




Inc 85-C
w 260

~~59=30=A~~

86-3



30

DE
STATIBUS CORPORUM
GENERICIS
DISSERTATIO
PHYSICO-THEOLOGICA
AUCTORE
NORMANNO BRITIA
P. 1774

DISSERTATIO
PHYSICO - THEOLOGICA.

DISSERTATIO
PHYSICO - THEOLOGICA.

DE
QUALITATIBUS CORPORUM
SENSIBILIBUS

DISSERTATIO
PHYSICO-THEOLOGICA

AUCTORE

P. F. FORTUNATO A BRIXIA

ORD. MIN. REF. PROVINCIAE BRIXIAE

secundis curis

Ab eodem recognita, plurimum aucta,
& vindicata.

*Veritati nemo praescribere potest, non spatium temporum,
non patrocinia personarum, non privilegium regionum.
Tertullianus de velandis Virginibus.*



BRIXIAE. MDCCIL.

Excudebat JOANNES-MARIA RIZZARDI.

SUPERIORUM APPROBATIONE.

DE
QUALITATIBUS CORPORUM
SENSIBILIBUS

DISSERTATIO
PHYSICO-MATHEMATICA

AUCTORE
P. E. FORTUNATO A BRIXIA

GRADUATI IN PHILOSOPHIA BRIXIAE


SECVNDVM

AD EORVM RECOGNITIONEM, PUBLI-
CVM

EDITIONEM

1777

Exemplum unum praesentibus praestitum, non habet
significandi vim, sed est tantummodo
testamentum de veritate editionis.



BRIXIAE, MDCCLXXVII

Excusavit JOHANNES MARIA LEXARDE

STATIONARIUM APPROPRIATUM

ILLUSTRISSIMO AC REVERENDISSIMO
PRÆSULI
JOANNI BOTTARIO
SANCTISS. DOMINI NOSTRI
BENEDICTI PP. XIV.
CAPELLANO A SECRETIS,
S. MARIE TRANSTYBERIM CANONICO,
VATICANÆ BIBLIOTHECÆ CUSTODI,
&c. &c. &c.

F. FORTUNATUS A BRIXIA
MIN. REF.



*Quod Tuo nomini opusculum
hoc, Illustrissime ac Re-
verendissime PRÆSUL,
inscribam, nolim mireris.
Placuit enim, aliqua ratione posteris
testatum relinquere, & quantum Tibi
de-*

debeam, & quanti Te faciam. Quin
autem sigillatim beneficia omnia perse-
quar, quæ summa benignitate hætenus
in me contulisti atque in dies confer-
re pergis, unum illud memorare suf-
ficiat, quod caput omnium fuit, po-
steriorumque seriem longissimam præve-
nit. Romam quinque abhinc annis
cum venissem, ea me, plane ignotum
hominem, humanitate excepisti, quam
vix, aut ne vix quidem sperare au-
sus essem, si longo Tibi fuisssem usu
conjunctus. Quid multa? Honorifi-
cum mihi facilemque aditum comiter
illuc aperuisti, quo Romam adventan-
tes

tes votis omnibus , nec immerito quidem , anhelant . An hoc autem ejusmodi sit , ut me Tibi æternum obstringere debuerit , aliorum judicium esto . Superesset interim , ut saltem paucis indicarem , quanto in pretio Te , Tuaque habeam omnia , PRÆSUL eruditissime . Quoniam vero nequeam id præstare , quin præclara Tua , quæ sane plurima sunt , in Rempublicam Literariam merita recenseam , obstat autem maxime modestia Tua , mihi quamvis invito silentium imperabo . Quamobrem vix orsus , finem scribendi faciam , etiam atque etiam rogans Superos , ut quemad-

ad-

admodum Te præcipua Summi Sapien-
tissimique *ANTISTITIS* familia-
ritate dignum præstas ; ita me Tuis
auspiciis non prorsus indignum esse con-
tingat. Vale.

Dabam Brixiae Prid. idus Julii

anno MDCCXXXIX.

AD LECTOREM.

Tertium Physicæ tomum vix edideram, cum ad manus meas pervenit *Philosophia Peripatetica adversus veteres, & recentiores præsertim Philosophos firmioribus propugnata rationibus Joannis Dunsii Scoti Subtilium Principis* (sic enim inscribitur) opera & studio P. Josephi Antonii Ferrari de Modoetia Ordinis Min. Conventualium, anno 1747. Venetiis impressa. Opus statim pervolvere cœpi, noscere cupiens, an Cl. Auctor staret promissis, & Opus ipsum tam splendido titulo responderet. Non diu tamen multumque mihi laborandum fuit, ut certior fierem, nihil in illo esse, de quo gloriari merito possent Scholastici, vel jure timere Philosophi recentiores. Unum tamen vel in ipso limine offendi, quod, ne quid acerbius dicam, me vehementer movit, aculeatus scilicet acerbiorque stylus, quo Auctor non infrequenter impetit Recentiorum famam, eorumque opiniones hæud raro insectatur. Novi equidem cum Cl. Joanne Clerico, morem obtinere in *Repubblica Literaria*, ut homines literati sibi invicem perfacile detrabant, & propter levem injuriam, aut quod interpretantur, injuriam esse, convitiis plaustra in *Adversarios* coniiciant (a). Simul tamen persuasum habeo cum doctissimo Ludovico Antonio Muratorio, *veritatem ab erroribus liberari, defendi, suaderi posse sine tanto felle, tantaque petulantia orationis*, ipsamque caritatem jubere, *placide nos vel in pertinaces hæreticos agere, ut non tantum illorum errori prosternendo studeamus, sed & saluti prospiciamus* (b). Hæc mecum ipse reputans, & sæpe animo revolvens, dolebam aliquando, ob jam absolutam, & ferme etiam impressam utramque Physicæ partem justum mihi deesse locum vindicandi, tum quos ille

reos

(a) Tom. III. *Artis Criticæ* epist. 3. (b) Lib. II. *de moderamine ingeniorum* pag. 90. edit. Amstelod. anno 1700. cap. 3.

reos plerumque facit dubiæ, aut etiam violatæ fidei, Viros præstantissimos; tum quas rejicit, damnat, proscribit philosophicas eorundem opiniones, *summo animi dolore* sese affici dicens, *cum catholicam juventutem hisce nutriri principiis animadvertit* (a). Verum si non omnino, ut optabam, ex parte saltem mihi favit fortuna. Monuit enim Typographus, animum sibi esse iterum imprimendi, quam novem abhinc annis, ejusdem typis, edideram Physico-Theologicam *de sensibilibus corporum qualitatibus* Dissertationem; sibi que propterea visum esse factu optimum, si manum iterum Operi admoverem, illudque secundis, ut ajunt, curis recognoscerem. Hanc igitur peropportunitatem iterum philosophicum pulverem occasionem nactus, in ordinem digessi, quæ circa *qualitates corporum sensibiles* in laudata Cl. P. Ferrari *Peripatetica Philosophia* tumultuario calamo notaveram. Nullam quoque diligentiam omisi, ut reliquos Auctores mihi compararem, qui hac in parte vel steterunt a Recentioribus, vel averlati eos hætenus sunt, aperteque oppugnarunt. En ergo, Lector benevole, quæ me impulerit causa, ut & hanc crambem recoquerem, & in illa recoquenda, præcipue contra Cl. P. Ferrari (cui tamen nihil propterea detractum velim) calammum stringerem. Curavi autem omni, quo fieri a me potuit studio ac diligentia, ne quid omitterem sive ex ratione & experientia, sive ex summorum Philosophorum, ac Theologorum auctoritate, quod usui maxime mihi sit visum ad demonstrandum I. *Scholasticam accidentium absolutorum doctrinam tanta donatam non esse certitudine & evidentia, quanta eam pollere, illius patroni putant.* II. *Mechanicum Recentiorum systema non omni prorsus ratione destitutum esse; ac proinde illos jure culpari non posse, quasi ob solum amorem novitatis a Scholasticorum opinione recesserint.*

III.

(a) T. II. P. I. *Physicæ* Disp. IV. q. 1. pag. 206.

III. *Catholicæ fidei dogmata de venerabili Eucharistiæ sacramento non adeo dependere ab accidentibus absolutis, ut acta de eo res sit, nisi illa admittantur.* IV. *Neque testimonio veterum Patrum, neque summorum Theologorum auctoritate, neque demum ex Conciliorum decretis, & Ecclesiæ doctrina satis evinci, absoluta Scholasticorum accidentia a Viro catholico, tuta fide, negari non posse.* Nonnemini fortasse videbor in iis, quæ ad Physicum spectant, prolixius versatus, quam opus erat, ut Recentiorum religio vindicaretur. Velim tamen is consideret, jam ferme consultum esse illorum famæ, si semel constiterit, rationem & experientiam ei, quam tuentur, opinioni suffragari. Ut enim optime habet Cl. Muratorius, *verum vero adversari nequit; atque uti cum veritatibus Theologicis Philosophicæ, ita cum Philosophicis Theologicæ revera pugnare non possunt. Quamobrem tam ex his ille, quam ex illis istæ lucem mutuo accipiunt, & certa incertis dant legem (a).* An autem res cesserit ex voto, viderint alii. *Difficile enim est, teste S. Augustino, ut de se quisque perfecte judicet (b), quod nempe, ut recte observat Lactantius, ita comparata sit hominum natura omnium, ut aliena melius videant, & dijudicent, quam sua (c).* Non deerunt forte, ut loquar cum Cl. Melchiore Cano, *etiam ex Viris plane doctis, qui me objurgent; erunt etiam, qui vituperent, quod quæstionem multis nominibus invidiosam consulto & cogitato discutiendam susciperem, ut rem alias gravissimam, nullius in Christiana religione esse momenti asseverem (d).* At vero id unum cum Lactantio ab æquo Lectore, *humanitatis jure postulo, ut non prius damnet, quam universa cognoverit. Nam si sacrilegis, & veneficis potestas defendendi sui datur, nec prædamnari quemquam, incognita causa, licet, non injuste petere videmur, ut si quis erit ille, qui inciderit in hæc*

* 2

(a) Lib. I. de moderamine ingeniorum cap. 24.

(b) Enarrat. in Psalmum 147. num. 12.

(c) Lib. III. Divin. Instit. cap. 4.

(d) Lib. VII. de locis Theologicis cap. 3. ad concl. 4.

si leget, perlegat, si audierit, sententiam differat in extremum (a). Summopere porro cavi, ne quid in scribendo mihi excideret, quod præstantissimis iis Viris, contra quos in hac concertatione adversarii partes gero, vel minus honorificum sit, vel molestum esse possit. *Vincat veritas*, dicebam cum Cl. Muratorio, *pondere argumentorum; non opprimat ira, mordacitate & furore dictorum* (b). Nam, ut Cl. Joannes Clericus egregie observat, *viçtoria quidem gaudet veritas, sed clemente, & in qua tetrum illud: væ victis, non audiatur; sed tranquilla, & in qua victi victoribus ita postmodum miscentur, ut eos secernere amplius non liceat; quia æqua sors est omnibus, & par gaudium ob defensam, vel reiectam veritatem* (c). Sicubi tamen peccatum a me fuerit, Lectorem meum precor obtestorque, id ne ex industria a me factum putet, sed inadvertenti potius animo illud totum, quidquid est, elapsum referat. Tandem ad rem quod attinet, per me cuique liceat, opinionem, quæ sibi magis placet, nedum amplecti, sed ad ravim usque defendere. Neque enim de me ita magnifice sentio, ut nunquam hallucinari, vel falli putem, Ixionemque pro Junone nunquam accipere. Satis mihi est, si in re, *de qua tantopere non solum indocti, sed etiam docti dissentiant* (d), non minus probabiles, quam quivis alius, rationes attulerim. *Æquum est enim meminisse, & me, qui edisseram, & vos, qui judicabitis, homines esse, ut si probabilia dicentur, nihil ulterius requiratis* (e). Si quid autem, erudite Lector, de istis rebus invenisti melius, sive invenire potueris, gratissimum habebimus, si nos feceris nosse. EGO ENIM MAGIS AMO DISCERE, QUAM DOCERE (f). Vale.

ELEN-

(a) Lib. V. *Divin. Instit.* cap. i.

(b) Lib. II. *de moderamine ingeniorum* cap. 3.

(c) Tom. III. *Artis Criticæ Dissert. ethicæ: an semper respondendum sit calumniis &c.* pag. 394. edit. laudatæ.

(d) Tullius lib. I. *de natura Deorum* cap. 2.

(e) Plato in *Timæo*.

(f) S. Augustinus lib. octo qq. ad *Dulcitium* q. 5. n. 4.

ELENCHUS

Propositionum, que in hac Dissertatione
demonstrantur.

PROPOSITIO I.

Corporis magnitudo non est accidens absolutum in sensu Scholastico.

pag. 41.

PROPOSITIO II.

Nulla corporis affectio est entitas extensa quoad se, & natura sua impenetrabilis.

pag. 50.

PROPOSITIO III.

Nullum accidens absolutum, si quod hujusmodi in corporibus admittatur, est natura sua sensibile.

pag. 59.

PROPOSITIO IV.

Compositum quodcunque naturale hoc ipso formaliter est sensibile, quod ex solidis corpusculis certa magnitudine, & figura affectis, certoque artificio simul intextis, motuque, aut quiete donatis intrinsecus coalescat.

pag. 60.

PROPOSITIO V.

Nulla qualitas, sive affectio corporum sensibilis est accidens absolutum in sensu Scholastico.

pag. 63.

PROPOSITIO VI.

Qualitates sensibiles corporis naturalis ex mechanicis affectionibus particularum materię, ex quibus illud compositum est, unice proveniunt.

pag. 94.

PROPOSITIO VII.

Realis pręsentia Christi Domini in venerabili Eucharistię sacramento non exigit, ut qualitates sensibiles panis, & vini sint accidentia absoluta in sensu Scholastico.

pag. 176.

PRO.

P R O P O S I T I O VIII.

Stare optime potest transubstantiatio, licet qualitates sensibiles panis, & vini non sint accidentia absoluta in sensu Scholastico. pag. 177.

P R O P O S I T I O IX.

Necessarium non est, qualitates sensibiles panis, & vini, adeoque etiam corporum reliquorum, sint accidentia absoluta, quæ, consecratione peracta, sine illarum rerum substantia remaneant, ut Corpus Christi Domini sub speciebus panis, ejusque sanguis sub speciebus vini vere & realiter sint in Eucharistia, nobisque sub illis tradantur. pag. 192.

P R O P O S I T I O X.

Absolutis Scholasticorum accidentibus opus necessario non est, ut Eucharistia tam extra, quam intra pixidem posita, in eaque latens, sit vere & proprie Sacramentum. pag. 230.

P R O P O S I T I O XI.

Neque testimonio veterum Patrum, qui decem prioribus Christi sæculis in Ecclesia floruerunt, neque Theologorum auctoritate potest evinci, panis, vinique sensibilitatem, sub qua Christus Dominus in Eucharistia existit, oriri ex illarum rerum accidentibus, quæ in hoc sacramento divinitus sine subiecto supersint. pag. 239.

P R O P O S I T I O XII.

Haëtenus definitum ab Ecclesia non est, neque nobis, tamquam certo indubitanterque credendum, ab illa expresse traditum, dari absoluta Scholasticorum accidentia, ex quibus, divinitus in Eucharistia remanentibus, ea oriatur panis, vinique sensibilitas, sub qua Christus Dominus vere, realiter, & substantialiter in hoc Sacramento existit. pag. 274.

A P P R O B A T I O N E S.

JUssu Reverendissimi Patris Raphaelis a Lugagnano totius Ordinis Min. Ministri Generalis opus accurate prelegimus, cui titulus: *Dissertatio Physico-Theologica de qualitatibus corporum sensibilibus*, secundis curis plurimum aucta, & vindicata, a R. P. Fortunato a Brixia compositum: cumque in eo non nisi sana doctrina, & Catholicae Fidei consona occurrerit, dignum illud censemus, ut praelo tradatur. In quorum fidem &c.

Dat. Brixiae in nostro Conv. Corporis Christi die 13. Februarii, anno 1749.

F. Dorotheus a Vir. Min. Ref. S. Theol. Lect.

F. Prosper a Brixia Lect. Theologus.

Fr. RAPHAEL A LUGAGNANO Lector Emeritus, Catholicae Majestatis in Regali Congressu Matritensi pro Immaculata Conceptione Theologus, ac Totius Ordinis Fratrum Minorum S. P. N.

FRANC. Minister Generalis, Commissarius, Visitator
Apostolicus, & in Domino Servus.

CUM a duobus Patribus Theologis revisum de Ordine nostro, & approbatum fuerit Opus, cujus titulus est: *Dissertatio Physico-Theologica &c.* compositum a Patre Fortunato a Brixia nostrae Reform. Provinciae Brixiae Lectore Theologo, praesentium tenore facultatem eidem tribuimus, quatenus servatis servandis illud Typis mandare possit, & valeat.

Dat. Romae ex nostro Aracaelitano Conventu die 11. Martii 1749.

F. Raphael a Lugagnano Minister Gener.

L. ✕ S.

*De mandato Rmi in Christo Patris
Fr. Casarius a Bononia Secret. Gener. Ordinis.*

Reg.

N O I R I F O R M A T O R I

DELLO STUDIO DI PADOVA.

AVendo veduto per la Fede di Revisione, ed Approvazione del P. F. Giacinto Maria Marini Inquisitor Generale del Sant'Ufficio di Brescia, nel Libro intitolato: *De qualitatibus Corporum sensibilibus Dissertatio Physico-Theologica*, non v'esser cosa alcuna contro la Santa Fede Cattolica, e parimente per Attestato del Segretario nostro, niente contro Principi, e buoni costumi, concedemo Licenza a Gian-Maria Rizzardi Stampatore di Brescia, che possa esser stampato, osservandogli ordini in materia di Stampe, e presentando le solite copie alle Pubbliche Librerie di Venezia, e di Padova.

Dat. li 30. Marzo 1749.

(
(BARBON MOROSINI Cav. Ref.
(MARCO FOSCARINI Cav. Proc. Ref.

Regist. in Libro a car. 2, al num. 18.

*Michiel Angelo Marino Segret.
ER-*

ERRATA CORRIGE

Pag. 3. lin. 10.	falsi eos	falli eos
pag. 16. l. 22.	quod sit	quod sic
pag. 44. l. 2.	<i>Si hoc demus</i>	<i>Si hoc demas</i>
pag. 47. l. 31.	fidem habenda	fides habenda
pag. 57. l. 1.	non satis distinxerint.	non satis distinxerit.
Ibidem l. 37.	<i>in ordine a se</i>	<i>in ordine ad se</i>
pag. 91. l. 1.	<i>vincantur</i>	<i>vincatur</i>
Ibid. §. 77. l. 19.	(§§. 63. 64.)	(§§. 72. 73.)
pag. 115. l. 29.	<i>calorem</i>	<i>colorem</i>
pag. 120. l. 34.	<i>calorem</i>	<i>colorem</i>
pag. 133. l. 28.	<i>adoratum</i>	<i>odoratum.</i>
pag. 136. l. 9.	memori	memorari
pag. 154. §. 99. l. 3.	(§. 77.)	(§. 76.)
pag. 176. l. 2.	Christum Dominus	Christum Dominum
pag. 180. l. 8.	Non ita neque.	Non ita de natura ac proinde neque &c.
pag. 182 l. 2.	dirimire	dirimere
pag. 213. §. 119. l. 29.	memento	momento
pag. 267. l. 22.	<i>ab cujus</i>	<i>ab ejus</i>
pag. 297. l. 30.	ex uno sensum	ex uno sensuum

Alia, si qua occurrerint, Lector ipse patienter corrigat.



DISSERTATIO PHYSICO - THEOLOGICA

De qualitatibus corporum sensibilibus.



Uas corpus quodcunque habere *qualitates*, quibus *formaliter*, ut Scholæ verbo utar, *sensibile* redditur, nescius nemo est; at quæ sit *physica* illarum natura, quod earum principium, quæ origo, etiam doctioribus aqua hæret. Nil minus certe, quam cum agitur de *qualitatibus* corporum, inter Philosophos convenit. Scholastici namque, sive Peripaterici, quos vocant *rigidiores*, raturum fixumque habent, eas esse *entitates* talis naturæ, quæ a corporea *substantia*, cui *insunt*, quamque nobis *sensibilem* reddunt, *separari divinitus possint*, & *sine illa existere*. Illas idcirco *accidentia absoluta* appellant, ut a *modalibus*, quæ sine *subjecto*, quod afficiunt, neque esse, neque concipi possunt, apte discernant. Contra vero Recentioribus, qui *mechanicam* a Pythagora, Democrito, Platone, aliisque vetustissimis Philosophis inventam, semperque exultam, philosophandi rationem sequuntur, persuasum est, nullam *sensibilem* corporum *qualitatem* esse *accidens absolutum*, prout illud sumunt Scholastici; sed ex *mechanicis* materiæ *affectionibus*, scilicet ex *magnitudine*, *figura*, *motu*, *quiete*, atque *textura* corpusculorum, quibus *sensibilia* quæque corpora componuntur, eas omnes immediate provenire. Quam porro grande bellum hanc ob causam inter eos exarserit, dici vix potest. Queruntur enim Scholastici, exa-

A

gerant,

gerant, prædicant, *mechanicam Recentiorum Philosophiam*, potissimum ubi de *corporum qualitatibus* agitur, tacitas Religioni insidias moliri, ansamque dare heterodoxis, ut Catholicæ fidei dogmata irrideant, contemnent, rejiciant. *Solliciti propterea*, inquit Vir eximius, *nullum non movent lapidem, quo Auctores novarum opinionum, licet nihil cum sancta Religione habentium, infament, eorumque libros dilacerent, proscribant, & supremis Ecclesiæ tribunalibus configendos exhibeant* (a). Nihil vero ex adverso Recentioribus frequentius est, nihil solemnius, quam Scholasticorum laborem atque operam, in eo unice esse positam, ut *multitudinis, & vulgi opiniones verborum involucris contegant, & his, quasi arcanis reconditisque principiis, scientiæ naturalis fundamenta inædificent, quæ, demta vocabulorum obscuritate, communia sunt, & vulgo trita* (b). Verum enimvero quantum graviora ea scommata, atque convicia, quibus eorum plerique sese mutuo impetunt, pungunt, atque dilacerant, Christianum Philosophum dedeçant, ipsique veritati, sive invenienda ea sit, sive aliis demonstranda, quantum officiant, neminem esse puto cordatum Virum, qui non videat. Velim, persuasum habeant, quicumque suis in disceptionibus Plautino sale plurimum delectantur, non dictariis, sed rationibus servatam esse palmam, seque scommatibus conviciisque defendi, veritatem indignari quammaxime. Velim quoque, animo sibi alte infigant, modeste semper circumspectoque judicio de magnis Viris pronunciandum esse, ne scilicet, ut sapienter monet Quintilianus (c), & ipso auctore, plerisque accidit, *damnent, quæ non intelligunt*. Dissimulare tamen nequeo cum Viro Cl. Alphonso de Castro, *me non posse cohibere iracundiam, quoties video aliquos ita addictos hominum aliquorum scriptis, ut impium autument, si vel in modica re quis ab eorum sententia discedat. Volunt enim hominum scripta, velut divorum oracula, recipi, illumque honorem illis exhiberi, qui solis sacris Literis debetur. Non enim juravimus in verba hominum, sed in verba Dei. Ego autem miserrimam hanc dicerem servitutem, sic esse humanæ sententiæ addictum, ut non liceat ullo modo illi repugnare..... Paulus quidem jussit captivare intellectum nostrum, sed in obsequium Christi, non in obsequium hominis* (d). Et revera, inquit Cl. Muratorius, *non animadvertunt interdum docti pariter, piique Viri, se unius Aristotelis causam agere, cum religionis causam tueri videntur. Peripatetica*
Phi-

(a) Ludovicus Antonius Muratorius Lib. I. de moderamine ingeniorum cap. 21.

(c) Lib. X. Instit. Oratoriarum cap. 1.

(b) Ludovicus a Ripa Dissert. meteorolog. pag. 49.

(d) Lib. 1. contra hæreses cap. 7.

Philosophia capti, atque dissenti, quidquid ab ista abhorret, continuo falsum dicunt. Tantum nempe amoris, ac venerationis huic uni Scriptori, aliisque antiquis Auctoribus præjudicata opinio comparavit, ut eorum adversarios, & contraria quæque non odisse eorum amasii nequeant usque adeo, ut quando nulla alia ratio succurrat nova inventa dejiciendi, facile, & crebro ad auctoritatem Principum, Academicarum, & Religionis confugiatur, quasi de regnis, de veritate, de fide actum sit, si nova hæc recipiantur in Scholis (a).

Non ego tamen is sum, qui recentiores Philosophos, quorum causam suscepisse jam videor, tanti faciam, ut nunquam desipere, & falsi eos putem. Habent enim & ipsi sua, in quæ censoria virga cadere non immerito potest. Nam, ut Quintiliani verbis utar, & labuntur aliquando, & oneri cedunt, & indulgent ingeniorum suorum voluptati, nec semper intendunt animum, & nonnunquam fatigantur. Summi sunt, homines tamen (b). Illud dumtaxat in præsens mihi videtur eis perperam vitio verti, atque ob id reos ipsos fieri violatæ fidei, quod nolint, eam esse physicam sensibilibus qualitatibus naturam, quam vetustiores Scholastici tradidere. Ea non est enim rigido Peripateticæ doctrinæ evidentia, non illud, quibus ipsa innititur, rationum pondus, ut opinatores inconsulti censendi jure ac merito sint, qui secus sentiunt.

Itaque, ut Viros de rerum naturalium scientia præclare meritos, quantum mihi fas est, a crimine vindicem, hæc mea in eo versabitur disceptatio, ut palam fiat, recentiores Philosophos in explicandis sensibilibus corporum qualitatibus neque sine sufficienti ratione ab Scholasticorum sententia recessisse; neque commentitiam excogitasse hypothesim; neque Catholicæ fidei dogmatibus, S.S. Patrum doctrinæ, Conciliorumque decretis manifeste adeo refragari, ut tamquam malam redolentes fidem, digni jure ac merito sint, qui habeantur. Neminem tamen velim sic amplecti omnia mea, ut me sequatur, nisi in iis, in quibus me non errasse perspexerit (c). Nos enim, qui sequimur probabilia, nec ultra id, quam quod verisimile occurrerit, progredi possumus, & refellere sine pertinacia, & refelli sine iracundia, parati sumus (d). Candidi quippe hominis proprium est, vel eminens conspecta veritate, quam etiam in hoste venerabitur, arma deponere (e): quod ii ferunt animo iniquo, qui certis quibusdam destinatisque sententiis quasi addicti, & consecrati sunt, eaque necessitate constricti, ut etiam

A 2

quæ

(a) Lib. I. de moderamine ingeniorum c. 21.

(b) Lib. X. Instit. Oratoriarum cap. 1.

(c) S. Augustinus lib. de dono perseveran-

tis num. 55., alias cap. 21.

(d) Tullius lib. II. qq. Tuscul. cap. 2.

(e) Auctor Artis cogitandi P. IV. c. 4.

qua non probare soleant, ea cogantur constantia causa defendere (a).
Itaque ut ad rem veniam,

DEFINITIO I.

1. *Natura sua impenetrabile voco illud, quod ita locum occupat, ut non finat, locum ipsum ab alio ejusdem generis simul occupari. Sic lignum, & lapis dicuntur natura sua impenetrabilia, quia ejusmodi ipsa sunt, ut, spectatis naturæ viribus, in eodem simul loco esse non possint.*

S C H O L I O N.

2. Cavendum est, ne *impenetrabile* cum *duro* confundatur. *Impenetrabilitas* enim, cujus notionem modo tradidimus, non *duris* tantum, verum etiam *fluidis* corporibus ex æquo convenit.

DEFINITIO II.

3. *Extensum entitative, sive quoad se, ut ajunt Schola, vocatur illud, quod ex pluribus partibus constat ita simul unitis, ut entitas unius extra alterius entitatem tota existat. Hujusmodi est e. c. lignum palmare. Componentes enim illius partes ita se habent, ut extra se invicem singulæ quoad suam entitatem existant.*

COROLLARIUM.

4. Hoc ipso, quod plura sint *impenetrabilia*, totum entitative extensum ex illorum unione consurgit. Hoc enim ipso fit totum, cujus singulæ partes extra se invicem quoad suam entitatem existunt.

DEFINITIO III.

5. *Extensum localiter, sive, ut vocant, quoad locum, dicitur illud, quod extensum spatium occupat. Sic corpus replens locum, sive spatium palmaris e. c. magnitudinis, localiter extensum nuncupatur.*

DEFINITIO IV.

6. Dicitur sensibile, quod, qua tale formaliter, ita potest sensoria nostra

(a) Tullius loco citato.

De qualitatibus corporum.

5

nostra afficere, ut sensum in nobis excitet. Sic lignum, quia durum est, vel coloratum, dicitur sensibile, quia, si sensorii nostris applicetur, ita ea afficit, quatenus tale, ut hinc anima sentiat.

COROLLARIUM.

7. Corpus per id formaliter est sensibile, per quod formaliter ejusmodi est, ut applicatum externis sensoriis, ita ipsa afficiat, ut hinc anima ad sentiendum determinetur.

DEFINITIO V.

8. Nomine sensibilis qualitatis ea corporis affectio intelligitur, per quam formaliter corpus est sensibile. Sic color, sapor, odor, aliæque id genus corporum affectiones dicuntur qualitates ipsorum corporum sensibiles, quatenus per illas formaliter habent corpora, ut externorum sensuum ministerio a nobis percipiantur. Qualitas est, inquit Gassendus, quidquid visui, tactui, ceterisque sensibus patet. Et quamvis oculus dicatur videre non tantum colorem, sed coloratum etiam corpus, uti & manus tangere non tantum duritiem, sed etiam rem duram; attamen hoc ipsum esse coloratum, esse durum, qualitas est. Quod autem substantiam, cui insit, simul nominamus, ob inductionem facimus, quia subesse aliquod subjectum qualitati ratiocinamur. Nam, si nulla quidem qualitas in Mundo, aut re aliqua, præter colorem unicum, foret, tunc non subesset, cur mens colorem a colorato distingueret; verum, quia percepto oculis colore, ubi illi manus admoveatur, resistantiam quoque, sive duritiem percipit, esse debere infert commune subjectum, cui color, & durities insit; ac illud proinde colore, & duritie præditum, seu, quod idem est, cum commune subjectum, substantiamve esse in confesso sit, ea tamen semper obvelata manet; neque aut intelligere, aut dicere, cujusmodi sit, possumus, nisi per ipsas, quibus afficitur, quæque sensibus patent, qualitates (a).

COROLLARIUM I.

9. Qualitas sensibilis in eo physice posita est, per quod formaliter habet corpus, ut eam in externo sensorio, cui applicatur, passionem excitet, quam in anima sensatio consequitur. Per id enim formaliter corpus est sensibile, per quod formaliter ad illam passionem in externo sensorio excitandam proxime aptum est (§. 7.).

Co.

(a) Sect. I. Physices Lib. VI. cap. I.

COROLLARIUM II.

10. *Existentia sensibilibus qualitatibus in corporibus certissima est.* Id enim in corporibus certissime existit; per quod externa sensoria ita ab ipsis corporibus, si illis applicata debite fuerint, afficiuntur, ut aliqua sensatio hinc in nobis excitetur.

S C H O L I O N.

11. Qui negant *accidentia absoluta* in sensu Scholastico, *qualitatum sensibilibus* existentiam non idcirco inficiantur. Et ipsi namque fatentur, id vere esse in corporibus, per quod habent *formaliter*, ut externorum sensuum organa pro sensationis negotio immutent, certoque modo afficiant. Negant tamen, ejus illud esse naturæ, ut sine corporea substantia, quam afficit, quamque nobis reddit sensibilem, existere divinitus possit.

DEFINITIO VI.

12. *Nervi sunt albicantes quidem veluti funiculi, qui ex intima cerebri substantia tamquam ex radice prodeuntes, per totam animalis machinam stupendo prorsus artificio disseminantur.* Ita Anatomici omnes.

ANIMADVERSIO.

13. *Nervorum substantia, docente Cl. Heistero (a), tota fibrosa est, ex quamplurimis nempe fibris, & quasi fasciculo filamentorum cylindricorum, albicantiumque composita.* Horum præterea filamenta non omnino solida sunt, sed, sicuti ille pluribus demonstrat (b), intus cava, ut proinde tamquam vera vascula haberi possint.

DEFINITIO VII.

14. *Spirituum animalium nomine intelligitur substantia quadam subtilissima, summe fluida, & maxime mobilis, ex arterioso sanguine in cerebro elaborata, qua, nervos omnes luminis instar irradiante, viventis sensitivi functiones peraguntur.* Dicimus, inquit Thomas Villis,

(a) Compend. Anatom. num. 301.

(b) Ibidem.

De qualitatibus corporum.

7

His, spiritus animales esse corpuscula subtilissima, summeque agilia, e sanguine accenso in cerebrum, & appendicem ejus instillata, quae partim ex sua natura, quatenus lucida sunt, & aerea, & partim ex concinnō organorum apparatu, quatenus intra ductus, quasi tubos, aliasque machinas concluduntur, virtute pollent tum objectiva, qua plusquam lucis radii in sensibilia omnium simulacra promptissime coeunt, sensationesque cujusque generis efficiunt; tum activa, qua supra venti, aut flatus cujuscunque machinis inclusi impetus, aut instinctus, potentia locomotiva, ut & affectionis spasmodica actus exequuntur (a).

SCHOLIUM.

15. Existentia spirituum animalium omnibus ferme probatur tum Medicis, tum Philosophis. Ab antiquissimis temporibus perpetua traditione creditum est, inquit Cl. Haller, motum, & sensum perfici per nervorum ministerium; nervos vero agere per *ενορμῶν*, per principium fluidissimum, quod per nervos feratur, & actionum animalium causa sit, & animae cum corpore quoddam quasi vinculum constituat (b). Neque rationes desunt, quibus, ut in Physica vidimus (Tom. IV. §. 4401), spirituum animalium existentia suadeatur.

DEFINITIO VIII.

16. Organum sensus externi dicitur ea nostri corporis pars, cujus passionem, ex sensibilis rei appulsu proveniente, sensatio in anima consequitur. Sic oculus dicitur organum visus, lingua organum gustus, & ita porro; quia mutatio facta in oculo a lumine, & in lingua a re sapida animam ad visionis, & gustus sensationes eliciendas determinat.

DEFINITIO IX.

17. Videtur sub propria specie, quod tale per sensus nobis apparet, quale natura sua aptum est, ut per illos a nobis percipiatur. Sic homo sub specie propria nobis apparet, dum talis, ministerio sensuum, a nobis percipitur, qualis aptus est natura sua, ut, illorum ministerio, a nobis cognoscatur.

DE-

(a) De anima Brutorum cap. 4.

(b) Not. I. in num. 234. Prælect. Boerhaavii in suas Instit. Medicas.

DEFINITIO X.

18. *Contra vero sub aliena specie nobis apparere dicitur, quod diversum ab eo, quod nobis per sensus naturaliter apparet, sese nobis conspiciendum exhibet. Sic sub aliena specie, puta sub specie vini, nobis apparerebit aqua, si sensibus nostris ita illa occurrat, ut eorum ministerio discerni a vino non possit.*

Hypothesis I.

19. *Persuasum mihi hoc loco est, substantiam corpoream ita esse naturam suam solidam, sive impenetrabilem, ut impenetrabilitas sit vel formalis ipsa ratio substantiæ corporeæ, vel ea ipsius proprietas, quæ illi uni conveniat.*

*Tangere enim, & tangi, nisi corpus, nulla potest res, ut olim cecinit Lucretius (a); sique ad notionem ipsam corporis, quam nobis quodammodo impressit natura, animum attendamus, fateri cogimur vel inviti, non aliud menti nostræ sua veluti sponte occurrere, cum corpus concipit, nisi rem, quæ tactui resistat. Certe & ipse Christus Dominus ex hoc uno, quod resisteret tactui, Discipulis suis ostendit, se etiam quoad corpus e sepulchro resurrexisse. *Palpare enim, inquit illis, & videte, quia spiritus carnem, & ossa non habet, sicut me videtis habere* (b): quod profecto argumentum non valeret, si res alia a corpore tactui resistere posset. Unde locum illum explicans S. Ambrosius, ait: *non per incorpoream naturam, sed per resurrectionis qualitatem impervia usu clausa* (Christus) *penetravit. Nam quod tangitur, corpus est; quod palpatur, corpus est* (c).*

Hypothesis II.

20. *Certum itidem puto, substantiam extensi corporis habere ex se partes integrales, in quas, cum illud dividitur, & ipsa dividatur. Neque enim, cum extensum corpus in partes secatur, nova aliqua substantia, vel substantiæ pars in illis entitative producitur.*

Hypo-

(a) Lib. I. de natura rerum v. 305.

(b) Lucæ XXIV. v. 39.

(c) Lib. X. in Lucam.

Hypothesis III.

21. Velim quoque pro comperto habeatur, corporis magnitudinem, sive quantitatem molis, ut vocant, nihil esse diversum a certa ipsius corporis entitativa extensione. Id sane ex hoc uno vel maxime patere arbitror, quod nonnisi penes entitativam illorum extensionem conferantur corpora inter se, ut ipsorum magnitudo, sive quantitas molis definiatur.

Hypothesis IV.

22. Velim præterea, persuasum sit omnibus, ex passione, quæ ex rei sensibilis impulsu in externo sensorio efficitur, nullam in nobis sensationem contingere, nisi passio ipsa cerebro communicetur. Hujus demonstrationem dedimus Tom. IV. *Physicæ* §. 4425.

Hypothesis V.

23. Ratum postremo fixumque mihi est, utpote manifesta experientia, omniumque Philosophorum consensione probatum, organum externi cujusque sensus positum esse in subtilissimis quibusdam nervorum fibris, dissimili artificio pro specifico sensuum discrimine simul intextis, eiquæ nostri corporis parti respective insertis, quæ dum ab re sensibili afficitur, sensatio in anima contingit. Id manifeste sequitur, ut vidimus in *Physica*, ex eo quod soli nervi cum cerebro, prout sensatio necessario postulat, immediate communicent. Positum est itaque

I.

24. Organum visus in ea oculi membrana, quæ opticorum nervorum expansio est, & vulgo retina nuncupatur. (Tom. IV. *Physicæ* §. 4493.)

I. I.

25. Organum auditus in iis nervorum filamentis, quæ, ex molliori septimi paris ramo sumta origine, per intimum cochleæ gyrum disseminantur. (*Ibidem* §. 4735.)

B

26. Q.

III.

26. Organum gustus in iis nerveis pyramidalibus, arcuatis, & globosis papillulis, quæ, trajecta reticulari linguæ membrana, ad extremam ejusdem tunicam, qua teguntur, appellant, perque totam ipsius linguæ superficiem, quamvis non ubique in æquali copia, sese diffundunt. (*Ibidem* §. 4739.)

IV.

27. Organum olfactus in illis itidem nerveis papillulis, quibus membrana, narium anfractus investiens, instructa est (*Ibid.* §. 4745.)

V.

28. Organum demum tactus in iis nerveis pyramidalibus papillulis, quæ, ut ait Cl. Malpighius, a quo primum observatæ fuere, e cute erumpentes, tandem in cuticulam desinunt, & singula in plures veluti fibrulas dividi videntur (a).

PRINCIPIUM I. FUNDAMENTALE.

Passio externi sensorii ex sensibilis rei appulsu proveniens, quam sensatio ipsius rei in anima consequitur, non est, physice loquendo, nisi certa quadam motio in iis nervorum fibris, quæ externum sensorium constituunt, ex rei ipsius appulsu excitata.

29. Probatur 1. ex natura partis, quæ dum a re externa afficitur, sensus in nobis excitatur. Cum enim illa pars componatur tota ex minutissimis nervorum fibris, diversa ratione pro specifico sensoriorum discrimine simul artificiose intextis (§. 23.), videtur profecto, non aliud pati ipsam posse ex rei sensibilis appulsu, nisi motum quemdam, quo componentes illius fibræ alternatim veluti contrahantur, & sese restituant. Ergo &c.

Probatur 2., simulque præcedens ratio confirmatur. Certum est, nullam sensationem fieri in nobis posse, dum externa sensoria a proprii

(a) *Epist. de externo tactus organo.*
Vide Tom. IV. *Physicæ* §. 4753.

priis objectis immutantur, nisi sensoriorum ipsorum passio *cerebro* communicetur (§. 22.). Hæc autem propagatio externæ passionis ad *cerebrum* facilis captu est, si passio ipsa non sit aliud, *physice* loquendo, nisi certa quædam fibrarum nervearum sensorium ipsum constituentium motio; contra vero est intellectu perquam difficilis, ne dicam impossibilis, si in alio, quam in illarum fibrarum motione, passio ipsa *physice* statuatur. Facilis est captu, si passio externi sensorii nihil sit a nervearum fibrarum motione diversum. Cum enim omnes nervi ex intima *cerebri* substantia, veluti ex radice, prodeant, adeoque cum illa immediate communicent (§. 12.), aperte patet, extremas nervorum partes, quæ externa sensoria constituunt, concuti, vellicari, aliove modo moveri non posse, quin ipsum quoque *cerebrum* resultu quodam commoveatur. Nempe, ut præclare habet Gassendus, *turgescerent spiritibus nervi concipi possunt, quasi radiorum spirituosorum manipuli, adeo ut cum quovis spirituosus radius intentus sit ex cerebro ad extremum usque sensorium, idcirco premi, urgerive in ipso externo sensorio tantillum non valeat, quin resultu quodam ipsum cerebrum, e quo usque tenditur, feriat* (a). Neque enim, quemadmodum egregie explicat idem Vir doctissimus, *nervus, nervulusve potest contingi (a re sensibili) quin aliquatenus prematur; neque potest ullatenus premi, quin ob disentionem spiritus contentus urgeatur; neque spiritus ille sic urgeri, quin pellat, seu potius repellat vicinum instantem, ac pari ratione advenientem ex cerebro; neque iste porro repelli, quin, tota serie ob repletionem, continuitatemque compulsus, spiritus existens ad ipsam originem nervi, nervulive in cerebrum quasi resiliat* (b); motumque propterea illi non dissimilem, qui in nerveis externi sensorii fibrillis ab re sensibili excitatus est, in ipso quoque *cerebro* efficiat. Quod si nervi, musicarum chordarum instar, ut plerisque placet, ten si concipiantur, non minus aperte relucet, nervos ipsos concuti, vellicari, impellive in extremis suis partibus ab sensibili objecto neutiquam posse, quin illa motio per totam eorum longitudinem propagetur, atque ad ipsorum usque originem, ad *cerebrum* scilicet, diffundatur, eique communicetur. Quo facilius autem id concipitur, & explicatur, si passio externi sensorii nihil sit aliud, quam motio quædam nervearum fibrillarum externum ipsum sensorium constituentium, eo difficilius intelligi, & exponi hoc phænomenon potest, si in alio, quam in illarum fibrillarum motione, passio ipsa statuatur. Adhuc certe desideratur ex Scholasticis unus, qui modo in-

B 2

tel-

(a) Sect. III. *Physices* Memb. II Lib. VIII. cap. 2.

(b) Ibidem Lib. VI. cap. 1.

telligibili id palam efficiat. Dicunt, ab re sensibili *speciem* sui imprimi externo sensorio, eamque *cerebro* communicari, per quam deinde sensitiva animæ potentia ad sentiendum determinetur. At quid physice sint illæ sensibilibus rerum *species*, si plane diversæ dicantur a motione in nerveis externi sensorii fibrillis ab sensibili objecto excitata, atque *cerebro* vel *immediate*, vel *spirituum animalium*, quibus illæ turgent, ministerio impressa, etiamnum in votis est, qui id ostendat. Neque enim ad physicam illarum *specierum* naturam explicandam sufficit dicere, ut videtur Scholasticis, eas esse *qualitates*, *objectum*, a quo *producuntur*, *representantes potentia*, cum qua *concurrunt ad sensationem eliciendam*. Neceffe siquidem est, explicetur primo, *quæ sit physica illarum qualitatum natura*. Secundo, *quomodo producantur ab objecto*, *cujus dicuntur species*. Tertio, *quomodo objectum ipsum representent*. Postremo, *qua ratione cum potentia sensitiva ad sensationem producendam concurrant*. Adde, scholasticam hanc *specierum* definitionem etiam motioni, quam dicimus in nerveis externorum sensoriorum fibris a rebus sensibilibus excitari, quadrare penitissime. Et illa namque motio est *affectio*, seu *qualitas representativa objecti*, a quo sensorio imprimitur, animam determinans, ut sensationem eliciat; unde apparet, scholasticam illam *specierum* definitionem nimis vagam esse, quam ut in ea conquirere ingenuus Philosophus possit.

Confirmatur assertio. Agens corporeum non agit, nisi per motum localem, videlicet non nisi quatenus localiter movet id, in quod agit. Nulla certe corporea actio est, quæ partium motu, ut patebit consideranti, non absolvatur. Ergo nullum quoque corpus patitur aliquid ab agente corporeo, nisi quatenus ab illo movetur. Patiuntur autem sensoria a rebus sensibilibus, dum illa ab hisce pro sensationis negotio immutantur. Ergo in sola motione fibrarum nervearum, ex quibus ipsa sensoria composita sunt, illorum passio consistit.

Objecta diluuntur.

30. *Opponit primo* P. Josephus Antonius Ferrari (a), in sola motione fibrarum nervearum, externa sensoria constituentium, statui non posse impressionem, quam a propriis objectis sensoria ipsa recipiunt, quin dicamus, *organum illud, cujus est omnes impressiones discernere, nempe cerebrum, præditum esse tactu exquisitissimo*. Atque

(a) Tom. III. P. III. *Physicæ Disp.* II. q. 2. pag. 325.

tantum abest, inquit ille, ut cerebrum gaudeat exquisito tactu, quin potius obtusissimum sit, ac pene stupidum. Igitur impressiones sensibilium non sunt mere locales motiones.

Confirmat argumentum. Si enim, ait, omne sensibile est tactile, si omnis sensus est tactus, si sentire non est, nisi discernere motiones, & tactiones exteriorum corporum, idque fit, similes in se motiones recipiendo; ille solus sensus esse poterit perfectissime perceptivus omnium tactilium, qui est perfectissime tactivus. Ergo sensus communis debuisse statui exquisitissime tactivus.

R. primo, hoc argumentum, si quid habet roboris, ab omnibus Scholasticis, ac proinde etiam ab suo Auctore, solvi debere. Quocunque enim modo explicetur passio, quæ fit in externis sensoriis a proprio objecto, dum a nobis sentitur, illud certum est, comperitumque, organum sensus, quem communem Scholastici ipsi appellant, in solo cerebro residere. Si ergo cerebrum præditum esse debet, ut ait Cl. Adversarius, tactu exquisitissimo, ut quamlibet possit motionem excipere, suamque singulis objectis, a quibus provenit, tribuere, pollere quoque illud debet sensu exquisitissimo, ut passiones omnium sensuum, quæcumque demum sit illarum natura, ab eo recipi, discerni, & conferri inter se mutuo possint. Id enim, ipsorummet etiam Scholasticorum iudicio, munus est sensus communis. Falsum est autem, cerebrum donari sensu exquisitissimo. Ipso siquidem Cl. Adversario teste, obtusissimum illud est, ac pene stupidum. Ergo neque exquisitissimo tactu pollere ipsum debet, ut omnium sensuum motiones possit excipere. Vel si ad id muneris necessario opus sit, ut cerebrum sit tactus exquisitissimi, ostendant Scholastici, cur non sit necesse, donetur cerebrum sensu exquisitissimo, ut particulares omnes sensationes recipere ipsum possit.

R. 2. *distinguo majorem*: impressio, quæ fit in externis sensoriis ex rei sensibilis appulsu, nequit statui in motione fibrarum nervearum sensoria ipsa constituentium, nisi cerebrum polleat tactu exquisitissimo, hoc est, nisi medullaris illius substantia ejus sit naturæ, ut valeat externorum omnium sensuum motiones recipere, concedo majorem; nisi tota ejus substantia capax sit sensus, si vel levissime a re externa tangatur, nego majorem; & eodem modo *distinguo minorem*: cerebrum caret tactu, hoc est, intima illius substantia nequit omnium sensuum impressiones recipere, nego minorem; hoc est, nullus fit sensus, si pars illius extima tangatur, concedo minorem, & nego consequentiam. Itaque, ut argumentum concludat, evincere debet illius Auctor, medullarem cerebri substantiam, ex qua sensorii nervi

proveniunt, recipere non posse motiones, quæ in externorum sensuum organis ab sensibilibus rebus excitantur, nisi cinerea ipsius *cerebri* substantia tangi ne levissime quidem possit, quin anima pressionem ipsam sentiat. Id enim nisi ab illo demonstretur, in ævum stabit, passionem externi sensorii, quam sensatio in anima consequitur, positam esse in certa quadam motione fibrillarum nervearum sensorium ipsum constituentium; & ideo omnia externa sensoria per contactum vel *mediatum*, vel *immediatum* a proprio objecto, ut ajunt Recentiores, immutari, quin propterea necesse sit, tactu exquisitissimo *cerebrum* polleat. Nunquam autem fore, ut id ille demonstrer, certum ex eo vel maxime puto, quod motiones factæ ab re sensibili in cinereo *cerebri* cortice nequeant medullari ipsius *cerebri* substantiæ communicari. Cum enim, ut sentiatur corporis passio, necesse sit, illi *cerebri* parti ipsa communicetur, ex qua nervi sensorii, veluti ex radice, oriuntur (§. 22.), manifeste sequitur, passionem in cinereo *cerebri* cortice excitatam sentiri non posse, adeoque illam *cerebri* partem sensus non esse capacem, si pars ipsa hujusmodi sit, ut ejus passio ad originem usque nervorum, scilicet usque ad medullarem *cerebri* substantiam, nequeat propagari. Passionem porro in cinerea parte *cerebri* excitatam, medullari ejusdem parti, ut sentiatur, communicari non posse, ex hoc uno manifeste apparet, quod nulli sint nervi, qui ex *cerebri* medulla provenientes, per cinereum ejusdem corticem, ut illi sensum tribuant, dispergantur.

Ceterum peccat argumentum eo fallaciæ genere, quod Logici *dictionis* appellant. Est nempe error in voce *tactus*. Is enim duplici modo sumi potest, *primo* scilicet pro sensu, qui ex contactu nervi sensorii a re sensibili in nobis excitatur. *Secundo* pro sensu, quo *calida*, & *frigida*, *humida*, & *secca*, *dura*, & *molli*, & id genus alia a nobis percipiuntur. *Primo* modo sumto *tactu*, omnis sensus dici *tactus* potest; quia omnis sensus contactu perficitur. *Visus*, inquit Cl. Boerhaavius, est *nervi optici in pulposam retinam dilatati adtractus per focum radiorum lucis*. *Olfactus* fit, ad tacta *nervi olfactorii superficie in naribus expansa*. *Gustus* est *species tactus, quam in papillis linguae, ramisque non parvis contingit fieri*. *Tactus* est *motus excitatus in pulpa papillarum subcutanearum a corpore, quod epidermidis adfricatur*. *Auditus* denique fit, quando *unda sonora aeris per tremores fenestrae ovalis harmonice contremiscentis impelluntur in superficiem nervi acustici* (a). Sumtus vero *tactus* secundo modo, peculiaris sensus est, id tantum commune habens cum sensibus reliquis, ut, quemadmodum

il-

(a) Tom. IV. Prælect. in suas Instit. Medicas ad n. 566.

illi, ita etiam ipse in nobis non excitetur, nisi nervi, qui ei peragendo inserviunt, a proprio objecto contingantur. Hac igitur *tactus* distinctione posita, non est, cur P. Ferrari vitio vertat Recentioribus, quod omnes sensus externos ad unum *tactum* revocent, quasi nempe ipsi tunc sumant *tactum* pro eo speciali sensu, quo *calor*, *frigus*, ceteræque id genus *qualitates* a nobis percipiuntur. Id quippe tam longe ab illorum mente est, ut nihil magis.

Ex hisce patet responsio ad *confirmationem*. Patet nempe, concedendum quidem esse Cl. Adversario, *omne sensibile*, Recentiorum sententia, *esse tactile*, & *omnem sensum esse tactum*, si *tactile* pro eo sumatur, quod sentiri non potest, nisi sensorium tangat, premat, & moveat; & sensus *tactus* pro eo sensu, qui ex contactu sensorii a re sensibili in nobis excitatur; at dicendum contra, si sumatur *tactile* pro eo, quod speciali sensu *tactus* percipitur, & sensus *tactus* pro eo, qui inter quinque sensus exteriores vulgo jam notos postremum locum occupat. Falsissimum est enim, necessario tunc futurum, Recentiorum opinione admissa, *omne sensibile esse tactile* hoc sensu, & *omnem sensum esse tactum* hoc modo sumtum; quemadmodum ex adverso verissimum est, nihil posse a nobis sentiri, nisi sensorium contingat, & *omnem sensum externum oriri ex tactu*, ipsoque absolvi. Ad id vero, quod Vir Cl. ex hisce colligit, videlicet *sensum communem debere statui exquisite tactivum*, si *omne sensibile sit tactile*, si *omnis sensus sit tactus*, sique sentire non sit, nisi discernere motiones, & tactiones corporum, patet quoque, dicendum, *sensum communem*, sive melius, *organum sensus communis* nempe *cerebrum* debere esse *exquisite tactivum*, hoc est, maxime aptum ad recipiendas omnes motiones, quæ in externis sensoriis ex ipsorum contactu a rebus sensibilibus excitantur; at minime ipsum debere esse *exquisite tactivum*, hoc est, exquisitissimo *tactus* sensu ipsum polle-
re. Hoc enim postremum ex præmissis, ut satis ex dictis patet, nullatenus sequitur; bene vero primum; cumque nihil prorsus ex hoc sequatur, quod rationi, vel experientiæ contrarium sit, hoc admittitur a Recentioribus, illud negatur.

III I.

31. *Opponit.* 2. frustraneam esse specificam organorum sensationi inservientium diversitatem, si *sensus non sit, nisi tactus*. Neque enim, inquit, parandum fuisset organum, quam quod tactui, ut est nomen specialis sensus a ceteris distincti, ac per totum corpus diffusi, reipsa
para-

paratum est. Quandoquidem hoc unum satis esset omnino ad omnes motuum differentias dignoscendas, & perficiendam omnem externam sensationem; nam percussio, titillatio, corrosio, constrictio, laxatio, undulatio, ceteraque hujusmodi nomina sunt a vulgaris tactus perceptionibus desumpta, & manu etiam omnia dignosci possunt. Atqui Deus nihil egit frustra, & omnia prorsus in numero, pondere, & mensura disposuit. Igitur &c.

Confirmat primo hanc rationem, quia quaecunque contingit in sensibilibus impressionibus diversitas, ea per nervos, fibras, aut spiritus cerebro communicatur. Atqui in omni corporis parte praesto sunt, & quidem ejusdem rationis, nervi, fibrae, & spiritus animales; in iis enim fas non est essentialem effingere diversitatem; nervi siquidem tibiarum prorsus apparent ejusdem rationis cum nervis brachiorum, idemque videtur in aliis. Ergo in omni corporis parte extant organa, quae nata sunt excipere omnium sensibilibus impressionem, sive motionem. Igitur in solo vulgari tactu sensitiva vis absolvetur, & hoc uno lucem, saporem, odorem, si superis placet, percipiemus; adeoque superflua omnino essent tot organa humani corporis.

Confirmat 2. rationem eandem. Si vera enim est, inquit, exposita Recentiorum sententia, quinarium sensuum numerus, communi gentium omnium consensione firmatus prorsus concidit. Etenim sub tactu innumera deberent admitti sensuum species: quod sit probat. Innumerabilis pene est varietas motus aliter, atque aliter modificati. Ergo quemadmodum quinque admittuntur sensuum species propter variam motus modificationem, ita propter innumerabilem pene motuum variam modificationem, innumerabiles etiam sensuum species forent sub tactu asseveranda. Profecto enim, si sensus non est nisi tactus motum unum percipere natus, & sensibile non est nisi corpus motu uno natum percipi, ut exinde quinque asserantur sensus, quinque dumtaxat sensibilia ostendenda forent, hoc est corpora, quae valeant dumtaxat efficere quinque modificationes motuum. Cum ergo haec innumera pene sint pro varia corporum figura, mobilitate, & affectione, innumeri quoque statuendi sunt sensus: quod absurdum est. Haec ille.

R. ad argumentum principale, & primo quidem dico, illud urgeri ex æquo posse non tantum contra Aristotelem, verum & contra suum Auctorem. Urgeri potest contra Aristotelem. Is enim non uno, sed pluribus in locis tradit apertissime, gustum esse speciem tactus. Ait quippe lib. II. de anima, sapor unum quid est eorum, quae tactu percipiuntur (a); lib. III. iterum de anima, necesse est, ipsum gu-

stum

sum tactum quemdam esse, quia rei tangibilis, ac nutritiva est sensus (a); lib. de sensu, & sensibili, degustandi facultas quedam tactus species est (c); & lib. II. de partibus animalium, gustus, inquit, tactus quidam est (b). Ita ergo conficitur argumentum: specifica organorum diversitas dicitur frustranea, si sensus non sit nisi tactus. Gustus autem ex Aristotele tactus est, ut jam vidimus. Ergo frustra organum gustus ab tactus organo distinguitur; & ideo argumentum, sumtum ex hoc capite, etiam ab Aristotele solvendum est. At solvendum est etiam ab suo Cl. Auctore. Soni quippe naturam explicans Vir Cl. (d) in eam sententiam maxime & ipse propendit, quæ illum formaliter statuit in tremulo aeris motu, omni prorsus rejecta absoluta qualitate ab illo motu distincta; & ideo quæ ponit, motum illum, adeoque sonum, ab auditu percipi, quando etiam ex magna distantia propter impetum, & reciprocationem primi aeris commoti, usque ad aures propagatur, similemque tremorem interno aeri auris communicat, concutitque membranam cochleæ. Jure ergo negare non potest Cl. P. Ferrari, probabile plurimum esse, auditionem oriri ex tremore, fibris nervorum cochleam investientium ab externo tremente aere communicato; ac proinde passionem sensorii, quam auditio consequitur, in certo dumtaxat nervearum fibrarum motu tremoreque consistere; & ideo sensum hunc tactu absolvi; atque hinc ab ipsomet quoque Viro Cl. explicandum fore, quamobrem frustraneum minime sit discrimen organi auditus ab organo vulgaris tactus, tamen si passio utriusque organi in sola fibrarum nervearum motione physice consistat, & sensus uterque ex contactu sensorii a proprio objecto perficiatur. Non sum nescius, negari ab eodem Viro doctissimo (e), auditionem fieri ex contactu, propterea quia, inquit, si auditio esset tactus, utique esset tactus perceptivus tremoris: quod tamen est falsum; cum tota caro tremere quandoque tactu percipiat, neque tamen audiat. Verum satis comprehendere animo non possum, cur ille deinde dicat (f), licere cuique pro arbitrio, sonum statuere formaliter vel in solo motu tremulo, & reciproco aeris, vel in qualitate absoluta aeri superaddita. Cum enim statui nequeat sonus in solo aeris tremore, nisi in solo itidem motu fibrarum nervi acustici statuatur passio, quam soni auditio consequitur; atque hinc nisi ex solo contactu illarum fibrarum ab tremente aere auditio soni fieri dicatur, ipsi certe Viro Cl. neganti, passionem organi auditus positam esse in solo motu fibrarum nervi

(a) Cap. XII. tex. 64.

(b) Cap. II.

(c) Cap. XVII.

(d) T. III. P. III. Physicæ Disp. III. q. 4. p. 384.

(e) Ibidem pag. 378.

(f) Ibidem pag. 384.

acustici, illamque ex contactu oriri, non licet, in solo tremulo aeris motu sonum *formaliter* collocare. Itaque vel frustranea non est organorum sensationibus inservientium essentialis diversitas, tametsi eorum omnium passio in solo motu componentium fibrarum posita sit, & contactu perficiatur; vel etiam diversitatem specificam organorum, quibus sensationes *gustus*, *auditus*, & *tactus* absolvuntur, necesse est, haud dissimili profecto ratione, frustraneam dicamus.

R. 2. frustraneam non esse specificam externorum sensoriorum diversitatem, quamvis illorum omnium immutatio ex contactu oriatur. Cum enim & maxime inter se differant sensibilia ea corpora, a quibus externa sensoria immutantur, & plane dissimilis sit modus, quo sensoria ipsa ab illis afficiuntur, factum non est frustra, sed summo Divini Opificis consilio, maximaque necessitate naturæ, ut notabiliter quoque diversa sit externorum ipsorum sensoriorum structura. Corpora exteriora, inquit Cl. Villis, quia particulis varii generis, iisque diversimode configuratis constant, ideo cum alia aliis applicantur, eorum adinvicem appulsus, non semper uno, eodemque modo, verum multiplici ritu, ac cum insigni varietate fiunt, scilicet aut per contactus corporeos, aut per effluvia ab iis decidua, aut per aeris, auræque, sive lucis particulas ab illis reflexas, & velut tela quaquaverfus jaculata. Porro & cuilibet horum generum plures species accensentur; diversa quippe non tantum concreta, sed etiam ejusdem subjecti varia corpuscula multiplices edunt, imprimuntque contactuum suorum typos, quorum singuli ut ab animalibus distincte excipiantur, adeoque dignoscantur, anima sensitiva organis corporeis utens, plura sensoria tanta objectorum varietati, & diversis rerum occurribus accommodata habet, in quibus singulis tum pororum conformatio, tum spirituum animalium dispositio ad corpuscula ab objecto immissa, quæ tantum unius generis sunt, apte suscipienda proportionantur. Hac ratione sensibilibus impressiones, saltem quæ animali cuilibet ex usu esse possunt, percipiuntur, & ab hac multiplici sensationis via omnis rerum notitia procedit, juxta illud Philosophi: omnis scientia fit a sensu; cum e contra, si corpora, eorumque particule nuda animæ systasim, aut partem ejus semper uno eodemque modo ferirent, nihil prorsus sciretur; quia aliud ab alio, aut partes, aut membra hæc ab illis minime distinguerentur. Quapropter ut præcipua quævis objecta, eorumque accidentia distincte notentur, ita comparatum est, ut particule quædam hoc organum feriant, & non illud, adeoque singula sua tantum respectiva sensoria, ceteris intactis, afficiant (a). Itaque, licet omnis externa sensatio oriatur ex contactu, & ex inde

orta

(a) De anima Brutorum cap. 10.

orta motione in nerveis externorum sensoriorum fibris a rebus sensibilibus excitata, negamus tamen Cl. Adversario, non aliud *pyrandum fuisse organum, quam quod tactui, ut est nomen specialis sensus a ceteris distincti, ac per totum corpus diffusi, reipsa paratum est*; pro comperto habentes, tantam esse, ratione magnitudinis, figura, atque textura, diversitatem particularum, ex quibus res sensibiles componuntur, tamque dissimili modo particulas ipsas nobis occurrere, ut ad omnes illarum impressiones suscipiendas, & cerebro communicandas, unum *tactus organum, sumto tactu pro speciali sensu, nequaquam sufficiat.*

Ad *primam* autem argumenti *confirmationem* respondeo, concedendo, omnes impressiones, quæ ex rerum externarum appulsu in nobis fiunt, per *nervos, fibras* (supple *nerveas*) & *spiritus* cerebro communicari; sed negando, in omni corporis parte præsto esse *nervos, & fibras* ejusdem rationis, adeo nimirum ut inter partes ex nervorum fibris compositas nullum plane sit essentielle discrimen. Illud enim si ita intelligat Cl. Adversarius, parcat, si Anatomicus aliquis dixerit, ipsum tunc aperte falli, Autopsia nimirum demonstrante, eas humani corporis partes, quæ sensationibus peragendis inserviunt, maxime differre inter se, quamvis ex nervorum filamentis singulæ componantur. Do equidem Viro Cl., primitivas nervorum fibras esse ubique ejusdem rationis; at nego, eas in omnibus corporis partibus eodem artificio simul esse intextas. Hoc enim artificio, ipsa teste experientia, plane dissimile est pro specifico ipsarum partium discrimine. Negamus itaque, quod ille inde colligit, *in omni scilicet corporis parte extare organa, quæ nata sunt excipere omnium sensibilibus impressionem, sive motionem; & ideo in solo vulgari tactu sensitivam vim absolvi, & hoc uno lucem, saporem, odorem, si superis placet, ut ille ait, percipi; atque hinc tot organa humani corporis esse superflua.* Nam licet in omni parte corporis habeantur nervi, ii tamen non in partibus singulis apti sunt ad omnium externarum rerum impressiones recipiendas, quod scilicet in illis omnibus eodem modo, eodemque artificio minime sint conformati. Hinc etenim fit, quemadmodum ex Epicuro observat Gassendus, *ut corpuscula solum, ex quibus species colorum constant, penetrare possint in sensorium visus, ipsumque adeo commovere, & afficere; non item vero corpuscula, quæ sola, ac solummodo subire possunt, ac movere, & afficere sensorium auditus; neque rursus alia, quæ sola, ac solummodo sensorium olfactus; atque ita de ceteris* (a). Quod, eodem Gassendo referente (b),

C 2

do-

(a) Sect. III. *Physices* Memb. II. lib. VI. cap. 2.

(b) Ibidem.

docuit etiam Empedocles, cum ait, *juxta concinnitates meatulorum sensus distingui, sensibili proprio unicuique sensui congruente*. At vero, quoniam Cl. Adversarius, utpote uni addictus Aristoteli, ne flocci fortasse faciet memorata Epicuri, atque Empedoclis testimonia, Alexandrum Aphrodisæum audiat, Virum scilicet, cui non ultimus profecto inter Peripateticos locus debetur. Is ergo quærens, *quam ob causam, cum nervi iidem a cerebro, & dorsi medulla in partes membrorum omnium transmittantur, non eadem actio, sed varia soleat provenire?*

Quoniam, inquit, non modo ratione essentia, verum etiam structura variat actio. Alia enim strues, & effigies nervi conspectus est, alia auditorii, alia gustatorii, alia ejus, qui in ore ventris positus est (a). Itaque etsi omnia externa sensoria ex nervorum fibris componantur, verumtamen quia illorum structura plane diversa est, fit ut nonnisi a rebus dissimilibus immutari pro sensationis negotio ipsa possint, videlicet ut a lucis radiis eæ tantum nervorum fibræ valeant commoveri, quæ reticularem oculi membranam constituunt; ab undis sonoris, sive a tremulo aeris motu illæ dumtaxat, quæ per cochleæ antrum disseminatæ sunt; a particulis saporis corporis eæ solum, quæ in papillulas desinentes, sub externa linguæ tunica latent; ab odori corporis effluvio illæ tantummodo, quæ per membranam interiores narium anfractus investientem disperguntur; ac demum a tactilibus corporum particulis eæ dumtaxat, quæ itidem conformatæ in papillulas, sub cuticula delitescent. Hinc non immerito (absit verbo invidia) illud risu excipiendum censet Cl. Constantinus Grimaldi, quod sententiæ Recentiorum statuentium, passionem externi cujuslibet sensorii in sola motione fibrarum nervearum, quibus illud constat, opponit Cl. Petitus, & post ipsum P. de Benedictis sub nomine Benedicti Aletini, quamobrem scilicet, cum in pede, ut in membris reliquis, sint nervi, & fibræ, non propterea sensibilia quæque unius pedis ministerio, a nobis discernantur. *A questa dimanda ridicolossima è agevole, inquit ille, il risponder con altra dimanda: cioè, se con la man noi facciamo tante, e sì ammirabili operazioni, quali sono lo scrivere, il ricamare, lo scolpire, e tante e tante sì nobili, e sì fine opere, che recan meraviglia; e ciò, per aver essa dita, e muscoli, che si muovano a nostro talento: per qual ragione l'istesse operazioni non facciamo co' piedi, in cui certa è trovarsi le dita, e i muscoli? Or chi non ismacellerebbe dalle risa, si fatta dimanda udendo? E pure è vera, che altrettale è quella del Petito; poichè se bene in tutti gli organi de' nostri sensi ritrovansi i nervi, e con essi le fibre, non pertanto v'intervien tra essi una differenza*

(a) Lib. II. *Problematum* num. 73.

renza assai maggiore, che non è tra le mani, e i piedi; perocchè alcuno d'essi averà le fibrille coverte da tuniche più dure, che l'altro; onde un movimento leggero, che in questo opererà, in quello non sarà valevole a far nulla; di più altro di essi costerà di fibre più grosse; l'altro di più sottili; altro ne avrà maggior copia, altro minore; altro avrà le fibre più distese, altro meno; altro l'avrà tessute in una guisa, ed altro in diversa maniera: dalle quali differenze può certamente avvenire, che uno di essi atto sia a ricevere un' impression degli esterni oggetti, che l'altro ricever non possa (a).

Ceterum, quoniam ipse etiam Cl. Adversarius statuit cum Recentioribus sensorium *tactus* in *papillulis nerveis*, quæ latent sub cuticula (b); sensorium *gustus* in *nerveis* itidem *papillulis* sub extrema lingue tunica delitescens (c); sensorium *olfactus* in *fibrillis nerveis* per tenuem membranam, interiores narium anfractus investientem, disseminatis (d); sensorium *auditus* præcipue in *zona nervea*, quæ *cochleæ* antrum investit (e); ac demum sensorium *visus* in oculi *retina* (f); necesse est, hoc solum argumentum, si quid concludit, ab ipso quoque solvatur. Sic enim arguo: cum omnia ejusmodi sensoria ex nervorum fibris componantur; neque fas sit in illis fibris *essentialem*, ut ipse ait, *effingere diversitatem*, stat, illa, ejus quoque judicio, non differre inter se, nisi quatenus diverso artificio, pro specifico ipsorum sensoriorum discrimine, simul intextæ sint fibræ, ex quibus componuntur. Hæc igitur dissimilis, pro sensoriorum discrimine, textura fibrarum vel est sufficiens ratio, quamobrem non in omni corporis parte extent organa apta ad rerum omnium impressiones recipiendas, vel non. Si illa sit ratio sufficiens, jam corrui argumentum. Hoc enim ipso apertum manet, non placere diis, ut uno *tactus* sensu sensibilia quæque a nobis percipiantur. Sin autem dissimile illud artificio non sufficit, ostendat, quæso, Cl. Adversarius, quomodo impedire illud possit, ne Scholasticæ sensibilibus omnium rerum sive *species*, sive *qualitates* omnibus sensoriis ex æquo imprimantur; & ideo eodem jure, ne omnia sensibilia uno sensu *tactus* homo attingat. Neque enim video, cur, si, ut ille docet, in omni corporis parte præsto sint, & quidem ejusdem rationis, *nervi*, *fibræ*, & *spiritus animales*, non in omni corporis parte habeatur organum, quo *sensibilis* quævis *qualitas* a nobis sentiat; cum, ejus quoque sententia, ut

(a) Discussioni Istoricæ, Teologicæ, & Filosoficæ P. III. risposta alla terza lettera Apologetica n. 544.

(b) Tom. III. P. III. Physicæ Disp. 3. q. 1. pag. 339.

(c) Ibidem q. 2. pag. 336.

(d) Ibidem q. 3. pag. 370.

(e) Ibidem q. 4. pag. 376.

(f) Ibidem q. 5. pag. 388.

visum est, organum externi cujuslibet sensus in solis nervorum fibris consistat. Animo siquidem complecti non possum, quidnam prohibeat, quominus decantatae adeo a Scholasticis sensibilibus rerum species non omni parti corporis, pro sensationis negotio, imprimantur.

Ad secundam confirmationem respondeo, negando assumptum, corrumpere scilicet *quinarium sensuum numerum, communi gentium omnium consensione firmatum*, si passio externi sensorii, quam sensatio consequitur, in sola fibrarum nervearum, ex quibus illud constat, motione statuatur. Ad probationem autem dico, falsum esse, *sub tactu innumeras debere admitti sensuum species*. Quamvis enim *innumerabilis pene sit varietas motus, aliter, atque aliter modificati*, non propterea, ut hinc ille colligit, *innumerabiles sensuum species sunt idcirco sub tactu asseveranda*. Falsum quippe est, quod perinde ac certum ab eo assumitur, *quinque nimirum admitti ab Recentioribus sensuum species propter variam motus modificationem; & sensum, illorum iudicio, non esse, nisi tactum, motum unum percipere natum*, adeo ut quot *diffimiles motus* excitari ex rerum sensibilibus appulsu in nobis possunt, tot illi *sensuum species* in nobis distinguant. *Quinarium enim externorum sensuum numerum non ex motionum diversitate, sed ex hoc uno potissimum Recentiores derivant, quod quinque in nobis sint dissimilia organa, quibus res sensibiles a nobis percipiuntur. Olfactus, visus, & auditus, inquit Cl. Gassendus, cum non sine contactu quodam functiones suas obeant, videntur posse quasi species tactus perfectiores haberi; ac in ea tamen a tactu communi distincta, quod ad communem quidem sufficiat communis crassaque in externo sensorio, partem contacta dispositio, ut pars illa interior communi crassoque afficiatur modo, neque secus ipsum contactum, aut rem contingentem percipiat; ad illas vero spectatior quadam, exquisitiorque contextura ad hoc exigatur in sensorio, ut pars interna specialius exquisitiusque afficiatur, ac percipiat rem non tam per seipsam, quam per subtile quidpiam ab ea emissum, contingentem. Unde & efficiatur, ut quia alia longe ratione comparata est auris, exempli gratia, quam oculus, ideo alia ratione percipiatur, quod percellit aurem, quam quod percellit oculum (a). Non inficior, ea quoque differre inter se, quae dissimilibus organis sensoriis percipiuntur. Moneo solum, ex hoc discrimine minime posse quinarium externorum sensuum numerum satis evinci. Quaeso enim, inquit laudatus Vir Cl., annon sit aliud a tactu sensus caloris, & frigoris? quippe tactus nota proprie solum est ex applicatione ad res duras, molles, ficas, humi-*

(a) Sect. III. *Physices* Memb. II. lib. VI. cap. 3.

humidas, asperas, glabras, & si quæ sint tales; cum diversissimum tamen quidpiam sit caloris, & frigoris sensus? Quid dicam vero de ipso sensu ponderis, atque levitatis? anne ibi nihil præter tactum est? Et nonne ipsemet Aristoteles multipliciter sensuum pro contrarietatum multiplicitate distinguens, & eam ad visum spectare dicens, quæ est albi, & nigri; eam ad auditum, quæ acuti, & gravis; eam ad gustatum, quæ dulcis, & amari? distinguat oportet sensus varios, ad quorum unum spectet contrarietas calidi, & frigidi; ad alium humidi, & sicci; ad alium duri, & molli; ad alium levis, & gravis &c. (a)? Hæc autem dixi, ut pateat Cl. Adversario, jure non esse, cur in quinario externorum sensuum numero nimiam contra Recentiores spem collocet, cum defuturus fortasse non sit, qui piaculum nequaquam ducat, numerum illum, tametsi communi gentium omnium consensione firmatum, augere, aut etiam minuere. Tale præterea hoc suum argumentum est, ut, penitus inspectum, vel Recentiores non urgeat, vel etiam Scholasticos ex æquo premat. Si ve enim sit motus, si ve species, si ve qualitas id, quod externo sensorio ab re sensibili imprimitur, nosque ad sentiendum determinat, certum est perspicuumque, illud non minus debere esse multiplex & varium, ac multiplex sit atque varius motus ille, qui juxta Recentiorum hypothesein sensorio communicatur. Igitur si, Cl. Adversarii judicio, corrui quinarium sensuum numerum, propterea quia innumerabilis pene sit varietas motus aliter, atque aliter modificati; eadem prorsus ratione debet ille idem sensuum numerus nutare prorsus atque corrui etiam in hypothesei Scholasticorum; cum æque innumerabilis sit varietas specierum, quæ sensorio imprimuntur. Nam quemadmodum, ut ille ait, quinque admittuntur a Recentioribus sensuum species propter variam motus modificationem, ita, dicent Recentiores, quinque species sensuum a Scholasticis statuuntur propter variam specierum impressarum naturam; unde, quemadmodum propter innumerabilem pene motuum variam modificationem, innumerabiles sensuum species sub tactu a Recentioribus, ut ille ait, asseveranda sunt; ita, dicam ego, propter innumerabilem pene impressarum specierum diversitatem innumerabiles sensuum species sub uno tactu a Scholasticis eodem jure sunt admittendæ.

Urget autem Vir Cl., si sensus non est nisi tactus motum unum percipere natus, & sensibile non est, nisi corpus motu uno natum percipi, ut exinde quinque asserantur sensus, quinque dumtaxat sensibilia ostendenda forent, hoc est, corpora, quæ valeant dumtaxat efficere

(a) Sect. III. Physices Memb. II. lib. VI. cap. 1.

quinque modificationes motuum. Cum ergo hæc innumera pene sint pro varia corporum figura, mobilitate, & affectione, innumeri quoque statuendi sunt sensus. At vero ita quoque urgebunt Recentiores: si sensus non est nisi animæ actio ab una impressa rei specie determinata; & sensibile non est, nisi corpus aptum, ut per unam impressam speciem a nobis percipiatur; ergo pari ratione quinque dumtaxat sensibilia, quæ valeant quinque tantum dissimiles species externis sensoriis imprimere, ostendenda sunt a Scholasticis, ut nonnisi quinarium esse numerum sensuum, ipsi quoque evincant. Cum ergo hæc species innumerae pene sint, pro variis nimirum corporum qualitatibus, innumeri sensus etiam a Scholasticis sunt statuendi. Quod si dicat Cl. Adversarius, non multiplicari sensus a Scholasticis pro multiplicatione specierum dissimilium, quæ externis sensoriis a corporibus imprimuntur, sciat velim, neque pro multiplicatione dissimilium motuum, quos nerveis sensoriorum fibris sensibilia externa corpora communicant, sensus a Recentioribus multiplicari.

I I L.

32. Opponit 3. commentitiam esse, neque posse defendi viam illam, qua, ex Recentiorum sententia, sensibilibus impressiones ad cerebrum per sensus externos derivantur. Non enim per fibras, aut nervos, aut spiritus fieri potest illa motuum communicatio. Non per fibras, motum impediens, ac retundens molli carne, qua nervi, & fibra circumambiuntur, & ossibus, quibus illa incumbunt. Sed neque per spiritus. Neque enim tanta celeritate possunt ad cerebrum ferri, quanta omnino necessaria est, ut pedis tactio momento eodem percipiatur, quo fit, sicuti docente experientia novimus contingere (a). Ergo &c.

Id porro ex eo confirmat, quia vel hæc motus communicatio fit, quia spiritus in extrema corporis parte existentes ad cerebrum usque promoveantur, vel quia commoti hi spiritus aliis item similem communicant motum, aliisque aliis usque ad cerebrum. Si primum: illud prorsus irrationabile est; quoniam & instantanea deberet esse motio, & alii spiritus varie commoti, atque jam in nervis existentes, motum certe retunderent, perturbarent, & impedirent aliorum, qui in locum ipsorum subire conarentur. Secundum item in instanti credibile non est fieri, & cum persape spiritus jam in nervis existentes jam contrarium motum habeant ex animæ determinatione impressum, infe-

(a) Tom. III. P. III. Physices Disp. II.
q. 2. pag. 329.

riores spiritus, qui suum illis motum communicare tentarent, ab illis potius repellerentur, maxime si levis sit motus in manu (a).

Respondeo, passionem, sive motionem in externo sensorio ex rei sensibilis appulsu excitatam, non per nervos, & fibras, sed per spiritus animales, quibus illi turgent, probabilius, mea quidem sententia, cerebro communicari. Dicere namque, illam passionem cerebro imprimi, quatenus, ut nonnulli præstantes Viri putant, tota, quanta est, nervi longitudo, musicæ chordæ instar, tremat quodammodo, dum extrema ejus pars, quæ externum sensorium constituit, a re sensibili percellitur, repugnat, inquit Cl. Boerhaavius, natura molli, pulposi, flacidi, & sæpe inflexu curvati nervi (b). Fallitur autem Cl. Adversarius, dum ait, spiritus non sufficere ad illam motuum communicationem; idcirco quia nequeant illi tanta celeritate ad cerebrum ferri, quanta omnino necessaria est, ut pedis tactu momento eodem percipiatur, quo fit: fallitur, inquam, si de momento temporis penitus indivisibili mens ejus sit. Passio externi sensorii deferretur quidem ad cerebrum tanta celeritate, ut inter momentum, quo pungitur pes, & illud, quo punctio sentitur, nullum plane tempus mens nostra discernat. Verum non propterea dici potest, punctiorem illam, ejusque sensationem eodem penitus indivisibili temporis momento absolvi. In instanti non propagatur lux, ut cum Recentioribus fateri vel invitus cogitur Vir ipse Cl. (c); neque tamen aliqua successio in illa propagatione a nobis distinguitur; sed uno pene temporis momento etiam per immensum spatium ipsa fieri, nobis apparet. Ergo passio quoque, sive motio externi sensorii videri nobis potest uno momento temporis ad cerebrum deferri, quamvis reapse non uno momento, sed tempore divisibili illa absolvatur. Non assumat itaque P. Ferrari veluti experientia notum perspicuumque, punctiorem pedis, & universaliter passionem externi sensorii, eodem penitus momento, quo fit, a nobis percipi, sed id demonstret; & tunc fateri ipsi quoque non detrectabimus, passionem externi sensorii neutiquam posse per spiritus animales cerebro communicari. Parcat tamen, si dixerò, id nunquam ab eo demonstratum iri, quemadmodum nunquam ab eo demonstrabitur, species illas, quæ, Scholasticorum, adeoque & ipsiusmet Cl. Viri sententia, externis sensoriis a rebus sensibilibus pro sensationis negotio imprimuntur, uno indivisibili temporis puncto ad sedem sensus communis, nempe ad cerebrum deferri.

D

Hinc

(a) Tom. III. P. III. Physicæ Disp. II. q. 2. pag. 329.

(b) Tom. II. Instit. Medic. n. 285. Vide, quæ diximus in Physica Tom. IV. §. 4426.

(c) Tom. III. P. III. Physicæ Disp. III. q. 5. pag. 421. in responsione ad VI. objectionem.

Hinc retorqueri hoc modo potest argumentum: sensibilibus rerum *species* externis sensoriis *impressa* vel deferuntur ad *cerebrum* uno indivisibili temporis momento, vel spatio temporis exiguo quidem, sed divisibili. Si primum: ostendant Scholastici, quomodo hæc *specierum* delatio uno indivisibili momento, tametsi externum sensorium notabili intervallo ab *cerebro* distet, peragi possit; videantque, an tantumdem de *spiritibus animalibus* dicere etiam Recentiores queant. Sin alterum: ergo falsum est, passionem externi sensorii eodem plane momento, quo fit, ab anima sentiri.

Dicit aliquis Scholasticorum, discrimen esse, quia delatio externæ passionis ad *cerebrum* per *species impressas* fit sine motu locali; non sic autem delatio ejusdem per *spiritus*.

Verum contra est. Nam, cum illæ *species* dicantur, & vere sint *entitates materiales*, & *divisibiles*, repugnat, ut ab externo sensorio, cui imprimuntur, ad *cerebrum* usque sine locali motu perveniant. Id certe tam arduum captu est, ut Delio natatore, mea quidem sententia, indigeat.

Porro ad argumenti *confirmationem* quod attinet, dico, passionem externi sensorii communicari *cerebro*, non quia *spiritus* in extrema corporis parte existentes ad *cerebrum* usque promoveantur; sed quia commoti hi *spiritus* aliis item similem communicant motum, aliique aliis usque ad *cerebrum*. Concedo Viro Cl., non solum minime esse credibile, verum nec esse possibile, ut ejusmodi communicatio motus in instanti perficiatur; sed nego, necessarium esse, ut communicatio ipsa uno indivisibili momento temporis tota fiat. Nulla quippe ratione, ut diximus, nulloque experimento evinci potest, passionem externi sensorii eodem plane momento a nobis sentiri, quo in illo efficitur. Miror tamen, P. Ferrari in eo maxime esse, ut demonstret, *spiritus animales*, qui in externo sensorio ex appulsu rei sensibilis ad motum excitantur, minime posse motum ipsum aliis sibi vicinis communicare, & ita porro usque ad *cerebrum*; cum non uno, sed pluribus in locis ipse quoque teneat, doceatque apertissime, ab hoc motu *spirituum animalium* per nervos sensationem, ceterasque animalis functiones necessario dependere. Docet enim, evocatos ad cutem, & excitatos *spiritus animales* longe diversam sui speciem imprimere in phantastica virtute, ac efficiant partes corporis discolligata, vel discontinuata; atque hinc oriri variam illam perceptionem titillationis ex levi, doloris ex forti fricatione (a). Fatetur, motum spirituum, rectamque organorum dispositionem requiri, sive ut conditionem habenda sensationis.

(a) Tom. III. P. III. *Physices* Disp. II. q. 2. pag. 333.

sationis, sive ut partialem causam sensationum; unde ex illorum defectu, asserit, impediri virtutem animæ, & sensationem (a). Docet, oclusis meatibus, & impedito spirituum vitalium (sed melius dixisset animalium) affluxu ad sensoria, aut ex nimia attentione, spiritibus in cerebro detentis, perceptionem tolli (b). Explicans præterea, quamobrem fiat, ut cubito diutius innixi stuporem in digito auriculari sentiamus, ait, id propterea contingere, quia, constricto nervo, major spirituum copia ad extremitatem digiti confluit, atque hi spiritus multitudine sua motum invicem retardant, & impediunt (c). Causam quoque ut afferat, cur homines, quibus manus, vel tibia resecta fuit, videantur sibi in manu sentire dolorem, licet manum non amplius habeant, ait, id ex eo fieri, quia spiritus animales ad brachii extremitatem confluentes, memoriam excitant doloris, quem olim in manu experti sunt (d). Docet etiam, naturalem extasim in Presbytero, quem memorat S. Augustinus (e), contigisse evocatione spirituum ad cerebrum, qui etiam ibi vi magnæ attentionis detinentur; unde externa sensatio impeditur, quæ sine spirituum effluxu fieri non potest (f). Quærens itidem, cur interdum, præsertim in apoplecticis, caro obstupescat, ait, huius esse causam, quoniam spirituum animalium per fibrillas nerveas propagatio impeditur (g). Universaliter etiam certum esse, fatetur, nullam fieri sensationem sine spirituum animalium agitatione, & motu, quibus anima utitur, velut instrumentis ad suas operationes exercendas. Itaque, concludit, sensibili objecto externos sensus percellente, excitantur spiritus, & anima per sensitivam facultatem in externis sensibus operatur, & hanc sensuum operationem attingit, simulque se agere animadvertit. Fit etiam in cerebro (pergit ille) impressio aliqua tum rei affecta, tum sensationis; adeoque illa externa sensatio communicari interno sensui dicitur, quatenus illa sine huius operatione propter potentiæ ordinem non habetur (h). Somnum demum explicans, ipsum oriri docet ex defectu spirituum, quibus operationes animalis exercentur. Dissipantur enim, inquit, actione spiritus animales; unde iterum somni tempore alii eliciuntur; vel, ut nonnullis placet, obstruuntur orificia fibrarum, per quæ spiritus transire debent a sensibus ad cerebrum, a cerebro ad externos sensus. Sed hoc ipsum ex sola spirituum deficientia contingere novimus (i). Hinc explicans ea,

D 2

quæ

(a) Tom. III. P. III. Physices Disp. II.

q. 2. pag. 334.

(b) Ibidem q. 3. pag. 339.

(c) Ibidem.

(d) Ibidem pag. 341.

(e) Lib. XIV. de civitate Dei cap. 24.

(f) Loco citato pag. 342.

(g) Ibidem Disp. III. q. 1. pag. 360.

(h) Ibidem pag. 364.

(i) Ibidem Disput. II. q. 1. pag. 322.

quæ de somnambulis referuntur, ait, causam illorum esse, quia *spirituum naturalis motus non est omnino impeditus*; unde *nec somnus perfectus est* (a). Hæc igitur cum ita sint, Cl. Adversario, æque perfecto ac Recentioribus incumbit explicare modum, quo *spiritus animales* ita per nervos moveantur, ut motus in externo sensorio, dum a re sensibili percellitur, illis impressus, ad *cerebrum* usque propagetur; & vicissim, quem illi, dum *phantasia, imaginationis*, aliasque *internorum sensuum* functiones anima exercet, in *cerebro* motum concipiunt, ad partes corporis ab ipso *cerebro* valde remotas diffundatur. Quocumque enim modo hanc motus communicationem, diffusionemque per *nervos* exposuerit. Vir Cl., Recentioribus perinde omnino est, utpote qui hoc loco non aliud habent in animo, nisi passionem externi sensorii in motione fibrarum nervearum, ex quibus illud componitur, positam esse, demonstrare. Accedit, inficiari neminem posse, passionem, quæ in externis sensoriis, dum a rebus sensibilibus pro sensationis negotio percelluntur, efficitur, in motione fibrillarum nervearum, ex quibus ipsa sensoria composita sunt, unice consistere; idcirco quia nobis plane ignotus sit modus, quo illa externorum sensoriorum motio *cerebro* communicetur. Negare quippe non licet, quod clarum est, quia quod est obscurum, non potest comprehendi. Clarum est autem, id, quod in externo sensorio ex appulsu rei sensibilis contingit, nihil omnino esse a nervearum fibrarum, quibus illud constat (S. 23.), motione diversum. Non aliud certe, nisi motio quædam, fatentibus Scholasticis, ipsoque etiam Cl. Adversario adsentiente, fit in nerveis papillis *tactus*, dum a duro corpore premuntur, ejusque *durities* a nobis sentitur; neque aliud, iisdem testibus, nisi motio, in fibrillis *nervi acustici* itidem contingit, dum percelluntur a motu aeris tremulo, & *soni* sensatio in nobis excitatur. Quemadmodum ergo non idcirco negandum est, horum sensoriorum passiones in sola nervorum motione consistere, quia a nobis ignoratur modus, quo motio illa *cerebro* communicetur; ita negari non debet, passionem externi cuiusvis sensorii, quam sensatio consequitur, haud esse a certa componentium nervearum fibrillarum motione diversum, propterea quia modus nos lateat, quo ipsa motio deferatur usque ad *cerebrum*, eique, ut anima sentiat, imprimatur.

I V.

33. *Opponit* postremo laudatus Vir Cl. hoc dilemma: aut potest ali-

(a) Ibidem Disput. II. q. 1. pag. 324.

aliqua sensatio sine motu percipi, aut non potest. Si potest, ruat oportet omnis Recentiorum doctrina. Si non potest, ruat oportet omnis memoria, omnisque sensatio a dormientibus peracta, qua certe contingit, nulla locali impressione facta ab externis objectis tunc absentibus. Deinde (pergit ille) si ab objectis non aliud recipimus, nisi motum, ergo non aliam deberemus ideam habere, nisi ideam motus; alioquin enim experimentalis cognitio esset falsa, quia objectum repraesentaret aliter, ac sit in se. Atqui etiam ipsi Recentiores fatentur, non percipi a nobis motum, dum videmus, & audimus, sed cognosci colorem, sonum. Igitur &c. (a).

Respondeo, nullam externam sensationem, de qua dumtaxat res nobis in praesens est, fieri sine motu. Impossibile est enim, rem aliquam externo sensu a nobis attingi, quin illius organum ab ipsa re immutetur; ac proinde quin tum nervae fibrae, quibus illud constat, tum qui in ipsis fibris latent animales spiritus, motum aliquem concipiant. Falso autem sibi blanditur Cl Auctor, docens, si nulla sensatio fit sine motu, ruere omnem memoriam, omnemque sensationem a dormientibus peractam; utpote qua contingit, nulla locali impressione facta ab externis objectis tunc absentibus. Etenim vel loquitur de sensatione interna, vel de externa. Si de interna, miror, eum non vidisse, ad rem, de qua modo agimus, internam sensationem non pertinere; cum praesens quaestio versetur tota circa modum, non quo interna, sed quo externa tantum sensatio in nobis perficitur; ut proinde Recentioribus sufficiat, nullam externam sensationem fieri sine motu, quocunque demum modo sensatio interna absolvatur. Si vero de externa intelligat, vehementius obstupesco, quod non viderit, se tunc non experientiae solum, verum & sibi metipso adversari. Adversatur experientiae; nam ex illa certo constat, sensus omnes externos in dormientibus otiosi. Adversatur sibi metipso. Somnum quippe definiens, illum vocat sensuum omnium externorum naturalem ab opere cessationem, ortam ex defectu spirituum, quibus operationes animalis exercentur (b). Somni quoque causas enumerans, eas inter recenset sensibilis objecti defectum, & lucis carentiam, quatenus iis, inquit, externi sensus non vellicantur, nec subinde spiritus in capite commoventur (c). Ceterum nullam seu internam, seu externam sensationem fieri sine motu, ipse etiam aperte docet alio loco. Certum est enim, inquit, nullam fieri sensationem sine spirituum animalium agitatione, & motu, quibus anima utitur velut instrumentis ad suas operationes exercendas (d).

Ad

(a) Loco citato pag. 330.

(c) Ibidem pag. 323.

(b) Ibidem pag. 322.

(d) Ibidem Disp. III. q. 1. pag. 164.

Ad id demum, quod ille addit, fore scilicet, si ab objectis non aliud recipimus, nisi motum, ut non aliam debeamus ideam habere, nisi ideam motus, dicam primo, hanc instantiam ab ipsomet etiam solvi oportere. Cum enim de sono differens, in eam, ut modo inuimus, opinionem propendat, quæ statuit, sonum non in aliqua a motu distincta reali qualitate, sed in solo tremulo interjecti aeris motu consistere, ipsumque sonum a nobis idcirco sentiri, quatenus motus ille aeris tremulus usque ad aures propagatur, similemque tremorem interno aeri auris communicat, concutitque membranam cochleæ (a), ipse quoque Vir Cl. explicet necesse est, quamobrem, licet sonus nonnisi motum sensorio communicet, non motum, dum audimus, sed sonum percipiamus. Dicam secundo, difficultatem hanc nihil prorsus negotii iis faceffere, qui cum Cartesio (b), Malebranchio (c), Boerhaavio (d), aliisque putant, motus, qui in externis sensoriis ab sensibilibus rebus fiunt, non esse causas idearum, quæ tunc in anima excitantur, nisi occasionales: videlicet qui ajunt, nos sentire, dum externa sensoria a rebus sensibilibus immutantur, non quia motiones, quæ in sensoriis tunc fiunt, ipsi percipiamus; sed quia ea a Deo mentem inter atque corpus constituta lex est, ut, certis quibus motibus factis in corpore, certæ ideæ in anima consequantur. Dicam postremo, non aliam nos habere ideam, dum sentimus, nisi ideam motus, non quidem formaliter, adeo nempe ut sensatio generatim sumpta, aliud non sit, nisi perceptio corporis diversa successive loca occupantis; sed tantum materialiter, quatenus scilicet passio externi sensorii, quam sentiens anima percipit, in certa fibrarum nervearum, quibus illud constat, & spirituum animalium, quibus fibræ ipsæ turgent, motione consistit. Neque propterea falsa censenda est experimentalis cognitio, quasi objectum, a quo sensorium afficitur, aliter, ac sit in se, animæ sentienti per eam exhibeatur. Tale quippe per sensum nobis exhibetur objectum sensibile, quale per passionem ab eo excitatum in externo sensorio, & ad cerebrum usque propagatum, illud menti occurrit. Coloratum nempe a nobis percipitur objectum, si ejus sit naturæ, ut reticularem oculi membranam, luminis ministerio, afficiat; sapidum, si nerveas linguæ papillas moveat; odorum, si per membranam, interiores narium anfractus investientem, disseminatas nerveas fibrillas vellicet, & ita porro. Fatentur quidem Recentiores, motum, hoc est, corpus plura successive loca occupans, a

no-

(a) Tom. III. P. III. Physicæ Disp. III.
q. 4. pag. 383. 384.

(b) P. IV. Principiorum num. 197.

(c) Lib. I. de inquirenda veritate cap. 10.

(f) Tom. IV. Instit. Medicarum n. 570,
& ibidem in Prælectionibus.

nobis non percipi, dum videmus, & audimus; at simul docent, non aliud, nisi dissimiles in dissimilibus, dissimilique modo sibi mutuo intextis, externorum sensoriorum fibris excitatas, motiones tunc a nobis sentiri.

COROLLARIUM I.

34. *Illud itaque ex se formaliter sensibile est, quod externis sensorii debite applicatum, nerveas illorum fibras premere, vellicare, aliave ratione movere potest. Ejusmodi enim hoc ipso illud est, ut, quemadmodum sensibilitas postulat (§. 6.), ea ex illius appulsu ad externa sensoria passio in ipsis excitetur, quam sensatio consequitur.*

COROLLARIUM II.

35. *Ab eo formaliter habet corpus, ut sit sensibile, a quo habet formaliter, ut externis sensorii debite applicatum, fibras nervorum, ex quibus illa composita sunt, movere certa ratione possit, premere, & vellicare. Corpus namque per id formaliter est sensibile, per quod formaliter, externis sensorii applicatum, valet illa immutare (§. 7.).*

COROLLARIUM III.

36. *Qualitas sensibilis in eo physice posita est, ratione cujus corpus sensibile est proxime aptum ad ita movendas nerveas fibras externi sensorii, cui applicatur, ut aliqua in nobis ex illa motione sensatio contingat. In eo enim qualitas sensibilis physice consistit, per quod formaliter habet corpus, ut eam in externo sensorio, ad quod appellit, passionem excitet, quam sensatio in anima comitatur (§. 9.).*

COROLLARIUM IV.

37. *Vel nulla sunt species, quæ externis sensorii ab rebus sensibilibus imprimi dicuntur pro negotio sensationis, vel ab certa ipsorum sensoriorum motione illa non distinguuntur. Res enim sensibiles, dum externis sensorii applicantur, nonnisi certam quamdam motionem illis, ut modo visum est, communicant.*

PRINCIPIUM II. FUNDAMENTALE.

Id, quod objecti instar nobis in sensatione occurrit, & ab sentiente anima immediate percipitur, non est res ipsa sensibilis, a qua sensorium immutatur, sed passio dumtaxat, sive motio in ipso sensorio ab illa excitata.

38. *Probatur.* Certum est, ac, nisi mea me opinio fallat, plane perspicuum, non rem ipsam, quam intuemur, sed illius tantum imaginem in oculorum fundo depictam, id esse, quod visu conspiciamus, & circa quod, tamquam objectum, mens nostra videndo versatur. Constat etenim *primo*, si oculorum alter tunc leviter digito prematur, duplatam, tametsi unica sit in se, rem ipsam nobis apparere: cujus phœnomeni cum ea sit causa, quod puncta imaginis in unius oculi fundo depictæ, ob deturbatum axium concursum, iis in locis tunc non appareant, quibus homologa puncta similis imaginis, quæ in altero oculo depicta est, respondere videntur (Tom. IV. *Physicæ* §. 4579.), dubium esse nequit, quin ipsæ tantum imagines illud sint, quod a nobis visu conspicitur. Constat *secundo*, id, quod intuemur, videri nobis a suo loco recedere, nutare, atque in orbem moveri, si, uno oculo clauso, alter premente digito moveatur huc illucque, ac veluti in gyrum agatur. Tunc autem non movetur res extra nos posita, sed ejus tantum imago in oculi fundo depicta. Ergo hæc dumtaxat, minime vero res, quæ per illam exprimitur, nobis in visione occurrit. Constat *tertio*, oculum *microscopio* armatum videre plura, quæ, sublato *microscopio*, videri ab illo non possunt. Ergo illa non videntur in se, sed tantum in imagine. Neque enim alia hujusce phœnomeni ratio esse potest, nisi quia in oculo nudo nullam imaginem illa efficiunt; contra vero distinctam, si *microscopium* intericiatur. Constat *quarto*, longe majoris molis, quam sit in se, objectum apparere, si trans *microscopium* conspiciatur. Id autem certo certius ex eo fit, quod objecti imaginem, quæ depingitur in fundo oculi, *microscopium* notabiliter augeat. Ergo hæc sola est illud, in quod visio desinit. Constat *quinto*, objectum trans *polyedricam lentem*, vel in speculo *plurium planorum* inspectum, multiplex nobis se prodere ob id dumtaxat, quod ipsius imago in oculi fundo tunc multiplicetur. Ergo hæc tantummodo, non autem objectum, animæ videnti occurrit. Constat *postremo*, eo in loco plerumque videri objectum, in quo reipsa non est. Patet de

num.

nummo existente in fundo vasis aqua pleni, de Sole infra *horizontem* posito, de reimo una sui parte aquæ immerso, deque demum iis omnibus, quæ trans *telescopia* conspiciuntur. Nummus enim altior videtur, quam sit reipsa; Sol apparet supra *horizontem*, licet vere infra illum existat; quæque trans *microscopia*, & *telescopia* intuemur objecta, viciniora, aut remotiora, quam revera sint, nobis se produnt. Hæc autem omnia pendent ab imagine, quam illa in oculi fundo depingunt, sive ex hoc uno, quod objecta ipsa non in se, sed in sui tantum imagine, ut est in *Physica* explicatum, a nobis conspiciantur. Ergo id, quod objecti instar nobis in visione apparet, quodque mens nostra tunc percipit, non est objectum in se, sed ejus dumtaxat imago, sive passio, vel motio, quam res ipsa in visionis sensorio excitat. Indubiam porro rem puto, eodem penitus modo, quo visio fit, & sensationes reliquas in nobis peragi; cum scilicet natura unitatem, quoad potest, affectet, & effectus similes simili modo producat. Ergo, generatim loquendo, non res extra nos posita, a qua externa sensoria, ut fiat sensatio, immutantur, sed passio a re sensibili in externo sensorio excitata, id unice est, quod objecti instar nobis in sensatione occurrit, & ab sentiente anima immediate percipitur.

Observandum autem censet Cl. P. Ferrari, eos omnes hallucinari, qui mecum putant, id, quod mens percipit, dum aliquod objectum intuemur, non esse objectum ipsum in se, sed illius imaginem dumtaxat in oculi fundo depictam. Nulla quippe ratione, inquit ille, idipsum adstruitur. Nam quod, presso digitis oculo, objectum duplex appareat, hoc ex diversa axis optici directione, & anima tendentia explicatur. Alioquin enim semper duplex videretur objectum; cum duplex sit imago in retina. Eadem ratione, agitato oculo, objectum moveri videtur. Ita & per plura veli foramina, & in speculis plurium facierum objectum ipsum multiplicatum videtur; quia multiplex tunc fit axis optici directio (a).

Sed contra est. Nam quomodocunque mutetur directio axis optici, dum alter oculorum digito premitur, objectum non propterea definit esse unum. Ergo, si illud videtur in seipso, nullatenus potest ob hanc causam duplatum nobis apparere. Eadem ratione non video, quamobrem ob successive mutatam *opticorum axium* directionem, dum, uno oculo clauso, alter digito in orbem agitur, videri nobis debeat objectum mutare locum, ac veluti huc illucque impelli; sicuti etiam cur, propter multiplicem factam directionem *axium*,
E dum

(a) Tom. III. *Physicæ* Disp. III. q. 5. pag. 411.

dum objectum vel per plura veli foramina, vel in speculo plurium facierum conspiciamus, debeat objectum ipsum tunc nobis videri multiplex. Non enim movetur objectum ad motum *axis optici*, neque ad hujus multiplicatam directionem multiplex redditur. Ergo, si in seipso illud a nobis videtur, profecto & immotum, & unum numero tunc etiam nobis appareat, necesse est.

Quod si dicat Vir Cl., ex directione *axis penicillorum opticorum*, quorum apicibus imago objecti in oculi fundo depingitur, vel mutata, vel mota, vel multiplicata, etiam a Recentioribus, imo & a memorata visionis phœnomena *respective* derivari; id utique ipsi do libentissime. At simul velim consideret, quibusnam principiis in hisce explicandis phœnomenis illi innitantur. Videbit enim, ideo ex mutata, mota, & multiplicata axium directione ea omnia phœnomena ab illis desumi, quia ratum habent fixumque, I. *id, quod, visu in objectum converso, intuemur, non esse objectum ipsum in se, sed illius dumtaxat imaginem in oculi fundo depictam*. II. *singula puncta imaginis, quæ a radiante externo objecto in oculorum fundo depingitur, eo in loco extra illos apparere, in quo axes penicillorum, quibus ipsa puncta in retina sunt, directe extra oculos ipsos producti, concurrunt* (a). Hisce ergo positis principiis, optima est, quam illi tradunt, horum effectuum explicatio; contra vero dicendum arbitror, si ejusmodi principia respuantur. Nimis apertum est enim, objectum, si in seipso, non vero in sui imagine a nobis conspicitur, fore, ut tale nobis perpetuo appareat, quale in se est, qualiscunque demum in *opticorum axium* directione mutatio contingat. Unum porro addere liceat, utpote quod, nisi vehementer fallar, ad intentum facit perquammaxime. Certum est, cum faciem nostram in speculo conspiciamus, non ipsam faciem in se, sed ejus tantum imaginem tunc a nobis videri. Ergo nulla res in se, sed in sui dumtaxat imagine a nobis conspicitur. Qua enim ratione imago faciei nostræ, ita prorsus & imago rei cujusque, in oculi fundo depicta, potest habere rationem objecti, circa quod visio *immediate* versetur. Hinc non propter multiplicem factam directionem *axis optici*, ut ait Cl. Adversarius, sed propter multiplicatam in oculi fundo imaginem objecti, fit, ut objectum ipsum, tam in speculo plurium facierum, quam per plura veli foramina a nobis inspectum, multiplicatum appareat. Meliora ergo nisi dederit Vir Cl., moleste ne ferat, si dixerim, eos non falli, qui mecum putant, *id, quod mens percipit, dum aliquod objectum*

in-

(a) Vide, quæ diximus Tom. IV. *Physices*
§§. 4525, & 4568.

intuemur, non esse objectum ipsum in se, sed illius imaginem dumtaxat in oculi fundo depictam.

Ajunt vulgo Scholastici, rem externam in se quidem a nobis conspici; verum non *absolute*, sed *dependentem* a *sui specie*, quam illa oculo imprimit.

Verumtamen illud ipsum contra hanc doctrinam facit *primo*, quod contra Cl. P. Ferrari modo retulimus: videlicet si res videretur in se, ut ille ait, non vero tantum in sui imagine, ut ajunt Recentiores, duplatam nobis apparere eam non posse, dum oculorum alter digito a nobis premitur; neque nutare, dum, uno oculo clauso, huc illucque alter digito urgetur; neque demum posse nobis videri multiplicem, dum in plurium facierum speculo eam ipsi intuemur. Cum enim res non mutet locum, dum oculus, una cum impressa rei *specie*, digito pressus movetur; neque multiplex illa fiat, dum vel oculorum alter, pressus digito, a suo naturali situ recedit, vel ipsius rei *species* in illo multiplicatur; necesse profecto est, una semper, & immota, si conspicitur in se, tunc etiam res ipsa appareat. *Secundo*: quia palam efficere debent Scholastici, non solum quid *physice* sint illæ *species*, & quomodo ab externis rebus oculo imprimantur; verum etiam quomodo illæ ad visionem concurrant, quin ipsæ id sint, ad quod visio terminatur. Quamdiu enim hæc in abdito fuerint, tamdiu dicam, bona Cl. Adversarii venia, nihil prorsus suis hisce *speciebus* ab illis confici. *Docere me prius sodes*, dicam cum Scaligero Cardanum alloquente, *quid est id, quod video?* Dices, *puerilem esse interrogationem*; rem enim esse, quæ videatur. At doce quæso nos pueror, per salebras hæc naturæ perreptantes. Si *sensio est receptio*; nec recipitur res, demonstrabitur certissima demonstratione sic: ergo non sentitur res. Ajunt, rem videri per speciem. Intellico, & concludo: *species ergo sentitur*. Rem ipsam haud percipit sensus. *Species ipsa non est ea res, cuius est species*. Isti vero ausi sunt ita dicere, non videri speciem, sed rem per speciem; speciem vero esse videndi rationem. Audio verba: rem haud intellico. Non enim est ratio videndi, ut lux. Quid igitur? Quid, inquirunt? per speciem vides rem. Non potes autem videre speciem; quia necesse esset, ut per speciem videres. Quæ sententia est omnium absurdissima. Dico enim jam, rem non videri, sed speciem (a), passionem scilicet, sive motionem, quæ ex rei ipsius appulsu in externo sensorio excitatur.

S C H O L I O N.

39. Hæc opinio de immediato sensationis termino recens non est, ut forte nonneminum Scholasticorum videbitur, sed pervetusta. Eam quippe expresse docuit S. Augustinus, cum sensationem definiens, eam dixit passionem corporis, quæ per seipsam, scilicet *immediate*, animam non lateat, sive quæ ab anima *immediate* percipitur. *Sensus*, inquit, *est passio corporis per seipsam non latens animam* (a); sibi que videri ait, animam, *cum sentit in corpore, non ab illo aliquid pati, sed in ejus passionibus adtentius agere, & has actiones, sive faciles propter convenientiam, sive difficiles propter inconvenientiam, non eam latere, hoc totum esse, quod sentire dicitur* (b). Rationem quoque afferens S. Doctor, quamobrem, etsi corpus nostrum patiatur, *cum crescimus, vel senescimus, neque id tamen animam lateat, non propterea sensus appellari id possit* (c), causam esse ait, quia passionem hujusmodi non *immediate*, sive *per se ipsas*, sed per discursum, seu *conjectatione* ab anima cognoscuntur (d). Unde Evodius, quem inter, atque S. Augustinum in libro *de quantitate animæ* disputatio est, minime dubitat, quin ita definiendus sit *sensus*, ut sit *passio corporis per seipsam non latens animam*. Nam & *omnis sensus*, inquit, *hoc est, & omne hoc, ut opinor, sensus est* (e). Dubitandum non est igitur, quin etiam S. Augustino persuasum fuerit, non rem extra nos positam, a qua sensoria nostra afficiuntur, sed passionem dumtaxat, quæ ex rei ipsius appulsu in illis efficitur, esse id, quod sentienti animæ, objecti instar, occurrit, ab eaque, dum sentit, *immediate* percipitur. Profecto, si secus, per passionem corporis, quæ per seipsam non lateat animam, jure, ut arbitror, definiri *sensus* non posset. A vero idcirco aberrat Cl. P. Ferrari, dum ait (f), nos, Recentiores si audiamus, *ratione sentire*, eosque propterea hac super re adversari S. Augustino. expresse docenti, non ad *sensum*, sed ad *scientiam* id pertinere, quod nos *per rationem non latet* (g). Errat, inquam, Vir Cl. Etenim *rationis* nomine vel intelligit *percipiendi vim*, vel *ratiocinandi potentiam*. Si hoc alterum: Recentioribus sane imponit; cum nemo eorum dixerit unquam, neque dicat: modo, eam corporeæ

(a) Lib. *de quantitate animæ* num. 48.
alias cap. 25.

(b) Lib. VI. *de Musica* num. 10. alias
cap. 5.

(c) Lib. *de quantitate animæ* num. 46.
alias cap. 24.

(d) Ibidem num. 48: alias cap. 25.

(e) Ibidem.

(f) Tom. III. P. III. *Physicæ* Disp. II.
q. 3. pag. 342. prope finem.

(g) Lib. *de quantitate animæ* num. 58.
alias cap. 30.

poræ passionis perceptionem, quam *sensum* appellant, a *ratiocinatione* dependere. Homo quippe sentit, illorum iudicio, hoc ipso dumtaxat, quod passio, sive motio a re sensibili in externo sensorio excitata, deferatur ad cerebrum, & ab sentiente anima, quæ in illo potissimum residet, percipiatur. Sin vero primum intelligat: hoc quidem asserunt, propugnantque Recentiores, sed illud neque falsum est, neque S. Augustini doctrinæ adversatur. Non est falsum; quia ipso intimo sensu constat, nos passionem illam corporis percipere, quam sentimus; eamque nos ideo sentire, quia ipsam percipimus; unde Plutarchus, *necessarium esse*, dixit, *omnibus, quibus sit sensus, etiam mentem obtingere; quia nulla alia re, quam mente sentimus* (a); & Tertullianus, *quid, inquit, erit sensus, nisi ejus rei, quæ sentitur, intellectus? Quid erit intellectus, nisi ejus rei, quæ intelligitur, sensus? Unde ista tormenta crucianda simplicitatis, & suspendenda veritatis? Quis mihi exhibebit sensum non intelligentem, quod sentit? aut intellectum non sentientem, quod intelligit* (b)? Sed neque S. Augustini doctrinæ id adversum est. Quid enim aliud intelligit S. Doctor, cum *sensum* definit passionem, quæ per se ipsam non latet animam, nisi corporis passionem, cum sentitur, ab anima immediate percipi? Sane, explicans S. Doctor, in quonam consentiant *sensus*, & *scientia*, & per quid differant, *quamquam inquit, sit aliud sensus, aliud scientia, illud tamen non latere* (scilicet percipi) *utrique commune est; ut ipsi homini, & bestia, quamvis plurimum differant, animal tamen esse, commune est. Non latet enim, quidquid anima apparet sive per temperationem corporis, sive per intelligentiæ puritatem; atque illud primum sensus, hoc alterum scientia sibi vindicavit* (c). Quod si, cum ait Cl. Adversarius (d), nos, Recentiorum iudicio, *sentire ratione*, quia *solis ideis mentis nostræ sensationes haberi illi dicant*, mens ejus sit, tradi ab Recentioribus, animam nostram, ut sentiat, nullatenus a corpore dependere, æquo ferat animo, si dixerim, ipsum manifesto in errore versari. *Primo* etenim ad Cartesium quod attinet, meridiana ipsa luce clarius est, tantum Virum pro re comperta habuisse, sensationes nostras dependere a corpore, non quidem ut a *causa* illarum *effectrice*, sed tantum ut a *causa* earundem *occasionalis*. Pluribus quippe probare nititur Vir Cl., *talem esse nostræ mentis naturam, ut ex eo solo, quod quidam motus in corpore fiant, ad quaslibet cogitationes, nullam istorum motuum imaginem referentes, possit impelli, & speciatim ad illas confusas, quæ sensus, sive sensationes* dicun-

(a) Lib. de industria animalium.

(b) Lib. de anima cap. 18.

(c) Lib. de quantitate animæ cap. 9.

(d) Loco citato.

dicuntur (a). Malebranchius quoque, qui sane inter occasionalistas, ut ajunt, non ultimus est, statim, inquit, atque mens novas excipit ideas, nova cerebro imprimuntur vestigia, & statim atque objecta efficiunt nova vestigia, mens novas excipit ideas (b). Boerhaavius demum, Cartesii vestigia & ipse hac in parte sequutus, quid ergo, ait, sensus est? Nescio. Id solum scio, in corpore nostro certa organa esse certis recipiendis motibus apta: hac organa cum cerebro conjungi: in cerebro sensum fieri: animam vero percipere, judicare de iis sensis, ac si sentiret ipsa. Nexum vero omnium harum actionum explicare, non hominis est, multo minus nostri (c). Ad harmonistas quod spectat, hac inter alia plurima habet Volfius: perceptiones, quarum ratio continetur in mutationibus in organis corporis nostri, qua talibus, contingentibus, dicuntur sensationes. Definiri etiam posset sensatio, quod sit perceptio per mutationem, qua fit in organo aliquo corporis nostri, qua tali, intelligibili modo explicabilis (d). Hinc definit organum sensorium, quod sit pars organica corporis, in cujus mutationibus continentur rationes perceptionum rerum materialium in mundo adspectabili (e); facultatem vero sentiendi, sive sensum, quod sit facultas percipiendi objecta externa, mutationem organis sensorii, qua talibus, inducentia, convenienter mutationi in organo facta (f). Hac demum propositione, ait legem sensationum comprehendere: si in organo aliquo sensorio ab objecto aliquo sensibili quadam producitur mutatio, in mente eidem coexistit sensatio per illam intelligibili modo explicabilis, rationem sufficientem, cur sit, in illa agnoscens (g). Postremo ad Gassendum quod spectat, dico jam, inquit ille, sensationis negotium explicans, quia nervus, nervulusve non potest contingi, quin aliquatenus prematur: neque potest aliquatenus premi, quin ob distentionem spiritus contentus urgeatur: neque spiritus ille sic urgeri, quin pellat, seu potius repellat vicinum instantem, ac pari ratione advenientem ex cerebro: neque iste porro repelli, quin tota serie ob repletionem, continuitatemque compulsa, spiritus existens ad ipsam originem nervi, nervulive in cerebrum quasi resiliat: ideo facultatem sentiendi residentem in cerebro, hoc quasi resultu moveri, factumque attactum percipere, apprehendere, seu cognoscere, ac sentire (h). Neque dissimili modo sensationem explicat P. Maignan (i); ut jure propterea dici possit, Cl. Ad-

ver-

(a) P. IV. principiorum num. 197.

(b) Lib. II. de inquirenda veritate p. 2. cap. 3.

(c) Tom. IV. Prælect. in suas Instit. Medicar. num. 570.

(d) Psychol. empiric. §. 65.

(e) Ibidem §. 66.

(f) Ibidem §. 67.

(g) Ibidem §. 84.

(h) Sect. III. Physices Memb. II. lib. VI. cap. 1.

(i) Philof. naturæ cap. 24. num. 18.

De qualitatibus corporum.

39

vestarium hallucinari, & Recentioribus imponere, si velit, ita *solis mentis nostra ideis* sensationes ab illis acceptas referri, ut dicant, mentem nostram in sensationibus eliciendis nullo prorsus modo a corpore, cui jungitur, dependere.

COROLLARIUM I.

40. *Corrigendum itaque eorum omnium iudicium est, qui putant, non in sensorio, quod afficitur, sed in objecto, quod illud afficit, id existere, quod mens nostra, dum sentit, immediate percipit.* Satis ostensum est enim, corporis passionem, non vero rem, ex cuius appulsu sensorium patitur, a nobis *immediate* percipi, dum sentimus.

COROLLARIUM II.

41. *Non aliud, ministerio sensuum, si sani sint, recteque valentes, de rebus sensibilibus pronunciare tuto possumus, nisi id in illis esse, ratione cuius aptæ sunt ad eas motiones in externis ipsorum sensuum organis excitandas, quas ipsi, dum sentimus, immediate percipimus.* Sic de re, quæ per visum nobis alba apparet, & per gustum simul dulcis sentitur, non aliud pronunciare jure valemus, nisi id in illa haberi, per quod in visus, atque gustatus organo eas ipsa potest motiones efficere, quas albedinis, & dulcedinis sensatio in anima necessario consequitur. Si namque non aliud percipit mens, dum sentit, nisi motionem a re sensibili in externo sensorio, dum ad illud appellit, excitatam; aliud sane de ipsa re pronunciare tunc illa non potest, nisi rem ipsam esse ejusmodi, cujusmodi esse debet, ut motionem, quam ipsa mens sentiendo percipit, in externo sensorio valeat excitare.

SCHOLION.

42. Dixi: *si sensus sani sint, recteque valentes.* Plerumque enim fit illorum vitio, ut motio, quæ ex rei sensibilis appulsu in ipsis efficitur, plane diversa ab ea nobis videatur, ad quam excitandam res ipsa, natura sua, destinata est. Sic ob vitiatum gustatus organum, nobis amarum videtur haud raro, quod ad dulcedinis sensum excitandum natura sua aptum est.

COROLLARIUM III.

43. *Si motio externis sensoriis ab re sensibili impressa, in illis, etiam ipsa re absente, conservaretur, nobis præsens, licet absens, illa appareret, perinde prorsus ac si revera coram nobis res ipsa existeret. Ut si imago, quam homo coram nobis positus, in nostrorum oculorum fundo depingit, non evanesceret, dum ille a nobis recedit, sed in iisdem, ut antea, permaneret, homo ipse minime a nobis recessisse videretur. Manente enim illius imagine in oculorum fundo, id sentienti animæ præsens tunc manet, quod illa, hominem sibi præsentem dum cernit, intuetur.*

COROLLARIUM IV.

44. *Ut sub aliena specie res nobis appareat, sufficit, ut eas ipsas motiones in externis nostri corporis sensoriis excitet, quæ ab ea re, sub cuius specie apparere illa dicitur, in iisdem naturaliter producuntur. Sic aqua ut sub vini specie nobis se prodar, satis est, ut visus, gustus, atque olfactus organa eodem penitus modo ab illa moveantur, quo naturaliter a vino moveri solent. Quod enim sentienti animæ tunc occurrit, ab eo nullatenus diversum est, quod eidem occurrit, dum vinum percipit.*

SCHOLION.

45. Hoc principio eæ omnes apparitiones explicari possunt, quæ sensuum illusione fieri dicuntur. Dici nimirum potest, illas ex hoc uno provenire, quod externa nostri corporis sensoria iis motibus a bono, vel a malo angelo afficiantur, quibus ab illis rebus affici naturaliter solent, quæ tunc nobis apparent. Nempe, *causa exempli*, ut Christus Dominus cruci affixus a nobis conspici videatur, sufficit, ut ejus imago imprimatur oculorum nostrorum fundo, eoque toto tempore in illo conservetur, quo apparitio ipsa nobis durat. De huiusmodi proinde apparitionibus loquens S. Augustinus, ait, in illis falli animam, *cum in ipsis corporibus fieri putat, quod fit in sensibus* (a).

PRO-

(a) Lib. XII. *super Genesim* num. 52, alias cap. 25.

PROPOSITIO I.

*Corporis magnitudo non est accidens absolutum
in sensu Scholastico.*

46. *Probatur 1. Corporis magnitudo non est accidens absolutum in sensu Scholastico, si partes corporeæ substantiæ valeant ex ipsa sua natura, omni scilicet absoluto accidente secluso, ita simul conjungi, ut totum entitative extensum illæ constituent. Cum enim corporea magnitudo in ejusmodi extensione posita sit (§. 21.), illa certe nihil erit reale absolutum a corporea substantia distinctum, si nihil ejusmodi in ipsa substantia, ut ex illius partibus extensum fiat, requiratur. Certum est autem, integrales corporeæ substantiæ partes posse ex se ita simul conjungi, ut totum entitative extensum inde confluat. Sunt enim natura sua impenetrabiles (§. 19.): quod sufficit, ut totum entitative extensum ex illarum unione componatur (§. 4.). Ergo magnitudo corporum non est accidens absolutum in sensu Scholastico.*

Confirmatur hæc ratio: integrales partes absolute illius entitatis, in qua corporis magnitudinem Scholastici positam esse dicunt, vel indigent absoluto accidente, ut totum entitative extensum simul unitæ constituent, vel non indigent. Si indigent: quæro de illo, per quid formaliter id præstet. Si non indigent: quæro, cur partes quoque corporeæ ipsius substantiæ nequeant ex se ita conjungi, ut, quemadmodum ex partibus illius entitatis, totum entitative extensum inde confluat. Neque enim illis deest impenetrabilitas, quæ sola requiri videtur, ut simul hac ratione conjungantur. Ergo &c.

Probatur 2. assertio. Multitudo non est accidens absolutum, ab iis reipsa distinctum, & divinitus separabile, quæ dicuntur multa. Ergo neque magnitudo est simile accidens a rebus illis eodem modo distinctum, & separabile, quæ extensa, sive quantæ quantitate molis nuncupantur. Consequentia est evidens. Utraque enim quantitas, continua scilicet, atque discreta, sub eodem quantitatis genere ex æquo continetur; unde neutra tamquam absolutum accidens habenda est, si alterutra veluti accidens hujusmodi haberi non possit. Ans vero probatur. Etenim primo datur multitudo, nempe quantitas discreta, etiam in attributis rerum modalibus, iisque relationibus, quas ipsimet Scholastici reales appellant; quin propterea, eorundem Scholasticorum judicio, detur absolutum aliquod accidens, ex quo illa multitudo

repetatur. *Secundo*: quia *multitudo* ex sola rei divisione ac propterea quin, ut est perspicuum, *absolutum* aliquod *accidens* producat, emergit. Ergo &c.

Confirmatur. Enimvero eadem ipsæ partes corporeæ substantiæ, quæ simul junctæ constituunt *magnitudinem*, a se mutuo divisæ *multitudinem* efficiunt. Nullum autem *accidens absolutum* producit in substantia, dum ejus partes vel junguntur inter se, si antea erant a se mutuo separatæ, vel a se mutuo reipsa separantur, si antea erant simul junctæ. Ergo neutra *quantitas* est *accidens absolutum*.

Solvuntur argumenta in oppositum.

I.

47. *Opponitur primo*. Ex Aristotele, *magnitudo* non est *substantia*. Ait enim: *longitudo, latitudo, & profunditas quantitates quedam sunt, non substantia* (a). Ergo *quantitas* realiter a *substantia* distinguitur.

R. *primo*, concedendo *ans*, & negando *consequentiam*. Neque enim Aristoteles is est, qui nec falli possit, nec fallere. Dabunt itaque Recentiores, si ita placet Scholasticis, traditam fuisse ab Aristotele distinctionem *quantitatis* a *substantia*. At non dabunt propterea, licitum nemini esse, contra sentire. *Non enim equum est*, inquit Cl. Melchior Canus, *ut apud Christi discipulos tantum ethnici unius auctoritas possit, ut etiam sine ratione vincat* (b).

R. 2. *disting. ans*: *magnitudo* non est *substantia* reipsa, nego *ans*; consideratione, concedo *ans*, & nego *conseq.* Docet ergo Aristoteles, *magnitudinem* non esse *substantiam*, non quia, ejus iudicio, *magnitudo* sit *entitas aliqua absoluta*, reipsa a corporea *substantia* distincta; sed quia dum consideratur *substantia*, quatenus præcise aliquod *extensum* est, certæque magnitudinis, physica ipsius substantiæ natura, nimirum an *lignum* sit, num vero *lapis*, prorsus negligitur. Profecto neque *unitas*, neque *multitudo* est *substantia*; & tamen nemo Scholasticorum contendet, *unitatem*, & *multitudinem* non consideratione solum, verum etiam re ab iis distingui, quæ *unum*, vel *multa* reapse sunt, atque dicuntur.

I I.

48. *Opponitur 2. ex S. Augustino*. Docet enim, aliud esse *magnitu-*

(a) Lib. VII. *Metaph.* tex. 8

(b) Lib. X. *de locis Theologicis* cap. 5.

tudinem, aliud substantiam, quæ magna nuncupatur. In rebus, inquit, quæ participatione magnitudinis magna sunt, quibus est aliud esse, aliud magnas esse, sicut magna domus, magnus mons, & magnus animus. In his ergo rebus aliud est magnitudo, aliud quod ab ea magnitudine magnum est, & prorsus non hoc est magnitudo, quod est magna domus. Sed illa est vera magnitudo, quæ non solum magna est domus, quæ magna est, & quæ magnus est mons, quisquis magnus est; sed etiam quæ magnum est, quidquid aliud magnum dicitur; ut aliud sit ipsa magnitudo, aliud ea, quæ ab illa magna dicuntur (a). Ergo &c.

R. 1. eodem modo, quo supra ad Aristotelem, videlicet aliud quidem esse, S. Augustini iudicio, *magnitudinem*, aliud *substantiam*; verum non *re*, sed tantum *cogitatione*, quatenus nempe in *essentiali* notione rei habentis *magnitudinem* non venit ipsa *magnitudo*, quemadmodum neque *unitas*, neque *multitudo* in eadem notione occurrunt; & vicissim in notione *magnitudinis*, spectatæ in abstracto, non veniunt *essentialia* ipsius rei attributa, sicuti hæc ipsa menti non refulcent, dum res tantum ut *una*, vel *multiplex* a nobis spectatur.

R. 2. *magnitudinem* esse aliud a re, quæ dicitur *magna*, non *absolutum* quidem, sed *modale*. Enimvero, cum omnino contingens sit, ut plures, paucioresve substantiæ partes simul copulentur, ac propterea ut modo majoris, modo minoris illa sit molis, sive *quantitatis*, relinquitur, *magnitudinem* quamlibet certam & determinatam, veluti corporeæ substantiæ *modum*, spectari a nobis posse; cumque *modus* dici queat aliud a re, cuius est *modus*, non immerito dixit S. Augustinus, *aliud esse magnitudinem, aliud ea, quæ ab illa magna dicuntur*. Ceterum *magnitudinem* non ita esse aliud, S. Augustini sententia, a corporea substantia, quæ *magna* per illam nuncupatur, ut eadem prorsus fuerit tanti Doctoris, quæ Scholasticorum, de *magnitudinis* natura, ejusque a corpore distinctione opinio, constabit profecto, si considerabimus, quomodo Vir ille summus *physicum corpus* definiat. Ita namque ipsum exprimit, deque eo ita loquitur S. Doctor, ut in *extensione*, quemadmodum deinde Cartesius, *formalem illius rationem* collocare videatur. Contra eos siquidem differens, qui rationalem animam ex *quinto* quodam corpore constare arbitrabantur, si, inquit, *qui hoc sentiunt, hoc dicunt corpus, quod & nos, id est, naturam quamlibet longitudine, latitudine, altitudine spatium loci occupantem, neque hoc est anima, neque inde facta credenda est (b)*. Agens itidem de animæ quantitate, ita Evodius interrogat: *prius*

F. 2

abs

(a) Lib. V. de Trinitate num. 11.
alias cap. 10.

(b) Lib. VII. super Genesim num. 27.
alias cap. 21.

abs te quæro, utrum corpus ullum esse putes, quod non pro modo suo habeat longitudinem, latitudinem, & profunditatem..... Si hoc de mus corporibus, quantum mea opinio est, neque sentiri possunt, neque corpora recte existimari (a). Nisi ergo velimus, quod absit omnino, S. Augustinum non ubique sibi metipsum consentire, dicamus oportet, ipsum, cum dixit, aliud esse magnitudinem, aliud ea, quæ ab illa magna dicuntur, non re, sed tantum cogitatione inter corpus, ejusque magnitudinem discrimen posuisse.

I I I.

49. *Opponitur 3. Certum est, magnitudinem constituere prædicamentum diversum a prædicamento substantia. Prædicamenta autem realiter distinguuntur inter se. Ergo magnitudo a substantia non cogitatione solum, sed re distinguitur.*

R. primo, hoc argumentum eo vitio laborare, quod Logici dicunt petitionis principii. Dato namque, corporis magnitudinem peculiare prædicamentum constituere, assumi tamen nequit, tamquam certum & evidens, prædicamenta realiter discriminari inter se, nisi pro comperto habeatur, quod ex hoc principio demonstrandum assumitur, magnitudinem scilicet corporis ab ejus substantia re ipsa distingui. Certum quippe est, argumentum ab inductione desumptum, id unum necessario postulare, ut de partibus, seu membris singulis illud primo demonstretur, quod denuo de omnibus in conclusione enunciatur. Ergo vel peccat vitio imperfectæ enumerationis, qui ex demonstrata aliquorum dumtaxat prædicamentorum reali distinctione absolute infert, omnia hoc modo inter se distingui; vel culpa petitionis principii non caret, qui ut evincat realem distinctionem quantitatis a substantia, assumit veluti notum ex suis terminis, omnia prorsus prædicamenta inter se hoc modo discriminari.

R. 2. concedi posse, magnitudinem re ipsa distingui a substantia, propterea quia prædicamenta realiter distinguantur inter se, & magnitudo peculiare prædicamentum constituat, quin inferre idcirco liceat, quod dumtaxat hoc loco negamus, magnitudinem scilicet esse accidens absolutum in sensu Scholastico. Id namque si colligi ex illis principiis posset, nedum quantitas discreta, spatium, & tempus, sed etiam relatio, ubi, quando, & situs essent accidentia absoluta; cum singula ejusmodi attributa, æque ac magnitudo, peculiare prædicamentum.

(a) Lib. de quantitate Animæ num. 6.,
alias cap. 4.

mentum, ut omnes norunt, constituent. Itaque non aliud, ut recte habeat Cl. Du-Hamel, hoc argumento efficitur, quam id ipsum, quod ultro concedimus, quantitatem scilicet formaliter, & logice distinguere a corpore, aut esse novum prædicamentum; est enim id, quod respondetur, cum quaritur, quantum quidque sit; est denique accidens metaphysicum, non physicum (a).

I V.

50. Opponitur 4. ex Cl. P. Amort: potest dari spatium imaginarium cum trina dimensione saltem per conceptum, quin detur corpus. Ergo corpus, & extensio non sunt idem (b).

R. disting. cons: corpus, & extensio positiva non sunt idem, nego consequ. corpus, & extensio negativa non sunt idem, concedo consequ. At quid inde sequatur contra identitatem quantitatis cum substantia, quam ille hoc argumento impugnandam assumit, plane non video. Fateor, dari spatium, quod vocant imaginarium, illudque non esse corpus; cum non sit aliquod reale positivum, sed purum nihil: quod tamen, ut egregie dixerat Gassendus, instar corporearum, quæ in sensum cadunt, dimensionum imaginamur (c), quatenus nempe extensa, divisibilis, & mensurabilis substantia in illo existit, eique quodammodo commensuratur. Verum sicuti hinc non sequitur, extensionem realem, & positivam, qua corporea substantia prædita est, (undeunque demum ea derivetur) ab ipso imaginario spatio neutiquam esse diversam; ita inferri nullatenus potest, positivam illam extensionem, quemadmodum ipsum spatium, a corporea substantia realiter distinguere. Molesto autem ne ferat animo Cl. P. Amort, si dixerim, hoc suum argumentum cum iis, quæ de interminatis materiæ dimensionibus ipse antea tradiderat, minime posse componi. Ita namque probat, materiam habere dimensiones interminatas: si ex materia fit corpus, eo ipso est extensa. Sed ex materia fit corpus. Ergo est extensa. Major probatur: si ex materia fit corpus, tunc est corporea, & corpus. Sed si hoc, tunc est extensa. Ergo. Major patet; quia ex incorporea non fit corpus, nec ex non corpore corpus (d). Jam vero ut hæc ratio rem conficiat, necesse est, materia prima sit extensa non per accidens absolutum, realiter ab ipsa distinctum, eique superadditum, sed ex se; quippe si secus, haud recte inferret Vir Cl., materiam propterea esse extensam, quia sit corporea, & corpus; quemadmodum

(a) Tom. III. Philosoph. ad usum Burgundiae Tract. I. Dissert. II. q. 2.

(b) Philosoph. Polling. P. III. Physices Generalis Sect. I. q. 2.

(c) Sect. I. Physices lib. II. cap. I.

(d) Philosoph. Polling. P. II. Physices Sect. II. q. 5.

modum ex hoc, quod sit corporea, colligi nequit, ipsam esse albam; cum scilicet albedine carere illa possit, quin desinat esse corporea. Id autem ex illa ratione confirmatur, qua assertionem suam ipse postremo demonstrat. Ait enim: *si detractis omnibus reliquis proprietatibus, in materia adhuc remanet extensio saltem indefinita, tunc est (extensio) de essentia materiae. Sed. Ergo.* Minor prob. quando v. g. a lapide separamus rotunditatem, duritiem, colorem, adhuc tamen remanet extensio, & hac ablata, nihil omnino remanet quoad nostrum modum concipiendi. Ergo &c. (a). Igitur, si extensio est de essentia materiae, tantum abest, materiam carere posse omni extensione, ut sine illa ne concipi quidem valeat; ac proinde tam longe a vero est, extensionem esse accidens physicum absolutum materiae, quin potius formalis materiae ratio in ipsa extensione cum Cartesio statuenda videatur. Neque demum aliud evincunt auctoritates Aristotelis, & Averrois, quas pro sua de interminatis materiae dimensionibus stabilienda opinione recenset Vir ipse Cl. Refert enim inter alia, profecto non pauca, haec tradi ab Aristotele: *cum terminus, & affectiones globi detracta fuerint, nil relinquitur praeter materiam.* Haec vero ab Averro: *quoniam (Aristoteles) invenit, omnes formas communicari in dimensionibus nondum terminatis per formam, intulit, quod prima materia nunquam denudatur a dimensionibus non terminatis; quia si denudaretur, tunc corpus fieret ex non corpore, & dimensio ex non dimensione; & sic formae corporeitatis essent contrariae, & sibi succedentes in materia, sicuti de facto loquimur de formis substantialibus.* Igitur ex Aristotele, & Averro, ipsiusmet Cl. Viri sententia, extensio ad materiae essentiam pertinet; & ideo sibiometipso ille non consentit, dum, corporum quantitatem non discernens ab eorum extensione, aperte deinde docet, a corporea substantia eam realiter distingui.

V.

§ 1. *Opponitur ultimo: fidei doctrina est, in venerabili Eucharistiae sacramento manere quantitatem panis, non superstitere illius substantia. Si hoc, minime dubitandum videtur, quantitatem esse accidens absolutum in sensu Scholastico. Ergo &c.*

R. *nego maiorem.* Nullibi enim definitum legitur, in venerabili Eucharistiae sacramento ita haberi eandem ipsam quantitatem, quae ante consecrationem fuit in substantia panis, ut eadem numero entitas physica, in qua formaliter, ut ajunt, quantitas ipsa posita est, super-

(a) Loco citato.

perstes maneat. Nisi enim ostenderint Scholastici, hoc sensu definitum fuisse ab Ecclesia, *quantitatem* panis in Eucharistia remanere, nihil plane habent ex hoc capite, de quo contra Recentiores jure gloriantur. Sicuti namque vulgo dicitur, duo ligna palmaris longitudinis esse *ejusdem quantitatis*, non quia eadem numero *entitas realis*, & *physica* in utroque sit, sed tantum quia eorum dimensiones sunt æquales; ita dicere poterit non nemo, eandem panis *quantitatem* in Eucharistia manere, non quia eadem numero *entitativa extensio* substantiæ panis post consecrationem remaneat; verum quia *species* panis, quæ remanent (quæcunque demum sit *physica* illarum natura) dimensiones habent iis omnino æquales, quæ in panis substantia ante consecrationem habebantur. Dixit quidem Ecclesia, post hostiæ consecrationem manere *species* panis, non amplius existente *ejusdem* substantia; verum quid *specierum* nomine intellexerit, nullibi ab ea, ut fuse suo loco dicemus, traditum est, quemadmodum nullibi quoque ab ea est definitum, sub *specierum* nomine etiam *quantitatem* comprehendendi. Ceterum, velint, nolint, fateri debent Scholastici rigidiores, vel identitatem *quantitatis* cum substantia a nobis assertam ne levissime quidem doctrinæ Catholicæ de venerabili Eucharistiæ sacramento adversari; vel quamplures Viros æque pios, ac doctos perperam quoque de hoc sacramento sentire. Hæc enim in primis habet Petrus de Alliaco S. R. E. Cardinalis, & Episcopus Cameracensis, qui floruit sæculo XV. Quærens, *utrum in Eucharistia accidentia panis maneat in subiecto*, inquit: primo fuit quorundam opinio, quod *quantitas* potest esse sine subiecto, sed *qualitas* corporalis non, quoniam non potest esse sine *quantitate*, cum necessario sit *extensa*; & secundum istam viam posset imaginari, quod *quantitas* panis est hic sine subiecto; alia vero accidentia sunt in ea tamquam in subiecto. Sed hæc est falsa; quia nulla ponenda est *quantitas* distincta a substantia, vel *qualitate* (a). Idipsum docuere Aureolus, Ochamus, Gabriel, Major, Adamus, & Albertus de Saxonia, si Cl. P. Suarezio fidem habenda est. Hoc enim teste, communis illorum omnium opinio fuit, constansque sententia, *quantitatem* molis non esse rem distinctam a substantia, & *qualitatibus* materialibus; sed unamquamque earum *entitatum* per seipsam habere hanc molem, & *extensionem* partium, quæ est in corporibus; sed illammet *entitatem* vocari materiam v. g., quatenus est *substantiale* subiectum; vocari autem *quantitatem*, quatenus habet partium *extensionem*, ac *distinctionem*, idemque proportionaliter dicunt de formis, & *qualitatibus* materialibus. Unde inferunt, in unoquoque com-

posi-

(a) In IV. Sententiarum q. 6. artic. 3.

posito materiali tot esse quantitates, quot sunt entitates materiales realiter distinctae, quae ita possunt se se penetrare, sicut ipsamet entitates (a). Celeberrimus quoque Melchior Canus Ord. Prædicatorum, Episcopus Canariensis, qui seculo XVI. doctrina maxime claruit, dolens extrema quorundam Theologorum vitia in usu Philosophiæ, quis, inquit, ferre potest disputationes illas de universalibus, de nominum analogia, de primo cognito, de principio individuationis, de distinctione quantitatis a re quanta Puderet me dicere non intelligere, si ipsi intelligerent, qui hæc tractarunt (b). Hisce addendi sunt ii omnes Scholastici, præcipue e schola Scotistarum, qui corporum quantitatem non in entitativa illorum extensione, sed in ipsorum impenetrabilitate statuendam censent ob id potissimum, quod extensio non sit accidens absolutum a corporea substantia realiter distinctum, sed substantia ipsa sit ex se, omni scilicet absoluto accidente secluso, entitative extensa. Sic enim contra illos argumentum conficitur: identitas extensionis cum substantia corporea vel officit doctrinæ Ecclesiæ de venerabili Eucharistiæ sacramento, vel non officit. Si officit: ergo ipsi quoque, æque ac Recentiores, rei sunt violatæ fidei. Si non officit: ergo injuste prorsus notam hanc Recentioribus inurunt; cum quantitatis nomine non aliud, nisi entitativam substantiæ extensionem illi intelligant, dum ajunt, quantitatem a corporea substantia reipsa non distingui. Neque enim futurum aliquem puto, qui velit, quantitatem corpoream minime posse, salva fide, in extensione collocari. Non est igitur, cur ad sacram Religionis anchoram confugiant Scholastici, ut suam de reali distinctione quantitatis a re quanta sententiam tueantur.

S C H O L I O N.

52. Doctore Subtili, cujus firmioribus rationibus adversus veteres, & recentiores præsertim Philosophos Philosophiam Peripateticam ab se propugnandam promittit, apertè adversatur Cl. P. Ferrari, dum se minime iis assentiri posse, ait, qui quantitatis naturam in ipsa tantum extensione constituunt, propterea nimirum quia, inquit ipse, id cuique corporeæ rei proprium sit, & notionem illam corporis faciat, qua a spiritu secernitur per partium integralium pluralitatem (c). Primo namque constans Scoti sententia est, quantitatem continuam permanentem in extensione consistere. Dico siquidem, ait Scotus, quod positio, quæ est

(a) Disp. XL. Metaph. Sect. 2.

(b) Lib. IX. de locis Theolog. cap. 7.

(c) Tom. I. P. I. Logicæ Sect. I. cap. 6. pag. 60.

est differentia quantitatis, necessario inest quanto continuo permanenti; & istam oportet salvare in proposito, scilicet, quæ dicit ordinem partium in toto. Non est enim bene intelligibile, aliquod esse quantum dimensionatum, quin sit signare in toto ordinem hujus partis ad illam secundum quantitatem, vel positionem interjacentem. Positio autem, quæ ponitur prædicamentum a quibusdam, aliud addit. Præsupposito enim ordine partium in toto, positio dicit ultra hoc ordinem partium ad locum, sive ad partes loci, vel locantis, hoc est dictum, quod partes coextendantur partibus loci, sicut totum dicitur primo commensurari toti loco, in quo habet ubi, ita quod positio prædicamentum præsupponit positionem differentiam quantitatis, & specificat ubi. Per modum autem quantitativum, sive dimensionivum, quocunque modo nominetur, non intelligo, nisi positionem dictam secundo (a). Unde Cl. P. Hiquæus hæc Subtilis Doctoris verba exponens, ait, ab illo tradi I. essentiam quantitatis consistere in ordine partium in toto, seu in ordine ad se invicem in toto, loquendo de quantitate continua, quæ est sententia communis. II. positionem in ordine ad locum superaddere coextensionem ad partes loci. III. possibilem esse separationem hujus extensionis ab illa (b). Secundo: quia stando doctrinæ Scoti, dicere nequit P. Ferrari, extensionem entitativam ita propriam esse substantiæ corporeæ, ut ab illa realiter non distinguatur, nisi etiam dicat, impenetrabilitatem eodem modo ipsi substantiæ competere; atque hinc quantitatem corpoream, utpote ab impenetrabilitate, ejus judicio (c), minime diversam, ab ipsa eadem substantia realiter non distingui. Docet enim Scotus, dimensionem, sive extensionem entitativam esse rationem, quamobrem duo corpora nequeant simul esse in eodem loco virtute naturali, quæ non potest facere causam sine suo effectu naturali (d). Argumentum quoque approbat, quo per rationem, ut ipse ait (e), divisivam objectum fuerat in quæstionis limine, impenetrabilitatem corporum ex sola eorum extensione provenire. Ad illud quippe argumentum respondens, dico, inquit, quod verum est, quod non invenitur aliud, quod sit causa illius repugnantie, nisi dimensio (f). Igitur, cum Cl. P. Ferrari in eo statuatur (g) corporum quantitatem, quod est ratio, sive causa, cur duo corpora in eodem simul loco esse non possint, debet vel refragari Scoto, vel quantitatem ipse quoque in extensione collocare. At ve-

G

ro,

- (a) In IV. Sententiarum Distin. 10. q. I. num. 14. (d) In IV. Sententiarum Distin. 49. q. 16. num. 6.
 (b) Comment. ibidem. (e) Ibidem num. 3.
 (c) Tom. I. P. I. Logicæ Sect. I. cap. 6. pag. 60. (f) Ibidem num. 7.
 (g) Tom. I. P. I. Logicæ Sect. I. cap. 6. pag. 60.

ro, nisi inconstantia tunc arguatur, necesse est, dicat, *quantitatem a corporea substantia realiter non distingui, neque esse accidens absolutum in sensu Scholastico; cum extensio, ut ipse tradit, propria sit cujusque rei corporeæ, & notionem illam corporis faciat, qua a spiritu secernitur, five, ut apertius docet alio loco (a), essentia corporis consistat in extensione ejusdem corporis in ordine ad se, nempe in extensione entitativa. Equidem scio, P. Ferrari non jurasse in verba Scoti; non unus enim locus est, in quo ille ab Scoti doctrina manifeste recedit. Hæc tantum dixi, ne cui, ut facile est, fucum faciat titulus, quo Philosophiam suam ipse inscripsit.*

COROLLARIUM.

53. Ex modo ostensa identitate *quantitatis* cum *substantia corporea*, manifeste apparet, eorum opinionem corruere, qui *sensibiles corporum qualitates ex mechanicis affectionibus non quidem substantiæ corporeæ, sed quantitatis derivant.* Si namque nulla plane sit *extensio solida a corporea substantia realiter distincta, eique inhærens, quæ, destructa ipsa substantia, conservari divinitus possit, nullum sane subiectum superest ab substantia diversum, ex quo mechanicè modificato qualitates corporum sensibiles valeant derivari.* Unde necesse est, vel dicamus cum Scholasticis, *sensibiles corporum qualitates esse accidentia absoluta, apta divinitus ad existendum sine substantia, quam afficiunt, vel qualitates ipsas ex mechanicis materiæ affectionibus cum Recentioribus repetamus.*

PROPOSITIO II.

Nulla corporis affectio est entitas extensa quoad se, & natura sua impenetrabilis.

54. *Probatur.* Si qua enim affectio corporis esset *entitas quoad se extensa, & natura sua impenetrabilis, ea esset corpus.* Est enim corpus quidquid *entitative* extensum est, & tactui resistit (§. 19.). Repugnat autem, ut est perspicuum, affectionem corporis esse corpus. Ergo &c.

Dices, *entitativam extensionem, & naturalem impenetrabilitatem efficere quidem, ut affectiones corporis, quæ entitative extensæ sunt,*
&

(a) Tom. II. P. I. *Physices* Disp. III. q. 2.
pag. 181.

& impenetrabiles sint *materiales*, sive *corporeæ*; minime vero ut sint *materia*, seu *corpus*, quod nempe ad *corporis* rationem requiratur præterea, ut quod *extensum* est & *impenetrabile*, sit *substantia*.

Sed contra. Nam *primo* Christus Dominus tunc haud recte ostendisset discipulis suis, se post resurrectionem verum corpus habere ex hoc, quod etiam tunc tactui resisteret (a). Si namque non omne, quod resistit tactui, corpus est, profecto ejusmodi resistentia nequit esse medium, ex quo existentia corporis legitime colligatur. Sequeretur *secundo*, S. Augustinum falso appellasse corpus, *quidquid per loci spatia distenditur* (b), nempe *quidquid extensum* est; atque ex hac notione perperam collegisse, animam rationalem non esse corpus, cum ait, *si hoc dicunt corpus, quod & nos, naturam quamlibet longitudine, latitudine, altitudine spatium loci occupantem, neque hoc est anima* (c); cum illa, utpote *entitative inextensa*, locum hoc modo non occupet. *Tertio*: quia si *extensio*, & *impenetrabilitas* sint ratio, quare affectiones corporis sint *materiales*, nulla erit affectio materialis, quæ non sit *entitative extensa*, & *impenetrabilis*, quemadmodum, quia *perfecta* est ratio, ut Scholastici ipsi ajunt, cur *ens* sit *substantia*, nihil potest esse *substantia*, nisi per se existat. Igitur *motus*, *figura*, *situs*, ceteræque *modales* corporum affectiones, utpote *materiales*, erunt *extensa quoad se*, & *impenetrabiles*: quod quam falsum sit, ipsorummet Scholasticorum judicium esto. *Postremo*: convenit modo inter Philosophos (§. 19.) *entitativam extensionem*, & *impenetrabilitatem naturalem* ita inesse corpori, ut vel in illis posita sit *ratio formalis* ipsius corporis, vel omni & soli corpori ipsæ competant. Jam vero si hoc, nulli *enti* illæ inesse queunt, nisi illud sit corpus, quemadmodum haud dissimili ratione, ut Scholastici ipsi dicunt, nulli competere potest *perfectitas*, quin sit *substantia*, nulli *risibilitas*, quin sit *homo*. Ergo nulla corporis affectio esse potest *entitative extensa*, & *impenetrabilis*, quin nedum *corporea*, sed vere & proprie ipsa sit *corpus*.

Confirmatur assertio. Si enim aliqua affectio corporis esset *entitas extensa quoad se*, & *impenetrabilis*, cum ejusmodi sit etiam ipsa corporis *substantia*, plura *entitative extensa*, & *impenetrabilia* eundem simul locum, ut patet, occuparent. Repugnat autem, ut plura *entitative extensa*, & *impenetrabilia* in eodem simul loco viribus naturæ existant. Contradictio enim est, ut *naturaliter* penetrentur inter se, quæ natura sua sese mutuo penetrare non possunt. Ergo

G 2

nulla

(a) Lucae cap. XXIV. v. 39.

(b) Lib. VIII. super Genesim num. 43.
alias cap. 22.(c) Ibidem lib. VII. num. 27., alias
cap. 21.

nulla corporis affectio potest esse *entitas extensa quoad se*, & ex ipsa sua natura *impenetrabilis*.

Dices, integrales partes unius corporeæ affectionis non posse quidem penetrari inter se, bene vero cum partibus integralibus tum substantiæ, quam afficiunt, tum alterius affectionis *specie* diversæ. Nihil enim *impenetrabile* cum alio est, nisi ejusdem ambo sint naturæ.

Sed contra: etenim *primo* affectiones corporis vel ideo sunt natura sua *impenetrabiles*, quia *materiales*, adeo nimirum ut *materialitas* sit veluti ratio, cur sint *impenetrabiles*, vel non. Si non: ergo nulla affectio corporea est *entitas* natura sua *impenetrabilis*; hoc siquidem munere *materialitati* denegato, nihil profecto, ut patet, superest aliud, cui corporearum affectionum *impenetrabilitas* possit accepta referri. Si vero *materialitas* sit ratio, cur affectiones corporis sint *impenetrabiles*, necesse est, ut non tantum partes integrales unius ejusdemque affectionis, verum etiam, ut integrales partes affectionum *specie* dissimilium neque inter se, neque cum partibus substantiæ corporeæ valeant penetrari. Hac enim admissa causa *impenetrabilitatis*, necessario sequitur *primo* duas quaslibet *entitates*; hoc ipso præcise, quod sint *materiales*, in eodem simul loco viribus naturæ componi non posse, idemque spatium occupare; sicuti quia physica compositio est ratio *corruptibilitatis*, stat, hoc ipso quod duo *physice* composita sint, ut ea, quantumcunque inter se diversa, ex ipsa sua natura corrumpi naturaliter possint, atque perire. Sequitur *secundo*, nullam corporis affectionem posse *intensivè*, ut ajunt Scholæ, augeri. Certum est enim, hoc augmentum, si affectio ipsa sit *entitas extensa*, & *impenetrabilis*, fieri non posse, nisi per ejusmodi gradus, quorum quilibet sit *entitas* ex se itidem *extensa*, & *impenetrabilis*. Certum est etiam, omnes gradus ejusdem affectionis esse plane similes inter se, quemadmodum ejusmodi sunt partes illius integrales. Ergo, si duæ partes integrales ejusdem corporeæ affectionis ideo nequeunt sese mutuo penetrare, quia natura similes, neque duo ejusdem affectionis gradus tolerare eadem ratione penetrationem poterunt; ac proinde nulla corporis affectio ex genere *qualitatis* poterit *intensivè* augeri. Hoc autem experientiæ plane contrarium est. Ergo eadem quoque adversatur, corporeas affectiones esse *entitates extensas quoad se*, & natura sua *impenetrabiles*.

COROLLARIUM.

55. Nullum accidens absolutum, si quod datur in corporibus, est entitas extensa quoad se, & natura sua impenetrabilis. Omne enim ejusmodi accidens, si quod in corporibus existit, ita determinat corpus, in quo est, ut nonnisi tamquam illius affectio haberi queat.

SCHOLION I.

56. Quibus rationibus ostensum modo est, nullam corporis affectionem esse entitatem quoad se extensam, & natura sua impenetrabilem, iisdem ipsis confirmatur, quod de corporis magnitudine antea diximus, eam scilicet non esse entitatem reipsa distinctam a substantia corporea, neque ex illa mechanice modificata posse affectiones corporum sensibiles jure desumi. Qui namque corpoream magnitudinem a corporea substantia realiter distinguunt, eam concipiendam volunt tamquam entitatem, quæ sit extensa quoad se, & natura sua impenetrabilis.

SCHOLION II.

57. Nullam corporis affectionem esse entitatem quoad se extensam, propterea quia ejusmodi illa esse non possit, nisi vere proprieque sit corpus, non inficiabitur P. Ferrari; quippe qui non solum docet, essentiam corporis consistere in extensione ejusdem corporis in ordine ad se (a), verum etiam aperte tradit, accidens absolutum esse corpus. Respondens namque Recentioribus, contendentibus, nullum dari accidens absolutum, quia entitas hujusmodi neque sit corpus, neque spiritus, & omne ens sit aut corpus, aut spiritus, concedo, inquit, entitatem illam accidentalem esse corpus, prout corpus universim accipitur, & a spiritu secernitur per partium pluralitatem (b). Negat tamen Vir Cl., illam accidentalem entitatem esse corpus completum, & substantiale, nec esse materiam primam, quoniam hæc ultra notionem corporeitatis præ se fert etiam potentialitatem, & rationem substantiæ. Quamobrem (concludit) cum ens dividitur in corporeum, & in spirituale, notio corporei unice præ se fert pluralitatem partium integralium (c).

Ægre tamen ne ferat Cl. Auctor, si doctrina hæc sua neque cum Philosophia, neque cum sancta Religione componi posse, non nemi-

(a) Tom. II. P.I. Physicæ Di p. III.
q. 2. pag. 181.

(b) Ibidem Disp. IV. q. 2. pag. 220.

(c) Ibidem.

ni videatur. Et primo ad Philosophiam quod attinet, cum ex Porphyrii arbore, quam ipsemet Vir Cl. contra frigida, quemadmodum ea ipse appellat (a) Gassendi, & Purchotii commenta, aperte tuetur (b), omne corpus sit substantia, non potest accidens absolutum esse corpus, quin etiam sit substantia, sicuti nihil potest esse animal, quin, ut constat ex eadem arbore, sit vivens: quo certe nihil in Philosophia absurdius, nihilque magis veritati repugnans. Quod vero spectat ad Religionem, sequitur ex hac doctrina, in venerabili Eucharistiæ sacramento haberi corpus panis, ejusque proinde etiam substantiam, una simul cum Corpore Christi. Manent quippe post consecrationem accidentia panis absoluta; ergo, si illa sunt corpus, maneat corpus panis post consecrationem, consecrarium est. Dicit fortasse Cl. Auctor, in pane, sicuti & in quovis alio composito naturali, duplex haberi corpus, alterum scilicet substantia, quod in Christi Corpus, vi consecrationis, convertitur; alterum accidentium, quod, consecratione peracta, superstes manet. Verum, omisso, hanc corporum dualitatem hactenus invisam fuisse, & rationi repugnare, monito tantum, apertam hinc ansam dari sectariis, irridendi catholicum transubstantionis dogma, quasi nempe hoc duplex corporis genus, non nisi illius dogmatis gratia, a Catholicis fingatur. Non est præterea, hac posita doctrina, cur ille Cartesium criminetur, quod a veritate deflexerit (c), cum scripsit, nihil reale posse intelligi remanere (in Eucharistia) nisi quod subsistat, & quamvis verbo vocetur accidens, concipi tamen, ut substantiam; ideoque in re idem esse, ac si diceretur, totam quidem panis substantiam mutari, sed tamen illam ejus substantiæ partem, quæ vocatur accidens reale, remanere: quod si non in verbis, certe in conceptu contradictionem involvit (d). Non est, inquam, cur laudatus Vir Cl. Cartesium propterea erroris acerbè insimulet. Nam, si absoluta Scholasticorum accidentia sunt corpus, dicendum necessario est, id, quod panis remanet in Eucharistia post consecrationem, quamvis verbo vocetur accidens, revera tamen esse substantiam; ut proinde in re idem sit, ac si diceretur, ut ait Cartesius, totam quidem panis substantiam mutari, sed tamen illam ejus substantiæ partem, quæ vocatur accidens reale, remanere; quod si non in verbis, certe in conceptu contradictionem involvit. Unde non immerito dixit Purchotius, communem Scholarum opinionem, quæ ponit, quantitatem corpoream concipiendam a nobis esse ut entitatem a materia, seu

cor-

(a) Tom. I. P. I. Logicæ Sect. I.
cap. 4. pag. 54.

(c) Ibidem.

(c) Tom. II. P. I. Physicæ Disp. IV. q. 1.
pag. 196.

(d) Respons. ad quartas objectiones.

corpore secretam, errore aliquo, sin minus in verbis, aut in voluntate, certe in percipiendi modo non carere; & aliquid substantiale (dixisset corpus, si nunc viveret, sibi que compertum esset, quod nuperrime tradidit laudatus Auctor) quod prius fuerat, post verba consecrationis in hostia consecrata relinquere, quod contra fidem est (a). Peccat demum Vir Cl. in illis postremis verbis: cum ens dividitur in corporeum, & in spirituale, notio corporei unice præ se fert pluralitatem partium integralium. Etenim vel sumit ens corporeum pro corpore, vel generatim pro omni eo, quod aut corpus est, aut corpus afficit. Si primum: ergo modales saltem corporis affectiones non sunt ens, quia non sunt corpus; sibi que propterea ille contradicit, dum eas etiam affectiones inter prædicamenta recenset, docetque, in prædicamentorum serie minime constitui illa attributa, quorum nulla est realis essentia (b). Sin alterum: ergo perperam statuit essentiam corporis in extensione, qua pluralitatem partium importat (c); cum rei cuiusvis essentia in iis tantum attributis constitui jure possit, quæ illi uni, semperque conveniunt.

Sed non hæc tantum sunt, in quibus a vero aberrare videtur Cl. P. Ferrari, dum ardore nimio (absit verbo invidia) in Recentiores invehitur, eorumque placita insectatur. Quærens enim Vir Cl., utrum essentia corporis consistat in extensione in longum, latum, & profundum juxta Cartesi sententiam, aliorumque Philosophorum (d), primo Cartesium irridet, quod geometricas opiniones in Physicam inscite transferens, (illius sunt verba), sententiam Phytagoræ, Epicuri, & Stoicorum statuentium essentiam corporis in extensione, adoptaverit (e). Hanc quippe omnino falsam esse, ait, & cum ipsa naturali ratione pugnare (f). Refert secundo opinionem eorum, qui non quamlibet extensionem corpus esse docent, sed corporis essentiam in ea extensione constituunt, quæ actualis est, & formalis, partiumque pluralitatem præ se fert (g); tum licet dicat Vir Cl., moderationem hanc in plerisque Cartesianis sibi placere quammaxime, utpote quæ (ait ipse) sinceram ab illis confessionem exprimat, qua se & a Cartesio alienos profitentur, & falsitatis arguant ideas ab eo propositas (h); contendit tamen, ne ipsos quidem recte de corporis natura sentire, aperte scilicet negans essentiam corporis consistere in extensione actuali, quæ partium pluralitatem præ se fert (i). Bona igitur tanti Viri venia, dico, ipsum

(a) Tom. II. P. I. Physicæ Sect. I. cap. I.

(b) T. I. P. I. Logicæ Sect. I. cap. 5. pag. 55.

(c) Tom. II. P. I. Physicæ Disp. III. q. 2. pag. 181.

(d) Ibidem q. 1. pag. 164.

(e) Ibidem.

(f) Ibidem pag. 165.

(g) Ibidem.

(h) Ibidem.

(i) Ibidem pag. 170.

sum in hoc negotio non satis sibi constare, imo adversari apertissime. En quippe, quod ille sentit de *corporis* natura, fuisset verbis expressum: *est*, inquit, *assertio nostra, essentiam corporis consistere in extensione ejusdem corporis in ordine ad se, quæ extensio pluralitatem partium importat* (a). Approbat ergo Vir Cl., quod paulo antea in Cartesio, ejusque asseclis tam acerbe irriserat. Sed Cartesium ipsum audiamus, ut hinc liberum cuique sit judicare, num ego laudato Viro Cl., an vero ille Cartesio imponat. *Sensuum præjudicia deponentes, & solo intellectu ad ideas illi a natura inditas attendentes*, inquit Cartesius, *percipiemus, naturam materiæ, sive corporis in universim spectati non consistere in eo, quod sit res dura, vel ponderosa, vel colorata, vel alio aliquo modo sensus afficiens, sed tantum in eo, quod sit res extensa in longum, latum, & profundum* (b). Do equidem Cl. Adversario, in eo peccasse Cartesium, quod *spatium a corpore*, sive *extensionem negativam a positiva* non distinxerit; at simul opinor, Cartesii sententiam de *corporis* natura haud recte ex hoc capite ab eo impugnari. Enimvero vel necessario repugnare debet, iudicio P. Ferrari, *negativa extensio spatii*, ut *essentia corporis in extensione* statuatur, ne scilicet, ea admissa, detur *extensio*, quæ non sit *corpus*; vel, ut in *extensione* jure collocetur *essentia corporis*, minime requiritur, *negativa extensio* repugnet. Si primum: ergo, cum ille quoque doceat (c), *vacuum per Dei virtutem esse possibile*, nempe *negativam extensionem* non repugnare, contra seipsum rem agit, dum *corporis* essentiam in *extensione* constituit. Sin alterum: ergo omnino falsam, & cum naturali ratione pugnantem Cartesii sententiam ille haud recte propterea appellat, quia *vacua extensio*, secus ac Cartesius doceat, non repugnet. Eo siquidem vitio tunc peccat Vir Cl. quod a Logicis *ignoratio elenchi* nuncupatur. Nam id, quod revera ille impugnat, aliud est omnino ab eo, quod impugnandum assumit. Assumit enim demonstrandum, peccasse Cartesium, dum dixit, in eo positam esse *essentiam corporis*, quod sit *res extensa in longum, latum, & profundum*. At re non demonstrat, nisi ipsum errasse, dum *corpus a spatio* nequaquam distinxit.

Dicet forte Cl. Adversarius, vitio ab se non verri Cartesio, quod *corporis* essentiam statuerit in *extensione interna*, ut ajunt, sive *entitativa*; sed quod in *extensione externa*, sive *locali* illam collocaverit.

Verum contra est. Etenim primo stat adhuc, Cartesii sententiam illegitime prorsus ab ipso ex eo oppugnari, quod *spatium a corpore* non

(a) Loco citato q. 2. pag. 181.

(b) P. II. Princip. num. 4.

(c) Tom. II. P. I. Physicæ Disp. VIII. q. 4. pag. 344.

non satis distinxerint. Nemo quippe non videt, *corpus* differre perquammaxime a *spatio*, quamvis occupare *spatium extensum* ad *corporis* essentiam pertinere dicatur. Nescius quoque nemo est, non repugnare *spatium vacuum*, quamvis essentia *corporis* in eo consistat, quod sit res *localiter extensa*. Secundo: quia cum de *corporis* natura differens Cartesius, nullam prorsus duplicis illius *extensionis* mentionem fecerit, nonnisi temere dici posse videtur, in *externa* potius, quam in *interna extensione* essentiam *corporis* illum posuisse. Tertio: quia, cum Cartesius dicat, essentiam *corporis* in eo consistere, quod sit res *extensa*, videtur *entitativam extensionem* ille intellexisse, utpote per quam dumtaxat potest res vere & proprie dici *extensa*. Quarto: quia certum est, ut ex Laertio, & Plutarcho manifeste constat, de *interna extensione* loquutos fuisse Pythagoram, Epicurum, atque Stoicos, dum *corpus* per *extensionem* definiunt. Id enim dicebant *corpus*, quod *trifariam divisibile* est (a): quod sane nonnisi de *entitativæ extensionis* verum esse potest. Fatetur autem P. Ferrari, ut vidimus, Cartesium id ipsum sensisse de *corporis* essentia, quod illi docuerant. Ergo concedere quoque vel invitus debet, de *interna* itidem *extensione* Cartesium intellexisse. Quæro postremo a Viro Cl., an opinio eorum, qui, ut ipse ait, *non qualemcunque extensionem putant esse corporis essentiam, sed eam solum extensionem, quæ partes & partes reipsa præ se fert*, eadem sit cum sententia Cartesii, num vero ab illa diversa. Si dicat, illorum opinionem fuisse eandem cum opinione Cartesii: ergo falso ait, eos *non jam cum Cartesio* hac super re sentire; sibi que insuper falso blanditur, inquiens, *moderationem hanc in plerisque Cartesianis sibi placere quammaxime*, quia *sinceram ab illis confessionem* exprimat, qua se & a Cartesio alienos profitentur, & *falsitatis* arguunt *ideas ab eo propositas*. Si vero dicat, illorum opinionem ab Cartesii sententia differre, fateatur, necesse est, ipsos in *extensione interna* essentiam *corporis* posuisse; neque enim, ut puto, datur *tertia extensionis* species, quæ neque *localis* sit, neque *entitativa*, in qua recte illi potuerint *corporis* essentiam collocare. Jam vero si hoc, non video, quomodo Vir Cl., sibi manifeste non contradicat, dum horum opinionem ad trutinam revocans, ait, *essentiam corporis non consistere in ea extensione actuali, quæ partium realium pluralitatem præ se fert* (b); suam vero sententiam exponens, asserat, *essentiam corporis consistere in extensione ejusdem corporis in ordine a se, quæ extensio pluralitatem partium importat* (c). Cum enim sola *exten-*

H

sio

(a) Lib. I. de placitis Philos. cap. 12. (c) Ibidem q. 2. pag. 181.

(b) Tom. II. P. I. Physicæ Disput. III. q. 1. p. 170.

sio entitativa pluralitatem partium complectatur, ab eaque dependeat, relinquitur, entitativam eam esse extensionem, tum quam a corporis essentia ille excludit, tum quam pro essentia corporis ipse demum assumit.

Ne quid tamen dissimulem, quod Viro Cl. favere aliquo modo posse videatur, dicet nonnemo, *actuale* dumtaxat *extensionem* ab essentia corporis, illius sententia, excludi. Verum, si res penitus inspiciatur, fateri cogimur, neque hoc modo nodum solvi. Certum quippe arbitror, Virum Cl., ut nunc reliqui omnes Philosophi, nonnisi duplicem *extensionem* agnoscere, alteram scilicet *in ordine ad se*, alteram *in ordine ad locum*. Oportet distinguere, inquit ipse, *extensionem corporis in ordine ad se, & extensionem corporis in ordine ad locum* (a). Alterutram ergo *extensionem* necesse est ille intelligat nomine *extensionis actualis*; alterutram quoque Cartesius, dum corporis essentiam in *extensione* constituit. Ponamus, per *extensionem actuale* intelligi *extensionem quoad locum*. Vel igitur eandem intellexit Cartesius, vel non. Si eandem: ergo fallitur Vir Cl., dum putat, qui in *actuali extensione* collocant naturam corporis, non jam cum Cartesio sentire. Falso quoque sibi gratulatur, dum maxime gratum sibi esse dixit, illos a Cartesio sese alienos profiteri, & *falsitatis* arguere ideas, quas ille proponit. Si diversam: posuit ergo Cartesius essentiam corporis in *extensione quoad se*; & ideo, cum in eadem *extensione* ipse etiam Vir Cl. corporis essentiam constituat, sibi metipsum adversatur, dum approbat, quod, ut plane falsum, & rationi naturali contrarium, in Cartesio reliquerat. Quod si statuentes corporis naturam in *extensione actuali*, non *extensionem in ordine ad locum*, sed *extensionem in ordine ad se* illi intelligant, jam cum in eadem *extensione* & ipse Vir Cl. corporis naturam statuendam censeat, sibi nequaquam consentit, reprobans scilicet in Cartesianis illud ipsum, quod paulo post ipse quoque manifeste propugnat. Sed hac de re fortasse nimis. Verum, ut S. Hieronymi verba usurpem, *si culpa est respondisse*, quaeso Cl. Adversarium, patienter ferat: *multo major est provocasse* (b).

PRO.

(a) Tom. II. *Physices* Disp. III. q. 1. in respon.
ad quartam objectionem pag. 177.

(b) Epist. 105.

P R O P O S I T I O III.

*Nullum accidens absolutum, si quod hujusmodi in corporibus
admittatur, est natura sua sensibile.*

58. *Probatur.* Ut *accidens absolutum*, si quod hujusmodi detur in corporibus, sit natura sua *sensibile*, necesse est, valeat ex ipsa sua natura nerveas externorum sensoriorum fibras premere, vellicare, aliave ratione movere (§. 34.); cumque præstare id non possit, nisi ejus sit naturæ, ut illæ nervorum fibræ, dum ad eas appellit, ipsius impulsui resistent, perspicuum manet, *accidens* ipsum esse non posse natura sua *sensibile*, nisi itidem natura sua *solidum* sit, sive *impenetrabile*. Constat autem, nullum *accidens absolutum*, si quod hujusmodi detur in corporibus, esse natura sua *impenetrabile* (§. 55.). Ergo nullum ejuscemodi *accidens* est natura sua *sensibile*.

Dices: vel nulla sunt *absoluta accidentia* in corporibus, vel si qua sint ejusmodi, ea certe manent in venerabili Eucharistiæ sacramento, consecratione peracta. At si hoc, negari non potest, ea esse *sensibilia* ex se; cum in illo sacramento reipsa sentiantur, nihilque in eo sit, ex quo eorum *sensibilitas* repeti possit. Ergo vel nullum admittendum est *accidens absolutum*, vel si quod ejusmodi *accidens* admittatur, dicendum necessario est, illud esse natura sua *sensibile*.

R. neg. min. Dato enim, *sensibilitatem panis*, quæ habetur in venerabili Eucharistiæ sacramento, ex *absolutis accidentibus*, quæ in illo supersint, provenire, non propterea sequitur, dandum quoque esse, ejusmodi *accidentia* ex ipsa sua natura a nobis posse sentiri. Non enim in illo sacramento sentiuntur ex se, sed quia Deus ipse efficit omnipotenti sua virtute, ut a nobis sentiantur, quatenus nempe ita illa tunc conservat, ut non solum impediat, ne integrales eorum partes penetrentur inter sese, verum etiam efficiat, ut & incidentia corpora a se ipsis repellant, & nerveis sensoriorum nostrorum fibris, quibus applicantur, resistent. Itaque

C O R O L L A R I U M.

59. *Nihil, quod sit ex ipsa sua natura sensibile, est accidens absolutum in sensu Scholastico.* Si quod enim hujusmodi esset *accidens absolutum* in sensu Scholastico, aliquod *accidens absolutum*, secus atque modo demonstravimus, esset natura sua *sensibile*.

PROPOSITIO IV.

Compositum quodcunque naturale hoc ipso formaliter est sensibile, quod ex solidis corpusculis certa magnitudine, & figura affectis, certoque artificio simul intextis, motuque, aut quiete donatis intrinsecus coalescat.

60. *Probatur.* Naturale quodcunque corpus per id formaliter est sensibile, per quod habet formaliter, ut externis sensoriis applicatum, nerveas illorum fibras movere certa ratione valeat, easque premere, & vellicare (§. 35.). Id autem præstare potest corpus quodcunque naturale hoc ipso formaliter, quod ex solidis corpusculis certa magnitudine, & figura præditis, certo artificio simul intextis, certoque motu, aut quiete donatis intrinsecus componatur. Hoc enim ipso, quod ex solidis corpusculis constat, ejusmodi ipsum est, ut nervearum externorum sensoriorum fibræ illi, dum ad eas appellit, resistent. Hoc ipso vero, quod componentia ejusdem corpuscula inæqualem habeant magnitudinem, dissimilem figuram, diversum situm, & ordinem inter se, moveantur quoque, aut quiescant, sequitur, corpus ipsum ita respondere omnium externorum sensuum organis, ut non solum in omnibus, tametsi dissimilibus, valeat, dum illis applicatur, aliquam impressionem efficere; verum etiam ut uni eidemque sensorio dissimiles motus communicare optime possit; quippe, inquit Cl. Villis, quoniam corpora exteriora particulis varii generis, iisque diversimode configuratis constant, ideo cum alia aliis applicantur, eorum ad invicem appulsus non semper uno eodemque modo, verum multiplici ritu, ac cum insigni varietate sunt, scilicet aut per contactus corporeos, aut per effluvia ab illis decidua, aut per aeris, antraque, sive lucis particulas ab illis reflexas, & velut tela quaquaversus jaculata. Porro & cuilibet horum generum plures species accensentur. Diversa quippe non tantum concreta, sed etiam ejusdem subiecti varia corpuscula multiplices edunt, imprimuntque contactuum suorum typos, quorum singuli ut ab animalibus distincte excipiantur, adeoque dignoscantur, anima sensitiva organis corporeis utens, plura sensoria tanta objectorum varietati, & diversis rerum occursibus accommodata habet, in quibus singulorum pororum conformatio, tum spirituum animalium dispositio, ad corpuscula ab objecto immissa, quæ tantum unius generis sunt, apte suscipienda proportionantur (a). Ergo naturale quodcunque corpus formaliter

(a) De anima Brutorum cap. 10.

liter sensibile hoc ipso est, quod ex solidis particulis certa magnitudine, & figura affectis, certoque artificio simul intextis, motuque donatis, aut quiete, intrinsecus componatur.

COROLLARIUM I.

61. Cum omnis sensatio, ut satis ex dictis constat (§. 30.), sit quædam veluti species tactus, dici recte potest, corpora naturalia habere a soliditate particularum, ex quibus componuntur, ut generice; a mechanicis vero illarum particularum affectionibus, ut specificè sint sensibilia. Habent enim a componentium particularum soliditate, ut premant nerveas externorum sensoriorum fibras, in quas incurrunt; a mechanicis vero illarum affectionibus, scilicet a magnitudine, figura, combinatione, motu, & quiete, quamobrem omnia sensoria neque ab illis omnibus affici queant, neque ab omnibus, a quibus afficiuntur, valeant eodem modo, eademque ratione immutari.

COROLLARIUM II.

62. Nullum accidens absolutum requiritur in composito naturali, ut sit sensibile. Certum est enim, nullum ejusmodi accidens requiri, neque ut primitiva corpuscula compositi naturalis sint impenetrabilia (id quippe habent (§. 19.) ex ipsa sua natura) neque ut sint inæqualis magnitudinis, dissimilis figuræ, varioque artificio simul intexta; neque demum ut illa moveantur, aut quiescant. Apertum namque est, vel levi consideratione adhibita, nullam harum affectionum ab accidente absoluto dependere. Constat autem, compositum quodcunque naturale habere a soliditate suarum particularum componentium, ut generice; ab mechanicis vero earum affectionibus, ut specificè sit sensibile (§. 61.). Ergo nullum &c. Propterea

COROLLARIUM III.

63. Non satis consulunt veritati, qui naturalis compositi sensibilitatem a mechanicis componentium particularum affectionibus ita derivant, ut simul absolutum aliquod accidens illis particulis adiciendum esse contendant. Frustraneum quippe est ad corporum sensibilitatem omne hujusmodi accidens, si nullo ejusmodi accidente indigeat corpus, ut sit sensibile.

64. Eos inter, qui *sensibiles* corporum *qualitates*, eorumque operationes ita explicant per corpuscula exilissima, ut simul velint, *accidentia absoluta* illis esse adicienda, non ultimum locum tenet Cl. P. Eusebius Amort. Docet enim, *sensibiles* corporum *qualitates* explicari quidem posse per *motum*, & *figuram* partium quoad *causam*, ut ipse ait, *materialem*; sed negat id posse fieri quoad *causam formalem*; unde contendit, illis particulis superaddenda esse *accidentia absoluta*, quibus munus *formalis cause* in hoc negotio tribuatur. *Accidentia*, inquit Vir Cl., *dicunt duo, nempe materiam, & formam*. Lux v. g. est *alicujus corporis lux*. Corpus illud est *materia lucis*, & eatenus *materia lucis* dicit *motum*, & *figuram partium*, nempe *pressionem subtilis materiae*; sed cum illo *motu partium* simul *conjungitur aliqua alia forma a figura*, & *motu partium* prorsus *diversa*, nempe *lux sumpta formaliter*; simili modo, quando ex *aere*, & *organo* resultat *Musica*, datur *motus materiae*, & hic *motus* est *materiale Musicae*. Ipsa *Musica* est aliquid prorsus *diversum a figura*, & *motu partium organi*, & *aeris* (a). Verum nisi ostenderit, *passionem* externi *sensorii*, quam *sensatio* in *anima* consequitur, non consistere in certo dumtaxat *motu fibrarum nervearum*, ex quibus *sensorium ipsum* constat; neque ad illas *fibras movendas* satis esse, ut *corporis particulae*, a quibus ipsum *sensorium* afficitur, *solida* sint, *determinata magnitudine*, & *figura*, *motu*, vel *quiete praeditae*, certoque *artificio* simul *intexta*, nemini persuadebit unquam Cl. Auctor, *absolutum* aliquod *accidens*, praeter *naturalem soliditatem*, & *mechanicas affectiones*, in illis particulis necessario requiri, ut, quod ex ipsis compositum efficitur, sit *sensibile*. Neque ipsum juvat exemplum, quod affert ex *Musica*. Nihil quippe magis alienum a vero est, quam *sonorum* *harmoniam*, in qua *Musica* consistit, esse aliquid a certo *aeris*, & *organi motu* *diversum*; sicuti nihil est magis falsum, *saniorum Philosophorum* *judicio*, quam *sonum*, qui a *sonante corpore* ad *aures usque* per *aerem* *propagatur*, esse *qualitatem* distinctam a *tremulo aeris motu*, eique *superadditam*. Arbitror itaque, ab iis omnibus aptari *quadrata rotundis*, qui *mechanicam philosophandi rationem* cum *scholastica Peripateticorum* conciliare hac via nituntur.

PRO.

(a) Philof. Polling. P. III. *Physicæ Generalis* Sect. I. q. i. in responsione ad primam objectionem num. 4.

PROPOSITIO V.

Nulla qualitas, siue affectio corporum sensibilis est accidens absolutum in sensu Scholastico.

65. *Probatnr primo.* Certum est, nullam *sensibilem* corporum *qualitatem* esse *accidens absolutum* in sensu Scholastico, si nullo ejusmodi *accidente* indigeant corpora, ut sint *sensibilia*. Omnium quippe Philosophorum consensu, id venit nomine *sensibilis qualitatis*, per quod *formaliter* corpus evadit *sensibile* (§. 8.). Constat autem, nullo *absoluto accidente* opus esse, ut naturalia corpora sint *sensibilia* (§. 62.). Ergo *nulla qualitas corporum sensibilis est accidens absolutum*.

Probatnr secundo. Si enim aliqua *sensibilis* corporum *qualitas* esset *accidens absolutum*, aliquod ejusmodi *accidens* esset *entitas ex se*, siue ipsa sua natura *sensibilis*. Id profecto non negabunt Scholastici; cum, ipsos si audiamus, *sensibilia* sint *ex se*, quæ in Eucharistia manent, *absoluta panis*, vinique *accidentia*. Ostensum est autem, nullum *accidens absolutum*, si quod in corporibus existit, esse *entitatem naturam suam sensibilem* (§. 58.). Ergo *nulla corporum qualitas sensibilis est accidens absolutum*.

Probatnr tertio inductione, eas scilicet *sensibiles qualitates* singulatim considerando, quæ in corporibus sunt præcipuæ. Perspicuum quippe fore arbitror, nullam *sensibilem* corporum *qualitatem* esse *accidens absolutum*, cujusmodi eas sibi fingunt Scholastici, si ostensum semel fuerit, quæ principem inter illas locum tenent, ejusmodi fingi non posse. Posita ergo divisione *lucis* in *primariam*, per quam *formaliter* corpus *lucidum* est, & in *secundariam*, quæ a *lucido corpore* secundum rectam lineam quoquoeverfus constantissime diffunditur, & *lumen vulgo* jam nuncupatur, ordiemur a prima. Itaque

I.

66. *Lucem primariam* non esse *accidens absolutum*, haud obscure suadetur ex modo, quo corpus, omni penitus luce destitutum, *lucem* repente concipit. Constat igitur, corpora omnia, quæ partibus abundant terrestribus, & præsertim sulphureis, *lumen* emittere, seu *lucida* fieri, quotiescunque, ut ait Cl. Nevvtonus, *partes istæ satis sint agitatae*, siue id calore fiat, siue attritu, siue percussu, siue putrescendo, siue motu aliquo vitali, siue alia quavis de causa (a). Sic, referente Cl.

(a) Optices q. 9.

Cl. Gravesando, *lumen* percipitur, si vitreus tubus sicca manu, vel linteo atteratur, (a). Globus vitreus, aere vacuus, si circum suum axem in loco obscuro velocissime agatur, & sicca manu interea perfricetur, totus, eodem teste, quasi lucidus fit ab interiori parte (b). Mercurius quoque, ut ille observat, si probe depurgatus in vitro agitetur, lucidus apparet (c). Etiam frusta chrystalli inter se mutuo attrita, statim lucefcunt. (d). Oltre alla pietra da fuoco, inquit Academici Florentini, vi sono alcuni corpi, nè quali par che si faccia maggior conserva di luce; imperocchè a batterli insieme, o a romperli al bujo, ne disfavillano. Tali sono il zucchero candito, il zucchero in pane, ed il sal gemma lapillato, i quali pesti nel mortajo mandano fuori in tanta copia la luce, che s'arriva a scorgere distintamente i lati di esso mortajo, e la forma del pistello. Non c'è già riuscito di veder questa medesima apparenza a pestare il sal commune in pietra, l'allume, e il salnitro, come ne menò a pestar i coralli, l'ambra gialla, e la nera, i granati, e la marcasita; ma e l'crystal di monte, e l'agate, o diaspri orientali o percoffi insieme, od infranti danno un lume chiarissimo (e). Ex hisce ergo, aliisque etiam id genus plurimis, quæ, ne longior sim, silentio prætereo, sic argumentum conficio: certum est, nullam absolutam entitatem ex sola partium agitatione, licet vehementissima, oriri posse; si posset enim, cum motus non sit entitas absoluta, effectus suam causam effectricem, plane contra veritatem, perfectione superaret. Oritur autem lux in corpore ex sola particularum, quibus constat, agitatione. Ergo lux non est entitas absoluta.

Dicent Scholastici, non dependere lucem a motu partium, tamquam a causa effectrice, sed tantum veluti a conditione.

Sed contra est. Nam productio lucis ab iis corporibus derivari tunc debet, vel ex quibus, dum atteruntur, vel a quibus particulæ illorum corporum, mutuo attritu, ad motum excitantur. Non enim aliud occurrit, cui, tamquam causæ effectrici, queat absoluta lucis entitas accepta referri. Sed neutra illa corpora præstare id possunt. Primo etenim, si non omnia corpora, ex quorum mutuo attritu oritur lux, eorum saltem plurima, ut scilex, vitrum, crystallus, atque id genus alia, inertia sunt adeo, ut ad nullam prorsus absolutam entitatem producendam apta esse videantur. Secundo: quia vel illa corpora lucem producant, ut causa illius univoca, vel ut causa ejus-

(a) Elem. Physicæ Mathem. §. 2455.

(b) Ibidem §. 2463.

(c) Ibidem §. 2489.

(d) Ibidem §. 2497.

(e) Saggio di nat. esperienze: esper. III. intorno alla luce, e suoi effetti.

dem *equivoca*. Non ut *causa univoca*; quippe non sunt lucida, ut patet. Sed neque ut *causa equivoca*; alia siquidem causa tunc assignanda est, a qua ad *lucem* potius, quam ad aliam *qualitatem* producendam, illa corpora determinentur. *Postremo*: quia rationem afferre debent Scholastici, quamobrem si corpora, ex quorum mutuo attritu *lux* erumpit, *lucem efficienter* in seipsis producant, eandem, postquam producta est, etiam attritu cessante, non conservent? Neque enim *lux*, si ponatur *entitas absoluta*, ita pendere posse videtur a motu partium corporis, ut, quamprimum motus ille cessat, & ipsa destruat. Certe, nisi Scholastici id palam fecerint, contendunt, neque sane immerito, Recentiores, illorum sententiam de *primitiva lucis* natura ex hoc uno prorsus convelli. Æque obscurum quippe est, captuque difficile, *absolutam formam* dependere a motu partium, ut producat, & conservetur, ac sit obscurum, captuque difficile, *lucem primitivam* esse, ut ipsi putant, *entitatem absolutam*.

I I.

67. Ad *secundariam vero lucem* quod attinet, luce ipsa clarius videtur, eam in *absoluta entitate*, quæ per medium diaphanum propagetur, in eoque a lucido corpore producat, minime posse constitui. Etenim *primo*, ejusmodi si esset *lumen*, in eo medio, cui semel impressum est, non periret, lucido corpore sublato, a quo producit. Non enim habet contrarium, a quo periri possit, nullaque *forma*, ipsis fatentibus Scholasticis, perit in subjecto, nisi ab alia *forma*, cum qua in illo simul esse nequeat, destruat. Contra autem res se habet, loquendo de *lumine*; experientia demonstrante, eo ipso sensibili momento, quo lucidum corpus remouetur, vel extinguitur, *lumen* ab illo diffusum perire. Ergo *lumen* non est *entitas absoluta*.

Respondet Cl. P. Ferrari, *lumen*, utpote *qualitatem materiale*, dependere quidem a *subjecto diaphano in fieri, & conservari*; sed, cum ex *speciali natura sue proprietate nullatenus radicetur in subjecto*, minime a solo *subjecto conservari*, quemadmodum alia plura *accidentia*; proindeque pendere etiam ab *aspectu Solis, sive alterius luminosi corporis*, quod ipsam in *subjecto continuata actione conservat* (a).

Sed contra. Nam necesse est, explicet ille *primo*, quidnam intelligat nomine ejus *radicationis in subjecto*, quam denegat *lumini*, aliis

I

vero

(a) Tom. III. P. III. *Physicæ* Disp. III.

q. 5. pag. 413., & 418.

vero *accidentibus* ipse concedit. Mihi etenim nonnisi duplex modus *essendi in subiecto* ad hæc usque tempora innotuit, alter scilicet, quo *forma* ita in illo est, ut, quemadmodum ajunt Scholæ, in *fieri, esse, & conservari* necessario ab illo dependeat; alter vero, quo *forma* subiectum afficit, quin ad sui conservationem illud necessario requirat. Persuasum quoque habeo, posteriorem hunc modum *essendi in subiecto* nonnisi formæ, quæ sit *entitative* substantia, convenire. Igitur vel *lumen* non dependet a subiecto in *fieri, esse, & conservari*, si in illo, ut reliqua *accidentia*, non radicetur; & ideo dicendum, *lumen* non esse *accidens*: vel *lumen* quoque, ut *accidentia* reliqua, in subiecto *radicatur*; atque hinc conservari & ipsum, ut cetera quæque, in illo potest, etiam lucido absente corpore, a quo producitur. Velim *secundo*, nitide quoque ab eo explicetur, quomodo *lumen*, contra ac reliqua *accidentia*, quæ itidem a Sole, aliove corpore aeri communicantur, ita pendeat ab ejus aspectu, ut continuata ejusdem præsentia ad sui conservationem necessario illud indigeat. Quamdiu enim distincta hujusce dependentiæ notio Recentiores latuerit, tamdiu dicent, eam fingi in *lumine* a Viro Cl., ut argumentum, quo nimis premitur, declinet, ejusque vim, ut bonus quandoque Homerus, dormitando evitet. Ait ipse, contra Cartesii globulos, & Malebranchii vortices rem agens, se non facile assentiri dicentibus, & non probantibus (a). Verum caveat, ne contra hanc suam *luminis* a Solis adpectu dependentiam tantumdem etiam Recentiores dicant. Illa certe longe difficilior captu est, quam sint vel globuli, quos ponit Cartesius, vel vortices, quos Malebranchius assumit. Spero autem, Virum Cl. ad dependentiam hanc demonstrandam exemplo *soni* nequaquam usurum; nam pro certo habeo, tantum Virum non latere, ideo necessariam esse præsentiam corporis indefinenter sonantis, ut *sonus* in aere perseveret, quia non in *accidente absoluto*, sed in solo aeris tremulo motu *sonus* consistit (b).

Secundo: si *lumen* esset *accidens absolutum* medio diaphano a lucido corpore impressum, eo intensius in eadem medii parte illud fieret, quo diutius corpus lucidum ipsi parti præsens conservaretur. Cum enim corpus lucidum indefinenter agat, & *lumen*, si ponatur *accidens absolutum*, sit qualitas *permanenter* adhærens subiecto, cui imprimitur, necesse est, momentis singulis, quibus corpus lucidum medio diaphano præsens existit, novus gradus *luminis* in qualibet ipsius medii parte ab illo producat. Constat autem experientia,

in-

(a) Tom. III. P. III. *Physicæ Disp.* III (b) Videantur, quæ diximus Tom. I. III. q. 5. pag. 417. *Physicæ* §§. 1070, 1071.

intensive in eadem medii parte non augeri *lumen*, quo diutius corpus lucidum illi præsens existit. Ergo *lumen* non est *accidens absolutum*.

Tum hæc porro, tum præcedens ratio manifeste confirmatur exemplo *caloris*, *frigoris*, *odorum*, aliarumque id genus *qualitatum*, quæ, non secus atque *lumen*, tamquam *accidentia absoluta* a Scholasticis habentur. Perspicua siquidem res est, *qualitates* ejusmodi manere in aere, etiam sublatis corporibus, a quibus in illo productæ fuerunt; easque præterea eo intensiores in eadem aeris parte continuo evadere, quo corpora, a quibus proveniunt, longiori tempore in eodem loco perseverant. Ergo vel danda est ratio, quamobrem *lumen* quoque, si, ut illæ, sit *accidens absolutum*, non conservetur in medio diaphano, sublato lucido, a quo fuerat illi impressum, neque ad diuturnam præsentiam ipsius lucidi *intensive* augeatur; vel necesse est, dicamus, *lumen* non esse *accidens absolutum*.

Postremum hoc *luminis* a *calore*, *frigore*, ceterisque *actuosis qualitatibus* discrimen diffimulavit laudatus P. Ferrari, quod & ipse fortasse viderit, illius causam, quemadmodum hinc habetur causa phœnomeni prioris, derivari ex eo non posse, quod *lumen*, secus ac *qualitates* reliquæ, lucidi corporis adpectu ad sui conservationem, ut ipse docet, indigeat. Certe dato etiam, solius *luminis* proprium esse, ut ejus conservatio a præsentia lucidi corporis necessario dependeat, inferre tamen inde non licet, *lumen* hanc ob causam *intensive* augeri ab eodem lucido corpore nequaquam posse. Cur namque, si corpus lucidum continuata sua actione *lumen* conservat, non efficit quoque eadem ipsa, ut illud *intensive* continuo augeatur? Neque enim *lumen* incapax intensificationis est; cum, aucto in eodem loco lampadarum numero, longe intensius vividiusque illud appareat: quod certe non fieret, si plures *luminis* gradus in eadem diaphani corporis parte simul componi nequirent.

Causa postremo afferenda ab Scholasticis est, quare *calor*, *frigus*, & *qualitates* reliquæ *actuosæ* etiam oblique, *lumen* vero nonnisi secundum rectam lineam in medio uniformi constantissime propagetur. Ait P. Ferrari, discrimen esse, quia *lux* ita dependet ab aspectu Solis, ut nullibi fiat, nullibi conservetur, nisi ubi Sol respicit: causa nempe hæc est, inquit ille, quare Solis radius non per omnes conclavis partes extendatur, sed per eas solum, quas Sol directe respicit (a). Verum, cur *lumen* ita dependeat ab aspectu Solis, *qualitates* vero reliquæ

I 2

ab

(a) T. III. P. III. Physicæ Disp. III. q. 5.
pag. 418.

ab aspectu corporum eorum, a quibus, ut *lumen* a Sole, producuntur, non ita debeant, tametsi illæ etiam, æque ac *lumen*, ponantur *accidentia absoluta*, altum apud Virum ipsum Cl., ut etiam supra innuimus, silentium est, quasi persuasum illi fuerit, sufficere, ipsum dixisse, ut id ab omnibus admittatur. Videtur tamen, Virum Cl. de huiusce phænomeni causa non multo post fuisse aliter opinatum. Respondens enim Cartesianis, contententibus, *si lux non est motus*, assignari minime posse causam, *cur semper sequatur rectilineum*, ait, *lucem per rectilineum produci, quia linea recta ea est, per quam natura maxime agit; cum illa sit via brevissima, & efficacissima ad operandum, & cum aliunde lux non habeat contrarium positivum* (a). Sed ne flocci quidem facienda hæc ratio est. Si enim corpus lucidum *lucem* producit *per rectilineum*, quia per lineam rectam, utpote quæ brevissima est, & efficacissima ad operandum, natura maxime agit, cur eadem ratione etiam corpus calidum per haud dissimilem lineam *calorem* non producit? Fortene in *caloris* productione, sicuti in productione *luminis*, non agit natura? Quod si etiam corpus calidum agit secundum rectam lineam, dum *calorem* diffundit, eccur *calor* quoque, ut *lumen*, per lineam rectam constantissime non propagatur? Fateor, *lucem* non habere *contrarium positivum*. Sed non video, quonam jure hinc inferat Vir Cl., nonnisi secundum rectam lineam posse *lucem* in medio uniformi propagari. Tantum sane abest, rectilineam *lucis* propagationem ex illo principio deduci posse, quin contrarium potius dicendum videatur. Si namque *lumini* nihil *positive* contrarium est, cur etiam in spatio extra rectilineam directionem posito *lux* non diffunditur? Nihil certe in eo est, quod impediat, quominus *lux* etiam per illud propagetur. Sane, licet *calor*, & *frigus* habeant, quod *positive* opponatur illorum propagationi, adhuc tamen non recte tantum, verum etiam *oblique* diffunduntur. Ergo potiori ratione id etiam de *lumine* dicendum est, utpote cui nihil occurrit, quod illius propagationi *positive* resistat. Igitur vel demus oportet, etiam *oblique* in medio uniformi, plane contra experientiam, diffundi *lumen* posse, vel dicamus necesse est, peccare Scholasticos, dum in *accidente absoluto* statuendum illud esse contendunt.

I I I.

68. Sed non minus peccant, dum corporum *diaphaneitatem*, & opa-

(a) Tom. III. P. III. Physicæ Disp. III. q. 5.
pag. 424. in responsione ad 8. objectionem.

opacitatem inter *absoluta accidentia* iidem ipsi recensent. *Diaphanum* dicitur, quod *lumini* pervium est; *opacum*, quod est *lumini* impervium. Neutram harum affectionum esse *entitatem absolutam* corporæ substantiæ inhærentem, ex hoc uno plane ad evidentiam ostenditur, quod *entitas* hujusmodi plerumque fieret, atque periret sine causa. Omnibus enim notum est, perspicuumque. I. vitrum, & crystal- lum, quæ sunt corpora *diaphana*, in pulveream *opacam* massam abire, si conterantur. II. aquam, quæ maxime *diaphana* est, in *opacam* spumam concrefcere, si agitetur, tum *diaphaneitatem* pristinam recuperare, si suo, ut ita dicam, genio iterum relinquatur. III. si plures planæ laminæ vitreæ sibi invicem secundum earum planitiem superponantur, *opacum* corpus emergere, & eo quidem magis *opacum*, quo numero plures illæ fuerint, tametsi divisim sumtæ, sint maxime *diaphana*. Manifesta autem res est, nullam *absolutam entitatem* produci, nullamque destrui, dum vitrum in pulverem redigitur; neque dum aqua vel concrefcit in spumam, vel ex spuma ad pristinum statum redit; neque demum dum plures vitreæ laminæ simul junguntur secundum earum planitiem, vel dum, antea simul junctæ, a se mutuo separantur. Sola enim fit integralium partium secretio, & confusa earum mixtio, dum vitrum atteritur; sola mutatio situs in haud dissimilibus aquæ particulis, dum illa spumescit; sola demum loci mutatio, dum vitrum vitro apponitur, vel unum ab alio removetur. Ergo neque *diaphaneitas*, neque *opacitas* est *entitas absoluta*, sive *accidens* in sensu Scholastico. Videtur porro minime negligendum, quod post Nevvtonum (a) tradit Gravesandus (b), nullum scilicet dari corpus, *cujus partes minima non sint pellucida*. Hoc in dubium, inquit ille, *nemo vocabit, qui microscopiis saepe usus est*. Jam si hoc, quis non videt, Scholasticorum sententiam de *opacitatis*, & *diaphaneitatis* natura plane corruere? Si namque *opacitas*, & *diaphaneitas* sunt *accidentia absoluta*, repugnat sane, ut plura minima *diaphana*, quin *diaphana* esse desinant, *opacum* corpus, dum simul uniuntur, constituent.

I V.

69. Non minori evidentia ostenditur, etiam in *colorum* natura definienda Scholasticos a vero aberrare, nempe dum ajunt, *colores* esse *entitates absolutas* ita afficientes substantiam colorati corporis, ut, velaminis instar, eam circumquaque tegant quodammodo, ac veluti

(a) Lib. II. *Optices* P. III. prop. 2.

(b) Elem. *Physices* Mathem. §. 3443.

vestiant. Quam igitur hæc explicatio sit a vero aliena, ita primo ostenditur. Indubium est, nullam *absolutam entitatem* in aqua produci, dum illa validissime agitata in spumam abit; nullam fieri in vitro, dum in pulverem attritione redigitur. Nulla quippe tunc habetur actio, ut patet, cui productio *absolutæ entitatis* jure valeat accepta referri. Constat autem, tam aquam, quam vitrum tunc albescere. Ergo *albedo*, eademque ratione nullus *color*, tamquam *entitas absoluta* habenda non est. *Secundo*: perit *albedo* in spuma, dum ad pristinum statum redit. Nulla autem tunc destruitur *entitas absoluta*, quemadmodum nulla producitur, dum aqua spumescit. Ergo &c. *Tertio*: frigida bilia colorata corpora, si atterantur, suum *colorem* mutant, adeo nimirum, ut, ne ipso quidem nigerrimo marmore excepto, omnia tunc albescant. Nulla autem tunc in illis perit *entitas absoluta*, nulla ejusmodi *entitas* in illis tunc, ut patet, emergit. Ergo &c. *Postremo*: explicari hac in hypothesi minime potest, quamobrem ad *colores* conspiciendos *lumine* opus sit, & quomodo ad illorum visionem *lumen* ipsum concurrat. Ea etenim *absoluta coloris entitas*, quæ in colorato objecto fingitur, vel aliquid communicat *lumini*, quod resiliens ex objecto colorato spectatoris oculum ad *coloris* visionem determinat, vel nihil prorsus illi imprimit. Si nihil, ut proinde sit purum *lumen*, quod ex colorato objecto ad oculum pervenit, explicent, quæso Scholastici, quomodo visus organum ita ab eo *lumine* immutetur, ut *colorem* objecti, ex quo resilit, hinc visus conspiciat. Si autem *objectivus color* aliquid resiliens *lumini* communicat, quæro, an id sit *color* ei similis, a quo illud *lumini* imprimitur, num vero aliquid ab *objectiva colore* diversum. Si diversum: quomodo, quæso, visus organum potest ad *objectivi coloris* visionem ab illo determinari? Si vero a *colore objectiva* illud non differt: causa danda est, cur *color objectivus* opus habeat *lumine*, ut *colorem* sui similem ad oculos usque diffundat. Ecce enim ille *colorem* aeris non imprimit, quemadmodum corpora odora ex seipsis *odorem* suum per aerem spargunt, eique communicant? Sequitur præterea, quemadmodum *lumine* perfusum, ita & *colore* imbutum videndum esse medium, quod oculum inter, ipsumque coloratum objectum interficitur. Hoc autem, experientia teste, falsum est. Ergo nihil *coloris* a *colorata corpore lumine* resiliens imprimitur; & ideo dicamus oportet, organum visus affici a *colore*, qui in objecto est, quin aliquid sui, a quo sensorium immutetur, *color* ipse emittat: quo sane nihil in Philosophia absurdius.

Dices, non a *lumine*, quod *coloratum* objectum regerit, sed a *speciebus* sui *coloris*, quas illud quoquoque diffundit, visus organum

ad

ad *coloris* visionem determinari: verum illas *species* a colorato obiecto non emitti, nisi obiectum *lumine* perfusum fuerit.

Sed contra. Nam *primo* palam fieri debet, quomodo *lumen* ad illarum *specierum* productionem concurrat. Id enim nisi in aprico ponatur, dicent Recentiores, illud fingi a Scholasticis, ut verborum involucris contegant, quod ne ipsi quidem animo comprehendunt. *Secundo*: quia cum illæ *colorum species* non habeant contrarium, a quo perimantur (nihil certe huiusmodi assignari a Scholasticis potest) manebunt illæ in aere, in quo semel productæ sunt, etiam absente colorato corpore, a quo productæ dicuntur; quemadmodum in eodem aere conservantur *species odorum*, eo etiam sublato corpore, quod illas emiserat. Ergo, sicuti ablato corpore *odoro*, *odor* adhuc sentitur, ita colorato corpore absente, *color* adhuc videatur, necesse est. *Experientia* autem teste, contra res se habet. Ergo nullæ sunt illæ *colorum species*, quæ dicuntur quoquoersus a corpore colorato emitti. Non me latet, quod forte, ut nodum solvant, dicent illarum patroni, eas scilicet, non solum ut producantur, verum etiam ut conserventur in medio, per quod diffusæ sunt, a *lumine* dependere. At neque ignoro, id quidem posse dici, sed Delio natatore opus esse, ut mente comprehendatur. Sicuti enim *colores*, si ponantur *entitates absolute*, diversæ a *lumine*, ab illo non dependent, ut sint in corpore, ipsumque afficiant, ita ab eodem dependere iidem ipsi nequaquam possunt, ut sui *speciem* emittant, eamque in medio conservent, quemadmodum in emittendis conservandisque *odorum speciebus*, certum est, odora corpora ab illo non dependere.

V.

70. Quantum quoque a vero aberrant Scholastici, dum *sapores* inter *absoluta accidentia* recensent, satis ex eo patet, quod, ut ait Gassendus, & experientia verissimum esse demonstrat, *sapidum nihil sit, ex quo extrahere sal non detur; nihil sapidum, quod, extracto sale, non reddatur inspidum; nihil demum inspidum, quod, commixto sale, sapidum non fiat* (a). Sequitur enim hinc, corporum *sapores* non ab *absoluto accidente*, quod illorum substantiæ inhæreat, ipsamque afficiat, sed a salinis tantum particulis, quæ illis permixtæ sint, provenire. In eo siquidem positus corporum *sapor* est, quo in ipsis corporibus admissio, *sapida* fiunt, & quo sublato, *insipida* redduntur.

Dices, a salinis quidem particulis habere corpora naturalia, ut sint

sapi-

(a) Sect. I. *Physices*, lib. VI. cap. 9.

sapida; verum *salinas* particulas non excitare in nobis sensum *saporis*, nisi ratione *accidentis absoluti*, quo singulae afficiuntur.

Contra. Nam *primo* hinc sequitur, corrigendam esse eorum Scholasticorum sententiam, qui docent, *saporem* esse *accidens* ita afficiens *sapidi* corporis substantiam, ut ipsi toti inhæreat. Dicendum quippe tunc est, *saporem* esse *accidens* non corporis *sapidi*, sed *salinae* dumtaxat substantiae, quæ in illo delitescit; hancque tantum, non autem ipsius corporis substantiam ab illo affici. *Secundo*: quæro a Scholasticis, num *absolutum* illud *accidens*, quod *saporis* dicunt, valeat, uti *salinas*, ita & reliquas *sapidi* corporis partes, sive totam illius substantiam afficere, an non. Si potest: rationem postulo, quamobrem natura id reapse non præstiterit? Si non potest: causam requiro, cur non possit? Aut enim tota *sapidi* corporis substantia *homogenea* est, adeo nempe ut omnes particulae, in quas illa dividi, sive resolvi potest, sint ejusdem naturæ; aut est *heterogenea*, scilicet ex particulis natura dissimilibus composita. Si primum: ergo omnes illius partes, non autem aliqua tantum, nempe *salinae*, debent esse ex æquo *sapidae*, eodemque proinde *absoluto* *saporis accidente* omnes ex æquo donari; & ideo peccasse naturam, dicendum est, dum vim excitandi in nobis sensum *saporis* solis *salinis* particulis concessit. Sin vero alterum: ergo falluntur Scholastici, dum ajunt, naturalia quæque composita ex duplici *semisubstantia*, quarum una sit pura *potentia*, altera *actus*, *essentialiter* coalescere. Cum *heterogeneitate* siquidem partium, in quas valeant illa resolvi, ejusmodi compositio stare certe non potest. Quæro *postremo*, num *salinae* particulae sint *formaliter*, nempe quoad propriam naturam, in composito, cui *sapiditatem* tribuunt, an non. Si dicant Scholastici, eas in illo esse *formaliter*: ergo non dissimili ratione in ipso quoque sunt eodem modo *sulphur*, *spiritus*, ceteraque Chymicorum principia; ac propterea non ex *materia*, & *forma*, ut ipsi docent, sed ex principiis Chymicis, secus ac illi contendunt, naturalia quæque corpora *essentialiter* componuntur. Si vero dicant, *salinas* particulas non esse *formaliter* in mixto, explicent quæso, cur, quemadmodum experientia constat, *sapidum nihil sit*, ex quo extrahere *sal* non detur; *nihil sapidum*, quod, extracto *sale*, non reddatur *insipidum*; *nihil demum inspidum*, quod commixto *sale* *sapidum* non fiat: uno verbo, cur omnium corporum *sapiditas* ex uno *sale* proveniat.

Miror propterea, Cl. P. Ferrari concedere Recentioribus, *sales* esse *sapidos*, & *saporum efficientes* (a), sive ex *salinarum* particula-

rum

(a) Tom. III. P. III. *Physicæ* Disp. III. q. 2. pag. 367.

rum commixtione corpora reddi sapida (a). Vel enim ille tenet, salinas particulas esse formaliter in mixto, sive in composito naturali, ut Recentioribus persuasum est, vel id nequaquam ipse admittit. Si non: eccur sales vocat efficientes saporum, & ex illorum commixtione, ait, corpora sapida fieri? Quod enim in corporibus non est, nequit esse efficiens saporum causa, neque dici potest, ita illis esse commixtum, ut eorum sapiditas inde proveniat. Si vero putat, salinas particulas esse formaliter in mixto, sibi metipso, nisi vehementer fallar, non consentit, primo cum systema chymicum de rerum principiis adeo inficiatur, ut ratum habeat, terram, aquam, sal, sulphur, & mercurium ne quidem tamquam principia rerum secundaria haberi posse, hac potissimum ductus ratione, quod non satis perspicuum sit, Chymicorum illas substantias per meram divisionem detegi; cum fieri absolute possit, ut eadem de novo prodeant (b). Si namque salinae particulae sint formaliter in mixto, in eodem quoque & particulas terreas, aqueas, sulphureas, & mercuriales existere formaliter, dicendum profecto est; cum si mixtum, caloris actione, dissolvatur, omnes ex æquo in conspectum veniant; nullaque ratio occurrat, cur particulae salinae non prodeant de novo, actione ignis, reliquæ vero, terreae scilicet, aqueæ &c. de novo tunc fiant. Sibi non consentit secundo, cum probat, ideo elementa non esse formaliter in mixto, sed tantum virtualiter, tum quia mixtum corpus esset aggregatum quoddam per accidens, ex pluribus completis naturis constitutum; tum quia quilibet mixti pars ad sensum homogenea est, & mixta, quantumvis ea minima sit, & concipiatur: cujus tamen oppositum contingeret, si elementa in mixto naturali formaliter existerent, quod nempe tunc, ut ille ait, in qualibet vel minima mixti parte extarent quatuor minime partes elementorum (c). Sibi, inquam, non consentit, nam salinis particulis secundum formalem earum rationem in mixto admissis, fateri necessario debet Cl. Auctor, aut mixtum quodcunque esse aggregatum per accidens, quemadmodum, ipsius sententia, illud esset ejusmodi, si elementa non dissimili modo in ipso haberentur; aut dicat necesse est, formalem continentiam elementorum in mixto non impedire, quominus, contra ac ipse aperte tradit (d), illud sit unum per se, sicuti non definit esse per se unum, tametsi salinas particulas formaliter complectatur. Dare quoque debet, vel non omnem partem mixti naturalis esse homogeneam, & mixtam, vel ipsam esse hujusmodi, quamvis elementa non virtualiter, sed formaliter contineat. Ho-

K

mo-

(a) Tom. III. P. III. Phys. Disp. III. q. 2. p. 368. (c) Ibidem Disp. II. q. 3. pag. 73.
 (b) Tom. II. P. I. Physicæ Disp. I. q. 4. pag. 47. (d) Ibidem.

mogenea enim, & mixta illa est, licet particulæ salina secundum formalem suam rationem in ea existant.

V. I.

71. Ad odores quod attinet, constat in primis, nullum odorem spargi a corporibus, quamvis natura sua intensissime olentibus, si vase hermetice, ut ajunt, sigillato inclusa existant. Olio di cera, inquiunt Academici Florentini, quintessenza di solfo, ed estratto d'orina di cavallo, che si tengono per gli odori più acuti, e potenti, che sieno, non traspirano sensibilmente da un ampoletta sigillata a vetro, per molto che quelli vi si diguazzino, e che questa si riscaldi. Quell' alito ancora di finissimo spirito, che sfuma nel tagliar la buccia d'un cedrato acerbo, o che dalla stessa buccia premuta sprizzar minutamente si vede, non penetra a dar odore all'acqua, che in un vasetto di sfoglia sottilissima di cristallo ermeticamente sia chiusa. Similmente sigillata una starna in un sottil vaso di vetro, e rimpiazzata in un angolo d'una stanza, da un Bracco fatto vagirare un pezzo in quella vicinanza, non vien dato segno di sentirne il sito (a). Nemini ergo dubitare licet, quominus odor sit aliquod impenetrabile. At si hoc, prono alveo fluit, odorem non esse accidens absolutum, multoque minus speciem, ut vocant, intentionalem, quæ per aerem a corpore odoro propagetur. Nimis apertum est enim, neque absolutis accidentibus, si qua in rebus existant, neque speciebus intentionalibus impenetrabilitatem convenire (§§. 19. 55.). Ergo odores non sunt accidentia absoluta.

Dices, odores non esse impenetrabiles, nisi materialiter, nempe quatenus impenetrabilis est halitus substantialis, cui inhaerent, & sine quo non erumpunt e corpore odoro, neque per aerem diffunduntur.

Contra: nam hinc sequitur primo fallam esse eorum omnium Scholasticorum doctrinam (b), qui ajunt, odores etiam per species intentionales propagari. Si namque odor sine substantiali halitu non diffunditur, neque sine illo ad nos pervenit, nullæ certe sunt illæ species, nisi forte placeat, subtilissima odori halitus corpuscula intentionalium specierum nomine designare. Sequitur secundo, non odoribus, sed eorum vehiculo tribuendos esse effectus plurimos, qui vulgo odoribus ipsis

(a) Saggio di naturali esperienze pag. 263. edit. Florentiæ 1691.

(b) Videantur Conimbricenses q. 3. artic. 1. in cap. 9. lib. II. de anima.

ipsis accepti referuntur. Sic odori suavis thymiamatis tribui nequeunt syncopæ, lipothymix, suffocationes, apparentes epilepsix, convulsiones, vomitiones, aliaque permulta formidanda symptomata, quæ, illo odore hausto, in humano corpore, alioquin sano, repente contingunt, quæque ab imperitis, ut ait Cl. Boyle, *effecta sortilegii reputantur* (a). Hæc, inquam, non odoribus tribuenda sunt, sed, admissa superiori doctrina, ex illorum vehiculo unice sunt derivanda. Cum enim memorata omnia symptomata ab irritatis, contractis, convulsisque nervorum filamentis indubitanter proveniant, id dumtaxat efficiens eorum causa esse potest, quod, naribus attractum, valet olfactoriorum nervorum fibras, in quas incurrit, inordinate movere, constringere, & irritare; ac proinde quod est natura sua impenetrabile. Igitur odores, sumti formaliter, vel nihil sunt diversum ab *substantiali* illo halitu, quem odorum corpus diffundit, vel causa minime dici possunt eorum motuum, qui ex illorum haustu in nobis producuntur. Mirandum propterea est, Cl. P. Ferrari negare, odorem consistere formaliter in *substantiali effluvio*, quod solo motu olfactum impellat (b), dein docere, ideo ex odoribus excitari *sternutationem*, quia quando halitus illi, per quos, ut paulo antea & ipse cum Recentioribus aperte fassus est, odor diffunditur, *internas narium fibrillas percellunt*, excitantur *animales spiritus in cerebro*, unde illi per nervos ad thoracis musculos deferuntur, ibique fibras contrahunt *diaphragmatis*, sive *membrana*, quæ *superiorem ventris partem ab inferiori dividit*. Fibris autem illis repente laxatis, *diaphragma elevatur*, *pulmones comprimit*, *aeremque emittens*, *strepitum edit* (c). Mirandum, inquam, est, *sternutationem* ita ab eo exponi, qui negat, in effluvio, quod solo motu olfactum impellat, odores consistere. Cum enim ex solo motu fibrarum nervearum ipse etiam, ut est modo visum, *sternutationem* deriveret, dare vel invitatus debet, aut illam non excitari ab odoribus, quod experientix plane contrarium est, aut *substantiale odoris effluviu* solo motu olfactum immutare. Quandoquidem sicuti *sternutatio*, ita & quævis alia affectio, quam odores in nobis excitant, potest ex solo motu provenire.

Constat secundo, corpus, quemadmodum habet a *salinis particulis*, ut sit *sapidum* (§. 70.), ita a *sulphureo-mercurialibus* habere, ut sit *odoratum*. Patet experimentorum enumeratione, inquit Cl. Boerhaavius, quod

K 2

id

(a) Lib. de insigni efficacia effluviiorum cap. 6. Vide Verulamium Syl. sylvarum centur. X. num. 912., & seq. Boerhaavius Tom. IV. *Prælect. Acad.* in suas *Instit. Med.* as num. 507.

(b) Tom. III. P. III. *Physicæ Disp.* III. q. 3. pag. 371.

(c) Ibidem pag. 374.

id subtile, quod oleo inherens, spiritus dicitur, sit primarium illud, quod odorem excitat. Hoc enim absolute separato a corporibus odoratis, residuum vix fragrat; eo autem affuso, aliis fragrantia conciliatur (a). Ergo odor non est accidens absolutum. Sicuti namque, si a volatili sulphureo-mercuriali substantia odores proveniunt, ea amplius non est illorum origo, quam tradunt Scholastici (non enim tunc oriuntur a forma mixti, quæ sit semisubstantia, totam ipsius mixti materiam, ejusque singulas partes integrales ex æquo perficiens), ita neque ea ipsorum natura tunc amplius esse potest, quam iidem ipsi constituunt. Principali liquidem nutante, etiam quod ex illo sequitur, omnino vacillet, necesse est; & nisi mea opinio fallat, ex traditis superiori loco de saporibus liquido apparet, inconsulto agere Scholasticos, qui, ne inficientur, quod, demonstrante experientia, negare non possunt, concedunt Recentioribus, ex volatili sulphureo-mercuriali substantia, in mixto formaliter existente, odores provenire; sed una simul docent, substantiam illam ab absoluto superaddito accidente habere formaliter, ut sit odora.

Sed longe minus profecto consuluisse sibi videtur laudatus Cl. P. Ferrari, primo dum negat, ideo halitus, per quos, ipso quoque docente, odores diffunduntur, esse particulas sulphureas, & salinas (b), propterea quia falsa alibi demonstraverit Chymicorum principia, & omnino fallacia illorum experimenta. Secundo: cum ait, si crassa, pinguesque partes nomine sulphuris donentur, jam sententiam istam, scilicet Chymicorum ex sulphureo-mercuriali substantia odores derivantium, cum sua coincidere (c). Res enim si ita sit, ecurr ipse paulo antea dixerit, sales esse efficientes saporum in corporibus (d), & ex salinarum particularum commixtione corpora reddi sapida (e). Cum enim iis ipsis experimentis, quibus evincunt Chymici, salinas particulas in naturali mixto existere, etiam sulphureas, & mercuriales in eodem haberi demonstrent, causam non video, cur non fallantur, cum de particulis salinis res illis est, & corporum sapor ex illis derivant; fallantur vero, cum de sulphureis, & mercurialibus differunt, ipsisque, ad volatilitatis gradum evectis, corporum odores referendos esse acceptos, arbitrantur. Necesse est igitur, aut inficietur Vir Cl., corporum sapor ex salinis eorum particulis oriri, aut concedat, sicuti salinas, ita etiam sulphureas, & mercuriales reipsa haberi in corporibus; atque uti sapor ex salinis, ita odores ex sulphureo-mercurialibus

(a) Tom. IV. Instit. Medicarum n. 499.

(d) Ibidem pag. 367.

(b) Loco citato Tom. III. pag. 371.

(e) Ibidem pag. 368.

(c) Ibidem pag. 372.

libus rectissime a Recentioribus derivari. Sibi quoque non satis ille consentit, dum ait, Chymicorum opinionem de odorum origine cum sua coincidere, si crassæ, pinguesque partes (compositi naturalis) nomine sulphuris donentur. Enimvero, si partes crassas, & pingues ipse quoque cum Chymicis in composito naturali admittit, consecrarium videtur, ut etiam subtiles, & macras in eodem composito cum illis & ipse ponat; atque hinc ut se hallucinatum fateatur, primo dum Chymicorum systema inficiatus est (a); secundo, dum naturalia quæque composita nonnisi ex materia, & forma, quales sibi assumunt, & explicant rigidiores Scholastici, coalescere statuit (b). Neque enim stare potest, ut aliquæ partes compositi naturalis sint crassæ, & pingues, aliæ subtiles, & macræ, nisi primo verum sit, quod de corporum principiis tradunt Chymici; secundo, nisi plane diversa statuatur substantialis illarum partium forma; ac proinde nisi detur compositum ipsum esse unum non per se, sed per accidens, quemadmodum, docente ipso Viro Cl. (c), ejusmodi illud esset, si vulgo nota elementa formaliter in eo existerent. Docet quidem laudatus Cl. Auctor, salium, aliarumque rerum particulas, quæ in cujuslibet mixti poris latent, non ipsam mixti naturam facere, nec ad illius essentiam pertinere (d); sibi persuadens, hac ratione iis ab se fieri satis, qui contendunt, formalem existentiam elementorum in mixto ex eo evinci, quod, licet cineres, si sensum judicem adhibeas, partes habeant vel minutissimas sibi omnino similes, sola tamen aqua calida affusione, & percolatione, sal in aqua remaneat, qui post aquæ exhalationem in vasis fundo, ac lateribus concrevit (e). Verum penitus ignoro, quomodo stare tunc possit, quod ille deinde tradit, corporum nempe sapes a salinis eorum particulis; a crassis vero, pinguibusque eorundem partibus illorum odores provenire. Certum enim est, ipsiusmet etiam Cl. Adversarii sententia, sapes, atque odores esse proprietates corporis naturalis, quod afficiunt; & ideo id, ex quo proveniunt, ad ipsius corporis essentiam pertinere. Ait quippe, formam substantialem naturalis cujusque compositi vim habere exigendi, producendi, ac etiam reparandi collectionem accidentium, quæ unicuique speciei propria est. Unde est causa immanens, seu intima omnium physicarum proprietatum (f). Igitur vel sapes ex salinis, odores ex crassis, pinguibusque corporis partibus perperam ipse derivat, vel falso dixit, salium, aliarumque rerum particulas, in quas mixtum resolvitur, non ad ipsam mixti naturam facere, nec ad illius

(a) Tom. II. P. I. Physices Disp. I.

q. 4. pag. 47.

(b) Ibidem q. 1. pag. 16.

(c) Ibidem Disp. II. q. 3. pag. 73.

(d) Ibidem.

(e) Ibidem.

(f) Ibidem Disp. I. q. 1. prg. 14.

illius essentiam pertinere. Duo porro hisce addere liceat. Primum est, me non posse animo comprehendere, quomodo a partibus corporis *crassis, & pinguibus* illi halitus oriri queant, per quos odores diffunduntur. Alterum, opinionem Chymicorum cum sua, ut ille ait, coincidere, si *crasse pinguesque partes nomine sulphuris donentur*. Cum enim halitus, per quos fit odorum diffusio, subtilissimi sint, maximeque actiuosi, dicendum videtur, non a crassis, & pinguibus, sed a subtilioribus, solutioribus, vividioribusque odori corporis partibus illos provenire. Tantum quoque abest, si *crasse, pinguesque partes nomine sulphuris donentur*, illud ipsum de odorum origine sentire Chymicos, quod docet Vir Cl., quin illis potius manifeste ipse tunc adversetur. Chymici enim non ex *crassis & pinguibus*, sed ex *subtilioribus, volatilibusque* corporis partibus eos halitus oriri arbitrantur, in quibus ipsius corporis odores positos esse, contendunt.

VII.

72. Inter qualitates, quæ ad tactum pertinent, primus occurrit calor. Hunc definiunt Scholastici *accidens corporis absolutum, cujus proprium est, congregare homogenea, & heterogenea disgregare*. Falsotamen. Nihil certe minus verum est, quam calorem esse *accidens absolutum*; nihil magis a veritate alienum, quam proprium esse caloris, ut congreget *homogenea, & heterogenea* disgreget. Primum ostenditur ex eo, quod calor sit *entitas impenetrabilis*. Certo certius siquidem mihi est, nihil, quod natura sua sit impenetrabile, esse posse *accidens absolutum* (§. 19. 55.). Jam vero quod calor sit aliquod impenetrabile, demonstrant observationes plurimæ, quæ, cum cuique obviæ sint, verti a nemine in dubium possunt. Prima est, calorem non æque facile subire omnia corpora, sed facilius *fluida, & rara*, quam *dura & densa*. Facilius namque pervadit, afficitque aerem, quam aquam, & hanc facilius, quam lapides, & metalla. Secunda: calorem, ut ait Cl. Gravesandus, diu conservari in corpore, si hoc aliis corporibus involvatur; & corpora diutius calorem servare, aut breviori tempore hunc amittere pro diversis, quibus involvuntur, corporibus (a). Tertia: nullum corpus, siue *durum* illud sit, siue *fluidum*, posse calorem concipere, quin ea constanti lege tumescat, & rareseat, ut, quo vehementior fuerit calor, quem concipit, eo major evadat illius *moles, & raritas*; minor vero, quo calor ipse fuerit remissior. Quarta: non omnia corpora, caloris actione, ex æquo dilatari, sed aliqua magis, mi-

DUS

(a) Elem. Physicæ Mathem. §. 2, 26.

nus alia. Apparet semper, inquit Cl. Boerhaavius, duo corpora ejusdem ponderis, & molis, quorum unum sit durum, alterum fluidum, in eo differre, quod ab eodem igne fluidum magis, solidum minus expandetur. Certe in omnibus, pergit ille, quæ exploravi, hæc ratio obtinuit (a). Se quoque expertum fuisse testatur, illos liquores, qui minus densi, aut leviores sunt aliis, semper eo plus rarefcere ab uno, eodemque igne (b). Postrema demum observatio est, nullum corpus fluidum incalescere, quin internæ illius partes tumultuarium motum concipiant, & ita quidem, ut major in illis tumultus ipse fiat, quo magis calor augeatur; minor, quo magis calor minuitur. Constat quoque, metalla, aliaque dura corpora, vi & energia caloris, non dilatari solum, verum etiam liquefcere, imo & instar corporum fluidorum ebullire. Ex hisce porro impenetrabilem caloris naturam demonstrari, rem perspicuam puto. Quod enim natura sua penetrabile est, æque facile tam dura, quam mollia, tam rara, quam densa corpora pervadit; a nullo, utut duro, & denso, circumambiente corpore impediri valet, ne erumpat; nulliusque demum corporis partes ita potest urgere, ut eas nedum extrorsum impellat, verum etiam divellat a se mutuo, & perturbate exagitet.

Dicent Scholastici, calorem non esse aliquod impenetrabile per se, sed tantum per accidens, scilicet nonnisi ratione subtilium corpusculorum, quibus inhaeret, & quorum ope sese insinuat in corpora, & per aerem propagatur.

Verum contra est. Nam hinc sequitur primo, eos omnes Scholasticos errasse olim, & modo etiam errare, qui docuerunt, & docent, corpora incalescere, quatenus calor, tamquam inherens forma, in eorum substantia recipitur. Dicere quippe debuissent, ut nunc dicunt propugnantque Recentiores, illa fieri calida, quatenus subtilissima quadam corpuscula, e calefaciente corpore erumpentia, illorum poros subeunt, perque eorum molem disperguntur.

Sequitur secundo, proprium non esse caloris, dilatare corpora, eorumque partes perturbato, & expansivo motu agitare. Non enim calor sumtus formaliter, sed subtilissima illa corpuscula, quibus calor inherere dicitur, extrorsum urgent partes corporis, cujus poros subeunt, ipsasque partes ea sola impellunt; cum ad hosce præstandos effectus non aliud sane, quemadmodum consideranti parebit, requiratur, nisi ut illa corpuscula sint impenetrabilia, mole minima, & motu affecta. Igitur vel caloris sumti formaliter proprium non est, dilatare corpus, quod afficit, ejusque partibus expansivum perturbatum-

(a) Tom.I.Chemię pag.68.edit.Venetæ.

(b) Ibidem.

tumque motum tribuere; vel nullum est *absolutum* illud *accidens*, quod corpusculis, a calorifero corpore indefinenter emissis, superaddunt Scholastici, & in quo *calor*, sumtus, ut ipsi ajunt, *formaliter*, ab iisdem collocatur. Quod si quis illorum dicat, expansionem, quæ fit in corpore, dum incalescit, motumque tumultuarium, qui in illius partibus tunc apparet, effectus esse *caloris*, non quidem *formaliter*, sed *materialiter* dumtaxat considerati, necesse est, ille simul explicet atque demonstret, quinam deinde sint effectus, qui a *calore* sumto *formaliter* proveniunt, & ex quibus propterea illius distincta efformatur notio, & existentia in corporibus a nobis demonstratur.

Dices, effectum proprium *caloris*, hoc modo sumti, esse disgregare *heterogenea*, & *homogenea* congregare.

Contra. Nam, si *caloris* sumti *formaliter* id proprium est, illius quoque eodem modo spectati erit proprium, dilatare corpora, dissolvere ipsorum partes, easque perturbate movere. Neque enim sine partium dissolutione, & motu potest *calor* disgregare, quæ *heterogenea* sunt, & congregare, quæ sunt *homogenea*. Proprium autem nequit esse *caloris*, dilatare corpus, quod afficit, ejusque partes perturbate movere, nisi, ut est modo visum, sit *entitas impenetrabilis*. Ergo, nisi *calor*, & quidem sumtus *formaliter*, sit *entitas* hujusmodi, proprium illius esse nequit, disgregare *heterogenea*, & *homogenea* congregare.

Audiendus propterea non est Cl. P. Ferrari, dum ait, *calorem* esse *formam accidentalem absolutam*, qua nata est *raritatem* inducere, *heterogenea* segregare, congregare *homogenea*, quæque cum motu ut plurimum jungitur, atque cum *substantiali* corpusculorum effluvio propagatur (a). Si namque *calor* sit *forma accidentalis*, sive *accidens*, quale vulgo a Scholasticis definitur, memoratos effectus, utpote hoc ipso natura sua *penetrabilis*, præstare non potest. Neque inficiabitur Cl. Auctor, *calorem* esse *entitatem* natura sua *penetrabilem*; cum manifeste jam antea docuerit (b), *naturalem impenetrabilitatem* soli *quantitati*, a qua *calor*, utpote *qualitas*, illius etiam judicio (c), plane distinguitur, convenire. Peccare insuper videtur Vir Cl., ponendo, *calorem* non semper, sed tantum ut plurimum, conjungi cum motu, & cum *substantiali* corpusculorum effluvio propagari. Si enim *calor* neque semper sit cum motu, neque semper cum *substantiali* corpusculorum effluvio diffundatur, corporibusque communicetur, incalescere quandoque poterunt corpora, quin rarecant, sicuti etiam quin disgregentur *heterogenea*, quæ in illis sunt, & *homogenea* congregentur.

(a) Tom. II. P. I. *Physicæ* Disp. IV. (b) Tom. I. P. I. *Logicæ* Sec. I. cap. 6. pag. 60.
q. 3. pag. 232.

(c) Ibidem pag. 61.

Nullum quippe corpus rarefieri potest sine *motu*, & nisi id, cuius actione dilatatur, sit aliquod non solum *motu* affectum, verum etiam *impenetrabile*. Præterea, si *calor* aliquando sine *motu* est, ostendat, quæso, Vir Cl., undenam in corporibus colligi existentia *caloris* possit, sive quænam sit ea *caloris* proprietas, per quam formetur distincta illius notio, ejusque existentia in corporibus perpetuo dignoscatur. Probat porro Cl. Auctor, *calorem esse formam accidentalem absolutam* ex hoc, quod *calor multis corporibus modo insit, modo non insit, integra remanente eorum natura*; ex hoc vero ostendit, *calorem non semper, sed ut plurimum dumtaxat cum substantiali corpusculorum effluvio propagari*, quod *verisimile non sit, corpora nunc calida fieri, nunc secus, per ingressum, vel egressum corpusculorum calidorum*. Nam, inquit, *in quacunque parte ebullientis aquæ calor percipitur; cum tamen incredibile sit, calida corpuscula in omnibus aquæ particulis reperiri* (a). Verum neutra harum rationum, si penitius inspiciatur, intentum evincit. Certe non prima. Ex eo enim, quod *calor modo corporibus insit, modo absit, integra remanente eorum natura*, sequitur quidem, *calorem contingenter advenire corporibus, adeoque tamquam illorum accidens spectari debere*; at non sequitur, illum esse *accidens physicum absolutum*, quale ab ipso cum Scholasticis definitur. Potest quippe corporibus contingenter advenire *calor*, quamvis sit vel tantum *affectio modalis*, vel *accidens logicum*, nempe *effluviū substantiale*, cuius tota vis in expansivo perturbatoque motu, ut Recentiores ajunt, consistat. Sed neque secunda assumptum probat. Si namque non est verisimile, corpora fieri *calida* per calidorum corpusculorum ingressum, idcirco quia *in quacunque parte ebullientis aquæ calor percipitur*, dicamus oportet, nullum corpus sive *solidum*, sive *fluidum* hoc modo *calidum* fieri; propterea nimirum quia nullum penitus sit corpus *calidum*, in cuius qualibet, utut exigua, parte *calor* non deprehendatur. Aut igitur nullum corpus per ingressum calidorum corpusculorum fieri *calidum* dicendum est, ac proinde *calorem, non semper, nec fere semper*, ut ait Cl. Adversarius (b), sed nunquam, *cum substantiali calidorum corpusculorum effluvio* conjungi, aut dicere vel inviri debemus, omne corpus per ingressum calidorum corpusculorum *calidum* evadere; adeoque illum errasse dum scripsit, *calorem fere semper* (c), sive *ut plurimum* (d), adeoque non semper, cum illo *substantiali effluvio* propagari. Ceterum, cum etiam P. Ferrari, explicans *caloris* effectus doceat, aquam *incalescere, & ebulli-*

L

re,

(a) Loco citato pag. 232. (b) Ibidem. (c) Ibidem. (d) Ibidem pag. 232.

re, quatenus ignita corpuscula illam subeunt (a), consequens videtur, ut vel etiam ipse dicat, non in quacunque parte ebullientis aquæ calorem percipi; & ideo falso hinc collegisse, calorem non semper, sed ut plurimum, cum substantiali corpusculorum calidorum effluvio propagari; vel id concedat necesse est, quod censuit incredibile (sed melius dixisset naturaliter impossibile) calida scilicet corpuscula in omnibus aquæ particulis reperiri.

Videndum modo est, an ita proprium sit caloris, disgregare heterogenea, & homogenea congregare, ut recte Scholastici, Aristotelem sequuti (b), per hanc vim calorem ipsum definiant. Dico ergo, experientiæ id minime consentire. Constat enim, terebinthinam, aliaque resinosa corpora ita cum cera, caloris actione, confundi, ut unum idemque plane corpus inde consurgat. Idipsum fieri in metallis, perspicuum cuique est. Etenim, si eorum plura in eodem simul vase, valido admoto igne, liquecant, minimæ eorundem particulæ miscentur adeo inter se, ut genus aliud metalli ab illis plane diversum hinc factum esse videatur. Demum, ut paucis dicam, nulla mixtio fit sine calore. Jam vero proprie non miscentur inter se, nisi quæ sunt natura dissimilia, nempe heterogenea. Ergo tantum abest, heterogenea, vi caloris, disgregari, ut potius sit dicendum, ea, caloris actione, simul confundi. Falsum quoque est, quæ ejusdem sunt generis, calore contrahi. Observante enim Cl. Malebranchio, calor partes aquæ non congregat; illas potius in vapores dissipat. Non congregat partes vini, nec partes cujuslibet alius liquoris, seu corporis fluidi, immo nec partes argenti vivi. Contra omnia corpora solida, & fluida, homogenea, & heterogenea resolvit, & disgregat. At si quadam sint, quorum partes ignis non possit dissipare, id non fit, quod sint ejusdem naturæ, sed quia sunt crassiores, & solidiores, quam ut possint abripi motu partium ignis (c). Itaque contra experientiam manifeste peccant Scholastici, dum proprium esse dicunt caloris, congregare homogenea, & heterogenea disgregare.

Respondet Cl. P. Ferrari cum Philopono, per homogenea, quæ dicuntur calore congregari, non intelligi ea solum, quæ eandem habent naturam substantialem, sed etiam illa, quæ in liquabilitate, vel gravitate, aut levitate, vel in alia simili complexione conveniunt; præsertim vero illa, quæ similem habent partium contexturam, sive materiæ consistentiam. Ita per eterogenea, quæ calore segregari dicuntur, intelligi illa, quæ in his affectionibus discrepant, licet aliquando sint ejusdem naturæ (d).

Sed

(a) Loco citato pag. 237.

(b) Lib. II. de gen. & corrupt. tex. 8.

(c) Lib. IV. de inquirenda veritate cap. 5.

(d) Tom. II. P. I. Physicæ Disp. IV. q. 3. p. 230.

Sed contra. Nam metalla genere dissimilia, ut aurum, argentum, cuprum, ferrum, &c. differunt in gravitate, & liquabilitate, ut est perspicuum. Igitur, si *heterogenea* dicantur, quæ in his affectionibus discrepant, dare P. Ferrari vel invitum debet, metalla esse corpora *heterogenea*. Hæc autem omnia simul calore miscentur. Ergo ea etiam corpora miscentur calore, quæ, illius judicio, sunt *heterogenea*. Similiter partes aquæ, sicuti etiam argenti vivi, id totum habent, quod in illis postulat Vir Cl., ut *homogenea* censeantur. Similem certe habent partium contexturam, sive materia consistentiam. Illæ autem, experientia recte, nedum disgregantur a calore, sed dissipantur. Ergo ea etiam, quæ laudatus Auctor *homogenea* censet, a calore disgregantur. Vel igitur nulla hæc *homogeneorum*, & *heterogeneorum*, a Philopono tradita, & a P. Ferrari adoptata, explicatio est; vel nulla est ea caloris proprietas, quam illi tam acriter in ipso propugnant.

Restat igitur, dicamus cum Cl. Boyle, veram, & genuinam caloris proprietatem esse, in motum cedere, & hoc ipso dissociare corporum partes, easque in minutas particulas subdividere, nullo habito, sintne *homogeneæ*, an *heterogeneæ*, respectu, uti in aqua ebullitione, in mercurii distillatione, corporumve actioni ignis expositione patet, quorum partes vel non sunt, vel saltem eo caloris gradu non apparent, dissimilares: ubi totum, quod præstare ignis potest, est dividere corpus in perpusillas partes, quæ ejusdem sunt naturæ secum invicem, & cum suo toto, ut earum reductio per condensationem evincit. Atque etiam tunc, quando congregare *homogenea*, & *heterogenea* segregare ignis videtur, nonnisi per accidens effectum illum producit. Ignis enim dumtaxat dissolvit cæmentum, vel potius compagem illam, sive structuram disjicit, quæ partes corporum *heterogeneas* sub una communi forma constrictas tenebat, quæ facta dissolutione, componentis mixti particula discincta, & libertatem nacta, naturaliter, & sæpe sine ulla ignis operatione, suis quaque similibus sese associant, vel potius loca illa capiunt, quæ diversi gradus gravitatis, vel levitatis, fixitatis, vel volatilitatis, sive naturalis, sive ab impressione ignis accersita, ipsis assignant (a). Hinc, cum ex nullo effectu per accidens recte describi res possit, peccant Scholastici non in eo solum, quod calorem dicant accidens absolutum, verum etiam in eo, quod per vim disgregandi *heterogenea*, & *homogenea* congregandi, tamquam per proprietatem illius principem, calorem ipsum definiant. Igitur neque Cl. P. Ferrari audiendus est, dum ait, hanc esse caloris vim, ut *homogenea* congreget, & segreget *eterogenea* (b); præsertim, cum vis hujusmodi nonnisi per accidens, illius

L. 2

quo-

(a) P. I. Chemistæ Sceptici.

(b) Tom. II. P. I. Physicæ Disp. IV. q. 3. pag. 230.

quoque iudicio, calori insit. Inquit enim: *dum calor corpora quaque exagitat, & rarefacit, tum partes corporum graviores subsidunt, leviores vero sursum evehuntur. Et infra: cum calor per virtutem relaxandi, & rarefaciendi, concretionem, & colligationem illorum corporum tollat, idcirco quodlibet corpus ad locum propriae gravitati debitum fertur (a).* Sentit ergo cum Boyle, *veram, & genuinam caloris proprietatem esse in motum ciere, & hoc ipso dissociare corporum partes; has vero discinctas, & libertatem nactas, naturaliter, & saepe sine ulla ignis operatione, suis similibus singulas sese associare, vel potius loca illa capere, quae diversi gradus gravitatis, vel levitatis, fixitatis, vel volatilitatis, sive naturalis, sive ab impressione ignis accersita, ipsis assignant, ac proinde calorem non per se, sed tantum per accidens disgregare heterogenea, & homogenea congregare; unde peccat Vir Cl., dum per segregandi heterogenea, & homogenea congregandi calorem describit.*

Negat tamen Cl. Auctor, calorem nonnisi per accidens ad hunc effectum concurrere, propterea nimirum quia ad rarefactionem, & relaxationem ope caloris factam sequatur per se, semper, & necessario (si nihil aliud violenter obsit) congregatio similium, & dissimilium secretio. Quare, cum calor concurrat ut causa per se determinata ad obicem illum tollendum, quo praedicti effectus impediuntur; ideo, inquit, calor causa dicitur per se illorum effectuum (b). Verum, ut aliquid vere sit, recteque dicatur causa per se alicujus effectus, satis esse, ut illud sit per se determinatum ad obicem illum tollendum, quo praedictus effectus impeditur, neminem Philosophorum arbitror fore, qui huic doctrinae sese subscribat. Nihil enim communicat effectui, quod obicem dumtaxat remover, a quo illius productio prohibetur; nimisque alienum a ratione est, id statuere causam per se alicujus effectus, quod illi nihil plane communicat. Et sane, cum remotio obicis non sit, omnium Philosophorum iudicio, nisi conditio praerequisita ad productionem effectus, vel id omne dicendum est causa per se alicujus effectus, quod tantum aliquam conditionem ponit ad illius productionem praerequisitam, vel inficiemur oportet, id esse causam per se, quod obicem tollit dumtaxat, a quo productio effectus prohibetur; ac proinde negemus necesse est, ideo segregare heterogenea, & homogenea congregare esse caloris effectum per se, quia calor obicem illum tollit, quo praedicti effectus impediuntur. Miror autem, Virum ipsam Cl.

(a) Tom II. P. I. Physicae Disp. IV. q. 3. pag. 230.

(b) Ibidem pag. 235. in responsione ad instantiam, ejusque confirmationem post objectionem 3.

Cl. paulo antea dixisse, ideo motum non esse *causam caloris per se*, sed tantum *causam per accidens* (a), quia motus calorem non producat, sed efficiat tantum, ut calida corpuscula, in corporibus, quæ motu incalescunt, delitescant, libertatem nanciscantur. En illius verba: *Est motus causa caloris tantummodo per accidens. In viventibus enim motus dicitur causare calorem, quatenus efficit, ut spiritus animales evocentur ad cutem, & ad exteriores partes accedant. Illi autem spiritus, cum sint calidissimi, calorem excitant. Ita ergo manus mutua perfricatione incalescunt, quatenus per motum calidi spiritus ad cutem excitantur. In non viventibus vero motus est causa caloris, sed in iis tantum corporibus, quæ valide inter se conteruntur, & quorum alterum saltem sit calidum, vel calidiora corpuscula in suis meatibus contineat. Nam tunc vel corpuscula illa extrahuntur per motum, & rarefiunt, vel aer circumambiens purior per motum redditur, & ab eo separantur crassiores, & frigidi halitus, unde post rarefactionem ex sui natura incalescit; atque exinde calor diffunditur. Itaque caloris causa per se tunc est aer, vel illa corpuscula, raritas est dispositio, motus vero est causa per accidens* (b). Hæc ille. Velim ergo, explicet Vir Cl., quomodo calor sit causa per se disgregationis heterogeneorum, & congregationis homogeneorum, licet nonnisi obicem tollat, quo, ut ipse ait, *predicti effectus impediuntur*; contra vero motus non sit causa caloris, nisi per accidens, quamvis etiam ille nonnisi impedimentum auferat, quo calida corpuscula in corporum meatibus detinentur.

VIII.

73. Ex modo traditis de calore difficile non est ostendere, neque frigus haberi posse tamquam *accidens absolutum*, neque per vim congregandi, tam quæ ejusdem, quam quæ diversi sunt generis, illud posse, ut vulgo fit a Scholasticis, definiri. Utrumque enim satis manifeste ex eo patere arbitror, quod frigus oppositione contraria calori adversetur. Enimvero, cum hinc sequatur, calorem, & frigus contineri sub eodem genere proximo qualitatis, dicendum necessario est, si calor non sit *accidens absolutum*, neque frigus simile *accidens* esse posse. Similiter, cum contrarii debeant esse effectus, quos calor, & frigus in corporibus producant, si calor congregat homogenea, & heterogenea disgregat, debet frigus ex adverso congregare heterogenea, & homogenea disgregare.

Respondet Cl. P. Ferrari, posse eundem effectum a contrariis causis

(a) Loco citato pag. 231.

(b) Ibidem.

procedere, quando pluribus, & diversis modis obtineri potest, ut res se habet in homogeneorum congregatione, qua effici potest & per rarefactionem, & per condensationem. Ceterum (pergit ille) aliud est, sola homogenea congregare, quod caloris proprium est; aliud vero congregare homogenea, & heterogenea simul, quod convenit frigori (a).

Sed contra. Etenim primo paradoxum est, eundem effectum a causis contrariis per contrarias actiones posse produci. Paradoxum est enim, tam a glacie, quam ab igne æque posse manum calefieri. Rationem certe non video, cur id fieri non possit, si potest fieri, ut idem effectus a causis contrariis, contrariis modis producat, nimirum si congregari queant homogenea tam a calore per rarefactionem, quam a frigore per condensationem. Secundo, si calor non unit homogenea, nisi quatenus corpora rarefacit, neque frigus illud ipsum præstat, nisi quatenus corpora condensat, sequitur, congregare homogenea non esse caloris, & frigoris effectum per se, sed tantum per accidens. Profecto, sicuti, teste ipso P. Ferrari, frigus per accidens vasa disrumpit, quatenus, cum vim habeat condensandi, & constringendi nimium illorum partes, ista ab aliis scinduntur, dum eas secum trahere agglutinas non queunt (b); ita nonnisi per accidens tam homogenea, quam heterogenea congregantur a frigore; cum id ab illo quoque non fiat, nisi quatenus partes corporis, quod afficit, simul devincit. Si autem tantum per accidens, tum quæ ejusdem, tum quæ diversi sunt generis, frigus congregat, manifeste sequitur, id neque posse proprium esse frigoris, neque per illud, quemadmodum de calore diximus, posse frigus legitime definiri. Ergo vel fallitur Vir Cl., dum ait, homogeneorum congregationem idcirco fieri tam a calore, quam a frigore, quia tam per rarefactionem, quæ a calore efficitur, quam per condensationem, quæ provenit a frigore, oriri illa potest; vel peccat, dum Aristotelem sequutus (c) docet (d) frigus esse id, quod homogenea, simul ac heterogenea congregat. Nullus postremo negabit Cl. Auctori, aliud esse sola homogenea, aliud homogenea, simul ac heterogenea congregare; sed nemo quoque illi dabit, id sufficere, ut per hujusmodi effectus frigus a calore distinguatur. Necesse est enim, ut illi effectus non solum dissimiles, verum etiam contrarii sint inter se, cujusmodi sane non sunt, congregare sola homogenea, & congregare homogenea, simul ac heterogenea, ut est perspicuum.

Ce-

(a) Tom. II. P. I. Physices Disp. IV. q. 4. pag. 243. in responsione ad confirmationem objectionis tertiæ.

(b) Ibidem pag. 242. in responsione ad objectionem tertiam.

(c) Lib. II. de gen. & corrupt. tex. 8.

(d) Loco citato pag. 241.

Ceterum ex iis etiam, quæ *frigoris* actione in corporibus contingunt, manifeste colligitur, *frigus* non esse *accidens absolutum* in sensu Scholastico. Constat enim, *frigus* densare corpora, quæ afficit; dura ipsa reddere, si mollia fuerint; liquores plurimos in consistentem massam mutare, motumque eorum intestinum compescere (a). Certum est autem, effectus huiusmodi provenire non posse, nisi ab *entitate*, quæ partes corporis premat, & contra se invicem urgeat; atque adeo quæ sit impenetrabilis. Huiusmodi autem esse nequit, si fuerit *accidens absolutum* (§. 55.). Ergo &c.

Dices, *frigus* esse quidem aliquod impenetrabile, non tamen secundum se, sive *formaliter*, sed tantum *materialiter*, nempe ratione corpusculorum, quibus inhæret, & quibus, tamquam vehiculo, diffunditur, & corporibus communicatur.

Sed contra primo: si enim corpora frigescent per receptionem frigidorum corpusculorum, ii omnes Scholastici olim errasse, & modo etiam errare dicendi sunt, qui docuerunt, & docent, frigescent corpora, quatenus *absolutum accidens*, quod vocant *frigoris*, in illorum substantia producitur.

Contra 2. Nam hinc sequitur, densare corpora, dura reddere, quæ mollia sunt, liquores plurimos in consistentem massam mutare, motumque perturbatum, & expansivum internarum partium corporis retardare, atque etiam sistere, non esse effectus *frigoris*, sed illorum corpusculorum, quibus illud inhære dicitur; & ideo perperam per illos effectus *frigus* describi.

Contra 3. Sequitur enim, proprium non esse *frigoris*, tum quæ ejusdem, tum quæ diversi sunt generis, congregare. Cum enim id non contingat in corporibus, nisi quatenus dentantur a frigore, eorumque partes simul ab illo devinciuntur, non *frigori*, sed corpusculis, quibus ipsum inhæret, & vehitur, *homogenorum*, & *heterogeneorum* congregatio tribuenda est, sicuti id ex illis unice provenit, quod congregatio ipsa consequitur. Peccat idcirco Cl. P. Ferrari, dum *frigus* definit *formam accidentalem absolutam, qua nata est, densitatem inducere, homogenea, & heterogenea congregare* (b). Nam, cum illa forma sit *entitas* natura sua penetrabilis, nequit densitatem tribuere corporibus, neque potest, tam quæ ejusdem, quam quæ diversi sunt generis, congregare.

Peccat quoque idem Vir Cl., dum admittens, in *frigoris* *communicatione*, & *propagatione* corpuscula frigida diffundi, negat, in illis consisti.

(a) Vide quæ diximus in *Physica* Tom. I. §. 864., & seq.

(b) Tom. II. P. I. *Physica*. Disp. IV. q. 4. pag. 241.

stituendam esse frigoris naturam; quia, inquit, experientia constat, totam pene aquam frigidam reddi; quare nec probabile est, nec verisimile, tunc aquam ex totidem frigidis corpusculis compactam esse (a). Quando enim ait, constare experientia, totam pene aquam frigidam reddi, vel ita sumit totam, ut velit, etiam minimas penitusque insensibiles illius particulas frigiditas evadere; vel ita, ut nonnisi de partibus aque sensibilibus velit intelligatur. Si primum: scire optarem a Viro Cl., quomodo illud experientia cognoverit. Nullum quippe in particulis aquæ minimis penitusque insensibilibus fieri a nobis periculum potest, quo eas esse frigiditas, cognoscatur. Sin alterum: vellem ostenderet Vir Cl., quomodo constet experientia, sensibiles partes aquæ non fieri frigiditas per receptionem frigidorum corpusculorum; sicuti etiam quare, ut ipse ait, non sit probabile, nec verisimile, aquam, dum frigida evadit, ex totidem frigidis corpusculis compactam esse, quot nempe, ut puto, necesse est in ea habeantur, ut tota quoad sensum frigida a nobis sentiat. Nonne constat experientia, dulcem nobis videri totam aquam, quæ in vase est, licet nonnisi per admixtionem dulcium corpusculorum sacchari in ea dissoluti dulcedinem contrahat? Nonne docet ipse, experimenta ostendere, frigida corpuscula diffundi, atque ex illorum communicatione alias etiam res frigiditas effici (b)? Si enim aqua non sit frigida ex communicatione frigidorum corpusculorum: ergo neque res aliæ hoc modo fiunt frigide; cum & illæ, perinde ac aqua, quoad omnes suas partes nobis frigida appareant. Si vero aliæ res hac modo fiunt frigide: ergo eadem ratione etiam aqua frigida hoc modo efficitur. Sibi igitur contradicit Cl. Auctor, quocumque se vertat.

74. *Arida corpora non propterea humectari, quod absolutum aliquod accidens illis adveniat, neque ea, humida jam facta, idcirco exsiccari, quia accidens haud dissimile ipsa deperdant, facile ostenditur. Constat enim, corpora arida, dum aquæ immersa humectantur, notabiliter intumescere, mollia fieri, eorumque pondus augeri, & eo quidem magis, quo magis ipsa humescunt. Vicissim vero, dum humectata arefcunt, constat, sensim decrefcere eorum molem, durefcere, si mollia antea fuerant, eoque demum leviora evadere, quo fiunt aridiora. Certum est autem, per humiditatem, quæ sit accidens absolutum, adeoque entitas penetrabilis, fieri non posse, ut augeatur*

(a) Tom. II. P. I. Physicæ Disp. IV. (b) Ibidem. q. 4. assert. 2. pag. 238.

tur moles corporis, in quo recipitur, laxentur illius fibræ, sique *durum* fuerit, *molle* reddatur, ejusque pondus crescat; neque vicissim per haud dissimile *accidens* vel *humiditatis*, quæ recedat, vel *siccitatis*, quæ adveniat, posse fieri, ut corporis magnitudo minuatur, *durum* illud evadat, leviusque, ac *rigidum*. Ergo corporum humectatio, & exsiccatio non fiunt per *accidens absolutum*, quod vel adveniat illorum substantiæ, vel ab illa recedat.

Compertum præterea experientia est, corpora, quo *densiora*, & *duriora* sunt, difficilius humectari; citius vero, quo sunt *molliora*, atque *rariora*. Si autem per receptionem *accidentis absoluti* fieret humectatio, æque facile, siue *durum*, & *densum*, siue *molle*, & *ravum* sit corpus, illa in eo perficeretur. *Absolutum* siquidem *accidens*, utpote natura sua penetrabile (*J. 55.*), æque facile in *duro*, & *denso*, ac in *molli*, & *raro* corpore, ut est perspicuum, recipitur. Ergo per receptionem *accidentis absoluti* non fit corporum humectatio.

Demum, si *humiditas*, & *siccitas* essent *accidentia absoluta*, simul in eodem subjecto, utpote contraria, componi nequirent; & ideo, adveniente *humiditate*, periret *siccitas* in corpore; neque *siccum*, *humiditate* recedente, illud evaderet, nisi nova *entitas absoluta* in ipso produceretur. Teste autem experientia, contrarium accidit. Constat enim, humectatum corpus exsiccari, tum si adeo comprimatur, ut totus, qui in illius poris latet humor, exiliat; tum si, caloris, ventorumque vi, & energia, humor ipse attenuetur, & dispergatur. Ergo *humiditas*, & *siccitas* non sunt *accidentia absoluta*.

S C H O L I O N I.

75. Exsiccari corpora, non quia *absolutum* aliquod *accidens* in illorum substantia ab exsiccante agente producat; sed quia tantum, qui in eorum poris latet humor, dissipetur, docuit etiam Aristoteles, dum ait, omnia a calore exsiccari *vel interiore, vel exteriori, humorem in vaporem eliciente* (a).

S C H O L I O N II.

76. Neque corpus *humidum*, siue *humectans* a *fluido*, neque *siccum* a *solido* secernit Cl. P. Ferrari (b). *Humidum* quippe definit id, quod
M alieno

(a) Lib. IV. *Meteorum* cap. 5.

(b) Tom. II. P. I. *Physicæ* Disput. IV.

q. 6. pug. 250.

alieno facile termino terminatur, difficile suo; id vero siccum appellat, quod suo facile termino terminatur, difficile alieno. Docet præterea (a), id consentaneum esse rationi, atque experimentis; nisi, inquit, quis velit, expositas a nobis humidi, & sicci definitiones suo tantum sensu usurpare, non nostro. At vel falsa hæc sunt, vel sibi metipso ille manifeste adversatur. Falsa sunt, si ignis ponatur corpus apprime siccum. Ignis enim fluidissimus est; cum, ut patet in flamma, facillime alieno, nullatenus autem suo termino comprehendi possit. Sibi vero ille aperte adversatur, si velit, ignem esse elementum humidum; cum differens ipse de elementorum qualitatibus, doceat, in igne calorem cum siccitate componi (b) agens vero de ignis natura, eum definiat, elementum, cujus natura exigit, cetera inter, siccitatem (c). Adde, ejusdem sententiam esse, ignis naturam postulare intestinum motum suarum partium, quo objecta corpora dissolvat (d). Quomodo ergo ignis siccus esse potest, si corpus siccum, ut ille tradit, idem sit, quod solidum; solidum vero ab ipso dicatur, cujus partes, ut ipse ait, ramorum instar, invicem sese arctius complectuntur, unde & motui, ac divisioni resistunt, & proprio termino facile continentur (e)?

Respondet Cl. Auctor, flammam fornacis ægre, & per vim a fornace terminari, unde huc atque illuc discurrit, ut foras erumpat, ac, si concavum clibani lambit, hoc ideo facere, ut quam brevi circuitu foras evadat. At corpora humida sponte sua sese figura continentis accommodare, & in eo conquiescere (f).

Contra: nam hinc sequitur, neque aquam esse humidam, quod ipsa quoque nonnisi ægre, & per vim a vase, ut flamma a fornace, terminetur. Sicuti enim flamma sursum continuo tendit, ita aqua deorsum moveri continuo nititur; & quemadmodum illa huc illucque discurrit, & clibani concavum lambit, ut brevi circuitu ex illo erumpat, ita hæc premit vasis fundum, ejusque latera indefinenter urget, ut ex ipso exiliat. Itaque vel neque aqua fluida est, vel etiam flammam fluidam dicamus oportet; & ideo, si humidum idem plane sit, quod fluidum, ignis non maxime siccus natura sua dici debet, sed apprime humidus.

Addit Vir Cl., neque tandem ignem siccum esse, & non solidum. Quod enim, inquit, propriis terminis non cohibeatur, neutiquam evincit, aut solidum non esse ignem, aut siccitatem idipsum non exposcere. Sed aliunde id repetendum est. Nempe quia calor in igne prædominatur

sicci-

(a) Tom. II. P. I. *Physices* Disp. IV. q. 6. pag. 250.

(b) Ibidem Disp. II. q. 1. pag. 61.

(c) Ibidem q. 5. pag. 112.

(d) Ibidem.

(e) Ibidem Disp. IV. q. 6. pag. 260.

(f) Ibidem pag. 251.

siccitati, ex quo fit, ut moderatio siccitatis vincantur voracitate caloris omnia depascentis, & ad propinquam materiam expandentis sese, ut diutius per alimentum queat conservari (a).

Verum contra est. Nam vel summus calor in igne ita prædominatur *siccitati*, ut illam destruat, vel non. Si primum: ergo calor nequit cum *siccitate* componi; & ideo ignis summe calidus, simulque *siccus* esse non potest; unde fallitur Cl. Auctor, ignem definiens *elementum, cujus natura exigit siccitatem, & potissimum summam caliditatem* (b). Nimis certe repugnat, ignem postulare natura sua affectiones illas, quæ in eodem subiecto simul componi nullatenus possunt. Sin alterum, nempe si summus calor in igne non perimit *siccitatem*, perperam sane ex caloris prædominio causam derivat Vir Cl., quamobrem ignis propriis terminis non cohibeatur; erratque manifeste, dum ait, *moderationem siccitatis vinci voracitate caloris*. Vinci enim *siccitas* a calore non potest, nisi affectio ejus naturæ ipsa sit, quæ, perinde atque frigus, calori contrarie opponatur.

X.

77. *Fluidum* dicitur corpus, quod sibi relictum diffluit quoquo versus, & cuilibet figuræ suæ veluti sponte facillime sese accommodat; contra vero *solidum*, sive *consistens*, quod non diffluit, si genio suo relinquitur, sed quæcunque illi detur figura, eam constantissime servat. *Fluida* sunt aer, aqua, oleum, & liquores ceteri; *solida* vero lignum, lapides, metalla, cera, creta, & hisce similia. Porro neque *fluiditatem*, neque *consistentiam* esse *entitatem absolutam* corpori superadditam, ex aquæ congelatione, & metallorum liquefactione videtur satis evinci. Nulla quippe *entitas absoluta* in aqua a frigore produci-
tur, dum hujus vi & energia in glaciem illa durefcit; nulla metal-
lis a calore communicatur, dum ejus impulsu ipsa liquefcunt. Con-
stat enim, *frigoris* vim in eo unice esse positam, ut simul devinciat
partes corporis, quod afficit, earumque motum retardet, ac sistat,
sive, quemadmodum ipsi docent Scholastici, ut tum quæ *homogenea*
sunt, tum quæ sunt *heterogenea*, illud simul congreget; & vicissim
vim caloris in eo tantum consistere, ut laxet texturam corporis, cui
communicatur, motuque perturbato, & expansivo illius partes exa-
gitet, sive, quemadmodum ajunt iidem ipsi, ut congreget *homoge-
nea*, & *heterogenea* disgreget (§§. 63., & 64.). Præterea, cum de-

M 2

nuo

(b) Tom. II. P. I. *Physicæ* Disp. IV. q. 6.
pag. 250.

(b) Ibidem Disp. II. q. 5. pag. 113.

nuo fluat aqua gelu concreta, & liquata metalla iterum durefcant, ftatim ac in hifce calor, in illa frigus minuatur, ac proinde quin *entitas* aliqua *absoluta* illis corporibus tunc communicetur, relinquitur, neque *fluiditatem* aquæ, neque metallorum *confistentiam* jure poffe in *absoluta entitate* constitui; quod nempe nulla fit caufa pofitiva, a qua *entitas* ejufcemodi in illis corporibus tunc producat.

Dices, caufam productricem *fluiditatis* in aqua gelu concreta, dum aliquantulum tepescit, & *confistentia* in metallis, dum liquata frige- fcunt, effe ipfam aquæ, & metallorum naturam.

Sed contra. Nam fi hæc effet illorum corporum natura, explicati- dum foret, quamobrem aut naturalis ea virtus non impediat, quo- minus aqua durefcant frigore, & metalla calore liquefcant; aut, fi id prohibere vis illa non poffit, cur neque aqua deftruat a nimio frigore, neque a nimis valido calore metalla corrumpantur. Tunc etenim ita aquæ ineffet *fluiditas*, & *confistentia* metallis, ut, falva eorum natura, illis affectionibus carere corpora ipfa non poffint. Ita- que cum, experientia teftè, contra res fe habeat, neque *fluiditas* in aqua, neque *confistentia* in metallis *absoluta entitas* dicenda eft, cu- jus productio, & confervatio ab illorum effentia neceffario proveniat.

X I.

78. Reliquum modo eft, ut de *raro*, & *denfo* pauca dicamus. *Ra- rum* vocant Philofophi, quod fub magnis dimenfionibus parum ma- teriæ continet; *denfum*, quod ex adverfo multum materiæ fub par- vis dimenfionibus comprehendit. Hinc corpus rarefit, cum, eadem in illo manente materiæ copia, ad majus fpatium corpus ipfum ex- tenditur; denfatur vero, cum, falva eadem copia materiæ, ad mi- nus fpatium illud redigitur. Porro neque *rarum* fieri corpus, quod *denfum* eft, neque *denfum* evadere, quod eft *rarum*, per hoc quod *en- titas* aliqua *absoluta*, five *absolutum accidens* ipfi corpori adveniat, ma- nifefte evincitur primo ex hoc, quod pleraque *rara* corpora per folam compressionem, ut experientia ipfa teftatur, *denfa* reddantur. Certo certius eft enim, nullam *absolutam entitatem* produci in corpore, dum comprimitur; fed tunc effici tantum, ut partes ipfius corporis acce- dant ad fe mutuo, ejufque pori constringantur. Suadetur fecundo, ex eo quia corpora quæque rarefcant actione caloris, & viciffim, unam fi excipias aquam, frigoris energia denfentur. Perfpicuum enim puto, neque frigoris, neque caloris eam effe vim, ut *absolutam entitatem* in corpore, quod afficiunt, producere poffint; fed tantum

ut

ut partes ipsius corporis vel constringant, simulque devinciunt, vel expansivo perturbatoque motu ipsas *respective* exagitant (§. §. 72., 73.) Demum si *raritas*, & *densitas* essent *entitates absolute* a substantia corporis, quod *rarum*, vel *densum* dicitur, *realiter* distinctæ, illæ essent profecto vel *qualitas*, vel *quantitas*. Non sunt autem *quantitas*; cum, ut est jam visum (§. 46.), hæc nihil sit *reale absolutum* a corporea substantia *realiter* distinctum. Sed neque sunt *qualitas*, cum, ut Philosophi omnes docent, *rarefactio*, & *condensatio* sint motus non ad *qualitatem*, sed ad *quantitatem*. Ergo &c.

X I I.

79. Itaque ostensum manet, nullam *affectionem*, sive *qualitatem* corporum *sensibilem*, si naturalem rationem consulamus, esse *accidens absolutum* in sensu Scholastico. Tanti sane ponderis sunt momenta, quibus opinionem hanc oppugnativimus, ut si eam penitus non evertant; maximam tamen illi labem inferant, ostendantque, non amore novitatis, sed veritatis impulsu recentiores Philosophos a Peripateticorum Schola recessisse. Accedit, nulla naturali ratione demonstrari a Scholasticis sententiam suam; sed sola auctoritate eorum, qui Scholasticæ sectæ fundamenta jecere, illam ab ipsis suaderi atque defendi. Adhuc certe in votis est, qui Scholasticum *sensibilem qualitatum* systema naturali ratione evincat. Profecto ipse etiam Cl. P. Ferrari, licet se dare promiserit *Philosophiam Peripateticam adversus veteres, & recentiores præsertim Philosophos firmioribus rationibus propugnatam*, differens tamen de accidentibus, quæsit quidem, *utrum naturalis ratio demonstret, falsam esse Peripateticam doctrinam, quæ accidentia astruit realia, & absoluta* (a), sed quærere non est ausus, num ratio naturalis hanc doctrinam veram esse ostendat; persuasum habens, ut puto, se in hac quæstione, si eam institueret, oleum & operam certo certius perditurum. Non est igitur, cur conquerantur Scholastici, quod huic opinioni Recentiores vale dixerint. Nam sicuti auctore Tullio (b), *nihil esse potest turpius Physico, quam fieri sine causa aliquid dicere*, ita nihil magis indignum eidem esse potest, quam sine sufficienti naturali ratione aliquid de rerum natura asserere, & propugnare.

SCHO-

(a) Tom. II. P. I. Physicæ Disp. IV. q. 2.

(b) Lib. I. de Finibus cap. 6.

SCHOLION I.

80. Nullam hic *soni* mentionem fecimus, quod etiam inter ipsos Scholasticos jam plane conveniat, illum non esse *accidens absolutum*, corpori sonanti, vel aeri, per quem diffunditur, superadditum. Certe nihil magis alienum a ratione est, quam *absolutam* aliquam *entitatem* sola percussione in corpore produci.

SCHOLION II.

81. An *gratia*, *lumen gloriae*, atque id genus aliae *spirituales* animae *qualitates* sint *accidentia absoluta*, viderint Theologi. Moneo tantum, etsi *qualitates* istae pro hujusmodi *accidentibus* habeantur, idipsum non propterea etiam de *qualitatibus sensibilibus* dici oportere. Sunt enim genere diversae. Falli idcirco eos puto, qui, ut evincant, *qualitates sensibiles* corporum esse *entitates absolutas*, ad *spirituales* animae *qualitates* provocant, easque hujus esse naturae, demonstrare nituntur. Ceterum animadvertere liceat hoc loco, errorem irrepisse, typographi oscitantia, in §. 603. Tom. I. *Philosophia sensuum* nuper a me editae. Legitur enim: *etsi qualitates sensibiles pro absolutis accidentibus habeantur, non propterea sequitur, idipsum de qualitatibus insensibilibus dici oportere; cum tamen legendum sit: etsi qualitates insensibiles pro absolutis accidentibus habeantur, non propterea sequitur, idipsum de qualitatibus sensibilibus &c.*

PROPOSITIO VI.

Qualitates sensibiles corporis naturalis ex mechanicis affectionibus particularum materiae, ex quibus illud compositum est, unice proveniunt.

82. Probatur 1. In eo posita est *sensibilis corporis qualitas*, per quod *formaliter* habet corpus ipsum, ut sit *sensibile* (§. 8.). A *mechanicis* autem *affectionibus* particularum materiae, quibus compositum est, habet corpus, ut *specificae*, quemadmodum ab illarum *soliditate*, ut *generice* sit *sensibile* (§. 61.). Ergo *qualitates sensibiles* naturalis cujusque corporis a *mechanicis affectionibus* particularum materiae, quibus illud intrinsecus constat, unice proveniunt.

Confirmatur. Etenim in eo certe *qualitas sensibilis* statuenda est, per quod

quod *formaliter* corpora naturalia sunt proxime apta ad ita movendas nerveas externorum sensoriorum fibras, ut ex illa motione aliquis in nobis sensus fiat (§. 36.). Ostensum est autem (§. 60.), ejusmodi esse naturalia quæque corpora hoc ipso *formaliter*, quod ex particulis materiæ certa *magnitudine & figura* affectis, certo artificio simul intextis, certoque demum *motu*, aut *quiete* donatis, intrinsecus coalescant. Ergo *sensibiles qualitates* corporum naturalium a *mechanicis affectionibus* particularum materiæ, quibus illa composita sunt, phylice non differunt.

Probatur 2. *inductione*, demonstrando scilicet, præcipuas naturalium corporum *qualitates* per *mechanicas* componentium particularum *affectiones* satis apte a Recentioribus explicari.

I.

83. Initio itaque sumto a *luce primaria*, hanc minime distinguendam putant a motu concitatissimo subtilium quarundam partium corporis lucidi, ea potissimum ratione in hanc sententiam ducti, quod *lucidum* nobis se prodat corpus, omni penitus *luce* antea destitutum, quam primum subtiliores quædam illius particulæ pernicissimum motum concipiunt; & vicissim *lucem* emittere illud desinat, statim ac subtiliores ejus partes, motu affectæ, ad quietem rediguntur. Utrumque certe experientia manifestum est. *An non*, inquit Cl. Nevvtonus, corpora omnia, quæ partibus abundant terrestribus, & præsertim sulphureosis, lumen emittunt, quotiescunque partes istæ satis sunt agitate, sive id calore fiat, sive attritu, sive percussu, sive putrescendo, sive motu aliquo vitali, sive alia quavis de causa? ut aqua marina, sæviente procella, argentum vivum in vacuo agitatam, felis dorsum, vel equi collum manu oblique in loco tenebricoso affrictum; lingua, carnes, & pisces, dum putrescunt; vapores ex aquis putridis, qui ignes fatui vulgo appellantur; metæ fæni, segetisve subhumidæ fermentescentes; cicindelæ, & animalium quorundam oculi motu quodam vitali; phosphorus Bononiensis radiis luminis agitatus; phosphorus vulgaris, corporis cujusque attritu, vel acidis aeris particulis agitatus; electrum, & adamantes aliqui feriendo, premendo, vel fricando; chalybis strigmenta silice decussa; ferrum ictibus malleorum calefactum, donec sulphur sibi injectum accendat; axes curruum motu rotarum rapidiore incensi; & certi liquores inter se permixti, quorum particula cum impetu concurrunt, ut oleum vitrioli a nitro pari pondere destillatum, de in dupla portione mixtum cum oleo garyophyllorum, sive anisi. Similiter

liter globus vitreus, diametro circiter 8., vel 10. unciarum, machine versatili infixus, ut circa axem suum motu celerrimo circumagatur, qua sui parte, vola manus opposita, inter volvendum confricetur, lucebit. Quod si eodem tempore charta alba, aut linteum album, vel etiam digitus extremus ita admoveatur, ut circiter quarta, vel dimidia unciae parte distet a vitro, qua parte motus ejus est celerrimus, vapor electricus frictione manus e vitro excitatus, & ad chartam albam, linteum, vel digitum allisus, ita agitabitur, ut lucem continuo emittat, efficiatque, ut charta illa alba, linteum, vel digitus, tamquam cicindela, luceat. Quin & e vitro erumpens, ea vi nonnunquam ad digitum illidetur, ut etiam tactu percipi possit. Quod idem quoque evenit, quando cylindrus e vitro, electrove longus, & amplus, charta manu admota, confricetur, donec vitrum incaluerit (a). Nonnulla quoque experimenta refert Cl. Gravesandus, (b), quibus manifeste suadetur, pleraque corpora fieri lucida hoc ipso tantum, quod subtiliores quaedam eorum partes motum arripiant; additque praeterea Vir Cl., multa corpora calida, si calor augeatur, lucere, & ut luceant, nil praeter augmentum caloris desiderari, & hoc imminuto, cessare lumen (c). Deficere porro lucem in corporibus lucidis, quamprimum subtilium partium motus in illis sistatur, satis obvio experimento manifestum est. Nemo enim ignorat, flammam compressione extinguere, lucemque in accensis carbonibus, ignitoque ferro perire, si aquae immergantur.

Dices, non aliud jure colligi ex hisce posse, nisi lucem primitivam a motu partium corporis lucidi, tamquam a necessaria conditione, dependere.

Contra: nihil omnino, ut ex relatis experimentis apertum est, praeter subtilium partium motum, producit in corpore, dum lucidum efficitur. Ergo lux corporis primitiva non tantum veluti a conditione, sed tamquam a formali sua ratione, a motu partium dependet.

Confirmatur exemplo soni primitivi. Quoniam nihil prorsus, praeter tremorem, communicatur corpori sonanti, dum percutitur, & sonum edit; ideo, nemine Philosophorum repugnante, tremor hujusmodi non conditio ad sonum praerequisita, sed ipse sonus est. Ergo eadem ratione, si dum corpus efficitur lucidum, nihil aliud, praeter motum, in subtilioribus ejus partibus excitatur, motus ipse non mera est conditio ad primitivam lucis productionem necessario requisita, sed ipsa lux. Nihil porro, nisi motum, excitari in subtilioribus partibus corporis, mediante attritu, percussu, vel affricu, non minus per-

(a) Optices q. 9.

(b) Elem. Phil. Mathem. §. 2455. & seq.

(c) Ibidem §. 2420.

perspicuum puto, ac sit apertum, nonnisi tremorem corpori sonoro, dum percutitur, communicari. Ergo, sicuti *sonus primitivus* in motu tremulo partium elasticarum sonantis corporis idcirco positus est; ita *primitiva lux* in perniciosissimo quodam motu subtilium partium corporis lucidi pari ratione consistit.

S C H O L I O N.

84. Qualis sit ea substantia, cujus particulæ in motum actæ corpus, in quo illa delitescit, *lucidum* reddunt, non definimus. Sive namque *ætherea* ea sit, sive *sulphurea*, sive *igneæ*, alteriusve naturæ, perinde est hoc loco. Satis est enim ad rem præsentem ostendisse, *lucidum* evadere corpus hoc ipso tantum, quod subtiliores quædam illius particulæ concitatissimum motum concipiant.

I I.

85. Quemadmodum *lucem primitivam* statuunt Recentiores in perniciosissimo quodam motu subtilium partium corporis lucidi (S. 83.), ita *lucem secundariam*, sive *lumen*, quod lucidum corpus quoquoque spargit, in subtilissima quadam substantia, omnem partem versus secundum rectam lineam celerrime mota, iidem ipsi constituunt. Et primo quidem *lumen* esse corpus, multiplici ratione ab illis ostenditur. Evincitur nempe in primis ex eo, quod in politam opaci corporis superficiem incidens *lumen* ipsam non penetret, sed ea constanti lege in adversam partem ex illa resiliat, ut angulus, quem vocant *reflexionis*, sit angulus, quem *incidentiæ* appellant, omnino æqualis. Hinc autem fore necessario, ut *lumen*, sit corpus, ita egregie probat Gassendus: sicuti *impacta in parietem pila ab eo resilit*, quia corpus cum sit, transire per locum a corpore occupatum non possit; ita non videtur posse lucis radius, in corpus obviam factum impactus, ab ipso reperi, nisi quia illud sua corpulentia locum occupat, neque potest radius, utpote qui idem sit, eoque corporeus, ipsum occupare (a). Certe, si verum est, quemadmodum natura ipsa compendio studens, verissimum esse, demonstrat, naturalium scilicet effectuum ejusdem generis easdem esse causas, videtur, posse neminem vel levissime dubitare, quominus *luminis* corpulentia sit causa, cur illud memorata constanti lege e polita opaci corporis superficie reflectatur, quemadmodum eadem ipsa corpulentia in pila causa est, quamobrem e pa-

N

(a) Sect. I. *Physices* lib. VI. cap. II.

riete, cui alliditur, haud dissimili lege constanter illa resiliat.

Idipsum ex eo evincitur *secundo*, quod *lumen* in transitu ex uno medio diaphano in aliud diversæ densitatis, puta ab aere in aquam, vel ab aqua in aerem, recta non procedat, sed declinet aliquantulum a recto tramite, accedens nempe ad *perpendiculararem*, vel ab illa recedens. Hinc etenim sequitur, *lumen* non æque facile subire media quæque, eaque pervadere, ac proinde sua corpulentia, quæ sola resistentiæ causa est, & ipsum donari. *Ecquis capiat*, inquit laudatus Vir Cl., *posse sic inflecti, refrangive radium, nisi corpus sit, quod corporis alterius objectu declinare a capto tramite cogatur; ac, ut tangere, ita experiri resistentiam a contactu possit* (a)?

Respondet P. Ferrari, ex Scoti doctrina in 2. d. 13. §. ad argumenta, *refractionem, & reflexionem dici de lumine metaphorice, quatenus sicuti baculus, cum frangitur, & pila cum resilit, efficiunt angulum, ita etiam lux, cum refrangi dicitur, & reflecti. Hoc tamen interest discrimen, quippe baculus, & pila ad alteram partem declinant; at radius lucis rectus manet in suo subjecto, in quo postea a lucido corpore efficitur radius reflexus, & aliud, aliudque lumen de novo fit. Refractionem porro, & reflexionem lucis metaphorice dici, non autem proprio & riguroso sensu, vel ipsi Atomistæ, ait ille, fateri coguntur. Enimvero, inquit, cum particule lucis sint tenuissimæ, non habent profecto talem duritiem, aut soliditatem, ut ad instar pile lusoria reflecti, ac refrangi valeant; non enim lana, vel stупpa, quamvis ingenti impetu in saxa impingatur, reflectere, aut retrocedere potest. Tum maxime corpora, quæ refranguntur, e raro in densum migrantia recedunt a perpendiculari, quoniam eorum motus ex duobus componitur, nimirum ex perpendiculari, qui a gravitate oritur, & ex horizontali extrinsecus impresso. Lux vero non ita se habet; nam ad perpendicularem accedit. Quare consequens potius est, lucem non esse corpus, nec eodem modo refractionem de ea dici, quo de reliquis corporibus. Concludit demum Vir Cl., cum accidens non sit sine subjecto, ea omnia de luce dici posse ratione subjecti, videlicet aeris illuminati, unde ratione subjecti lucem etiam dici localiter moveri* (b).

Verum contra est, & primo ad reflexionem quod attinet, dico, ex discrimine, quod inter *luminis*, & *pilæ* reflexionem ipse assignat, minime solvi argumentum, quo *luminis* corpulentia ex hoc capite a Recentioribus probatur. Primo etenim illud discrimen nullum est,

fi

(a) Loco citato

(b) Tom. III. P. III. Physicæ Disp. III. q. 5.
respons. ad object. primam pag. 418.

si *lumen* a lucido corpore emissum, nihil plane sit, ut plerique putant, a substantiali lucidi ipsius corporis effluvio diversum. Tunc enim *luminis* corpuscula eodem prorsus modo, quo *pila* ex pariete, ex speculi superficie, ut est perspicuum, reflectuntur. *Secundo*, ut evincatur, eo modo non resilire *lumen*, quemadmodum requiritur, ut corpus idcirco dicatur, satis non est ostendere, ipsum, non sicuti *pila*, ex speculo reflecti. Etenim neque *sonus* resilit, ut *pila*, dum fit *echo*, & tamen corporeæ sunt aereæ illæ particulæ, in quarum tremore, ipso quoque Viro Cl. consentiente (a), *sonus* consistit; certumque est, *sonum* reflecti, quia illæ particulæ sunt corporeæ. Ergo etiam *lumen* potest non *metaphorice*, ut ille ait ex Scoto, sed vere proprieque reflecti, quamvis, non ut *pila* ex pariete, sed ut *sonus*, illud resiliat. *Tertio*: falsum est, radium *luminis*, qui dicitur *reflexus*, non oriri ex vera resilientia radii *directi*, sed a lucido corpore immediate produci. Quæ enim tunc est causa, quamobrem angulus *reflexionis* angulum *incidentiæ* lege constanti adæquet? Hujusce quippe effectus ratio neque ex lucido corpore, quod *reflexum* radium producit, neque ex medio diaphano, in quo ille producitur, potest jure desumi. Quandoquidem sicuti illud agens est indifferens ad *lumen* omnem partem versus producendum, ita medium ipsum est passive indifferens ad *lumen* secundum quamcumque lineam recipiendum. Ne quid ergo fieri sine sufficienti ratione dicamus, necesse est, ex reflexione, ad quam speculi superficies determinat *lumen*, quod in eam cadit, æqualitatem angulorum, quibus *luminis* incidentiæ, & reflexio absolvitur, repetamus; unde fateamur oportet, *lumen*, non *metaphorice*, sed vere proprieque reflecti. Vera porro reflexione *lumini* concessa, non est, cur subjecto, nempe aeri, in quo Vir Cl. ait *lumen* produci & recipi, illam acceptam referat. Satis namque suo loco demonstravimus (§.67.), *lumen* non esse *accidens*, quod in subjecto diaphano, per quod diffunditur, recipiatur. Præterea si resilit *lumen*, quia aer reflectitur, cui illud impressum est, oportet dicat Vir Cl., aerem ipsum secundum rectam lineam a lucido corpore, dum illuminatur, impelli (neque enim, si secus, *lumen*, aeris causa, reflecteretur). At si *lumen* sit *accidens* in sensu Scholastico, ecurr premi atque moveri secundum rectam lineam debet aer, ut illud in eo producat? Demum vel solus aer *luminis* subjectum est, vel diaphana quæque corpora, sive fluida, sive solida, possunt, æque ac aer, *lumen* immediate recipere. Si primum: ergo *lumen* propagari

N 2

per

(a) Tom. III. P. III. *Physicæ* Disp. III. q. 4.
pag. 381., & 384.

per vitrum nequit, propterea quia nequeat aer vitrum permeare. Transibit quoque aer per ea omnia corpora, per quæ transit *sonus*; cum omnia, per quæ *sonus* transit, aer libere pervadat. Falsum autem utrumque est. Igitur non in solo aere *lumen* recipitur. Sin vero alterum: ergo non est opus, secundum rectam lineam moveantur partes aeris, dum illi *lumen* imprimitur. Hoc siquidem modo non moventur partes vitri, alteriusque solidi, simulque diaphani corporis, dum *lumen* recipit. Igitur non ideo resilit *lumen*, quia aer reflectatur, in quo producitur; ac proinde vel negandum est, omnino contra experientiam, *lumen* reflecti, vel dicendum, non metaphorice, sed vere, & proprie, & quidem ex se immediate, ex polita opaci corporis superficie illud resilire.

Quod autem addit Vir Cl., vel ipsos nempe Atomistas eo cogi, ut fateantur, *reflexionem* dici non posse de *lumine*, nisi metaphorice, idcirco quia particulæ *lucis*, utpote *tenuissima*, non habeant talem *duritiem*, aut *soliditatem*, ut ad instar *pilæ lusoria* reflecti valeant, tam longe a vero, mea quidem sententia, est, ut nihil magis. Quanta-cunque enim sit tenuitas particularum *lucis*, ea tamen ne minimum quidem impedit, quominus tanta illæ polleant vel *elasticitate*, vel *consistentia*, quanta est opus, ut ex polita opaci corporis superficie, in quam a lucido impelluntur, resiliant. Cum enim illæ particulæ, si-ve corpuscula non sint puncta penitus inextensa, sed ex aliis minoribus partibus consent, nemo profecto non vider, eam in illis esse posse partium texturam, in qua corporum *durities* posita est, vel ex qua eorundem *elasticitas* necessario dependet. At ne longior sim in re notissima, testem appello Auctorem ipsum Cl. Docet enim (a), exiguas adeo esse aeris particulas, ut *spatiola* quæque ille valeat imple-re. Sunt autem *elastica*, ut ipse quoque docet (b); & *sonus* reflectitur, quatenus, ipso itidem docente (c), illæ resiliunt. Ergo, ne sibi contradicat, contendere nequit, tenuitatem particularum *lucis* impedimento esse posse, quominus *elastica* illæ sint, & reflecti possint. Docet præterea (d), *calorem vel semper, vel fere semper conjungi cum substantiali calidorum corpuscularum effluvio*. Compertum autem esse ait (e), *lineas caloris regulas easdem refractionis, & reflexionis servare, quas linea lucis*. Ergo concedere vel invitus debet, ut sibi constet, caloriferi effluvi corpuscula posse reflecti. Tenuissima sunt

(a) Tom. II. P. I. *Physicæ Disp.* II. q. 6. pag. 146. & seq.

(b) Ibidem.

(c) Tom. III. P. III. *Physicæ Disp.* III. q. 4. pag. 384.

(d) Tom. II. P. I. *Physicæ Disp.* IV. q. 3. pag. 231.

(e) Ibidem pag. 227.

autem; cum quorumcunque corporum poros, experientia teste, illa subeant. Ergo tenuitas non impedit, quominus corpuscula caloris vere proprieque resiliant. Quamobrem neque tenuitas particularum *lucis* impedimento esse potest, quominus vere & proprie illa reflectatur. Tantum itaque abest, propter nimiam tenuitatem particularum *lucis* eo cogi Atomistas, ut illis veram propriamque denegent *reflexionem*, quin potius necesse sit, ne sibi aperte adversetur, alio se vertat Cl. Adversarius, ut demonstret, nonnisi *metaphorice* dici posse, *lumen* reflecti.

Quod vero spectat ad *refractionem* æquo ferat animo Cl. Auctor; si quis dixerit, ex hoc, quod *lumen*, dum ex aere in aquam *oblique* transit, non, quemadmodum corpora reliqua, recedendo scilicet a *perpendiculari*, sed ad illam accedendo refrangatur, perperam ab eo inferri cum P. Ceva (a), *lumen* non esse corpus. Sicuti namque globulus plumbeus ideo refrangitur in transitu ex aere in aquam, quia corpus est; & quia aqua, utpote magis densa, quam aer, plurimum virtutis, qua globulus ipse secundum *verticalem* directionem tunc movetur, in illius contactu eidem adimit, ideo globus ille cum recessu a *perpendiculari* refrangitur; ita vicissim non idcirco negare licet, *lumen* esse corpus, quia non refrangatur eodem modo, quo plumbeus globulus, dum ex aere in aquam *oblique* transit; sed dicendum potius est, ideo in ejusmodi transitu *lumen* refrangi, quia itidem, ut ille globulus, est corpus; ideo vero refrangi non cum recessu, sed cum accessu ad *perpendicularem*, vel quia facilius, secus ac globulus plumbeus, per aquam, quam per aerem, ut Cartesius putat, secundum *verticalem* directionem moveatur; vel quia, ut aliis placet, difficilius per aquam, quam per aerem propagetur; vel demum quia fortius ab aqua, quam ab aere, ut videtur Nevvtono, ejusque asseclis, attrahatur (b). Ut ergo evincat P. Ferrari, minime rem confici a Recentioribus, dum *luminis* corpulentiam ex illius *refractione* probare nituntur, demonstrare debet, eam solam *refractionem* ex corpulentia oriri, quæ in transitu ex medio rariore in densius cum recessu a *perpendiculari* perficitur.

Nullum quoque est alterum Cl. Viri effugium, *lumen* scilicet non refrangi ex se, sed ratione subjecti, nempe aeris, in quo producit. *Primo* etenim explicare & ipse tunc debet, quamobrem aer illuminatus, licet sit corpus, non tamen ut corpora reliqua, nempe

cum.

(a) Philof. novo-antiq. *Dissert.* 6.

(b) Vide, quæ de causa *refractionis* diximus in *Physica* Tom. I. §. 1312., & seq.

cum recessu a *perpendiculari*, dum aquam subire cogitur, refrangatur. *Secundo* danda ab eodem quoque causa est, cur aer *lumine* perfusus subire vitrum possit, *lumine* carens non possit. Interim ergo raturum Recentioribus fixumque erit, corpulentiam *luminis* ex illius *reflexione*, & *refractione* invicte demonstrari.

Ostenditur 3. *luminis* corpulentia ex hoc, quod Solis *lumen* cavo speculo, vel convexa lente exceptum, atque in *foco*, ut ajunt, collectum, tanta vi eo in puncto polleat, tantoque fervore, ut combustibilia quæque ibi posita post pauca *minuta* incendat, metalla etiam durissima fundat; quæ liquefieri nequeunt, dissolvat; quæque sale abundant, in vitrum mutet (a). Nemo enim, ut puto, ibit inficias, fieri hæc a *lumine* non posse, nisi & solidum aliquid fuerit, adeoque corpus (§. 19.), & maxima vi sese movendi illud simul polleat. Ita namque subire debet poros illorum corporum, & ita intra ipsos agere, ut eorum parietes in contrarias partes ictu validissimo urgeat, componentium particularum texturam laxet, solvat nexum, qua sub una communi forma colligatæ illæ simul sunt, easque expansivo motu impellat, & perturbate exagitet.

Responder P. Ferrari, *ignefactionem illam vel a corpusculis ignitis per aerem dispersis perfici; vel a Sole per equivocam actionem produci; vel ab ipso Deo immediate fieri. Colligi autem dici Solares radios, quatenus agentis actio determinatur ad agendum fortius in una parte speculi* (b).

Sed frustra. Si namque non a *luce* in *foco* lentis, aut speculi collecta, sed a *corpusculis ignitis* per aerem dispersis ignitio fieret corporum, quæ in illo lentis, vel speculi puncto ponuntur, incendi deberent ipsa corpora, flammamque concipere, non solum absente Sole, verum etiam sine lente, & speculo. Certum quippe est, neque a Sole, neque a lente, & speculo dependere ignita illa corpuscula, quæ ab Cl. Auctore per aerem dispersa dicuntur. Quod si dicat, corpuscula illa non dependere quidem a Sole, lente, & speculo, ut sint, bene vero, ut uno in puncto colligantur; ipsum rogabunt Recentiores, ut distincte explicet, quomodo Sol ea colligat in *foco*, licet ab illo non dependeant; & cur Luna tantundem præstare non possit, quamvis ejus *lumen*, perinde ac *lumen* Solis, in *foco* lentis, & speculi, quæ illi obvertuntur, colligatur. Nemo ignorat enim, lunare *lumen* ad comburenda corpora, in *foco* lentis, vel speculi posita, prorsus esse ineptum.

Non

(a) Vide, quæ ex *Actis Eruditorum Lipsiæ* retulimus Tom. I. *Physicæ* §. 1185.

(b) Tom. III. P. III. *Physicæ* Disp. III. q. 5. in respon. ad 2. objectionem pag. 419.

Non secus dicendum arbitror de *equivoca* Solarium radiorum *actio-
ne*, cui putat Vir Cl. illam corporum ignitionem posse acceptam re-
ferri. Actio enim *equivoca*, ut omnes norunt, & exemplis pluribus
ostendi potest, *univocam* necessario postulat, a qua determinetur.
Necessario quippe danda est ratio, quamobrem ex pluribus natura
dissimilibus effectibus, qui per *equivocam* actionem valent ex æquo
fieri, unus potius, quam alter, per eam producat. Videat ergo
P. Ferrari, hæc docens, quonam jure deinde Recentiores irrideat,
quod sibi imperceptibile esse dicant, *ignem actione equivoca a Sola-
ribus radiis produci*; sibi que persuadere nolint, *ipsorum ideas claras
& distinctas non esse Peripateticis criteria dijudicande veritatis* (a).

Indignum est etiam Viro Philosopho, ad Deum recurrere, ut ex
ipso, tamquam ex causa immediata (de hac enim res nobis in præ-
sens est) memorata corporum ignitio repetatur. Neque enim, ut
olim Balbo Stoico non secus philosophanti obiiciebat Tullius, *om-
nia, quæ cursus certos, & constantes habent, ea Deo potius tribuenda
sunt, quam naturæ* (b). Caveat proinde P. Ferrari, ne, si divinam
dicit combustionem corporum, quæ fit in *foco* lentis, & speculi, *ter-
tianas quoque febres, & quartanas divinas esse*, dicere cogatur, *qua-
rum reversione & motu quid*, inquit idem Tullius, *potest esse con-
stantius* (c)? Omnium itaque talium rerum, ut cum eodem loquar (d),
ratio reddenda est: quod qui facere nequeunt, tamquam in aram,
quemadmodum ille de Stoicis dixerat, confugiunt ad Deum.

Neque demum melioris farinæ est, quod habetur ultimo loco,
nempe *colligi dici Solares radios, quatenus agentis actio determinatur
ad agendum fortius in una parte speculi*. Cum enim ignitiones, quæ
fiunt in *foco* lentis, & speculi, Solarium radiorum actione peragan-
tur, idque radii ipsi non efficiant, nisi lente, & speculo excepti,
Philosophis explicare incumbit, quomodo lens, atque speculum ad
fortius agendum in ipsorum *foco* ipsos radios determinent. Inquiunt
Recentiores, id fieri quatenus, qui in lentem, & speculum cadunt
radii, uno in puncto colliguntur. Hoc non placet Cl. P. Ferrari.
Aliam ergo causam afferat, necesse est. Neque sufficit, dicat, *actio-
nem illorum radiorum determinari ad agendum fortius in una parte spe-
culi*, nisi simul explicet, quomodo ipsa actio ad fortius agendum de-
terminetur. Hoc enim delitescente, id certe latet, ut patebit confide-
ranti, quod explicandum est.

Sub-

(a) Tom. III. P. II. *Physicæ* Disp. II.

(c) Ibidem.

q. 10. pag. 105.

(d) Ibidem.

(b) Lib. III. de *natura Deorum* cap. 10.

Subtilissimam porro esse substantiam *luminis*, motuque celerrimo præditam secundum rectam lineam, longa demonstratione non indiget. Subtilitas illius substantiæ patet ex hoc uno, quod subtilissimos vitri poros *lumen* facillime subeat, perque illos libere transeat. Celeritas vero motus, ejusque directio rectilinea ex ipsius *luminis* propagatione manifesta est. Constat namque, illud tam cito diffundi, ut uno ferme temporis momento per immensa cœlorum spatia propagetur, atque ad nos perveniat. Neminem quoque later, impediri diffusionem *luminis*, si quod opacum corpus prohibeat, quominus recta progrediatur.

Verum opponit P. Ferrari: *lux penetratur cum toto corpore diaphano. Atqui corpora ne quidem per divinam virtutem penetrari possunt, ut Epicurei docent. Igitur lux non est substantia corporea* (a).

R. primo, hoc argumentum ab ipsomet etiam Viro Cl. solvi debere. Ostendens quippe, admittendam esse substantiam, sive materiam ætheream, docet, *lucem vel esse substantiam, vel sine substantia non extare* (b). Igitur, ipso teste, sine substantia non propagatur *lumen*, neque diaphanum corpus penetrat; adeoque &c.

R. secundo, distinguendo majorem: *lux penetratur cum toto corpore diaphano*, adeo ut solidas ipsius corporis particulas illa vere subeat, atque traiciat, *negō majorem*; *lux penetrat corpus diaphanum*, quatenus subit illius poros, & per eos libere excurrit, *concedo majorem*, & permitta *minori*, si loquamur de vera penetratione, spectatis naturæ viribus, *negō conseq.* Lux ergo dicitur diaphanum corpus penetrare, non quia solidas illius particulas pervadat, eundemque locum cum illis ipsa occupet repleatque (id quippe naturæ viribus impossibile est) sed quia, cum pori, quibus corpus diaphanum abundat, in directum, ut dicemus suo loco, positi sint, & inter se communicent, lux ita per illos sese diffundit, ut corpus ipsum traiciat, & libere ultra illud excurrat. Videtur autem totum corpus a luce occupari, hoc est, nullam prorsus in illo esse partem, quæ *lumine* non perfundatur, quia pori ipsius corporis non solum minutissimi sunt, verum etiam sibi mutuo adeo vicini, ut nullum penitus intervallum inter illos discernere ipsi possimus.

Urget tamen Vir Cl. *partes illæ vitri v. g., quæ extant inter poros, vel sunt opacæ, vel sunt diaphanæ. Non primum; quia sic totum vitrum esset opacum; siquidem pori non sunt vitrum, sed vitri cavitates, & vacuitates, quæ nihil sunt. Si ergo partes illæ sunt diaphanæ,*

(a) Tom. III. P. III. Physicæ Disp. III.
q. 5. prob. 3. pag. 414.

(b) Tom. II. P. I. Physicæ Disp. II.
q. 6. pag. 114.

phana, jam sunt susceptiva lucis. Ergo lux non solum recipitur in poris vitri, verum etiam in ipso corpore vitri (a).

R. partes vitri, quæ illius poros intercipiunt, non esse *diaphanas*, sed *opacas*; & nego, propterea futurum, ut totum vitrum sit *opacum*. Quamvis enim pori non sint, nisi vitri cavitates, & vacuitates, adeoque purum nihil; attamen si ita se habeant in vitro, ut in directum positi sint, & inter se communicent, corpus *diaphanum* constituunt, quatenus nempe, ut alio loco clarius dicemus, non obstant *lumini*, quod in ipsum cadit, sed *liberam*, ut ait Gassendus, *radiorum trajectionem faciunt (b).*

Stupendum tamen est, tantum Virum non vidisse, hoc suum *dilemma* nedum facillime, ut est modo visum, solvi posse, verum etiam posse contra suum Auctorem validissime retorqueri. Fatetur namque Vir Cl. non uno, sed sexcentis in locis, ut ita dicam, suæ Philosophiæ, si non omnia, plurima saltem corpora sensibilia esse *porosa*. *Porosum* itaque est, recteque dicitur corpus, quamvis pori non sint corpus, sed corporis cavitates, & vacuitates, quæ nihil sunt. Ergo ex æquo potest corpus esse *diaphanum*, & *diaphanum* recte nuncupari, licet pori, ex quorum recta dispositione *diaphaneitas* derivatur, non sint corpus, sed illius tantum cavitates, & vacuitates, adeoque purum nihil. Præterea, tametsi particulæ, quæ corporis poros intercipiunt, sint plane solidæ (neque enim datur processus in infinitum) & pori non sint corpus, sed purum nihil, non idcirco inferre inde licet, corpus esse omnino solidum. Ergo eodem jure potest corpus esse *diaphanum*, quamvis *diaphana* non sint primitivæ illius particulæ, sed *opacæ*.

Insuper ejusdem Viri Cl. aperta sententia est, *fluiditatem corporum ex partium parvitate oriri, tum ex partium tenui adhesionem (c)*. Admittit ergo, corpus *fluidum* ex *solidis* particulis coalescere. Necessè est enim, *solidæ* sint particulæ, ex quarum parvitate, & tenui adhesionem *fluiditas* oriri dicitur, ne scilicet in ea explicanda principium petatur. Potest igitur corpus vere esse, & dici *fluidum*, licet *solidæ* sint particulæ, quæ illud constituunt. Ergo *diaphanum* quoque esse, & dici corpus potest, quamvis illæ particulæ *opacæ* sint, ex quibus coalescit; & sicuti ex hoc uno, quod componentes corporis particulæ *solidæ* sint, inferre non licet, totum corpus esse *solidum*, ita ex hoc uno, quod *opacæ* sint particulæ, ex quibus corpus consurgit, jure deduci nequit, illud esse *opacum*.

O

Di-

(a) Tom. III. pag. 415. contra quarto

(b) Sect. I. *Physicæ* lib. IV. cap. 2.

(c) Tom. II. P. I. *Physicæ* Disp. IV.

q. 6. assert. ultima pag. 260.

Dicit forte Vir Cl., ut horum argumentorum vim declinet, nullum corpus esse *totum porosum*, nullum posse *totum fluidum* nuncupari, quemadmodum ex adverso *totum diaphanum* illud est, optimeque vocatur.

Sed contra. Nam non solum *gratis*, ut ajunt Scholæ, sed falso dicitur, totum corpus, puta totum *vitrum* (ut de eo ipso, quod ille adhibet corpus, loquar) esse *diaphanum*. *Gratis*, inquam, ponit ille, totum *vitrum* esse *diaphanum*. Nullam quippe hujusce assertionis suæ rationem affert, neque aliquam asserere potest. Certe, si sensus consulamus, fateri cogimur, vel neque *vitrum* esse *totum diaphanum*, vel illud quoque *porosum* esse totum, & totam aquam *fluiditate* pollere. Ut enim in vitro nullam discernimus particulam, quæ *diaphana* non sit, ita nullam in eodem particulam distinguimus, quæ non sit *porosa*, nullam in aqua, quæ non sit *fluida*. Falsum est etiam, totum *vitrum* esse *diaphanum*. Cum enim, ut experientia cuique obvia manifeste demonstrat, purissima non sit *lux*, quæ ultra *vitrum* excurrit, sed innumeris exilissimis veluti umbellis permixta atque foedata appareat, albo obice si excipiat, manifeste sequitur, *lucem* non ita totum *vitrum* pervadere, ut nihil prorsus in illo sit, quod *luci* transitum deneget. Verum hac de re alibi fusius.

Interim vero observare sufficiat, ne ipsum quidem Virum Cl. tenere posse, totum *vitrum* esse *diaphanum*. Docet enim, *diaphaneitatem in recta partium dispositione consistere* (a). Illæ ergo partes vel *diaphanæ* sunt, vel *opacæ*. Non *diaphanæ*; perperam quippe tunc ex illarum recta dispositione *diaphaneitas* derivaretur. Sunt ergo *opacæ*. Igitur corpus *diaphanum* ex *opacis* particulis constat; & ideo, contra atque ille habet, totum *vitrum* non est *diaphanum*. Præterea, licet recta dispositio partium non sit corpus, efficit tamen, ut ex illis, quamvis *opacæ* sint, *diaphanum* corpus confurgat. Ergo pari ratione, licet neque pori, neque eorum positio recta sint corpus, efficere tamen possunt, ut particulæ, quæ illos intercipiunt, tametsi *opacæ* sint, *diaphanum* corpus constituent; ac proinde vel mutare debet Vir Cl. sententiam suam de origine *diaphaneitatis*, vel fateatur oportet, se haud recte erroris insinulasse Recentiores, dum rectam dispositionem communicantium pororum in corpore *diaphano* causam esse dicunt, quamobrem illud sit *diaphanum*.

Observandum insuper ait Cl. Auctor, *vitrum totum denominari lucidum, sicuti totum dicitur tenebrosum, recedente luce: quod minime,*
in.

(a) Tom. III. P. III. *Physice Disp.* III. q. 5. in
respons. ad confirmationem pag. 425.

inquit, affirmatur de cribro subtilissimis foraminibus pertuso, cujus partes diaphanae non sunt, sed solum per foramina lucem suscipiunt (a).

Sed adeo facilis responsio est, ut stupendum videatur, eam tanto Viro non occurrisse. Totum itaque vitrum dicitur *lucidum*, quia tum ejus pori, per quos *lux* transit, tum ipsius particulae, quae illos intercipiunt, & *lucem* reflectunt, exiguae adeo sunt magnitudinis, ut sensus plane fugiant. At in cribro contra res se habet. Quandoquidem, utut mole parva sint foramina, quae sola in illo *luci* transitum praebent, sensus tamen ea plane distinguit, quemadmodum eas etiam partes in illo ipse discernit, ex quibus incidentes *lucis* radii in nos regeruntur.

Sibi demum prorsus mirabile esse ait Vir Cl., subtilissimam *lucis* substantiam non posse pervadere poros papyri, si videlicet multiplicia sint folia chartae, per quos tamen crassiores substantiae evolare solent, & evanescere. Nunquid enim, inquit ille, adeo rigidi sunt *lucis* radii, ut per recurvos opaci corporis poros non valeant intorqueri? Aut car saltem, cum subtilissimi sint, non poterunt instar aetheris permeare omnes corporis meatus? Illud etiam (pergit Cl. Auctor) inexplicabile videtur, quomodo tantum per poros transmittatur *lux* ab aquae superficie ad fundum, etiamsi aqua semper sit in motu vario, & diverso (b).

At vero, re attente considerata, non dubito, longe mirabilius non-nemini visum iri, persuasum fuisse Cl. P. Ferrari, haec posse Recentioribus negotium facessere. Ex hoc enim uno, quod *lumen* secundum rectam lineam constantissime propagetur, sequitur, minime fieri posse, ut papyri poros, per quos crassiores substantiae evolare solent, & evanescere, illud trajiciat. Causa nempe est, quia in papyro, ceterisque opacis corporibus, non sunt pori, quemadmodum in vitro, aliisque id genus, recta dispositi, sibi que mutuo in eadem recta linea communicantes, sed oblique tantum, atque insuper quin ex uno in alium liber aditus pateat. Hujusce rei Aristotelem ipsum testem appello. Is etenim causam quaerens, cur aspectus corpora penetrare solida non possit, vox autem possit: an, inquit, quod aspiciendi delatio simplex est, quae per directum profluere possit ad lineam?..... Quoties igitur aspectui directus ille impeditur progressus, eo scilicet, quod res objecta, meatuum incondita, sive indisposita turba, constipatur, transpicere nequit. At vox, quoniam quoquoersus profertur, omnia proreptat, penetrat, translapsa audiri undique potest. In humoribus tamen facultas transpiciendi oculis data est; voci autem nulla, vel minima,

O 2

(a) Tom. III. P. III. Physicæ Disp. III.

q. 5. ad calcem pag. 415.

(b) Ibidem pag. 416.

ma, quamquam humor tenuior, quam terra, sit; quoniam humoris meatus parvi, densi, continuatique sunt, ut minime aspectus impediatur, quominus tramite directo ingredi possit. Hæc eadem causa est, cur etiam per vitrum, quod densissimum est, transpicere liceat, per ferulam, quæ rara solutaque est, non liceat. In altero enim meatus respondent inter se, in altera variant. Nec quicquam juvat, amplos esse meatus, nisi recte ad lineam positi sint (a). Itaque non a Cartesio, neque a Gassendo, aliove ex Recentioribus, sed ab ipsomet Aristotele discat Cl. P. Ferrari, non esse mirabile, quod lucis radii, licet rigidi instar ferreæ virgulæ nequaquam sint, per recurvos tamen opaci corporis poros interqueri non possint; sicuti etiam quod, licet sint subtilissimi, nequeant tamen, ætheris instar, omnes corporum meatus penetrare. Inexplicabile demum ne dicat a Recentioribus, quomodo tantum per poros transmittatur lux ab aqua superficie ad fundum, etiamsi aqua semper sit in motu vario, & diverso; respondent enim, causam huius esse, quia motus aquæ varius, & diversus non impedit, quominus ejus pori, tametsi continuo locum mutant, in eadem recta linea semper inter se communicent. Et fane, cum aqua, etiam dum motu vario, & diverso agitur, maneat diaphana, dicere debet Vir Cl., eam rectam partium dispositionem, in qua diaphaneitatem ipse constituit (b), illius motus causa nequaquam perire. Quid ergo prohibet, quominus etiam Recentiores dicant, dispositionem illam rectam pororum, in qua corporum diaphaneitatem collocant, ab ipso eodem motu minime destrui? Nihil certe asserri contra unum potest, quod etiam alteri ex æquo non officiat; nihilque propterea impedit, quominus lumen in subtilissima, motuque rectilineo affecta substantia statuatur.

S C H O L I O N.

36. Quamvis certissima, & jure quidem, ut modo vidimus, Recentioribus res sit, lumen esse substantiam, inter eos tamen non convenit, num illa, subtilissimi effluvii instar, e lucido corpore indefinenter erumpat, ab eoque secundum rectam lineam quoquoersus celerrime vibretur, ut cum Democrito, & Epicuro sentit Gassendus; an vero omnem partem versus, perinde atque aer, diffusa vel prematur secundum rectam lineam ab innatante corpore lucido, ut tenet Cartesius, vel ita ab illo indefinenter urgeatur, ut, quemadmodum

(a) Sect. XI. Problem. q. 61.

(b) Vide quæ diximus Tom. I. Physicæ

dum in *Physica* exposuimus (a), vibratorium quemdam motum, qui successive quidem, sed celerrime secundum rectam lineam per eam quoquoersus propagetur, illi communicet. Hæc postrema opinio ob analogiam, quæ *sonum* inter, atque *lumen* maxima occurrit (b), ceteris longe probabilior mihi visa est; verum si cui vel Gassendi, vel Cartesii sententia magis arrideat, litem cum illo movendam non puto; quod ad rem præsentem demonstrasse sufficiat, *lumen* non esse *accidens*, ut pro comperto habent Scholastici, sed *substantiam*, ut Recentiores arbitrantur.

I I I.

87. Demonstrandum modo est, quod superiori loco innuimus, a recta scilicet communicantium pororum secundum omnem directionem positione habere sensibilia quæque corpora, ut *diaphana* sint; contra vero ex hoc uno ea esse *opaca*, quod illorum pori vel non communicent in se, vel sibi mutuo in eadem recta linea nequaquam respondeant. Id ergo ita ostenditur: cum primitiva rerum corpuscula sint solidissima, nullis nempe meatibus interrupta (ex aliis enim particulis, si quos illa haberent meatus, componerentur, scilicet ex iis, quæ meatus intercipiunt) fieri nullatenus potest, ut *lumen*, cum sit substantia corporea (§. 85.), corpuscula ipsa pervadat. Igitur corpora *diaphana* a lumine non trahuntur, nisi quia per eorum meatus propagatur. Propagari autem per illorum meatus non potest *lumen*, nisi in eadem recta positi illi sint, & inter se communicent; cum nonnisi secundum rectam lineam *luminis* propagatio, ut experientia constat, perficiatur. Ergo corpora *diaphana* non trahuntur a lumine, nisi quia illorum meatus secundum rectam lineam sunt dispositi, & inter se communicant. Per id porro habent corpora, ut sint *diaphana*, per quod habent, ut a lumine trahi possint. Ergo a recta communicantium pororum dispositione habent corpora, ut sint *diaphana*. *Opacum* autem *diaphano* opponitur, & contrariorum contraria natura est. Ergo a positione pororum tortuosa, & indirecta habent corpora, ut sint *opaca*.

Dices, nullam partem discerni in aere, neque in aqua, ceterisque purgatissimis *diaphanis* corporibus, quæ non sit *diaphana*. Ergo *diaphanum* ex *opacis* corpusculis non constat; atque hinc neque in recta positione pororum, quæ ab illis corpusculis intercipiuntur, sensibilibus corporum *diaphaneitas* potest recte constitui.

Sed

(a) Tom. I. §. 1200.

(b) Vide quæ diximus Tom. I. *Physica* §. 1199.

Sed contra est. Nam, ut optime observat Gassendus, *lumen*, vitrum etiam purgatissimo exceptum, per illud non transit totum, sed aliqua ejus portio in adversam partem ex illo regeritur; sique attente consideretur tum ea *luminis* portio, quæ vitrum penetrat, tum, quæ ex illo reflectitur, manifeste patebit, exilissimis umbellis, sive punctulis nigricantibus utramque esse infectam. Jam vero nigricantium horum punctulorum non alia profecto videtur causa, nisi quia *opaca* vitri corpuscula prohibent, quominus totum *lumen*, quod in illud cadit, per ipsum transeat; & directa communicantium pororum in eodem dispositio non finit, ut totum, quod in vitrum ipsum incidit *lumen*, regeratur. Ergo *diaphana* non sunt omnes, utut exiguæ, componentes vitri particulæ, sed ex opacis corpusculis, porulos recta dispositos, sibi que mutuo communicantes intercipientibus, illud, adeoque & aliud quodcunque corpus *diaphanum*, intrinsecus coalescit. Quia vulgo existimatur, inquit laudatus Vir Cl., vitrum pertenuesse totum perspicuum, radiosque omnes transmittere, jubere soleo, ut illud opponatur Soli, & candido papyri folio, tam pone, quam ante statuto, radii tum trajecti, tum reflexi excipiantur; & quia, quod est pone, excipit trajectos cum specie umbellula; quod ante excipit reflexos, exhibet speciem lucula, requiro in primis, unde illa umbellula, nisi ex corpusculis, quæ radios in se incidentes transire prohibuerint? unde illa lucula, nisi ex radiis, qui non trajecti cum ceteris, verum reflexi a corpusculis fuerint? Unde in neutro folio tanta claritas, quanta in alio, quo Solis exceperis radios, vitro non interposito, nisi quia in illo radii reflexi, in isto trajecti deficiunt? Unde postremo illa aliquorum trajectio, ista aliquorum reflexio, nisi quia ut tela intercepta alternis habens foraminula cum filorum particulis radios incidentes in foraminula transmittit, incidentes in filorum particulas reverberat, ita vitrum debet constare alternis porulis, & corpusculis, & illis transmittere, his reflectere radios incidentes (a)?

Tantum itaque abest, assertionem nostram idcirco labefactari, quia totum vitrum, tota aqua, aliaque id genus corpora, *diaphana* appareant, quin potius assertio ipsa satis valide ex hoc capite roboretur. Quippe si *lumen*, quod in vitream laminam cadit, neque totum illam penetrat, neque totum ex ipsa reflectitur, necesse est, dicamus cum Gassendo, eam alternis porulis, & opacis corpusculis immediate componi.

Id porro ex eo etiam non obscure suadetur, quod aqua, alique *diaphani* liquores in *opacam* spumam abeant, si agitentur; & vitrum, quod

(a) Sect. I. *Physicæ* lib. VI. cap. 2.

quod itidem *diaphanum* est, in *opacum* pulverem, si minutissime conteratur, facessat. Cum enim sola tunc mutetur horum corporum textura, sive mechanica integralium partium dispositio, manifestum relinquitur, sensibilibus corporum *diaphaneitatem*, & *opacitatem* ab hac dumtaxat partium dispositione dependere. Dependere autem minime posse videntur affectiones illæ a mechanica dispositione partium, nisi quatenus a certo pororum situ utraque dependet. Is quippe dumtaxat mutari videtur, dum partium dispositio mutatur. Ergo corporum *opacitas*, & *diaphaneitas* dependent a pororum situ; & ideo satis apte hæc a *dispositione* pororum *recta*, illa vero a *dispositione* eorundem *tortuosa*, & *indirecta* derivatur.

Neque Aristoteles, quem unum reliquis omnibus Philosophis preferendum censent Scholastici, ab hac opinione alienus fuit, sed eam adeo aperte tradidit, ut nemini dubium esse possit, quominus, qui hac super re contrarium sentiunt, ab illius doctrina manifeste recesserint. Quærens enim ille, ut paulo antea etiam diximus, cur *aspectus* corpora penetrare solida non possit, vox autem possit, an, inquit, quod adspiciendi *delatio simplex* est, quæ per *directum* profluere possit ad *lineam*.....? Quoties igitur *aspectui directus* ille impeditur progressus, eo scilicet, quod res objecta, meatuum incondita, sive indisposita turba, constipatur, transpicere nequit. At vox, quoniam quoque versus profertur, omnia proreptat, penetrat, translapsa audiri undique potest. In humoribus autem facultas transpiciendi oculis data est, voci autem nulla, vel minima, quamquam humor tenuior, quam terra est; quoniam humoris meatus parvi, continuatique sunt, ut minime *aspectus* impediatur, quominus tramite *directo* ingredi possit. Hæc eadem causa est, cur etiam per vitrum, quod densissimum est, transpicere liceat; per ferulam, quæ rava, solutaque est, non liceat. In altero enim meatus respondent inter se, in altera variant. Nec quicquam juvat, amplos esse meatus, nisi recte ad *lineam* positi sint (a). Aristoteli ergo non consentit Cl. P. Ferrari, dum ait, nihil ad rem (ad luminis nempe transitum per crystallum) pertinere pororum *rectam dispositionem* (b). Animo quoque comprehendere non possum, quod ille idem addit, scilicet nec *diaphaneitatem* in pororum *constrictione* statuendam esse, idcirco quia lux etiam per poros ampliores transeat (c). Nemo enim, quem ego quidem sciam, in pororum *constrictione* *diaphaneitatem* posuit; ii vero, qui eam statuunt in *recta* pororum dispositione,

perin-

(a) Sect. XI. Problem. q. 61.

(b) Tom. III. P. III. Physicæ Disp. III. q. 5.

in respon. ad confirmationem pag. 425.

(c) Ibidem.

perinde omnino habent, sive ampli, sive minutuli, maximeque contracti pori ipsi sint, dummodo tamen ejus sint magnitudinis, eumque situm habeant inter se, ut *lux* per eos transire liberrime possit. Recentioribus tamen imponit Cl. Auctor, dum ait alio loco, ex hoc quod *diaphaneitatem consistere dicant in recta pororum dispositione*, & *e contrario opacitatem sitam esse in obliqua dispositione pororum*, rationem ab ipsis peti, cur *concava crystallos lucem regerat, convexa vero lucem suscipiat, nempe ob diversam pororum dispositionem* (a). Nullus quippe dixit, a *concava crystallo* lumen regeri, a *convexa* suscipi; sed ajunt omnes, a *concavo speculo*, non ex *diaphana*, cujusmodi est *crystallus*, verum ex *opaca* materia confecto, cogi *lumen* in *foco*, a *convexo* dispergi; neque id repetunt ex varia pororum dispositione, sed ex diversa ipsorum speculorum figura, ut cuique, qui vel levissime *Catoptricam* salutaverit, est manifestum. Fallitur postremo Vir Cl., dum ait, ex *pario marmore* concavas, & *convexas lentes fieri posse, itidemque ex ære, aut ex alia nigra, vel nigricante materia*. (b). Ecquis enim nescius est, ex *marmore, ære, aliisque id genus opacis corporibus* non *lentes* confici, sed *specula*?

I V.

88. Quod attinet ad *colores*, constans est Recentiorum opinio, eos omnes, si spectentur, prout in corpore, quod afficiunt, non esse aliquid diversum a *magnitudine, figura, & artificiosa dispositione* particularum, ex quibus corpus ipsum intrinsecus coalescit. *Color* enim, prout in objecto, in eo certe statuendus est, per quod *formaliter* habet objectum ipsum, sive corpus, ut, dum *lumine* perfunditur, nobis *coloratum* appareat. Id autem *formaliter* non habet corpus, nisi a *magnitudine, figura, & artificiosa combinatione* particularum, ex quibus consurgit. Habet namque *formaliter* ab hisce affectionibus, ut *lumen*, quo perfunditur, certa ratione modificatum in nos reflectat; certoque constat, ut satis contra Scholasticos demonstravimus (§.69.), non esse aliquid diversum a *lumine*, vel puro, vel umbellis permixto, aliave ratione modificato, id, quod corpus *coloratum* in nos regerit, & quo mediante eam in *reticulari oculi membrana* motionem excitat, quam *coloris* sensatio in anima consequitur. Ergo *color*, prout in objecto, a *magnitudine, figura, & artificiosa dispositione* particularum, ex quibus *coloratum* ipsum corpus constat, *physice* non distinguitur. Ma-

(a) Loco citato pag. 438.

(b) Ibidem.

Manifestum est præterea, vitrum, & aquam, quamvis, utpote diaphana, nullius sint coloris, fieri colorata, sive alborem vividissimum contrahere, hoc ipso tantum, quod aqua valide agitata spumescat, & vitrum in pulverem minutissimum, media attritione, redigatur. Certum est etiam, perspicuumque, friabilia colorata corpora, ut vitriolum, smaragdus, & id genus alia, congenitum suum colorem mutare, sive plurimum albescere, itidem hoc ipso, quod contrita in pulverem facebant. Jam vero nemo, ut puto, inficiabitur, solam mutari integralium partium magnitudinem, figuram, & mechanicam earundem dispositionem, sive texturam, dum aqua abicit in spumam, sicuti etiam dum vitrum, & reliqua friabilia corpora in pulverem rediguntur. Ergo ab hisce tantum mechanicis componentium molecularum affectionibus habet corpus, ut, dum lumine perfunditur, coloratum appareat.

Opponit primo P. Ferrari: multa sunt corpora, quæ diverso constant temperamento, seu varia partium combinatione, figura, & textura, eundem tamen colorem præ se ferunt. Plura itidem alia corpora idem obtinent temperamentum, sive eandem partium combinationem, figuram, & texturam, diversum vero colorem habent. Primum illud apparet in aquis Chemicis, quas Pharmacopola elaborant. Nam in illis idem color inspicitur, varium autem earundem temperamentum, sive diversam in illis partium combinationem, figuram, & texturam tam varii effectus, qui ab aquis illis oriuntur, evidentissime demonstrant. Neque enim alia potior est causa dignoscendi variam in corporibus partium texturam, nisi effectuum varietas. Quod potissimum valet in Recentiorum sententia affirmantium, effectus a partium configuratione, & textura, veluti a causa, proficisci. Alterum vero inde concluditur, quia si effecta spectemus, nulla temperamenti, & contexturae diversitas deprehenditur in vino albo, & in vino rubro, quæ tamen vario colore constant. Marmor nigrum, & marmor album eandem habent partium texturam, & figuram. E contra pix, carbo, ebenus nigra pariter sunt, longe diversam autem obtinent partium configurationem. Plura quoque in albedine congruunt, ut nix, calx, charta, caseus, saccharum, sal, & similia, quæ tamen longe diversam habere partium texturam, & figuram, experientia teste, compertum est, maxime in sententia Recentiorum, qui saporis, & odoris diversitatem ex varia partium figura repetunt (a).

R. duplex in quovis corpore, sive composito naturali distinguendum esse temperamentum, alterum scilicet particularum, ex quibus

(a) Tom. III. P. III. Physicæ Disp. III. q. 5. de coloribus prob. I. assertionis 4. pag. 430.

remote, sive *mediate*, alterum particularum, ex quibus *proxime*, sive *immediate* illud consurgit. Patet ex duplici principiorum genere, *mechanico* scilicet, & *chymico*, quibus naturale quodcunque compositum constare diximus in *Physica* (a), quæque hoc loco minime sunt repetenda. Observandum præterea, *colores* in corporibus non a temperamento particularum, quæ *remote*, sed a temperamento earum, quæ *proxime* corpora ipsa constituunt, dependere. Hæ namque particulae sicuti, quod in corpus *lumen* incidit, *immediate*, ut patet, recipiunt, ita illud, pro diversa, quam habent, *magnitudine*, *figura*, & *combinatione* varie modificatum, in nos reflectunt. Itaque, loquendo de temperamento particularum *immediate* componentium, negamus, quod assumit Vir Cl., multa nimirum corpora, quæ diverso constant temperamento, habere eundem *colorem*; & vicissim multa, quæ eodem temperamento constant, donari *colore* diverso. Contendimus enim, eorum omnium corporum, quorum idem *color* est, idem quoque esse externum, ut ita dicam, ipsorum temperamentum; & vicissim, hoc in iis omnibus esse diversum, quæ dissimili *colore* prædita conspiciuntur. Neque huic officit, plura, quæ sunt ejusdem *coloris*, natura differre inter se, & vicissim plura, quorum eadem est natura, *colore* esse diversa. Fieri enim potest, ut particulae natura dissimiles simili artificio disponantur inter se, ita nempe ut, quæ ex illis emergunt composita, eodem modo incidens *lumen* modificent, eodemque modo modificatum, illud in nos reflectant. Vicissim quoque potest fieri, ut particulae ejusdem naturæ dissimili adeo artificio inter se disponantur, ut, quod in illas cadit *lumen*, modo plane dissimili in nos repercutiant. Sic non mutantur penes essentiam particulae aquæ, & vitri, illa dum abit in spumam, hoc dum in pulverem redigitur, & tamen externa earum partium textura adeo tunc mutatur, ut, quæ antea nihil ferme incidentis *luminis* in nos regerebat, maximam illius copiam ipsa deinde in nos reflectat. Hinc solutu facillima sunt, quæ assertit Cl. Auctor, ut utrumque suum assumtum demonstret.

Ait primo, apparere ex aquis *chymicis*, quas *Pharmacopola* elaborant, multa corpora, quæ diversi temperamenti sunt, eodem *colore* donari. Concedimus, dissimilem esse earum particularum naturam, quæ in illis aquis latent, & ex quibus illarum vis, & energia derivatur. At, si de externo temperamento loquamur, negamus, illud in ipsis esse diversum. Damus quoque Viro Cl., non aliam potiore esse viam dignoscendi *variā in corporibus partium texturam*, nisi *effectuum varietatem*, idque valere potissimum in sententia Recentiorum, contenden-

(a) Tom. I. Dissert. III. sect. 2., & 3.

dentium, *sensibiles corporum qualitates a partium configuratione, & textura* provenire. Verum optamus, simul ipse consideret, non sufficere convenientiam duorum corporum in una *qualitate*, ut inferatur identitas *configurationis, & textura* in particulis *primitivis*; neque vicissim satis in illis esse discrimen penes unam *affectionem*, ut varietas *configurationis, & textura* in iisdem particulis recte colligatur; sed ad illam *configurationis, & textura* identitatem inferendam necessario requiri, ut, quæ in una *qualitate* consentiunt corpora, in ceteris quoque affectionibus sibi mutuo similia ipsa sint; ad inferendum vero ejusdem *configurationis, & textura* essentielle discrimen opus esse ex æquo, ut, quæ penes unam *qualitatem* corpora differunt, etiam penes reliquas, saltem plurimas, eadem ipsa inter se discriminentur. Tantumdem certe de sua *forma substantiali* dicere ipsimet etiam debent Scholastici. Nec enim contendunt, ut puto, eorum omnium corporum, quorum idem *color* est, eandem esse *formam substantialem*; neque hanc in iis esse diversam, in quibus dissimilis *color* conspicitur. Quemadmodum ergo illi dicunt, cum identitate *forma substantialis* aliquid stare in corporibus, ex quo dissimilis in illis *color* oriatur, & vicissim cum *forma* varietate aliquid in illis latere, ex quo idem *color* proveniat; ita dicere eodem jure poterunt etiam Recentiores, cum identitate *configurationis, & textura* ex particulis *primitivis* eam in corporibus stare posse dissimilitudinem *configurationis, & textura* ex particulis *secundariis*, per quam diversi *coloris* corpora ipsa appareant; & vicissim, cum dissimili *configuratione, & textura* ex particulis *primitivis* eam identitatem *configurationis, & textura* ex *secundariis* particulis posse componi, per quam ejusdem *coloris*, quæ ex illis emergunt corpora, sese nobis videnda exhibeant.

Patet idcirco, quid dicendum sit ad secundum, ad illud nempe, quod *plura corpora idem obtineant temperamentum, & diversum calorem habeant*. Si nulla namque in eo sit repugnantia, quemadmodum nulla revera est, ut plura corpora sint ejusdem temperamenti quoad particulas *primitivas*, simulque diversi quoad *secundarias*, non est profecto, quamobrem Recentioribus opponat Vir Cl., plura haberi corpora ejusdem temperamenti, simulque *coloris* diversi, nisi demonstraverit, temperamentum, in quo ea omnia conveniunt, illud esse, quod penes principia non *primitiva*, sed *secundaria* in omnibus corporibus naturalibus consideratur. Ceterum hac super re quantum a vero distet Vir Cl., liquido ex iis apparet, quæ veluti ex suis terminis nota, vel ex ipsa experientia penitus manifesta ad suum probandum intentum ille assumit. Ait primo, *nullam temperamenti, &*

contextura diversitatem deprehendi in vino albo, & in vino rubro, quæ tamen vario colore constant. At quam falso, non ex ipso tantum palato, verum & ex aliis plane dissimilibus effectibus, qui ex utriusque vini usu in hominibus contingunt, aperte constat. Concedo, vinum album, & vinum nigrum essentialiter non differre. Arbitror tamen, id non requiri, ut colore differant, quemadmodum opus non est tanto discrimine, ut diversi penes alias affectiones liquores ipsi censeantur. Ponit secundo, *marmor nigrum, & marmor album eandem habere partium texturam, & figuram*. Sed omnino contra experientiam. Constat enim, non tantum marmor, sed omne corpus album magnam puræ lucis copiam, quæ in illius superficiem cadit, reflectere; nigrum vero totum, aut ferme totum, quod in ipsum incidit lumen, ex adverso absorbere. *Candidissima corpora, inquit Boerhaavius, lucem igneam illam acceptam a se reperiunt fere eadem vi, qua illam acceperant* (a). Contra vero, eodem teste, *nigra corpora lucem igneam, sive calefacientem, a Sole quamvisidissime emissam, non reflectunt a se* (b). Testatur Cl. Boyle, se, ope speculi ustorii, & quidem fatiis ampli, ex nigro marmore confecti, nunquam potuisse longo temporis spatio, vel astuante Sole, ligni frustum accendere, quamvis multa minus speculum ejusdem forma, & ex reflectente minus materia constans, ictu oculi accendisset (c). Non minus quoque certum experientia est, nigra corpora facillime, difficillime alba incallescere. Si vitri dioptrici caustico foco, inquit laudatus Cl. Boerhaavius, *albissima charta exponitur, diu erit, priusquam caleseat; valde diu, priusquam incendatur* Ubi vero *nigerrimam chartam eidem foco commiseris, illico inflammatur* (d). Neque secus rem contingere, deprehendit, facto periculo, Cl. Boyle (e). Alia igitur in corpore albo, alia in nigro partium configuratio est, ac prorsus diversa earundem textura. Nimis apertum est enim, nonnisi ex harum affectionum discrimine posse dissimiles illos effectus jure deduci (f). Igitur veritati non consentit Cl. Adversarius, dum ait, *marmor nigrum, & marmor album eandem habere partium texturam & figuram*; dissimilem vero tam picem, carbonem, & ebum, tametsi æque nigra sint, quam nivem, calcem, chartam, caseum &c., licet omnia in albedine congruant. Quamvis namque hæc vera sint, loquendo de combinatione, quæ fit ex particulis primitivis; falsissima sunt tamen, loquendo de combinatione, quæ ex particulis secundariis emergit.

(a) Elem. Chemiæ P. I. pag. 108.

(b) Ibidem.

(c) De coloribus P. II. cap. 2. num. 4.

(d) Elem. Chemiæ P. I. pag. 108.

(e) De coloribus P. I. cap. 1. num. 7.

(f) Vide quæ diximus in Physica tom. I. §. 1447., & §. 1460.

git. Hæc enim in iis omnibus similis esse debet, quæ, quod excipiunt *lumen*, eodem modo vel absorbent, vel reflectunt, quemadmodum combinatio prior in iis omnibus similis est, quæ ejusdem sunt *speciei*; in iis vero dissimilis, quæ sunt *specie* diversa. Neque porro juvat Virum Cl., *sapores*, & *odores diversitatem ex varia partium figura* a Recentioribus repeti; non enim ex omnibus particulis, quæ *sapidum*, & *odorum* corpus constituunt, sed ex aliquibus tantum, nempe ex *salino-sulphureo-mercurialibus*, affectiones illas Recentiores derivant; nullaque in eo repugnantia est, ut, quæ dissimiles *salino-sulphureo-mercuriales* particulas corpora comprehendunt, in externa partium dispositione, combinatione, sive textura, a qua dumtaxat dependet *color*, eadem ipsa plane consentiant.

Opponit 2. plurima extant corpora, quæ propter *diversam partium texturam*, & *dispositionem diversa ratione externam lucem modificant*, refrangunt, & reflectunt, quæ tamen omnia sunt alba, ut lac, & calx, vel æque nigra, ut marmor nigrum, & pix. Ergo colores fixi, seu permanentes non variantur ex varia externæ lucis modificatione (a).

R. ut supra, negando assumtum, scilicet corpora, quæ propter *diversam partium texturam*, & *dispositionem diversa ratione externam lucem modificant*, refrangunt, & reflectunt, esse ejusdem coloris. Certe neque lac, & calx, quæ æque alba, neque marmor nigrum, & pix, quæ æque nigra apparent, dissimili ratione incidens *lumen* modificant, & in nos reflectunt; sed illa *lumen* ipsum purum in spectatoris oculum regerunt; hæc vero illud totum, aut ferme totum ex æquo absorbent. Miror tamen, judicio Viri Cl., extare corpora, quæ propter *diversam partium texturam*, & *dispositionem diversa ratione externam lucem modificant*, refrangunt, & reflectunt, quin sint colore diversa. Non enim satis video, quomodo stare deinde possit, quod ille docet alio loco, nempe colores secundarios ex varia commixtione albi, nigri, flavi, rubri, & cerulei, accedente etiam varia dispositione lucis, & umbra, diaphaneitatis, & opacitatis provenire (b). Aperte namque hinc sequitur, dissimilitudinem colorum secundariorum a varia lucis modificatione, refractione, & reflexione dependere. Quid enim aliud est illa varia dispositio lucis, & umbra, nisi varia lucis, modificatio? Quidnam aliud ob variam dispositionem diaphaneitatis, & opacitatis in corporibus accidit, nisi varia externæ lucis refractione, & reflexio? Non dubitat ergo Vir Cl., quominus ob variam externæ lucis modificationem, refractionem, & reflexionem secundarii colores

mu-

(a) Loco citato prob. 2. pag. 431.

(b) Ibidem assert. 6. pag. 434.

mutentur. Igitur neque dubitare potest, quominus etiam *colores prismatici* possint propter easdem causas in corporibus mutari, sive quominus corpora, quæ *externam lucem* diversa ratione modificant, refrangunt, & reflectunt, sint *colore* diversa. Omnium quippe, nisi contrarium ille manifeste ostenderit, eadem ratio est, & par conditio.

Instat: *variata luce, eademque nunc intensiori, nunc remissiori, alba corpora semper videntur alba; & nix, quæ alba conspicitur, Solis luce præsentem, noctu etiam alba apparet; cum tamen pro majori lucis copia major illius reflexio habeatur* (a).

R. me non videre, quomodo Recentiorum hypothese id officiat. Nullus enim illorum est, qui velit, mutari *colorem* in corpore ob id dumtaxat, quod modo intensius, modo remissius *lumen* in corporis superficiem incidat, ab eaque in nos regeratur. Concedo, *variata luce, eademque nunc intensiori, nunc remissiori facta, alba semper videri corpora, quæ alba sunt.* Concedo, *nivem, quæ alba conspicitur, Solis luce præsentem, etiam noctu albam apparere; ac propterea, si quis fuerit, qui colorum diversitatem ex lumine inæqualiter intenso deriveret, perquam maxime a vero esse alienum.* Nego tamen, tantundem de iis dicendum fore, qui non ex inæquali intensitate *luminis*, sed ex dissimili illius modificatione *colorum* discrimen desumunt. Do etiam Viro Cl., *pro majori lucis copia majorem illius reflexionem haberi*, hoc est, *vividius esse lumen, quod reflectitur.* Verum, nisi ostenderit, *lucem ipsam, prout magis, minusve intensa fuerit, dissimili ratione modificatam ad nos pervenire, parcat, si dixerit, hinc ne levissime quidem Recentiorum hypothese labefactari.*

Addit porro, *in marmore albo, & in marmore nigro eandem contingere radiorum lucis reflexionem; quia utramque habet æqualem partium texturam, duritiem, poros, & utrumque levigatum est, ac tersum, & tamen color in illis longe diversus est* (b).

At vero id adeo falsum est, ut nihil magis. Experientia siquidem teste, ut vidimus, ex marmore *albo* maxima incidentis *luminis* reflexio est; nulla vero, aut ferme nulla ex *nigro*. Fallitur ergo Cl. Auctor, dum assumit, veluti ipsis sensibus manifestum, eandem in utroque marmore esse partium texturam, pororum magnitudinem, dispositionem &c. uno verbo, id in utroque ex æquo haberi, ex quo æqualis *luminis* reflexio dependet.

Op.

(a) Loco citato pag. 431.

(b) Ibidem.

Opponit 3. *sive oblique, sive directe radii lucis excipiantur, aut in corpus incidant, idem omnino calor percipitur* (a). Ergo &c.

R. concedendo *assumptum*, & negando *conseq.* Id enim nullatenus officit Recentiorum doctrinæ. Perinde siquidem est, illorum sententia, ad corporis *colorem*, *sive oblique, sive directe* externam *lucem* corpus ipsum recipiat, & in nos reflectat, dummodo tam in *directa*, quam in *obliqua* reflexione, eodem modo modificata ad nos illa perveniat. Sic corpus *album*, *sive directe, sive oblique* in nos emittat *lumen*, quod recipit, illud semper purum in nos regerit, unde semper *album* apparet. Similiter corpus *nigrum* vel totum, aut ferme totum, quod in ejus superficiem incidit *lumen*, semper ex æquo absorbet, unde *nigrum* perpetuo conspicitur. Quia tamen *lumen directe* reflexum, fortius; debilius vero, quod *oblique* reflectitur, visus organum percellit; propterea vividiores apparent *colores*, qui, medio lumine *directe* reflexo; dilutiores, qui, medio lumine *oblique* in nos repercusso conspiciuntur.

Pergit ille: *lux unius speciei est, colores specie differunt. Peto autem, quid sit illa lucis modificatio, aut quomodo possit tam varios referre colores* (b)?

R. *lucem* esse quidem unius speciei, *colores* vero specie differre; at tamen vel nihil prorsus hinc inferri posse, quod Recentiores aliquo modo premat; vel si quid hujusmodi inde sequatur, illud ipsum etiam Scholasticos ex æquo urgere. Nihil colligi hinc potest, quod Recentioribus valeat aliquid negotii facessere. Utut homogenea enim videatur *lux*, illud certum est perspicuumque, eam posse, vi solius *refractionis*, in plures *diversicolores* radios resolvi. Patet in illo *lucis* radio, qui per vitreum *prisma* trajectus, alba charta excipitur. Dubium non est ergo, quin *lux*, licet unius speciei, nobis exhibere, certa accedente causa, dissimiles *colores* possit. Præterea, quancunque sit unitas *lucis*, & *colorum* diversitas, ipsa tamen una medium est, quo omnes *colores* percipiuntur; ac proinde quo omnium imago in oculi fundo depingitur. Ergo neque *lucis* unitas, neque diversitas *colorum* impedimento esse potest, quominus ex una *luce*, diversa ratione modificata, omnium *colorum* origo derivetur. Igitur Cl. Adversarii argumentum vel non premit Recentiores, vel etiam Scholasticos ex æquo urget. Æque enim difficile captum est, unam *lucem* ad omnes, tum inter se, tum ab illa adeo dissimiles, *colores* percipiendos, tamquam medium, inservire; ac sit captum difficile, ex illa una *colores* omnes provenire.

Ad

(a) Loco citato prob. 3. pag. 431. (b) Ibidem.

Ad id vero, quod petit Vir Cl., quid nempe sit illa lucis modificatio, ex qua a Recentioribus derivantur colores, & quomodo tam varios colores referre ipsa possit; paucis respondeo, & dico, certo certius tunc futurum, ut Recentiores utrique propositæ quæstioni satisfaciant, cum Cl. ipse Auctor palam effecerit primo, quid sit tum varia illa dispositio lucis, & umbra, diaphaneitatis, & opacitatis, tum varia ea mixtio albi, nigri, flavi, rubri, & caerulei, ex quibus colores reliquos ipse oriri ait (a); secundo, cum in aperto ipse quoque posuerit, quomodo varia ejusmodi mixtio, & dispositio valeat tam varios colores referre. Qua enumeratione persuasum tanto Viro est, sibi jure non posse vitio verti, quod ex hac varia dispositione, atque mixtione secundarios colores deriveret, quin eas antea palam effecerit; eadem ipsa ratione contendunt Recentiores, injuste prorsus a Scholasticis eo adigi, ut vel explicent modificationem illam lucis, ex qua colores omnes repetunt, vel opinionem hanc suam de colorum genesi, tamquam mancā, & Philosopho indignam, ipsi reiciant.

Porro cum P. Ferrari ingenue fateatur (b), colorum naturam neque sibi clare distincteque innotescere, neque ab Aristotele nitide fuisse descriptam, veniam dabit, ut spero, Recentioribus, si hac super re a Scholasticorum sententia recesserint; neque contendet, illud ipsum de colorum natura sensisse Aristotelem, quod Scholastici docent.

Do itidem Viro Cl., colorem posse utcunque describi, affectionem corporis opacitate aliqua pradi, quæ quidem affectio subjectum suum denominat, & per lucem fit visibilis, atque nata est visionem terminare (c). Moneo solum, definitionem hanc non rei esse, sed nominis. Per eam quippe palam non efficitur, quid physice sit color, sive ea affectio, quæ dicitur denominare corpus, fieri visibilis per lucem, & visionem terminare; sed describitur tantum, quid coloris nomine intelligatur.

Opponit 4.: nigredo color est, & tamen ab albedine toto cælo differt. Quare utrumque per lucem haberi non potest; maxime cum nigredo videatur prorsus dissimilis luci (d).

R. nigredinem non esse calorem positivum, sed negativum. Corpus quippe, ut etiam supra innuimus, nobis nigrum apparet, non quia lucem vel puram, sicuti corpus album, vel certa ratione modificatam, quemadmodum corpora mediis coloribus affecta, in nos regerat; sed quia nihil prorsus, aut ferme nihil luminis, quo perfunditur, in nos

(a) Loco citato assert. 6. pag. 434.

(b) Ibidem pag. 444.

(c) Ibidem.

(d) Ibidem prob. 4. pag. 431.

reflektit. Concedo, *nigredinem* non solum toto coelo ab *albedine* differre (differunt enim, ut *privatio*, ejusque *forma*) sed etiam *luci* maxime esse dissimilem; & ideo per *lucem* haberi non posse. Quidnam vero hinc sequatur contra doctrinam Recentiorum de *colorum* origine, fateor ingenue, a me nequaquam videri. Nullus quippe illorum est, qui doceat, *nigredinem*, quemadmodum *albedo*, ceterique *colores*, qui *medii* dicuntur, a *luce* provenire; nullus, cui placeat, sensum *nigredinis*, ut *colorum* reliquorum, a *luce* in oculum ab objecto emissa, ejusque *retinam* movente derivare.

Verum urget Cl. Adversarius, hoc *gratis confictum* merito reputari. *Umbra enim nihil est, nec per se ipsam valet movere potentiam* (a).

R. gratis non fingi a Recentioribus, sed satis probabili conjectura ab illis poni, corpus ob id dumtaxat nobis *nigrum* se prodere, quod nihil, aut ferme nihil incidentis *luminis* in oculum reflectat. Ex una enim parte certum est, inquit illi, neque sane immerito, ut vidimus, corpus *nigrum* totum, aut ferme totum *lumen*, quod excipit, absorbere, adeoque nihil illius, aut ferme nihil in nos regerere. Ex altera vero manifeste constat, ea omnia nobis *nigra* apparere, quæ nullo *lumine* perfunduntur. Cum ergo perinde sit, corpus nullo *lumine* perfundi, ac illud nihil *luminis* in nos reflectere, non immerito dicendum putant, corpora *lumine* perfusa ideo *nigra* constanter apparere, quod nihil, aut ferme nihil incidentis ipsius *luminis* in nos reflectant. Accedit auctoritas Aristotelis. Is enim, vel quisquis fuerit, de quo viderint Critici, Auctor libelli de *coloribus*, Aristoteli vulgo adscripti, docet, *nigrum* apparere nobis posse multipliciter. Aut enim, inquit, omnino quod non videtur, est natura sua *nigrum*; aut a quibus nullum prorsus *lumen* fertur ad oculos. Nam, quod non videtur, cum ambiens locus videtur, nigri reddit apparentiam. Apparent item nobis hujusmodi omnia *nigra*, a quibus rarum, & paucum *lumen* repercutitur. Quare & *nigræ* apparent *umbra*, similiter & *aqua*, quando exasperata fuerit, quemadmodum maris horror, nam propter superficiei asperitatem paucis radiis incidentibus, & dissipato *lumine*, *umbrosum* *nigrum* apparet; propterea & *nubes*, quando densa fuerit valde, eadem quoque ratione & *aqua*, & *aer*, quando non omnino penetrat *lumen*. Etenim hac videntur esse *nigra*, quod profunditatem habeant, eo quod omnino radii refranguntur. Intermedia enim partes ipsorum omnes videntur *nigræ* propter tenebras (b). Injuste ergo, quod de *nigredinis* natura, & origine tradunt Recentiores, *gratis confictum* appellat Cl. P. Ferrari. Ratio etiam, qua

Q

id

(a) Loco citato.

(b) Cap. 1.

id ille demonstrat, nulla est, utpote principio penitus falso innixa. Falsum est enim, *nigredinem*, non perinde atque umbram, esse aliquid *positivum*; falsum, eam *per se* movere potentiam visus. Iterum quippe dicimus, *nigredinem* consistere in *privatione lucis*, & visus organum reapse non moveri, sive non affici *positive*, dum *nigredinem* in corpore discernit, quemadmodum ex adverso illud reipia moveatur, & *positive* afficitur, dum *colores* reliqui conspiciuntur.

Instat præterea idem P. Ferrari, pro *majori lucis copia*, quæ in *nigram* rem effunditur, *clarius etiam, & distinctius* rem illam conspici; proindeque *majorem tunc radiorum copiam* ab ea re *nigra* reflecti. Quare potius debere quasi *albam* postmodum apparere, si *albedo* consistit in *reflexione multorum radiorum* (a).

R. pro *majoris lucis copia*, quæ in rem *nigram* effunditur, *clarius & distinctius* rem illam conspici, non quia, ut ipse falso putat, *major copia lucis* tunc ab illa in nos regeratur; sed quia corpora, quæ eam ambiunt, & continent, cum visus organum tunc fortius percellant, sui que sensum vividius in nobis excitent, efficiunt quodammodo, ut res illa magis *nigra* nobis appareat. Universaliter enim, eo nobis sensibilibior *privatio* est, quo *forma* illi opposita validius sensum afficit.

Miror autem, dici a P. Ferrari, pro *majori lucis copia*, quæ in *nigram* rem effunditur, *majorem tunc radiorum copiam* ab ea in nos reflecti. Res enim *nigra* vel percipitur mediante *lumine*, quod ab illa, ut ait Cl. Auctor, in nos regeritur, vel non. Si non percipitur, medio illo *lumine*: ecurr dicit, pro *majori lucis copia*, quæ in eam effunditur, *clarius distinctiusque* rem *nigram* conspici? Si vero percipitur ope illius *luminis*: ergo maxima *nigredinis* diversitas ab *albedine*, ejusdemque maxima a *luce* dissimilitudo non impedit, quominus ad utriusque *coloris* visionem una *lux* sensum determinet; & ideo, secus ac ille docet, ut vidimus, neutra prohibere jure potest, quominus, sicuti *albedo*, ita etiam *nigredo* per *lucem* habeatur. Æque enim repugnare mihi videtur, *albedinem*, & *nigredinem*, licet toto cælo differant, immutare organum visus, mediante eodem *lumine*, ac utramque ex eodem *lumine* oriri; sicuti etiam visus organum moveri a *nigredine* per *lucem*, tametsi *lux* sit illi plane dissimilis, ac repugnet, *nigredinem* ipsam a *luce* provenire.

Opponit postremo idem P. Ferrari, *lucis refractionem* minime dici posse *causam colorum*. Etenim, inquit, si *lux* per *vitra colorata*, & *plana* transmittatur, eos quidem *colores* induit, sed non *aliam* subit *refractionem*.

(a) Loco citato pag. 431.

tionem, quam si vitra omni essent colore destituta. Non igitur partes illa, qua colores efficiunt, ceu parva quaedam prismata, aut cylindruli, radios luminis infringunt, aut disjiciunt. Quod si vitrum concavum aliquo sit colore imbutum, radii in eundem locum, seu focum refracti coibunt, ac si vitrum esset omnis coloris expers (a). Igitur &c.

Be. non ex omni *lucis* refractione derivari posse colores corporum, sed ex ea tantum, per quam refractum *lumen* in plures coloratos radios veluti separatur. Propterea, cum, ut experientia demonstrat, id illa refractione non efficiat, quam patitur *lumen*, dum per vitra plana traicitur, damus Viro Cl., corporum colores ex hac minime posse desumi. Hinc tamen non recte ille colligit, ex nulla *luminis* refractione derivari colores posse. Manifestum enim experientia est, a *lumine* per *vitreum prisma*, perque *bullulas* tum *vitreas*, tum *aqueas* refracto, colores plurimos, eosque elegantissimos exhiberi. Ipse etiam docet, colores *transeuntes* oriri ex mixtione *colorum* primitivorum pro *varia* itidem *opacitatis*, & *diaphaneitatis* dispositione, atque *reflexione*, *refractione*que *lucis* (b). Vel loquitur ergo de *refractione* illi non dissimili, quam patitur *lumen*, dum per planum vitrum transit, vel de *refractione* ab ea non diversa, quæ in illo contingit, dum per *vitreum prisma* traicitur, adeoque de *refractione*, per quam *lumen* in plures radios diversorum *colorum* veluti separatur. Si loquatur de prima: ergo sibi non consentit, dum approbat hoc loco, quod paulo antea contra Recentiores, ut falsum, rejecerat. Si vero de *refractione* altera loquatur: quæro a Viro Cl., num ineptitudo *refractionis* per *vitra plana* ad producendos colores satis evincat, ex nulla *refractione* derivari a nobis colores posse, an non. Si illa id satis evincat: eccur ipse deinde, ex hac postrema *refractione* provenire aliquos colores, docet? Si non: eccur illam ipse in medium profert, ut contra Recentiores ostendat, ex *refracto lumine* minime posse colores derivari?

Dicet forte, se hoc loco de *apparentibus coloribus* loqui; de *constantibus* vero, dum contra Recentiores differit.

At in oppositum est. Nam ineptitudo *refractionis* per *vitra plana* ad colores producendos vel non prohibet, quominus etiam colores *fixi* ex *lumine refracto* repetantur, vel etiam impedit, quominus ex illo deriventur *colores apparentes*. Ita enim argumentor: illa *refractionis* ineptitudo aut non obstat, ne corporum particulae, ceu parva quaedam *prismata*, aut *cylindruli*, incidens *lumen* infringant, vel disjiciant; aut obstat, ne illae particulae, ceu parva quaedam *prismata*,

Q 2

aut

(a) Loco citato pag. 431.

(b) Ibidem pag. 434.

aut *cylindruli* id in *lumine* præsent. Si non obstat : ergo neque obstat, quominus, posita in corporibus sensibilibus illa componentium particularum figura, & combinatione, etiam *colores fixi* ex *refracto lumine* oriri dicantur. Si vero obstat: ergo obstat etiam, quominus *colores apparentes* ex *lumine refracto* proveniant. Si qui etenim *colores* proveniunt ex *refractione*, ii profecto sunt, qui a *lumine* per *vitreum prisma* *refracto* exhibentur.

Non omittendum postremo videtur, Virum Cl. hallucinari, si putat, *lumen*, dum transit per vitrum planum coloratum, ideo *colorem* ipsum in egressu induere, quia in transitu refrangatur. Non enim hanc, sed prorsus aliam esse huiusce phænomeni causam, compertum fiet Viro Cl., si grave illi non fuerit, recentiores Philosophos consulere, quæque de illius *coloris* origine ipsi tradunt, attente considerare.

SCHOLIION I.

89. Quemadmodum inter Recentiores penitus convenit, corpus nobis *nigrum* idcirco apparere, quia nihil, aut ferme nihil *luminis*, quo perfunditur, in nos reflectit; ita iisdem persuasum est, *album* ideo nobis illud se prodere, quod singulæ, aut ferme singulæ extimæ ipsius particulæ radium puræ lucis, quam excipiunt, in nos emittant. Ut præteream enim, quod est egregie a Gassendo observatum, *summam* scilicet, seu *sinceram lucem* in ipso suo fonte, *lucidore*, ut *Sole*, *spectatam*, esse ipsum *candorem*, seu *albedinem candicantem, promicantem, emicantem, splendentem* (a); maximo huius opinionis argumento est, quemadmodum præclare animadvertit Cl. Boyle, *albicans* ea cœli *nebula*, quæ *via lactea* vulgo nuncupatur. Cum enim illa non aliud vere sit, nisi immensa quædam stellarum sibi mutuo perquammaxime vicinarum copia, videtur nullatenus dubitandum, quominus *corporum lucidorum multitudo*, si ob parvitatem singula seorsim visum fugiant, & si satis confertim sibi invicem componantur, possit, ut ille ait, ob *radios suos confusos* unum corpus *album* *oculo* apparere (b); ac proinde quin corpora, quæ nobis *alba* apparent, eam ob causam huiusce *coloris* videantur, quia extimæ minutissimæ, sibi que invicem apprime vicinæ, componentes illorum particulæ, *pura lucis radium*, ceu totidem stellaræ, singulæ in nos reflectant. Verum,

SCHO-

(a) Sect. I. *Physicæ* lib. VI. cap. 12.

(b) P. II. de *coloribus* cap. I. num. 10.

SCHOLIUM II.

90. Quo tamen certius est, hanc esse *albedinis*, & *nigredinis* naturam, atque originem, eo res est incertior, in quonam *physice* ea *reflexi luminis* modificatio posita sit, ex qua reliquos *colores* diximus provenire. Hypothesis enim adhuc desideratur, quæ penitus satisfaciatur. Ejusmodi certe, ut ingenue dicam, quod sentio, nulla earum est, quas ad rem hanc explicandam Recentiorum solertia hactenus excogitavit, ut proinde, differens hac de re, non immerito dixerim in *Physica* (a), quod scripserat Tullius, agens de natura Deorum, alterum fieri profecto posse, ut earum nulla, alterum certe non posse, ut plus una sit vera (b). Id tamen sicuti non obstat, quominus verum sit, nonnisi a lumine certa ratione modificato eam in oculo impressionem fieri, quam *medii* cujusque *coloris* sensatio in anima consequitur; ita illud ipsum jure non prohibet, quominus ratum fixumque maneat, a sola componentium particularum *magnitudine*, *figura*, & *combinatione* habere corpus, ut, lumine perfusum, nobis *coloratum* appareat; cum qualiscunque sit illa *reflexi luminis* modificatio, res indubia videatur, nonnisi ab illis *mechanicis* particularum *affectionibus* eam posse provenire. Hinc

COROLLARIUM.

91. Sumto *colore obiectivo* pro illa corporis seu *affectione*, seu *forma*, quæ est ratio, quamobrem corpus ipsum, dum lumine perfunditur, certi *coloris* appareat, perspicuum manet, *colorem obiectivum* in Recentiorum hypothesis, æque prorsus ac in hypothesis Scholasticorum, a lumine non dependere. Sive enim illa affectio in componentium particularum *magnitudine*, *figura*, & *combinatione*, ut Recentioribus placet, statuatur; sive, ut contendunt Scholastici, sit *accidens absolutum*, stat ex æquo, perinde illam esse in corpore, posito lumine, ac in ipso sit, lumine sublato; ac propterea æque veræ, posita sententia Recentiorum, ac opinione Scholasticorum admessa, dici posse, corpus, etiam quando nullo lumine perfunditur, esse *coloratum*, ejusque *colorem*, mutato *luminis* gradu, non mutari.

SCHO-

(a) Tom. I. *Physica* §. 1468. & seq.

(b) Lib. I. de natura Deorum cap. 2.

SCHOLION III.

92. Monere porro liceat, injuste prorsus Veteres nonnullos a Cl. P. Ferrari (a) eam ob causam irrideri, quod dixerint, *colores* existere in corporibus, presente *lumine*; hoc vero sublato, eos in corporibus perire. Cum enim illi sumserint *colores* non pro ea corporis seu affectione, seu dispositione, per quam corpus ipsum habet *formaliter*, ut *lumen*, quod excipit, certa ratione modificatum in nos reflectat, atque hinc ut, illo mediante, *coloris* sensum in nobis excitet, sed pro ea reflexi *luminis* modificatione, ratione cuius sensorium visus ita ab illo immutatur, ut hinc determinetur anima ad *colorem* percipiendum, non est sane, cur illi propterea risu excipiantur. Nemo non videt enim, nihil tunc verius dici posse, quam *incidentem in subjectas res lucem*, *colorem esse*, & *constituta in tenebris corpora colore destitui*, ut olim ab Aristarcho Samio apud Gassendum (b) dicebatur. Nemo quoque ignorat, nihil esse, quod prohibeat, quominus ita sumatur *color*, quemadmodum nihil jure habetur, quod obftet, quominus *soni* nomine non tremor sonantis corporis, sed qui aeri ab illo motus imprimitur, intelligatur. Hinc laudatus Cl. Gassendus non magis absurdum esse, ait, dicere cum Epicuro, omnia in tenebris æque esse *coloris* expertia, quam sit absurdum dicere, esse *varias fistulas aque insonoras*, & *dispositiones tamen in se habere*, propter quas, flatu adveniente, *varios sonos exhibeant*; aut esse *varia grana aque exflora*, & *dispositiones tamen continere*, propter quas, humore, caloreque advenientibus, *varios flores exhibeant*, parique modo *alia sexcenta* (c). Veterum itaque Philosophorum mentem non satis perspectam habuit Cl. P. Ferrari, dum contra illos scripsit, dicere *colores existere*, dum luce perfunduntur, absente vero lumine, deperire, perinde esse, ac si quis dicat, orientia quidem astra succendi, occidentia vero extinguere; sicuti etiam dum admirans scripsit: *hæc commenta quid aliud sunt, quam dicere, quos videas homines, esse; quos videre definas, mori; aut eundem parietis v. g. alborem eodem simul tempore existere, dum ab uno inspiciente videtur; & non existere, dum alterum hominem latet* (d)?

(a) Loco citato in prob. assert. 6. pag. 434.

(b) Sect. I. Physicæ lib. VI. cap. 12.

(c) Ibidem.

(d) Loco citato.

V.

93. Dicendum modo de *saporibus*. Itaque Recentiores si audiamus, a *salinis* potissimum particulis habent naturalia quæque composita, ut nobis *sapida* sint; idque illæ non præstant, nisi ratione *magnitudinis*, atque *figuræ*, quibus singulæ donantur. Quod spectat ad primum, illud sane ex hoc uno fit manifestum, quod, ut etiam dictum fuit, cum adversus Scholasticos res hujusmodi ageretur (§. 70.), *sapidum nihil fit, ex quo extrahere sal non detur; nihil, quod extracto sale non reddatur inspidum; nihil itidem fit inspidum, quod commixto sale, sapidum non fiat* (a). Dubium non est enim, quin corporum *sapor* ex ea substantia oriatur, qua, in corporibus posita, *sapida* illa nobis sunt, & qua sublata, *insipida* nobis ipsa redduntur. Ad secundum vero quod attinet, cum *salinæ* particulæ sensum *saporis* in nobis non excitent, nisi quia nerveas eas linguæ papillulas, in quibus *gustus* organum positum est (§. 26.), certa ratione pungunt, movent, & vellicant (§. 29.), ab eo certe habent *formaliter*, ut *saporis* sensum excitare illæ in nobis possint, a quo habent, ut nerveis linguæ papillulis debite applicatæ, pungere eas valeant, certa que ratione premere, atque movere. Nemo autem non videt, hanc in illis vim, utpote quæ est pure mechanica, a sola earum *magnitudine*, atque *figuræ* dependere. Ergo ab hisce tantum affectionibus ea vis oritur, qua *salinæ* *sapidi* corporis particulæ sensum *saporis* in nobis efficiunt.

Confirmatur ex eo primum, quod necesse sit, corpus *sapidum* dentibus conteri, & saliva dilui, ut illius *sapor* percipiatur. Hujusce enim phænomeni non alia sane esse potest causa, nisi quia *salinæ* ipsius corporis particulæ dissolvi debent, ab iisque sejungi, quibus in illo simul permixtæ sunt, ut, sui juris factæ, linguæ poros penetrare deinde valeant, ad nerveas ejusdem papillulas deduci, easque libere premere, & pro ratione suæ *magnitudinis*, atque *figuræ*, diverso modo ipsas pungere, & vellicare.

Secundo: quia nullius solidi corporis *sapor* sentitur, si lingua vel nimis arida fuerit, vel nimio humore turgida. Non sentitur enim *sapor*, si lingua fuerit nimis arida; quia, deficiente humore, deest menstruum, quo *salina* corporis substantia debite dissolvatur. Idipsum accidit, si lingua nimis humore turgescat; quia, si humoris copia

(a) Gassendus Sect. I. *Physicæ* lib. VI.
cap. 9.

pia debitam mensuram excedat, non solum retunditur salinarum particularum vis, verum etiam nerveæ linguæ papillulæ ineptæ redduntur ad eam ex illarum appulsu motionem concipiendam, quam *saporis* sensatio in anima comitatur.

Suadetur *postremo* ex eo, quod *sapida* corpora *calore* fiant *sapidiora*; ferme vero *insipida*, si nimio *frigore* corripiantur. Cum enim non aliunde repeti id posse videatur, nisi quia *calor* perfectius solvat attenuetque salis particulas, easque insuper contra nerveas linguæ papillulas fortius urgeat; *frigus* vero ex adverso perfectam illarum particularum dissolutionem prohibeat, & linguæ papillulas torpidas reddat, videtur, minime dubitandum, quominus pure mechanica sit actio, qua a salinis sapidi corporis particulis sensus *saporis* in nobis excitatur; ac proinde quominus ab salinarum particularum *magnitudine*, atque *figura* actio illa tota, adeoque etiam *sapor*, dependeat.

Contrarium sentit Cl. P. Ferrari. Tametsi enim & ipse, ut etiam innuimus alibi (§. 70.), a rigidiorum Peripateticorum sententia recesserit, admittens scilicet cum Recentioribus, sales non solum *sapidos* esse, verum etiam *efficientes saporum* (a), contendit tamen, fecus ac illi docent, salinas particulas non habere a sua *figura*, ut afficiant gustus organum, & *saporis* sensum in nobis excitent. Sic enim argumentatur Vir Cl.: *data Recentiorum sententia, quolibet nostri corporis pars esset gustativa, & quolibet corpus esset gustabile, ac saporificum; nullum vero insipidum. Utrumque contrarium est experientia. Igitur &c.* Major probatur: cum inter gustus, tactusque sensoria exiguum sit discrimen, nec cutis minus, quam lingua, salium asperitates nata sit percipere, quid est, quod cutis etiam non sit saporum iudex? Nec juvat ad cutis, seu cuticulæ conformationem, aut duritiem recurrere, ratione cujus dicatur, minimas eas asperitatum differentias sentire non posse, quas lingua potest; parte enim cutis abrasa, asperitas salis liquati cuticula sentitur; & tamen inauditum est, saporem ibi aliquem percipi. Quod si ad leges Dei recurrant Recentiores, jam hac commenta rejecimus in præcedenti disputatione. Deinde corpora insipida reperiri, certum est, ut sunt aqua, terra, & corpora omnia, in quibus spiritus a terra, & aqua obruuntur in statu fixationis, ut ajunt Chimici. Atqui juxta Recentiores, qui mechanicis principiis omnia expendunt, nullum corpus reperitur, quod conflatum non sit ex atomis, seu moleculis certa configuratione donatis. Ergo aqua etiam, & terra suas habent

bent atomos, seu particulas, quibus organum gustus valent afficere. Re ipsa autem aqua linguam alterat. Sed Recentiores dicent, aquam id efficere in linguam, ut hac tactiva est, non ut gustativa. Porro hoc explicandum manet per mechanicas affectiones. Si enim suavis gustus fit mollibus atomis linguam lenientibus, hoc totum præstat aqua, adeoque saporem habet suavem, lingua, non ut tactivæ solum, sed etiam ut gustativæ, se insinuantem. Asperitas quoque in terra partibus reperitur. Quod si ad asperitatem, lenitatemque minorem Recentiores confugiant, non alium omnino sensum, sed eundem delicatorem efficient. Ad hæc, varia corpora, quæ variis proinde moleculis constant, eundem reddunt saporem, ut mel, & saccharum, & similia. Quamquam ergo sales in corporibus existant, & saponi sint, & variam habeant figuram, non tamen figura ipsa efficit saporem, aut corpus sapidum constituit (a).

Respondeo ad hoc argumentum, singulas ejus partes singulatim expendendo. Primo itaque nego majorem, nempe fore, admissa sententia Recentiorum, ut qualibet nostri corporis pars sit gustativa, & quodlibet corpus sit gustabile, ac saporificum, nullum vero insipidum. Ad hujus probationem dico, inter sensoria gustus, & tactus, quamvis ex nerveis fibrillis æque composita, tantum esse discriminis, quantum sufficit, ut neque ab omnibus omnium corporum particulis excitari ad motum possint, neque ex motionibus, quæ in illis omnibus fiunt, eadem sensationes in anima consequantur. Illorum quippe structura plane diversa est, pro specifico scilicet ipsorum discrimine; idque satis esse, ne & ab omnibus omnium corporum particulis excitentur ad motum, & ex eorum motionibus eadem sensationes in anima contingant, abunde ostendimus supra (§. 29.), cum nempe momenta dissolveremus, quibus Cl. ipse Auctor demonstrare nitebatur, passionem externi sensorii, quam sensatio in anima consequitur, in sola motione nervearum fibrillarum, ex quibus organa ipsa immediate constant, perperam a Recentioribus collocari. Unum tantum addo, quod ibidem etiam notatum fuit, mihi nempe apprimè gratum futurum, si Vir Cl. in aperto posuerit, quomobrem gustus, & tactus organa, licet, ipso quoque docente (b), ex nerveis tantum fibrillis æque componantur, & ut habet hoc loco, exiguum inter illa sit discrimen; attamen ab iisdem absolutis saporum, & tactilium qualitatibus ex æquo non immutentur? Videtur enim, ut qua ratione stare potest, ab iisdem absolutis accidentibus illa non affici, quamvis exiguum sit ipsorum discrimen, eadem

(a) Loco citato prob. assert. 2. pag. 367.

(b) Ibidem pag. 366.

dem prorsus stare itidem queat, illa ab iisdem corpusculis non immutari, vel saltem non ita immutari, ut similes sensationes hinc in anima contingant.

Ad illud propterea, quod addit, *parte scilicet cutis abrafa, asperitatem salis liquati cuticula sentiri*, quin idcirco *sapor* aliquis percipiatur, facilis responsio est: dicendum nempe, ab iis acuminatis liquati salis corpusculis, quæ immutato *gustus* organo, *acidi saporis* sensationem in nobis excitant, etiam nerveas sensorii *tactus* fibrillas irritari, adeoque illorum corpusculorum asperitatem *tactu* quoque sentiri; verum, ob plane dissimilem horum sensoriorum structuram, sensationes, quæ ex illis motionibus in anima fiunt, diversas esse inter se, quemadmodum diversæ sunt sensationes *gustus*, & *olfactus*, tametsi eadem salina corpuscula, quæ *gustus* organum movent, etiam sensorium *olfactus*, ad *volatilitatis* statum, ut Chymici ajunt, evecta, ipsa afficiant.

Quod porro nullum, ut ille ait, in natura futurum sit corpus *insipidum*, si vis, qua salinæ particulae sensum *saporis* in nobis excitant, illarum *magnitudini*, & *figura* accepta referatur, plane falsum mihi est. Neque enim id ex eo sequitur, quod juxta Recentiorum doctrinam *nullum corpus*, ut ait Cl. Adversarius, *reperiatur, quod conflatum non sit ex atomis, seu moleculis certa configuratione donatis*; cum stare possit, omne corpus componi hoc modo, quin propterea in omni corpore habeantur particulae ejus *magnitudinis*, atque *figurae*, cujus necessario esse debent, ut ex illarum appulsu *gustus* organum immutetur; quemadmodum sane potest stare, ut stat reipsa, omne corpus sensibile ex figuratis corpusculis coalescere, quin corpus omne aliquid salis contineat. Certe ipsum P. Ferrati si audiamus, omne corpus constat ex *materia*, & *forma substantiali* (a), neque tamen omne corpus continet salinas particulas, ex quibus ipse etiam (b) corporum omnium *sapores* derivat. Qua ergo ratione dicet ille, stare posse, ut omnia corpora componantur ex *materia*, & *forma substantiali*, quin in omnibus habeatur sal, nobisque *sapida* illa se prodant; eadem ipsa ratione dicent etiam Recentiores, nihil in eo esse repugnantiae, ut *nullum corpus reperiatur, quod conflatum non sit ex atomis, seu moleculis certa configuratione donatis*, quin propterea corpus omne consurgat ex particulis salinis; ac proinde quin *saporem* præditum a nobis deprehendatur.

Hinc

(a) Tom. II. P. I. *Physicæ* Disp. II. q. 1.

(b) Tom. III. P. III. *Physicæ* Disp. III. q. 2.

Hinc explicatum manet per *mechanicas affectiones*, quemadmodum ille oprat, cur aqua, etsi linguam afficiat, nullius tamen *saporis* sensum in nobis excitet. Causa nempe est, quia aqua ex ipsa sua natura nihil salis in se continet, sive quia componentes illius particulæ ejus non sunt *magnitudinis*, & *figura*, ut illas nerveas linguæ papillulas, in quibus sensorium *gustus* positum est, valeat premere, & vellicare, quemadmodum ex iis ipsa consurgit, a quibus illæ nerveæ fibrillæ ejusdem linguæ concuti possunt, in quibus sensorium *tactus* consistit. Et hinc est, optime dici a Recentioribus, linguam affici ab aqua, aliisque insipidis corporibus, *ut hæc tactiva est, non ut gustativa*. Patet quoque, quamobrem aqua suavem gustum in nobis non efficiat, licet ille fieri dicatur a *mollibus atomis linguam lenientibus*. Ut enim suavis gustus excitetur, non quæcunque nerveæ linguæ papillulæ, sed eæ liniri debent, blandoque ictu vellicari, quæ *gustus* organum constituunt; unde, cum eas tantum, in quibus consistit organum *tactus*, linire possit aqua, causa apparet, cur suavem gustum illa in nobis nequaquam excitet.

Nullius demum momenti est, quod postremo loco habet Vir Cl., *varia nimirum corpora, quæ variis proinde moleculis constant, eundem reddere saporem, ut mel, & saccharum, & similia*. Dato namque existere corpora, quæ ejusdem omnino sint *saporis*, licet *specie* differant, dico, id non impedire, quominus vis, quam illa habent excitandi in nobis sensum *saporis*, ex *magnitudine*, & *figura* salinarum particularum, quibus composita sunt, repetatur. Cum enim *essentiale* corporum discrimen a solis componentibus salinis particulis non dependeat, fieri potest, ut duo corpora, ceteroquin diversa, similes salinas particulas comprehendant; atque hinc, ut licet differant *specie*, ejusdem *saporis* appareant. Dixi autem: *si existant corpora, quæ eodem sapore donata sint, licet sint specie diversa*. Id enim non adeo certum puto, ut verti a nemine in dubium possit. Certe mel, & saccharum, quæ a viro Cl. exempli loco proferuntur, non ita in *dulcedine* consentiunt, ut nullum prorsus ne levissimum quidem discrimen penes illam inter ipsa corpora discernatur. De hoc sane discrimine minime dubitari posse, censuit Cl. Gassendus, dum adversus Aristotelem, contendentem innumerabiles fore *saporum* species, si a figuris illi provenirent, *an*, inquit, *eodem modo afficit gustatum, quæ dulcedo agnoscitur in melle, & quæ in lacte, quæ in saccharo, quæ in vino, quæ in pomo, quæ in carne, quæ in ceteris? an eadem acerbitas pomi, pyri, cerasi, pruni, sorbi, reliquorumque*

fructuum viridium? cur non igitur tanta sit saporum varietas, quanta est specierum in sapidis rebus (a)?

Ceterum, utut se habeat res huiusmodi, videtur, hoc argumentum etiam contra suum Auctorem ita urgeri posse: in melle, & saccharo, ceterisque corporibus, quæ, licet *specie* differant, eodem *sapore* donata dicuntur, vel iidem omnino sunt sales, vel sunt sales diversi. Si iidem: quomodo illa *specie* differunt? Si diversi: quomodo eundem *saporem* referunt? Quippe ipse etiam P. Ferrari expresse docet, *salinas particulas esse sapidas, atque ex earum etiam commixtione corpora reddi sapida (b)*, & tantum inficiatur Vir Cl., *saporem consistere in partium configuratione (c)*.

S C H O L I O N.

94. Quæ sit, pro specifico *saporum* discrimine, salinarum particularum, a quibus illi in nobis excitantur, *figura*, divinare certo non possumus. Satis probabili tamen conjectura; ut vidimus in *Physica (d)*, putant Recentiores, *saporem falsum* oriri a particulis *cubica* figura affectis; *acrem* a particulis subtilissimis, angulo acutissimo præditis, motuque celeri, perturbato, & expansivo donatis; *acidum* a particulis maxime rigidis, *tetrahedrica* figura affectis; *acerbum* a particulis uncinatis, & asperis; a particulis non multum ab hisce dissimilibus *austum*; *dulcem* a particulis, quæ *obtusis* angulis præditæ sunt, & cum subtiliori quadam sulphurea substantia permixtæ; *amarum* postremo a particulis, quarum multiplices sunt anguli.

VI.

95. Circa *odores* tria docent recentiores Philosophi. Primum est, *odores in substantiali quodam subtilissimo odori corporis effluvio consistere*. Secundum: hoc effluviu esse sulphureo-mercuriale. Postremum: subtilissima huiusce effluvi corpuscula habere a sua tantum magnitudine, atque figura, ut naribus attracta, immutent olfactus organum, & odoris sensum in nobis excitent. Odorem, quem corpus diffundit, positum esse in subtilissimo quodam ipsius corporis *substantiali effluvio*, manifeste, inquiunt illi, & recte quidem, ex eo colligitur, quod nullus plane corporis etiam intensissime olentis *odor* sentiatur,

(a) Sect. I. *Physicæ* lib. VI. cap. 9.

(b) Tom. III. P. III. *Physicæ* Disp. III. q. 2. pag. 368.

(c) Ibidem.

(d) Tom. I. § 1020. & seq.

tiatur, si vase *hermetice*, ut Chymici ajunt, sigillato, clausum illud fuerit. Hinc certe sequitur, vitrum ab odore non penetrari; cumque ille per aerem ab odore corpore quoquoersus diffundatur, unum superest *substantiale* ipsius corporis subtilissimum *effluuium*, in quo odor collocari possit. Minime porro sentiri odorem corporis, si vase perfectissime obturato contentum fuerit, patet experimento, quod factum ab Academicis Florentinis; supra retulimus (§. 71.). Accedit veterum etiam Philosophorum auctoritas, silentio propterea non negligenda, ut perspicuum fiat Scholasticis, novitatis insimulari ab illis jure non posse Philosophos recentiores, dum in *substantiali* corporis *effluvio* illius odorem constituunt. Plato itaque de odoribus loquens, aperte dicit, eos *fumum esse, aut caliginem* (a). Aristoteles vero quærens, *quam ob causam res male olida gravius oleant, cum calent, quam cum frigent?* An, inquit, quod natura odoris vapor quidam, & delatio est, quæ calore existunt? motus etenim quidam sunt, calor autem movendi vim obtinet; frigus contra efficit, ut res consistat, & contrahatur (b). Testatur insuper (c), omnium Philosophorum sententias in id congruere, quod odor sit *fumida aspiratio*.

Quod autem *substantiale* ejusmodi *effluuium* sit *sulphureo-mercuriale*, præclaro Cl. Boerhaavii testimonio, alibi etiam memorato (§. 71.), evincitur. Patet quippe, inquit ille, *experimentorum enumeratione*, quod id *subtile*, quod oleo *inherens*, spiritus dicitur, sit *primarium illud*, quod odorem excitat. Hoc enim *absolute separato a corporibus odoratis*, residuum vix fragat; eo autem affuso, aliis *fragrantia conciliatur* (d). Ita porro id totum explicat: corpus odoratum, siue grate, siue tetriter oleat, quamprimum parte spirituosâ olei, & sale volatili privatum est, nihil omnino virium retinet. Neque enim sal fixus, neque aqua, neque oleum absque spiritu odoratum est. Si vero ab ipso oleo, aut sale volatili separaveris eam partem, quæ sponte exhalat, reliquum pariter absque odore erit. Deinde sal volatilis *alkalinus nonnisi pro ratione spiritus rectoris odoratus est* (e). Cum igitur, tanto Viro observante, & confirmante experientia, res ita sit, fallitur Cl. P. Ferrari (f), dum vocat sulphur *fætoris sentinam*, & nulla ratione ait ostendi a Recentioribus, illud esse *officinam odoris*. Sibi quoque ille non constat, dum tradit (g), sententiam Chymicorum cum sua coincidere, *sicrassæ pinguesque partes nomine sulphuris donentur*. Si namque ex crassis, & pinguibus corporis partibus illius odores, ejus sententia, proveniunt, stare nequit, quod

(a) In *Timæo*.

(b) Sect. XIII. Problem. q. 5.

(c) Lib. de sensu, sensibili.

(e) Instit. Medic. de olfactu num. 499.

(e) Ibidem in *Prælect. Acad.*(f) Tom. III. P. III. *Physicæ Disp.* III. q. 32. pag. 372.

(g) Ibidem.

quod ipse docet, nempe odora corpora attenuari in subtiles halitus, odoremque ipsum per halitus diffundi, & invisibiliter etiam exhalari (a); & spiritus, qui exhalant, quantumvis in magna copia, adeo tenuis esse entitatis, ut saepe non augeant, nec minuant sensibiliter pondus, & molem rei (b).

Restat modo, ut ostendamus, ab subtilissimi huiusce effluvii particulis non affici olfactus organum, neque odoris sensum in nobis ab illis excitari, nisi ratione magnitudinis, & figura, quibus singulae sunt affectae. Id ergo suadetur ex ipsa sensorii immutatione, quemadmodum supra ex haud dissimili principio ostensum fuit, vim, quam habent salina corpuscula, excitandi sensum saporis, ab illorum magnitudine, & figura unice dependere. Igitur, cum immutatio sensorii olfactus non sit, nisi certa quaedam motio ab odore effluvio iis nerveis papillulis, dum naribus attrahitur, impressa, quae sensorium illud constituunt (S. 29.), dubitari non potest, quin odori effluvii corpuscula per id formaliter immutent olfactus organum, & odoris sensum in nobis excitent, ratione cuius formaliter valent nerveas illas papillulas, dum ad eas, naribus attracta, appellant, certa ratione urgere, pungere, & vellicare. Evidens est autem, id ab illis non fieri, nisi quia certa magnitudine, atque figura affecta sunt, ratione demonstrante, effectum pure mechanicum, cuiusmodi certe illa nervearum papillularum motio est, nonnisi a causa mechanica posse provenire. Ergo a sola magnitudine, & figura, quibus donata sunt, habent corpuscula effluvii odori, ut odoris sensum in nobis efficiant.

Ex illis perniciosus motibus id praeterea confirmatur, qui in sano etiam firmoque corpore ab odoribus quandoque excitantur. Nisi ferme quotidianum esset, incredibile ferme foret, inquit Cl. Boyle, suavis thymiamatis odorem statim in humano corpore, quod modo sanum & firmum erat, syncopas, lypothymias, sensibilis respirationis amissionem, apparentes epilepsias, & veros convulsivos membrorum motus, ac noxia quammulta formidanda symptomata producere, quae ab imperitis effecta sortilegii reputantur (c). Itaque, cum motus huiusmodi ab odore effluvio in nobis non excitentur, nisi quatenus odorum est (nulla enim est ratio, quamobrem aliam qualitatem fingere in illo oporteat) ab eo illud habet formaliter, ut sit odorum, a quo habet, ut eos motus in nobis producat. Illos autem non producit, nisi causa magnitudinis, & figura, quibus affecta sunt ipsius corpuscula. Motus siquidem illi

(a) Tom. III. P. III. Physicæ Disp. III. q. 3.
pag. 371.

(b) Ibidem pag. 373.

(c) Lib. de insigni efficacia effluviiorum
cap. 6.

illi a violenta nervorum contractione, ob quam liber per eos *animalium spirituum* affluxus prohibetur, unice proveniunt. Ergo a sola quoque suorum corpusculorum *magnitudine*, & *figura* habet illud effluvium, ut sit *odorum*.

V I I.

96. Expendendæ restant modo *tactiles qualitates*, atque ut a calore ordiamur, maxima sane probabilitate ille statuitur in *substantiali* caloriferi corporis *effluvio*, cujus particulæ *mole* exilissimæ sint, *figura* rotundæ, simulque *celerrimo*, *perturbato*, & *expansivo motu* affectæ. Velim itaque illud habeatur, principii loco, quod pluribus observationibus, ipsisque certissimis, in Physica demonstravimus (a), proprium nempe esse *caloris* dilatare corpora, quæ afficit, eorumque partes expansivo, perturbatoque motu agitare; & ideo *calorem* in eo consistere, cujus vi, & energia corpora, dum incalescunt, dilatantur, solvitur nexus, quo componentēs illorum particulæ colligatæ sunt, motuque tumultuario eadem ipsæ impelluntur. Hisce ergo præmissis, & citra omnem dubitationis aleam positis, ita ostenditur, eam esse *caloris* naturam, quam modo paucis adumbravimus. Et primo quidem, *calorem* positum esse in *substantiali* caloriferi corporis *effluvio*, ex eo suadet, quod *calor*, ut supra contra Scholasticos satis probatum fuit (§. 72.), sit aliquod impenetrabile, adeoque corpus (§. 19.). Sequitur enim hinc, *calorem* non posse corpora penetrare, eorumque internas partes perturbate impellere, nisi quatenus illorum poros subeat, & contra pororum parietes vim faciat; adeoque nisi sit aliquod subtile, instar vaporis; ac proinde nisi in *substantiali* caloriferi corporis *effluvio* ille consistat.

Quod autem componentia huiusce *effluvii* corpuscula sint *mole* supra omnem imaginationem exilissima, ex hoc uno manifestum est, quod nullum sit corpus, ut ut densum, seu compactum, cujus subtilissimos poros ille non subeat. *Ignis corpuscula*, inquit Cl. Boerhaavius, *videntur esse omnium, quæ nota habentur, corporum minima*. Si enim corpora vere sunt, erunt necessario subtilissima; quoniam penetrant se quam facillime per omnia vel densissima corpora, atque maximam eorum crassitiem transgressa in omni parte penetrabili corporis effectus suos vere præstant Alia quidem, quacunque demum sint, quæ unquam cognovimus corpora, excludere possumus, ne intrare queant ullo modo in meatus quorundam corporum. Sane aer, aqua, spiritus,

(a) Tom I. §. 820., & seq.

sales, olea, cetera omnia facile videmus excludi posse, ne intrent intra ampullam vitream Hermetice undique clausam; ne exeant inde, postquam prius fuerant immissa. Solus ignis libero ingreditur, atque denuò egreditur itinere. Solus ille ingressus, & egressus omnes ipsi proprios effectus præstat (a). Hinc non immerito dixit idem Vir doctissimus (b), ignis corpuscula adeo exiguae esse magnitudinis, ut si ad nostram imaginationem referamus, necesse sit, infinite parva censeantur. Verum ne cui aliquid negotii facessat, non caloris, sed ignis corpuscula a tanto Viro memori, monemus, ignem, atque calorem, Veterum quoque Philosophorum iudicio, ut præclare observat Gassendus, non differre inter se, nisi secundum magis, & minus, vel certe quatenus calor generatim, & secundum omnem gradum accipitur; ignis autem specialius, & pro summo caloris gradu, docente ipso quoque Aristotele, nihil esse ignem aliud, quam caloris excessum, & quasi fervorem (c).

Caloris corpuscula sunt figura rotunda. Patet ex mira illa facilitate, qua sese insinuant in poros corporis, illudque totum penetrant. Ut enim egregie advertit Cl. Josephus del Papa, concedendo a questi corpi la figura piramidale, egli è poi necessario il supporre, che eglino si muovan sempre con un degli angoli inánzi, col qual possan pungere, ed insinuarsi nelle sostanze, nelle quali s' incontrano; giacchè movendosi a traverso, o con un piano avanti, non potrebbero esercitare la propria attività, la quale secondo Platone nella acutezza della punta risiede. Ma il conservar sempre questa positura nel moto, non sò come sia facile per gli spessi intoppi, che essi devono ritrovare, i quali col far loro mutar strada, pare, che debbano ancora fargli variar sovente la positura: se per sorte mai non dicesimo, che essendo principio interno di tali corpi il muoversi sempre con quella costituzione, ogni qual volta da qualche esterna forza ne sian rimossi, essi tornino subito a riacquistarla: il che poi è un ricorrere ad un immaginario supposto, del quale stando nell' opinione di Democrito non abbiamo bisogno alcuno; imperocchè quando cotali corpicciuoli sien di figura rotonda, si muovan pure in qualsivoglia modo, ed incontrino le materie in qualsivoglia parte di loro medesimi, che seguirà sempre lo stesso effetto; essendo eglino, in virtù della rotondità, atti al moto, ed alla penetrazione per ogni verso, e con tutte le loro parti egualmente (d).

Motu demum celerrimo, perturbato, & expansivo prædita sunt caloris corpuscula. Id manifeste ex eo sequitur, quod calor dilatet corporis

(a) Tom. I. Elem. Chemiæ pag. 194.

(b) Loco citato pag. 195.

(c) Sect. I. Physices lib. VI. cap. 6.

(d) Della natura del caldo, e del freddo pag. 41. secundæ edit. Eloquentiæ 1690.

ris molem, ejusque componentes particulas divellat a se mutuo, tum multuario impellat, prohibeatque, quamdiu in eo est, ne ad contactum pristinum illæ revertantur. Cum calor, inquit Cl. Gulielminus, *liquet liquabilia, oportet, ut eorum partes a partibus divellat non modo, verum etiam impediat, ne ad pristinos contactus redeant. Neutrum tamen horum motu quodam rectilineo, aut etiam curvilineo certam directionem servante, aut quam habet, certo modo mutante, potest obtineri. Quandoquidem hi sejungere quidem possunt partes lateraliter se invicem contingentes, non vero eas, quæ sibi insident secundum eam directionem, qua motus fit. Ad prohibendum autem, ne partes corporis denuo se complexentur, oportet, ut perennis sit variatio respectus, quem invicem habent, non tantum quod spectat situm, sed etiam quod attinet positionem unius ad alteram; ideoque ut motu quodam circa proprium axem volutentur: qui utique sicut importat diversas directiones, ita & exigit, ut fiat, & conservetur. Cum vero id, quod hunc motum efficit, & conservat, calor sit, in hoc varias directiones esse oportet, quod est idem, ac dicere, quod motus caloris necessario debet esse perturbatus (a). Necesse est etiam, ut motus eorundem corpusculorum sit celerrimus, nempe ut vi maxima perficiatur. Neque enim, si secus, posset calor dilatare corpora durissima, eorumque partes separare a se mutuo, & huc illucque impellere. Quippe cum caloris corpuscula sint mole minima, & vis motrix adæquet factum ex ductu massæ in celeritatem (b), maxima nequit esse illorum corpusculorum vis, nisi celeritate maxima moveantur. Hinc laudatus celeberrimus Gulielminus, notum est, inquit, quanta sit vis caloris in rarefaciendis corporibus, quantaque corporum, dum rarescunt, potestas ad obstantia vel diffringenda, vel removenda. Tanta autem vis nonnisi a maxima potentia proficisci potest; cumque momenta potentiarum hujus generis coalescant ex motus velocitate, & materia, quemadmodum a Mechanicis demonstratur; in calore vero minimum materia sit, adeout Peripatetici eum immateria-tam qualitatem existimaverint, profecto oportet, ut quantum caloris momentum deficit in materia, tantumdem recipiat a celeritate. Si ergo potentia caloris maxima est (commensuratur enim validissimis resistentiis, easque superat) necesse est etiam, ut celeritas ejus motus maxima sit (c). Demonstratum itaque manet, calorem satis probabiliter positum esse in substantiali caloriferi corporis effluvio, cujus particulae mole minime sint, figura rotundæ, motuque celerrimo, perturbato, & expansivo affectæ.*

S

Con-

(a) De principio sulphureo Dissert. V.

(c) Loco citato.

(b) Vide quæ diximus in Physica T. I. §. 211.

Contrarium sentit Cl. P. Ferrari. Ita autem probat, in *substantiali effluvio* non posse *calorem* consistere. *Lux*, inquit, ex *sententia Atomistarum* consistit in *atomis igneis*, quæ *rotundæ sunt*, ac *tenuissima*, *maximeque mobiles*. Quare, cum in *iisdem atomis* constituent *Atomistæ naturam caloris*, ex *illorum opinione manifestum est*, quod *ultro ipsi fatentur*, hanc *solummodo differentiam* haberi inter *calorem*, & *lucem*, quod *calor atomos præferat in majori copia*, quam *lux*. Atqui *assertio ista est contraria experientiæ*. Ergo *caloris natura non consistit in atomis rotundis &c.* Minor probatur: *speculum metallicum*, & *concavum*, ut refert *Auctor Burgundia*, *ignis calorem ita reflectit*, ut in *puncto concursus multo sit intensior*. At si inter *ignem lucidam*, & *ardentem*, ac *speculum ipsum interponatur vitrum*, in *speculi foco lux quidem augetur*, sed *nullus omnino calor procreatur*. Ergo *evidens est*, *calorem a luce reipsa distingui*, quod *altero prohibito*, altera *diffundi adhuc pergat expedita*, & *luce aucta*, calor *tollatur*. Nec fas est *affirmare*, non *quaslibet atomos igneas habere in se se calorem*; nam & hoc *gratis consingeretur*, & *ignis non esset per se ardens*, & *calidus*. Rursus *lux in sui diffusionem habet velocitatem longe majorem*, quam *calor*. Sentitur enim *jam plena*, ubi *calor omnino tenuis sensum incipit vellicare* (a).

Sed nemo non videt, hac ratione minime evinci, in *substantiali exilissimorum corpusculorum effluvio calorem collocari non posse*. Primo etenim, si quid probat hæc ratio, contra illos tantum probat, qui, uti *calorem*, ita & *lumen* in *substantiali effluvio* constituunt. Necessarium autem non esse, ut, qui *calorem* statuunt in *effluvio*, etiam *lumen* ab *effluvio* non discernant, testem appello ipsummet Cl. Adversarium. Fatetur namque, se non *inficiari, substantiale effluviū haberi in caloris propagatione*, & *diffusione* (b), sed *persuasum habere, calorem vel semper, vel fere semper conjungi cum substantiali calidorum corpusculorum effluvio* (c); neque tamen admittit, *lumen* in simili *effluvio* consistere, sed *nititur rationibus pluribus, ut visum est* (§. 85.), *contrarium demonstrare* (d).

Secundo: quia *incertum est*, num *calor ita possit a lumine separari*, ut *dari queat lumen*, quod *nullum plane calorem sibi adjunctum habeat*. Contingere enim potest, adeo *debile fieri lumen*, ut *afficere quidem visum possit, tactum non possit*; quod nempe *visus organum* ex *longe delicatioribus fibris*, quam *organum tactus*, componatur. Hanc certe ob causam putat Cl. Gravelandus, nihil de *distinguendo lumi-*

(a) Tom. II. P. I. *Physicæ* Disp. IV. q. 3.
in prob. assert. I. pag. 225.

(b) Ibidem.

(c) Ibidem assert. 5. pag. 231.

(d) Tom. III. P. III. *Physicæ* Disp. III.
q. 5.

lumine a calore deduci posse ex eo, quod in Lunari lumine, quod a Sole procedit, nulla arte calor detegi possit. Nimirum debile est enim, inquit ille, Solare lumen, quod a Luna reperiendum, ad nos pervenit (a). Rem idcirco non satis evincit experimentum Cl. Romeri, quod a P. Ferrari ex Cl. Du-Hamel (b) in argumento relatum est. Lux enim in transitu per vitrum cum apprime debilitetur, mirum videri non debet, si, ignem inter atque speculum interposito vitro, augeatur quidem lux in foco, sed nullus calor percipiatur. Dici potest præterea, ab iisdem particulis haberi tam calorem, quam lucem, quin idcirco ubicunque sentitur calor, etiam lumen appareat. Nihil prohibet enim, quominus dicamus, particulas, quæ, secundum rectas lineas in oculum incurrentes, lucis sensum in nobis excitant, sensum solius caloris, non autem lucis, easdem ipsas in nobis efficere, si non recta procedant, sed tumultuario motu agitentur. Quærens namque Cl. Musschenbroekius, an ignis, & lucis substantia tantum magnitudine partium, & directione motus a se differant? forte, inquit, nec substantia, nec partium magnitudine differunt; cum copiosa lux collecta, semper ignis characteres habeat. Ignis autem non lucet, nisi ad oculum in rectis lineis determinetur. Cochlear argenteum aliquantulum calefactum, in tenebris non lucet: ei adamantes, crystallive non lucentes imitantur; extemplo lucere incipiunt, ignem receptum sub lucis forma expellentes. Idem aquæ calidæ injecti præstant (c). Fallitur propterea Cl. Adversarius, dum ait, fas minime esse affirmare, non quaslibet atomos igneas habere in sese calorem; idcirco quia & hoc gratis confingeretur, & ignis non esset per se ardens, & calidus. Certum enim est, gratis non fingi, quod experientia comprobatur. Experientia autem patet, corpuscula, quæ ex igne erumpunt, posse in adeo exigua copia ad nos pervenire, ut immutare visum possint, tactum non possint; ac proinde ut luminis quidem, minime vero caloris in nobis sensum excitent. Neque propterea sequitur, ignem non esse per se, hoc est, natura sua, ardentem, & calidum. Quippe, ut sit huiusmodi, sufficit, ex talibus particulis ille coalescat, quæ valeant & lucis sensum in nobis efficere, si recta in oculum incurrant, & sensum caloris in nobis excitare, si fibras sensorii tactus perturbate percellant. Utrumque autem præstari posse ab igne, licet quandoque solius caloris, quandoque solius luminis in nobis sensum producat, satis ex modo traditis manifestum est. Pa-

S 2

ter

(a) Elem. Physices Mathem. §. 2423.

(c) Elem. Physices §. 356. num. 1.

(b) P. II. Physicæ ad usum Burgundiæ
Dissert. II. cap. 2.

ret demum, nihil quoque facessere posse negotii, quod ille postremo addit, *lucem* scilicet *in sui diffusionem habere velocitatem longe majorem, quam calor*; idcirco quia *sentiatur jam plena, ubi calor omnino tenuis sensum incipit vellicare*. Etenim, ut diximus, non quævis *lucis* copia, sed magna illa esse debet, ut robustum sensorium *tactus* immutare ipsa possit, & *caloris* sensum in nobis efficere.

Postremo nihil est, quod impediatur, quominus dicamus, ab aliis corpusculis *lumen*, ab aliis *calorem* provenire; imo tantum abest, aliquid huic distinctioni obesse, quin potius plura sint, quæ illi favere videntur. Ei certe apprime favet, summum quandoque haberi *calorem*, ubi nullum prorsus *lumen* est, & vicissim satis vividam *lucem* alicubi interdum existere, ubi nullus plane *calor* a nobis sentitur. Hinc Cl. Gravesandus ponit inter incerta, *utrum calor, & lumen unquam separentur* (a). Non inficiatur quidem Vir Cl., hæc duo fæpissime conjungi, verum, inquit, *an merito ad eandem causam diversa hæc duo referamus phenomena, non, ut jam monuimus, ita ut omnis omnino removeatur scrupulus, determinari potest* (b). Cum ergo ita res sit, liquido apparet, non satis evinci, ideo *calorem* minime posse in *substantiali* caloriferi corporis *effluvio* collocari, quia *calor* ita distinguatur a *lumine*, ut, quemadmodum ait Cl. Adversarius, *altero prohibito, altera diffundi adhuc pergat expedita, & luce aucta, calor toleratur*.

Ita porro ille ipse demonstrare nititur, *caloris naturam non posse in motu consistere: impossibile*, inquit, *omnino est, imo ne intelligi quidem potest, motum rectum simul cum perturbato, & irregulari per eandem lineam diffundi, & propagari. Atqui lux, & calor per eandem lineam propagantur. Ergo vel calor non est motus, vel lux non est motus rectus, nec recta movetur* (c).

Verum enimvero non minus, quam præcedens, hoc itidem argumentum facile diluitur. *Primo* etenim etiam ab suomet Auctore solvendum illud est. Licet enim Vir Cl., *caloris naturam, ut Cartesiani, in motu non collocet; fatetur tamen, calorem vel semper, vel fere semper cum motu conjungi* (d), quemadmodum (illius sunt verba) *experimenta ostendunt* (e). Docet quoque, *lucem per rectilineum produci* (f). Itaque, si est impossibile, imo, si, ut ille ait, ne intelligi quidem potest, *motum rectum simul cum perturbato, & irregulari per eandem lineam diffundi, & propagari, impossibile quoque est,*

(a) Elem. Physicæ Mathematicæ. §. 2418.

(b) Ibid. §. 2419. Vide Cl. Pluch. Tom. VII.

Spettacolo della natura Trattatim. XI.

(c) Loco citato in prob. 1. assert. 2. pag. 225

(d) Ibid. assert. 5. pag. 231.

(e) Ibidem in probatione.

(f) Tom. III. P. III. Physicæ Disp. III.

q. 5. in respon. ad 8. objectionem pag. 424.

est, nostrumque captum omnino excedit, *calorem cum motu* conjungi, & simul cum *luce* per eandem lineam propagari. Perinde enim puto, siue *calor* statuatur in motu, siue cum motu conjungatur.

Arbitror autem, P. Ferrari, ut nodum solvat, minime dicturum, *calorem* ab se quidem conjungi cum motu, sed non cum motu perturbato, & irregulari. Id namque si diceret, in syllam profecto incideret, cupiens vitare charybdim; cum *calor* vel non conjungatur cum motu, & vel certe cum perturbato, & expansivo, quemadmodum ostendunt experimenta, & ipse etiam Vir Cl., *caloris* phenomena explicans (a), semel atque iterum docet. Falso quoque dixisset, *hanc esse caloris vim, ut homogenea congreget, & segreget heterogenea* (b); cum ejusmodi effectus sine perturbato, penitusque irregulari motu partium haberi profecto non possit. Haud recte demum, postquam dixit contra Cartesianos, *caloris naturam non consistere in motu*, addidisset, se non propterea inficiari, *calorem conjungi cum motu* (c). Hisce enim verbis significare videtur, *calorem*, suo quoque judicio, cum illo motu conjungi, in quo a Cartesianis collocatur.

Secundo: dici potest ad argumentum, impossibile quidem esse, neque posse intelligi, *motum rectum simul cum perturbato, & irregulari per eandem lineam diffundi, & propagari*, si de eodem individuo corpore id dicatur; minime vero, si diversa sint, quæ moventur. Nihil enim repugnantiae in eo est, ut secundum rectam lineam projiciatur, & moveatur corpus, cujus componentes particulae tumultuario simul motu agantur. Id certe accidit, dum globulus metallicus, ebulliente aqua plenus, recta proicitur. Recta siquidem tunc movetur aqua, quin in ejus particulis tumultus idcirco deficiat. Fieri ergo potest, ut substantiale *caloris* effluvium ita propellatur, seu vibretur a corpore calorifero secundum rectam lineam, ut componentia illius corpuscula simul tumultuario motu agitentur.

Hæc, si *caloris* effluvium reipsa a *luce* distinguatur. Si vero eandem omnino particulae, quæ *lucis* sensum in nobis efficiunt, *calorem* quoque in corporibus producant, ejusque sensum in nobis simul excitent, dicimus ad argumentum, nullatenus repugnare, ut particulae, quæ per rectam lineam diffunduntur, ita urgeant partes corporis, cujus poros subeunt, ut tumultuarius motum hinc illæ concipiant; sicuti etiam, ut ita premant nerveas tactus fibras, in quas incurrunt, ut & illæ inordinate tremant, & quem continent liquorem, ad expansivum tumultuarium,

que

(a) Tom. II. P. I. *Physices* Disp. IV.
q. 3. pag. 236.

(b) Ibidem assert. 3. pag. 230.

(c) Ibidem assert. 2. pag. 225.

que motum ipsæ determinant. Nemo enim ignorat, perturbate agitari aquam ex iniecto in ipsam lapide, tamenli huius motus tam intra, quam extra aquam secundum rectam lineam perficiatur. Si autem id præstare potest lapis suo motu rectilineo, ecquid prohibet, quominus etiam *luminis* particulæ suo itidem rectilineo motu idipsum præstent? Nihil sane, quod videam. Stare ergo potest, *calorem* provenire ex *lumine*, quamvis ille in expansivo perturbatoque motu positus sit; hoc vero secundum rectam lineam constantissime diffundatur.

Sed non melioris conditionis est alterum ejusdem Viri Cl. argumentum. Inquit: *si calor est motus perturbatus, sensibilis ejusmodi motus erit calor sensibilis; major, vel minor motus erit major, vel minor calor. Atqui licet in liquorum effervescentia sensibilis motus appareat, iis tamen ab igne remotis, & effervescentia motu intra exiguum temporis spatium sensibilibiter detumescente, nulla profecto fit ad sensum immutatio caloris; quin etiam dum pix igni primum exponitur, effervescentia fit major, quæ sensim amittitur, dum calor augetur. Ergo dicendum est, calorem non esse motum. Præterea injice manum in aquam frigidam, tolerabis utcumque frigus, dum manum immotam servas, quam tamen si agites simul cum aqua, sustinere frigus non poteris. Ergo calor non est motus. Si enim calor est agitatio, cur frigus agitatione non minuitur, sed augetur? An frigus calore crescit, & vires a suo contrario accipit? Ita & in Machina Pneumatica, excusso crassiore aere, aqua ebullire conspicitur, ac si igni esset exposita, nec tamen aqua tunc est calida. Ergo calor non in motu consistit (a)*

Primo itaque hoc argumentum, plâne non fecus atque præcedens, contra suummet Cl. Auctorem, æque ac contra Cartesianos pugnat. Cum enim illius, ut vidimus, sit aperta sententia, *calorem cum motu perturbato vel semper, vel fere semper conjungi*, manifeste sequitur, fore, ut cum sensibili ejusmodi motu sit *calor sensibilis*; cum majore, vel minore motu *major, vel minor calor*. Id ergo si, ut ille contendit, non semper verum est, sed plerumque fallit, necesse est profecto, ipse quoque concedat, *calorem non semper, nec ferme semper, ut docuerat, cum perturbato motu conjungi*.

Secundo: corrui argumentum principale, si *sensibilitas perturbati motus, in quo calor statuitur, probe distinguatur*. Motus enim, in quo ponitur calor, dupliciter potest dici *sensibilis*, nimirum *visu, & tactu*. Concedimus ergo, *calorem sensibilem semper quidem conjunctum esse cum motu, qui sentiatur tactu*; at non semper motu, qui

(a) Loco citato prob. 2. assert. 2. pag. 229.

visu discernatur. Ut enim motus *visui* appareat, non sufficit, ipsum esse perniciosissimum, sed requiritur, ut, quod movetur, eam habeat magnitudinem, quæ *visu* discerni possit. Hinc omnino *per accidens* est, in corpore calido motum *visu* discerni. *Per accidens* est enim, ut particulæ, quæ tumultuario, *caloris* causa, in corpore moventur, tantæ sint magnitudinis, quæ *visus* organum valeant immurare. Damus itaque, motum partium *tactu* sensibilem, esse *calorem* sensibilem, atque illi motui ita *calorem* respondere, ut, illo aucto, augeatur *calor*; illo imminuto, *calor* minuatur. Sed, loquendo de motu sensibili per *visum*, illud negamus constantissime. Unde apparet, quid dicendum sit de experimento ex effervescentia in *minori propositione* assumpto. Verum est, in liquorum effervescentia quandoque dari motum *visu* sensibilem, eumque præterea minui, atque etiam cessare, nulla prorsus ad sensum facta imminutione *caloris*. At hoc est falsum, loquendo de motu earum particularum, quarum magnitudo sub *visu* non cadit. Is enim non cessat, cessante motu partium, quæ *visui* apparent; imo ille tunc fit validior, quatenus longa agitatione cum atterantur partes, quæ antea *visu* discerni poterant, augetur copia earum, a quibus afficitur sensorium *tactus*, & *caloris* sensus in nobis excitatur; & hæc est causa, quamobrem, dum pix igni primum exponitur, effervescentia fiat major, nempe fiat *visu* sensibilis; insensibilis vero sensum evadat, dum *calor* augetur.

Ad illud vero de manu injecta in aquam frigidam, dico, ideo tolerari vix posse *frigus*, si manus per aquam circumferatur; quia cum in novum semper frigidum ambiens tunc illa incurrat, causa quodammodo multiplicatur, quæ *frigus* illi communicat: quod non accidit, si prorsus immota in aqua extiterit; tunc quippe *frigus* circumambientis aquæ suo illa nativo *calore* paulatim retundit. Stupendum tamen nonnemini fortasse videbitur, tantum Virum ignorasse, huic argumento ab se quoque fieri debere satis. Cum enim aperte ille doceat, motum esse causam *caloris* (a), necesse profecto videtur, palam ipse quoque efficiat, quamobrem manus si agitetur simul cum aqua frigida, cui immersa est, sustinere *frigus* non possit. Sicuti namque, si *calor* est agitatio, quærit ille, cur *frigus* agitatione non minuitur, sed augetur? ita, si motus est causa *caloris*, postulabunt Cartesiani, quamobrem *frigus* agitatione non minuatur, sed potius crescat? Equidem scio, ipsum dicturum, non sufficere quamcunque partium separationem ad calorem producendum ex motu; sed requiri tum vehementem agitationem, tum solidorum corporum affricum, vel quod

(a) Loco citato assert, 4. pag. 231.

calidiora corpuscula in sufficienti copia emittantur (a). Verum ille quoque non ignoret velim, idem prorsus etiam Cartesianos respondere.

Ad illud postremo de aqua ebulliente in Machina Pneumatica, dum aer exfugitur, dico, me non videre, undenam cognoverit Vir Cl., aquam illam tunc non esse calidam. Non enim tactu id dignoscere poterat; cum aqua, dum illud sit periculum, manu tangi non possit. Neque *thermometro* id certe expertus est; cum hujus ab se facti periculi nullam prorsus mentionem faciat, quam fecisset profecto, si aquam tunc non incalescere, etsi quammaxime ebulliat, *thermometro* deprehendisset. Res igitur cum ita sit, æquo ferat animo Vir Cl., si, calidam tunc non esse aquam, Cartesianus aliquis negaverit. Refert sane Musschenbroekius ex Cl. Du-Hamel, Hombergium observasse, citius aquam congelatam in vacuo solvi, quam in aere aperto; & hujus causam esse, ait, quia continet glacies quamplurimas valde elasticas aereas bullas, quæ in vacuo se validius extrorsum exserunt, utpote minus ab exteriori parte compressæ, adeoque glaciei particulas dissolvunt, diserpuntque, eas adversus se mutuo pellunt, atterunt: attritu ignem colligunt, qui aquam solvit; ignis facilius in massam ita diffusam ingreditur, pluribusque occurrens superficiebus facilius adheret, suamque actionem dissolvendi exercet (b). Aqua igitur in Machina, dum aer exfugitur, ebulliens, non omni prorsus calore destituta est.

Sicuti porro negat P. Ferrari, calorem consistere in substantiali corpusculorum effluvio, ita contendit, figuram rotundam non satis congruere caloris, & ignis activitati, nec illorum effectis expendendis esse accommodatam (c). Id autem probat alio loco (d), ubi nempe de ignis natura differit. Opinatur ergo, pyramidatam potius, quam rotundam figuram igneis particulis tribui oportere, idcirco quia illa potius, quam hæc, explicandis ignis effectis maxime conferat. Hinc enim, inquit, optime intelligitur, quomodo ignis lignum destruat; nam vi sua, veluti cuspidatus ensis, partes ligni penetrans dissolvit. Hinc & duriora dividit corpora, dum cuspidatis particulis suis, veluti totidem canneis, locum sibi facit. At si ramorum instar ignis particula se haberent, non adeo facile possent penetrare, maxime ubi minutissimi sunt corporum pori; implicarent enim potius sese invicem. Ita & difficile pervaderent illa particula, si rotundæ forent. Igitur (concludit) dicendum est, ignis particulas potius esse pyramidatas, quam rotundas, vel ramosas.

Verum quanti facienda sit hæc ratio, satis ex ea ratione patet, prop-

(a) Loco citato assert. 4. pag. 231.

(b) Comment. in *Experim. Acad. del Cimento* P. I. pag. 95.

(c) Loco cit. in prob. assert. 1. pag. 225.

(d) Ibidem Disp. II. q. 5. pag. 101.

propter quam diximus, rotundam figuram corpusculis *caloris* esse tribuendam. Ex ea namque liquido apparet, *pyramidalem* figuram esse quidem ad divisionem aptissimam; verum ad id præstandum necessario requiri, quemadmodum egregie observat Cl. Josephus del Papa, ut, quæ illa figura denotata sunt corpuscula, *si muovan sempre con un degli angoli inanzi, col qual possan pungere, ed insinuarsi nelle sostanze, nelle quali s'incontrano; giacche movendosi a traverso, o con un piano avanti, non potrebbero esercitare la propria attività, la quale secondo Platone* (cujus quoque judicio pyramidales sunt ignis particulæ) *nell'acutezza della punta risiede* (a). Cum igitur ita perpetuo moveri debeant ignis corpuscula, necesse est, si ponantur *pyramidalis* figura affecta, ostendat Cl. P. Ferrari, a quonam principio ita illa perpetuo dirigantur: quod profecto incommodum nullum est, figura *rotunda* illis corpusculis concessa; siquidem, ut ait laudatus Vir Cl., *quando cotali corpicciuoli sien di figura rotonda, si muovan pure in qualsivoglia modo, ed incontrino le materie in qualsivoglia parte di loro medesimi, che seguirà sempre lo stesso effetto, essendo eglino, in virtù della rotondità, atti al moto, ed alla penetrazione per ogni verso, e con tutte le loro parti egualmente* (b). Fallitur propterea Cl. Adversarius, dum ait, ignis particulas, *si rotundæ forent*, difficile corporum poros esse subituras; cum jam manifeste pateat, ad facillime penetranda corpora non aliud tunc requiri, nisi ut poris ipsorum corporum illæ mole sua sint exiliores, nempe ut tantulæ sint magnitudinis, quantulæ ab ipso Viro Cl. ponitur acies *pyramidalium* suorum corpusculorum. Accedit, *pyramidales* particulas esse quidem aptas ad corpora acuminatis suis apicibus penetranda; at eas simul id habere proprium ratione suæ figuræ, ut figant partes corporis, quibus incuneantur, quemadmodum de *cuneo* ex Mechanicis constat. Ergo tantum abest, *figuram pyramidalem maxime*, ut ille ait, *conferre effectibus ignis explicandis*, quin potius id illa prohibeat.

Urget postremo Cl. Auctor, *non satis perspectam esse ex effectibus figuram atomorum*. Nam, inquit, *ex effectibus fas est quidem colligere, hanc, vel illam figuram esse in moleculis, sive in minimis physicis, quoniam corpora per moleculas immediate operantur. Non tamen ex effectibus figura atomorum innotescit; neque enim qualibet atomus per seipsam operatur. Accedit, atomos insectiles, ac simul figuratas percipi non posse* (c).

Verum, si mihi detur, ingenue fateri, quod sentio, dicam, quæ hoc loco tradit Vir Cl., neutiquam a me posse animo comprehendere.

T

Dum

(a) Loco citato.

(b) Ibidem.

(c) Tom. II. P. I. *Physicæ* Disp. IV. q. 3. pag. 225.

Dum enim ait, *ex effectis fas esse colligere, hanc, vel illam figuram esse in moleculis*, vel intelligit, colligi posse ex effectis, qualis determinate sit illarum molecularum figura, vel ejus mens est, non aliud posse colligi ex effectis, nisi illas moleculas aliqua, sed nobis prorsus ignota, figura donari. Si primum: sibi certe minime consentit, dum dicit, *non tamen ex effectis figuram atomorum innotescere*. Sin alterum: sibi adversatur, primo dum alibi docet (a), *pyramidatam figuram tribuendam esse igneis particulis*, idcirco quia illa maxime conferat effectibus ignis explicandis. Secundo, cum asserit, *spiralem esse particularum aeris figuram*; quia illa aptior videtur effectis illis exhibendis, quos ab aere, ejusque elaterio proficiscuntur (b). Postremo, cum asserit, *aquæ particulas rite dici posse oblongas, & anguillarum instar efformatas, multiplici tamen asperitate præditas, quod hinc apta effectuum ratio intelligatur, & omnia simul componi valeant, quæ ad istud elementum pertinent* (c).

Præterea, si satis perspecta, ejus judicio, non est ex effectis figura atomorum, neque ex effectis figura atomorum innotescit, eccur dixerat, figuram rotundam non satis congruere caloris, & ignis activitati, nec illorum effectis expendendis esse accommodatam? Quæ enim ratio ostendit, hanc figuram non congruere activitati ignis, & caloris, neque eorum explicandis effectis usui esse posse, eadem ipsa demonstrat, quænam huic muneri valeat inservire, quemadmodum sane Auctor ipse huic principio innixus, non solum censuit, ut vidimus, figuram particularum ignis esse pyramidatam (d), verum etiam, secernens ea, quæ in ab se relatis, oppugnatisque Recentiorum sententiis ipse quoque putat verissima, scripsit, *concitato motu agitari particulas ignis, & hinc fieri, ut accedente cuspidata illarum figura, poros obiectorum corporum pervadat, motum in illis procreet, partes eorum concidat, divellat, segreget, dispergat* (e). Quis namque non videt, hæc considerans, persuasum esse tanto Viro, figuram atomorum ignis ex illius effectis sibi plane constare?

Non est demum, cur addat, ut Recentioribus invidiam creet, atomos insectiles, ac simul figuratas percipi non posse. Ut enim habet Gassendus, quem ipsum non decuit ignorare, *insectilis dicitur atomus, non quia partibus careat, & magnitudine destituatur, sitque proinde aliud nihil, quam punctum mathematicum; sed quod ita solida, & ut ita dicam, dura, compactaque sit, ut divisioni, sectionive, & plagæ*

(a) Tom. II. P.I. Physicæ Disput. II.
q. 5. pag. 101.

(b) Ibidem q. 6. pag. 146.

(c) Loco citato q. 7. pag. 154.

(d) Ibidem q. 5. pag. 101.

(e) Ibidem pag. 112.

nullum locum faciat, seu quod nulla vis in natura sit, quæ dividere illam possit (a). Sed age, demus Cl. Adversario, non defuisse, qui opinaretur, *atomos*, ex quibus coalescere dicuntur corpora, & in quarum effluvio *activæ* illorum *qualitates* statuuntur, *insectiles* idcirco dici, quod partibus destitutæ sint, omnique extensione careant. Ita certe, si Gassendo credimus, interpretati sunt *quidam alioquin eruditi* (b). Fortene putat Cl. P. Ferrari, vel ita eos omnes sensisse de atomorum *insectilitate*, qui in substantiali corpusculorum effluvio *calorem* collocant; vel in hujuscemodi effluvio statui *calorem* non posse, nisi componentia illius corpuscula penitus *inextensa*, simulque *figurata* dicantur? Primum certe non dicet Vir Cl., cum unus sufficiat Gassendus, ut ille in errore tunc versari manifestissime convincatur. *Constat* enim, inquit, *cum dico, calorem subire, penetrare, exsolvere &c. non intelligi quandam nudam nudam, & solitariam qualitatem; sed intelligi certas atomos, quatenus præditæ hac mole, hac figura, hoc motu, subingrediuntur, pervadunt, discutiunt, & reliqua peragunt, quæ referrî vulgo ad calorem solent* (c). Sed neque secundum, spero fore, ut ille dicat. Aperte quippe tunc sibi adversaretur; cum *pyramidatas*, ut vidimus, dixerit *ignis*, adeoque etiam *caloris*, *particulas*; & *fassus* aperte fuerit, *calorem vel semper, vel fere semper cum substantiali calidorum corpusculorum effluvio conjungi* (d). Si enim potest calor cum substantiali corpusculorum effluvio aliquando conjungi, quin illa corpuscula *inextensa* propterea sint, simulque *figurata*, poterit ille in eodem effluvio semper constitui, quin eadem ipsa corpuscula simul itidem *inextensa*, & *figurata* dicantur.

VIII.

97. Cum proprium sit *frigoris*, densare corpora, dura reddere, quæ mollia sunt, eorumque partes, si moveantur, ad quietem redigere, easque inter se devincere quodammodo, ac veluti ligare (e); dicendum manet, *frigus* positum esse in *corpusculis* mole *exilissimis*, *figura affectis*, quæ *planis superficiebus*, *acutos*, aut *rectos solidos angulos constituentibus*, terminetur. Videtur enim, nonnisi ex hujusmodi corpusculis effectus illos, qui *frigoris* proprii sunt, posse derivari. Et *primo* quidem, cum *frigus* simul devinciat, ac veluti liget partes corporis, quod afficit, & si quem habent motum, retardet, atque

T 2

etiam

(a) Sect. I. *Physices* lib. III. cap. 5.

(b) Ibidem.

(c) Ibidem lib. VI. cap. 6.

(d) T. II. P. I. *Phys. Disp.* IV. q. 3. assert. 5. p. 231.(e) Vide, quæ diximus in *Physicæ* Tom. I. §. 864., & seq.

etiam penitus sistat, dubitandum non est, quemadmodum alibi etiam diximus (§. 73.), quominus *frigus* sit aliquod natura sua impenetrabile, ac proinde corpus (§. 19.); cumque corpora penetret, neque alia ratione præstare id possit, nisi subeundo illorum poros, relinquitur, *frigus*, ut est quoque dictum eandem ob causam de *calore* (§. 96.), in subtilissimis corpusculis collocari oportere. Quod vero horum corpusculorum figura *planis superficiebus*, *acutos*, aut *rectos solidos angulos constituentibus*, terminetur, non obscure colligitur tum ex *Mechanica*, tum ex eo quod *frigus* contrarie *calori* opponatur. Colligitur primo ex *Mechanica*. Ex illa siquidem constat, nullam figuram ad figenda corpora, & ad sistendum illorum motum ea esse aptiorem, quæ ita terminatur planis superficiebus, ut in *acutos*, aut *rectos* solidos angulos desinat. Hanc certe ob causam *cunens*, ut omnes norunt, ad hosce præstandos effectus omnium Machinarum aptissima est. Colligitur secundo ex contrarietate, quæ *frigus* inter, atque *calorem* habetur conspicua. Necesse quippe hinc est, ut figura corpusculorum *frigoris* figuræ corpusculorum *caloris* suo modo adversetur; & ideo, cum *sphærica* sit figura corpusculorum *caloris* (§. 96.), restat, ut figura corpusculorum *frigoris* vel *acutis*, vel *rectis* solidis angulis comprehendatur. Neque enim alia sphæram inter, ceterasque solidas figuras fingi potest oppositio. Igitur corpuscula, in quibus necessario statuendum est *frigus*, figuram habent *tetraedricam*, aut *octaedricam*, vel etiam *prismaticam*, *trilatera*, vel *quadrilatera basi terminatam*. Quæ siquidem corpuscula hisce figuris instructa sunt, in *acutos*, vel *rectos* solidos angulos, ut patet, desinunt. Non inficior tamen cum Cl. Gassendo, *tetraedricam* figuram ad præstandos *frigoris* effectus esse omnium aptissimam. Certe exinde perspicuum fiet, inquit ille, quemadmodum *frigus* *calori* opponitur, ita *atomos frigoris* *atomis caloris* oppositas esse. Nam quod ad molem attinet, possunt *tetraedricæ* *cuspidibus* totis majores esse, quam *sphæricæ*, quatenus potest *tetraedron* ipsi *sphæræ* circumscribi. Quod ad figuram, nulla est, quæ sit *sphæricæ* opposita magis, quatenus *angulosa* est, & maxime omnium recedit ab illa seu infinitate, seu innumerabilitate *laterulorum insensibilium*, quæ possunt in *sphæra* spectari. Quod ad motum, nullum est corpus, quod *tetraedrico* sit ineptius; nam quod cubo vulgo attribuunt ineptitudinem ad motum, perspicuum attendenti fit, eam *tetraedro* potius convenire. Non est porro intelligenda hujusmodi ineptitudo, ubi inanis libertas est; cum ea ratione illi habeant *atomos omneis aequi velocis*; sed quatenus *atomi* intra concretiones implicata sunt, & intestinis moti-

nibus

nibus expedire se connituntur (a). Verum, cum corpuscula salis cuiusque commune habeant, corporibus, quibus miscentur, frigus inducere, ut proinde *frigorifica vis* omnibus salinis particulis, etsi non omnibus ex æquo, satis probabiliter a Recentioribus tribuatur (b); dandum quidem est, *tetraedricam* figuram aptiorem esse ceteris ad explicandam vim frigoris; at minime dicendum, eam esse unam, ex qua vis illa derivari possit. Neque enim una est omnium salium figura; utque habet Cl. Boyle, omnibus, qui suis quæque ponderant effectis, est illud persuasissimum, nullum corpus existere in rerum natura, quod nitrum frigiditate exæquet (c); & tamen, si Cl. Gulielmino credimus (d), *tetraedrica* non est figura particularum nitri, sed *prismatica*. Satis est igitur ad frigus, ut corpuscula, in quibus positum illud esse diximus, figuram habeant, quæ in acutos, vel rector solidos angulos desinat.

Hæc tamen opinio, ut quævis alia Recentiorum, non placet P. Ferrari. *Gratuitam*, ait, esse sententiam, qua frigoris naturam in atomis frigorificis constituit; idque ex iis apparere, quæ supra contra atomos dixit. Quo enim, inquit, hæc familiaria magis sunt Atomistis, eo facilius a nobis negantur. Petit præterea, undenam atomi sint frigorifica? Petit, quid sit ipsa frigiditas, quam atomi sunt frigida (e)?

Verum enimvero opinio Recentiorum de frigoris natura ne levissime quidem hisce momentis labefactatur. Primo etenim cum minime diluat P. Ferrari, imo ne memoret quidem argumenta, quibus Recentiores, si non ad evidentiam, maxima tamen probabilitate suam sententiam probant, injuste prorsus *gratuitam* eam ille appellat; *gratuita* quippe, ut ipsius verbo utar, ea tantum opinio est, quæ nulla sufficienti ratione evincitur. Secundo, cum paulo infra manifeste ille doceat, *experimenta*, ab se postea referenda, ostendere, frigida corpuscula diffundi, atque ex illorum communicatione alias etiam res frigiditas effici (f), non apparet, quomodo, quin sibi contradicat, dicere ille possit, *gratuitam* esse sententiam, qua frigoris naturam in atomis frigorificis constituit. Contradictio est enim, *gratuitam* esse sententiam, qua frigoris naturam in atomis frigorificis constituit, & *experimenta* ostendere, frigida corpuscula diffundi, atque ex illorum communicationem alias etiam res frigiditas effici. Non inficior, illa corpuscula, iudicio Recentiorum, esse frigorifica per suam figuram; contra vero per accidens

(a) Sect. I. Physicæ lib. VI. cap. 6.

(b) Vide, quæ hac de re tradidimus Tom. I. Physicæ §. 901.

(c) Tentam. Physico-Chim. circa partes nitri sect. 13.

(d) De salibus num. 16.

(e) Tom. II. P. I. Physicæ Disp. IV. q. 4. assert. 1. pag. 238.

(f) Ibidem in prob. assert. 2.

dens absolutum illis superadditum, Scholasticos, ipsumque etiam P. Ferrari si audiamus. Verum id non sufficit, ut opinio statuens *frigoris* naturam in *atomis frigorificis* gratuita absolute censeatur. Unde-
cunque enim derivetur vis, qua illa corpuscula sint frigorifica, sem-
per verum est, naturam *frigoris* in *frigorificis atomis* recte constitui.
Tertio: quæ contra *atomos* ille affert momenta, nullo modo evin-
cunt, ex tenuissimis corpusculis oriri *frigus* non posse; quemadmo-
dum illa nequaquam probant, per corpuscula tenuissima non pro-
pagari *frigus*, resque alias ex illorum communicatione *frigidas* non
effici, alioquin Auctor ipse Cl. sibi, ut patet, nequaquam constaret.
Mirandum est autem, illum dixisse, *quo hæc* (subtilissima scilicet cor-
puscula) *familiaria magis sunt Atomistis*, eo *facilius ab se negari*; cum
ad naturæ phænomena explicanda æque ipse, ac Recentiores, cor-
pusculis utatur, pluresque corporum affectiones ex componentium
exilium particularum *magnitudine, figura, & situ* ipse quoque desu-
mar.

Ad illud demum, quod petit, videlicet undenam *atomi sint frigo-
rifica* quidque sit ipsa *frigiditas*, qua *atomi sunt frigide*? respondeo,
& primo ad primum dico, *atomos* esse formaliter frigorificas per suam
figuram, quatenus nempe ab illa habent, ut simul devinciant partes
corporum, quibus infiguntur, earumque motum retardent & sistant;
atque hinc ut simul congregent, tum quæ ejusdem generis sunt,
tum quæ sunt generis diverſi (a). Neque impossibile videbitur, ut
arbitror, Cl. P. Ferrari, effectus *frigoris* ex figura corpusculorum,
quibus illud diffunditur, rebusque aliis communicatur, provenire;
cum ipse etiam aperte doceat, a sola *figura, & motu* suarum par-
ticularum habere ignem, ut poros *objectorum* corporum pervadat, mo-
tum in illis procreet, partes eorum concidat, divellat, segreget, disper-
gat (b); sicuti etiam aerem a *figura* in *spiræ* modum contorta ha-
bere, ut eos effectus producat, qui ab ipso, ejusque elaterio proficiſcun-
tur (c). Qua ergo ratione quærenti, undenam aeris particulæ sint
elastica? putat P. Ferrari, non aliud respondendum, nisi illas id ha-
bere a sua *figura* in *spiræ* modum contorta; eadem ratione arbitrari
iure possunt Recentiores, satis ab ipsis fieri quærenti, undenam *atomi
sint frigorifica*? si dixerint, eas id habere a sua *figura* in *acutos, vel
rectos* solidos angulos desinente.

Ad secundum vero, quod ab illo quærebatur, dico, *frigiditatem*,
qua *atomi sunt frigide*, esse ipsam earundem *figuram*, sumta *frigidi-
tate*.

(a) Vide quæ dicta sunt de hoc *frigoris*
effectu §. 73.

(b) Tom. II. P. I. *Physicæ* Disp. II. q. 5. pag. 112.

(c) Ibidem q. 6. pag. 146.

tate pro eo, per quod *formaliter* illæ atomi frigoris effectus produ-
cunt. Non dubito autem fore, ut Vir Cl. hac responsione sit conten-
tus; cum si quis ab eo quærat, quid sit *elasticitas*, qua aeris particu-
læ sunt *elasticæ*, non aliud respondere ipse quoque possit, ut sibi con-
stet, nisi esse *figuram* in *spiræ* motum contortam, qua illæ donantur.

Non ignoro, P. Ferrari necessario dicturum, *frigoris* corpuscula
esse *frigorifica*, seu *frigida* per *formam accidentalem absolutam*, qua na-
ta est *densitatem* inducere, *homogenea*, & *heterogenea simul congregare*,
queque *calori* opponitur, & *illum destruit*. Ita quippe *frigus* ipse de-
finit (a). Me tamen prorsus latet, quamobrem eam quoque vim per
formam absolutam non descripserit, qua aeris particulæ sunt *elasticæ*,
& ignis corpuscula pervadunt poros objectorum corporum, motum
in illis procreant, partes eorum concidunt, divellunt, segregant, dis-
pergunt. Nam vel etiam in hisce corpusculis ad illos effectus produ-
cendos *absoluta forma* necessaria est, & ideo peccavit ille, eos omnes
ex sola *figura*, ut est modo visum, repetendo; vel neque in corpuscu-
lis *frigorificis forma* ejusmodi necessario requiritur; unde culpa non
vacat Vir Cl. dum eam illis tribuendam putat, ut sint *frigorifica*.
Neque enim video, quamobrem, si ratione solius *figura*, & *motus*
possunt particulæ ignis poros objectorum corporum pervadere, motum
in illis procreare, partes eorum concidere, divellere, dispergere, ne-
queant corpuscula *frigorifica*, itidem per solam suam *figuram*, *densi-
tatem* corporibus inducere, *homogenea*, & *heterogenea simul congregare*.
Accedit, vocabulum *formæ accidentalis absolutæ* nimis vagum & ob-
scurum esse, quam ut ad explicandos frigoris effectus jure valeat a
Viro philosopho usurpari. Certe nisi palam fiat, quomodo per illam
formam valeant *frigoris* corpuscula *densitatem* inducere, *homogenea*,
& *heterogenea simul congregare*, *calori* opponi, & *illum destruere*, non
plus de *frigoris* cognosceret Philosophus; quam rusticus quisque.
Ecquid enim aliud est, explicare effectus *frigoris* per vagum illius
formæ vocabulum, nisi dicere, illos effectus ab aliquo oriri, quod
ignoramus?

Nodum hunc probe vidit Vir ipse Cl. Propterea, ne Recentiores
ab eo requirant, cur *ejusmodi descriptiones* proferat, opportunum du-
xit, illos præmonere, hisce descriptionibus ipsum esse contentum;
cum (ejus sunt verba) *naturæ arcana mentis nostræ aciem effugiant*,
& *ultima rerum differentia latitante*, ea nonnisi ex particularibus
effectis definire liceat (b). Verum, si illa *frigoris* descriptione ipse

con-

(a) Tom. II. P. I. *Physicæ* Disp. IV.

(b) Ibidem.

q. 5. pag. 241.

contentus est, contenti eadem esse nequeunt Recentiores; cum detur per *formam*, cujus existentia ex effectis nequaquam probatur. Mirum est autem, P. Ferrari, qui dixerat contra Cartesium, & Malebranchium, se *non facile assentiri dicentibus, & non probantibus* (a), modo velle, ut Recentiores minime illi vitio vertant, quod per abstracta & vaga Scholasticarum *formarum* vocabula describat *sensibiles* corporum *qualitates*, quin rationem aliquam afferat, qua illarum *formarum* existentia vel levissime demonstretur. Probare quidem nititur Vir Cl., *naturalem rationem non evertere sententiam Peripateticorum de accidentibus realibus, & absolutis* (b), hoc est, non ostendere, sententiam illam esse falsam, sed nullam affert, qua *positive* evincat, eam esse veram.

Illa demum ratio animum mihi non subit, propter quam, *nec probabile esse*, dicit (c), *nec verisimile*, aquam fieri frigidam per receptionem frigidorum corpusculorum, quia nempe *experientia constat, totam pene aquam frigidam reddi*. Hæc enim ratio, meo quidem iudicio, vel nulla est, vel etiam falsum probat, quod Auctor ipse docet, videlicet *in frigoris communicatione ac propagatione corpuscula frigida diffundi, atque ex illorum communicatione alias etiam res frigidæ effici* (d). Experientia enim non minus probat, *totam aquam, ac totas alias res fieri frigidæ*. Ergo vel nulla res, secus ac ille expresse ait, *frigida efficitur ex communicatione frigidorum corpusculorum, vel etiam aqua hoc modo redditur frigida*. Ceterum quo sensu dici possit, *totam aquam frigescere, patet ex alibi traditis* (§. 73.), quæ non sunt repetenda.

I X.

98. Ad *humiditatem, & siccitatem* quod spectat, certum est, *primo*, consistentia corpora non humectari, nisi quatenus humor, sive humectans fluidum ingreditur illorum poros, eorumque parietibus adhærescit. Constat enim, eorum tam *molem*, quam *pondus* in humectatione augeri (e): quod profecto sine accessione novæ substantiæ fieri nullatenus potest. *Secundo*: valde probabile est, humectandi vim, qua pollent liquores, a *magnitudine, & figura* componentium particularum unice dependere. Fieri quippe videtur ob solam partium

(a) Tom. III. P. III. *Physicæ* Disp. III. q. 5. pag. 417.

(b) Tom. II. P. I. *Physicæ* Disp. IV. q. 2. pag. 220.

(c) Ibidem q. 4. in assert. 2., ejusque probatione pag. 238.

(d) Ibidem.

(e) Vide Tom. I. *Physicæ* §. 932.

magnitudinem, atque *figuram*, ut humor subeat poros corporum, ipsos dilatat, eorumque parietibus adhæreat. Accedit, nonnisi mechanica esse posse causam, quamobrem confricatione, & calore opus sit, ut volucrum aquaticarum plumæ, aliaque etiam apprime arida corpora aqua humectentur, sicuti etiam, cur unus idemque liquor humectare aliqua corpora possit, alia non possit (a). Itaque, sumta *humiditate* pro eo, quod aridis corporibus adveniens, illa humectat, *humiditas* non est *accidens*, sed *substantia*. Sumta vero pro eo, ratione cujus humor habet, ut corpora humectet, *humiditas* est affectio pure *mechanica*, a sola scilicet *magnitudine*, & *figura* particularum, quibus humor constat, tota dependens. Sicuti porro corpus fluidum dicitur *siccum*, quod vi humectandi destitutum est; ita corpus consistens *siccum* vocatur, quod vel nihil prorsus in se habet humoris, vel nonnisi portionem adeo exiguam, ut sensibus non appareat. *Talis habetur vulgo pumex*, inquit Gassendus, *talis cor, talis arena, cinis, ipsa terra, tale demum, quidquid ejusmodi est, ut neque in sui superficie madefactum sit, neque intus humorem contineat, qui extractus valeat corpora humefacere* (b). Hinc ratum fixumque habent Recentiores primo, corporum omnium *siccitatem* in sola humoris privatione consistere. Secundo: humecta corpora non exsiccari, nisi quatenus humor ille paulatim dissipatur, quo ipsorum pori turgescent. Io ben veggio, inquit Vir Cl. Josephus del Papa, che troppo dura impresa è la mia, a volere a forza di sì fatti volgari modi di favellare distruggere una cotanto stabilita opinione (Scholasticorum) qual'è, che il secco sia una reale qualità all'umidezza contraria; ma siasi come esser vuole, che io, il quale non è altra mira adesso, che d'investigare la natura di quella siccità, la quale da tutti gli uomini è come tale ricevuta, esperimenta, ed universalmente così chiamata, debbo perciò molta stima fare dell'idea, che appresso tutti gli uomini si è di essa secchezza, e delle voci, con cui sogliono tutti gli uomini della medesima ragionare. Per la qual cosa io considero, che sebbene non col solo nome di siccità, ma con altre voci eziandio così fatto naturale effetto è solito a denotarsi, onde ciò che è secco, si chiama parimente nella nostra Toscana favella arido, asciutto, ed in altre guise ancora per avventura, alle quali corrispondono altrettante, o più voci negli altri idiomi. Contuttociò di tutte quante esse voci una sola, e generale si è la significazione, la quale tende a stabilire il secco un'effetto dalla mancanza dell'acquosa umidità procedente. Il che tanto è vero, che chiunque con filosofica curiosità vorrà prendersi briga di rinvenire,

V

qual

(a) Vide dicta ibidem §. 939. & 941.

(b) Sect. I. Phisices lib. VI. cap. 7.

qual concetto abbiamo della secchezza, che essi nominano soventemente, coloro, i quali senri sono da ogni preoccupazione di scienza, e col solo autorevole e chiaro lume della natura favellano, troverà al certo, non altro concepirsi dagli uomini per la siccità, che una pura privazion dell'umido. Il che così essendo, qual ragione potrà vietarmi, che io ricevendo questo vocabolo di siccità in quel significato, con cui da tutti gli uomini vien ricevuto, non affermi adesso, esser ella un semplice discacciamento dell'umidezza, quando oltracciò io venga confortato a tenere tal sentenza dalla ragione altrove apportata, e da troppe più, le quali per brevitate io tralascio. Non già distorrammi da questo intendimento la Peripatetica scuola, la quale il contrario asserisce. Conciossiache ogni qual volta io mi son posto ad esaminare così fatta Peripatetica qualità, ella mi è sempre paruta una secchezza chimerica, e immaginaria, anzi che vera, e reale, la quale non apparisca a i sensi, agli uomini sia ignota, ed al comune uso di favellare, ed al comun concetto della secchitate affatto sia disdicevole, e impropria (a). Apparet itaque, ob solam contenti humoris dissipationem corpora exsiccari. Si namque eatenus tantum siccum sit corpus, quatenus ejus pori humore sunt vacui, relinquitur sane, ob id dumtaxat humectum corpus exsiccari, quod humor ille penitus dissipetur, quo ejus pori turgescunt. Huic porro opinioni etiam experientia consona est. Constat enim, decrescere molem corporis, ejusque pondus minui, dum illud, ante humectatum, exsiccatur (b). Id autem fieri nequit, ut est perspicuum, sine alicujus substantiæ, humoris nempe, deperditione. Ergo nonnisi ob dissipationem humoris, quem continent, humecta corpora exsiccantur. Et hinc est, corporum exsiccationem calore perfici, quatenus scilicet calor humorem in illis contentum attenuat, efficitque, ut sub vaporis forma ex illorum poris exiliat: quod etiam docuit Aristoteles, scribens, corpora exsiccari a calore humorem in vaporem elicente (c).

S C H O L I O N.

99. *Humidum* perperam prorsus cum *fluidò*, & *siccum* cum *solida* confundi, sicuti ab Aristotele, atque cum illo a P. Ferrari, aliisque etiam factum est, ex alibi traditis (§. 77.) satis constare puto.

X.

(a) Lettera intorno alla natura dell'umido, e del secco pag. 51.

(b) Vide Tom. I. *Physicæ* §. 948.

(c) Lib. IV. *Meteororum* cap. 5.

X.

100. Posita notione superius tradita (§. 77.) corporis tam *fluidi*, quam *consistentis*, communis inter recentiores Philosophos sententia est, corpus ob id *formaliter esse fluidum*, quod particulae, ex quibus immediate componitur, dissociatae a se mutuo sint, & sphaerica, vel quasi sphaerica figura affectae. Hoc enim ipso, putant illi, quod particulae, ex quibus corpus immediate consurgit, dissociatae sint a se mutuo, & sphaerae instar tornatae, vel quasi tornatae, illud huiusmodi est, ut, quemadmodum postulat *fluidi* corporis ratio, & diffluat quoquoque, quamprimum genio suo relinquitur, & cuilibet figurae sua veluti sponte facillime sese accommodet. Ita certe se rem habere, intelligimus primum, inquit Gassendus, in acervo granorum, & frumenti, quorum quodlibet, ob spatiola intercepta, evolvere se circa contigua capax est: ex quo fit, ut in quamcunque partem volueris acervum emovere, aut intra quodcunque vas reponere, ipsa grana emoveantur, effundantur, accommodent sese interiori figurae vasis. Ita deinde intelligimus, se rem habere in sabulo, & quolibet pulvere, cujus pari modo singula granula circa contigua emoveri, & effluere, ac in vas effusa, interiori superficiei sese accommodare valeant. Ita vero consequenter intelligendum est, sese rem habere in aqua (eademque ratione & in quovis alio fluido). Siquidem discrimen solummodo est, quod granula, seu corpuscula, ex quibus acervus, seu mavis, moles, & cumulus aquae contextitur, sint incomparabiliter minora, tenuioraque, & incomparabiliter angustioribus intercepta spatiolis, quam concipi corpuscula valeant cujuslibet pulveris, quem deterere artificio liceat (a).

Porro dissociatas a se mutuo esse particulas, ex quibus *fluidum* corpus proxime consurgere diximus, Recentiorum sententia, non obscure etiam colligitur ex illa facilitate, qua liquores inter se ita veluti sponte miscentur, ut unius partes a partibus alterius, perfecta mixtione facta, nullatenus discernantur. Sola enim partium dissolutio videtur esse posse huiusce phaenomeni causa; quemadmodum sola partium discretio itidem causa est, quamobrem dissimiles pulveres eodem ferme modo, quo liquores, simul misceantur. Accedit, naturam ipsam juxta ac artem, ut praclare observat Cl. Boyle, cum earum alterutra fluorem conciliare corporibus grandioribus nititur, solvere eadem ad istum finem obtinendum comminuere. Certe videmus, ait ille, naturam in ventriculis canum, dum redigere ossa in corpora fluida,

V 2

chy-

(a) Sect. I. *Physices* lib. VI. cap. 7.

chylum scilicet, & sanguinem, molitur, forti quodam, aptoque liquore, sive ventriculi ipsius indigena, sive ex arteriis, in circulantis sanguinis transitu, ejecto, in partes adeo minutas ea dissolvere, ut vel perspicacissima oculorum acies nemini suspicionem injiceret, istiusmodi liquorem osseam unquam substantiam fuisse (a).

Necesse est autem, ut proxime componentes fluidi corporis particulae sphaericam, vel sphaerae analogam figuram habeant. Debent siquidem partes illae nonnisi in puncto, vel quasi puncto sese mutuo contingere; quippe, cum ab externo fluido indefinenter præmantur, sibi invicem fortiter adhærerent, si mutuus earum contactus secundum planam notabilem superficiem fieret, quemadmodum in vulgato de duobus planis inarmoribus experimento notum est. Perfecte quoque non diffunderet corpus, sed illius particulae hærent in cumulum, si planis superficiebus terminarentur, acutisque, aut rectis, vel quasi rectis angulis instruerentur. Tunc quippe illae sustinerent sese, neque dilabi ita facile possent, una scilicet plurium motum impediens. Unde hæc est causa, cur pulveres etiam minutissimi, qui arte parantur, sicuti & granulorum cumuli speciem fluidi corporis non omno referant. Ut enim *mycroscope* ostendit, nimis aspera sunt illorum corpuscula; unde sese mutuo facile sustinent, & in suo lapsu invicem sese impediunt, contra prorsus atque ad fluidum corpus habendum requiratur.

Ex hisce proinde difficile explicatu non est, undenam corporum *consistentia* proveniat. Cum enim hæc *fluiditati* opponatur, & contrariorum contraria sit causa, sive ratio, sicuti ex proxime componentium particularum dissociatione, earumque mutuo contactu in puncto, vel quasi puncto oritur corporis *fluiditas*; ita vicissim ex eo provenit ejusdem *consistentia*, quod eadem ipsae partes ita colligatae sint inter se, eaque ratione sese mutuo tangant, ut, accedente externa circumambientis liquidi pressione, illarum nulla moveri secundum aliquam directionem possit, nisi reliquas omnes secum trahat, & secundum eandem directionem simul omnes moveantur. Valde probabile idcirco est, particulas *consistentis* corporis sibi mutuo, cuneorum instar, esse infixas. Sicuti namque pressio, quam partes *solidi* corporis ab externo circumambiente liquido sustinere coguntur, efficit, ut urgeantur contra se invicem, atque hinc ut, si sese mutuo tangant secundum planam notabilem superficiem, sibi mutuo satis valide adhæreant; ita mutua illa incuneatio impedit, ne qua sit directio, secundum quam impelli, vel tendere earum una possit, quin reliquæ pro-

(a) De fluiditate sect. 6.

prohibeant, quominus secundum illam directionem ipsa sola moveatur. Ex majori porro, vel minori copia componentium particularum, quæ, cuneorum instar, sibi mutuo infixæ sunt, satis probabiliter oritur divisio *consistentis* corporis in *durum*, & *molle*. *Durum* nempe est corpus, si omnes, vel ferme omnes componentes illius particulæ sint sibi mutuo, cuneorum instar, valide infixæ. Est vero *molle*, si vel paucae tantum ex illius partibus ea ratione sibi mutuo infixæ sint, vel si parum acuti sint anguli, quibus sibi mutuo incuneantur, vel demum si mutua illa infixio sit, pro ratione molis ipsarum partium, non multum profunda. Fit namque hæc ob causas, ut partes corporis, si pressæ fuerint, non difficile, quemadmodum postulat *durities*, sed facile, in quo *mollities* corporum posita est, introrsum cedant. Sufficit porro ad intentum, hæc paucis indicasse. Fusius rem hanc pertractatam si quis cupit, adeat *Tomum I. Dissert. IV. Sect. II. artic. I.* Philosophiæ *sensuum* mechanicæ, quam nuper edidimus. Non restat igitur, nisi, ut, quæ opponit Cl. P. Ferrari, pro ratione suscepti muneris diluamus.

Contendit itaque Vir Cl., *fluidi partes, quantumvis minima concipiantur, non esse omnino invicem dissolutas, seu disjunctas, sed invicem sibi met adherere, & continuitatem quamdam habere*. Duplici autem ratione id ab eo ostenditur. Primam ex ea *viscositate* desumit, quæ in aqua, aliisque etiam liquoribus satis conspicua est. Hæc enim cum ex aliquali partium adhærescentia proveniat, partes ipsas *non esse omnino invicem dissolutas, seu disjunctas, sed invicem sibi met adherere, & continuitatem quamdam habere*, minime dubitandum est. Secundam vero rationem ita ille conficit: *multa fluida corpora sunt diaphana, ut aer, & aqua. Ergo fluidum, ut tale, est capax perspicuitatis, sive lucis traicienda. Atqui nullum corpus, cujus partes omnino invicem dissolutæ sint, ac disjunctæ, est perspicuum. Ergo fluidi partes invicem coherent. Subsumta illa minor probatur multiplici experientia. Si vitrum minutatim contundatur, eo ipso desinit esse perspicuum. Porro id minime eveniret, si natura fluidi partium minutarum dissociationem præ se fert. Contusio enim illa re ipsa vitrum redderet simile fluido. Perspicuitas vero amitti non potest per accessum ad dispositionem, quæ capax sit perspicuitatis, cujusmodi sane est fluiditas. Quare, cum fluiditas optime componatur cum perspicuitate, contusio illa, quæ vitrum faceret simile fluido, non potest tollere perspicuitatem. At experientia ostendit, ea comminutione perspicuitatem tolli. Ergo comminutio illa non accedit ad fluiditatem, sed falsam tantummodo speciem fluiditatis præ se fert.*

fert. Igitur fluiditas non consistit in partium omnimoda dissolutione (a).

Sed neutra harum rationum intentum probat. Non prima. Concedo namque, aliquam in aqua, aliisque liquoribus haberi partium adhæSIONem, ut eorum viscositas, quemadmodum dixi in Physica (b), satis manifeste evincit. Sed nego, adhæScentiam illam esse de ratione *fluidi*, eamque in omnibus *fluidis* reperiri. Nego, illam partium adhæSIONem esse de ratione *fluidi*; repugnat enim, ut, quod naturæ rei, de qua agitur, contrarium est, eamque destruit, ad illius rationem pertineat. Illam autem partium adhæSIONem contrariam esse *fluiditati*, eamque destruere, patet; nam ex illa, si notabilis fuerit, corporum *consistentia* provenit; neque inficiari id potest Cl. P. Ferrari, cum ipse etiam, *duritiei*, & *mollitiei* naturam explicans, ex partium adhæSIONe utramque aperte derivet. Inquit enim: *durities ex partium soliditate, & arctiori contextura proficiscitur, qua fortius invicem adherent, & arctius sese complectuntur. Mollities e contra minorem partium cohesionem præ se fert; unde & facile queant loco dimoveri & externæ vi cedant* (c). Nego tamen, mutuam illam partium adhæSIONem in omnibus *fluidis* corporibus existere. Nulla quippe ea est in substantia ætherea, utpote fluidissima. Nulla in aere, vel nonnisi adeo exigua, ut vix, sed ne vix quidem sensibus discerni possit. Non inficior illam dari in aqua, in oleo, aliisque liquoribus. Sed non propterea inferri potest, adhæSIONem ipsam in omnibus haberi, quemadmodum ex hoc, quod substantia ætherea, ipso teste P. Ferrari (d), vitrum pervadit, colligere non licet, id etiam ceteris *fluidis* convenire. Ajunt quidem Recentiores, *fluiditatem* corporum in partium dissociatione consistere; verum non ita, ut, nisi partes omnino dissociatæ a se mutuo sint, negent, corpus esse *fluidum*. Sicuti enim *fluiditas*, ita etiam partium dissociatio suos, illorum sententia, habet gradus. Dicunt nempe *perfectissime fluidum*, si componentibus illius particulæ adeo sint a se mutuo dissociatæ, ut nonnisi in puncto, vel quasi puncto illæ sese contingant. Illud vero *non perfecte fluidum* appellant, cujus particulæ aliquantulum sibi mutuo adhæScent, ut aqua, oleum, & liquores ceteri. Nullus quippe illorum est, in quibus aliqua *viscositas* non occurrat (e). Itaque, ut evincat P. Ferrari, *fluiditatem* ex dissociatione partium non provenire, demonstret necesse est, perfectiorem illam non esse in corporibus, quo magis minimæ eorum particulæ dissociatæ sunt a se mutuo, five

(a) Tom. II. P. I. *Physicæ* Disput. IV. q. 6. ad assert. I. pag. 253.

(b) Tom. I. §. 725., & seq.

(c) Tom. II. P. I. *Physicæ* Disp. IV. q. 6. p. 261.

(d) Ibidem pag. 114.

(e) Vide Tomum I. *Physicæ* §. 726., & seq.

sive quo minus illæ sibi mutuo adhærescunt. Caveat tamen Vir Cl., ne, si id nitatur ostendere, sibi deinde contradicat. Velim quippe consideret, se alio loco aperte dixisse, *figuram ramosam maximæ aeris fluiditati, ac motui non apte respondere* (a). Videtur enim, figuram hanc propterea non apte respondere aeris *fluiditati*, quia officit dissociationi partium, efficitque, ut illæ simul implicentur.

Ad secundam vero rationem quod spectat, candide fateor, me non fatis illius vim percipere. Probare enim videtur, perfectam dissociationem partium contrariam adeo esse *fluiditati*, ut, quemadmodum illa dicitur destruere *diaphaneitatem* in vitro contuso, ita, ne corpus *fluidum* sit, ipsa plane prohibeat. Verum si hoc, dicendum superest, solam remanere adhæSIONem mutuam partium, ex qua desumi *fluiditas* possit. Neque enim dissociatio officere potest *fluiditati*, nisi illi faveat mutua partium adhæSIO. Igitur dabit P. Ferrari, corpus eo magis esse *fluidum*, quo fortius componentes illius particulæ sibi mutuo adhærescunt; & ideo illud esse *fluidissimum*, cujus partes sibi mutuo adhærent perquam fortissime. At quomodo stare tunc possit, corporum *duritiem*, ut ille docet, ex *partium soliditate, & arctiori contextura* proficisci, qua fortius invicem adhærent, & arctius sese complectuntur (b), vim mentis meæ (nec me pudet, id fateri) prorsus excedit. Sed respondendum est in forma, ut ajunt, ad argumentum.

Dico ergo, verissimum esse, *multa fluida corpora esse diaphana*; atque hinc *fluidum, ut tale, esse capax perspicuitatis*. At omnino falsum puto, quod subsumitur, *nullum scilicet corpus, cujus partes omnino invicem dissolutæ sunt, ac disjunctæ, esse perspicuum*. Ut præteream quippe, substantiam ætheream, atque aerem esse corpora apprime *diaphana*, simulque ex dissociatis particulis (quoadusque P. Ferrari contrarium ostenderit) coalescere, naturalis ipsa ratio oppositum demonstrat. Si enim ea corpora, quorum componentes particulæ sibi mutuo maxime adhærent, lumen præbere transitum possunt, id certe longe facilius præstare debent, quæ ex dissociatis particulis componuntur. Ad probationem vero illius *minoris subsumptæ*, videlicet *si vitrum minutatim contundatur, eo ipso desinere esse perspicuum*, respondeo, concedendo experimentum, sed negando, ideo vitrum suam *diaphaneitatem* tunc amittere, quia, ut pro comperto habere videtur Vir Cl., ex illius partes, quæ antea sibi mutuo adhærescebant, contusione dissociantur. Vitrum enim ideo, dum atteritur, in pulverem *opacum* faceffit, non quia *diaphaneitas* ita adversetur dissociationi partium, ut simul cum illa in uno eodemque corpore stare non possit; sed

(a) Tom. II. P. I. *Physicæ* Disp. II. q. 6. p. 146.

(b) Ibidem Disp. IV. q. 6. pag. 261.

sed quia tanta est irregularitas earum particularum, in quas vitrum attritione resolvitur, & adeo inordinata illarum in pulveris cumulo dispositio, ut vel earum pori non amplius inter se mutuo secundum rectam directionem communicent, vel nimis multas *refractiones*, & *reflexiones* pati cogatur incidens lumen, antequam ex illo pulveris cumulo erumpat (a). Valde idcirco a vero distat Cl. Auctor, dum ait, *perspicuitatem amitti non posse per accessum ad dispositionem, quæ capax sit perspicuitatis*; & ideo, *cum fluiditas optime componatur cum perspicuitate, contusionem illam, quæ vitrum faceret simile fluido, non posse tollere perspicuitatem*. Sane, cum plura sint fluida corpora omnino opaca, nihil magis falsum est, quam corpus diaphanum per accessum ad dispositionem, quæ optime stat cum diaphaneitate, privari congenita sua perspicuitate non posse.

Verum, ut apertius fiat, quantum a vero aberret Vir Cl., si putat, hoc suo argumento Atomistas premi, liceat contra illum haud dissimile argumentum conficere. Itaque, cum perspicua res sit, multa corpora *consistentia*, imo etiam *dura*, esse *diaphana*, dubium esse nequit, quin corpus *consistens*, & *durum* capax sit *perspicuitatis*, quemadmodum idipsum de *fluidis* corporibus ex eo ille deducit, quod *multa corpora fluida sint diaphana*. Sicuti ergo contendit P. Ferrari, fieri non posse hanc ob causam, ut solidum *diaphanum* per accessum ad dispositionem, quæ capax sit *perspicuitatis*, *perspicuitatem amittat*; ita necesse est, ille ipse concedat Recentioribus, neque posse fieri eadem ratione, ut corpus *fluidum* itidem *diaphanum* per accessum ad non absimilem dispositionem, nempe ad *consistentiam*, & *soliditatem*, sua itidem *diaphaneitate* privetur. Experientia autem teste, contrarium accidit. Aqua enim, dum in spumam, adeoque in consistentem massam abit, fit *opaca*, sicuti etiam dum in duram glaciem eadem ipsa concrevit. Oleum quoque *diaphanum* esse desinit, dum congelatur. Ergo si *fluiditas* statui non potest in partium dissociatione, idcirco quia dum vitrum per attritionem fit simile *fluido*, desinit esse *perspicuum*, dicendum quoque pari ratione est, in partium valida adhesionem *consistentiam*, & *duritiem* minime posse constitui, propterea nimirum quia aqua, & oleum, dum per congelationem durescunt, congenita sua *perspicuitate* privantur; & ideo, cum Viri Cl. sit aperta sententia, *duritiem ex partium soliditate, & arctiori contextura proficisci, qua fortius invicem adherent, & arctius sese complectuntur; molliem vero minorem partium cohesionem præ se ferre* (b), eo necessario ille

(a) Vide quæ diximus in *Physica* Tom. I. Dissert. IV. Sect. IV. art. 1. cap. 5. (b) Tom. II. P. I. *Physicæ* Disput. IV. q. 6. pag. 261.

ille adigitur, ut fateatur, vel nullum esse argumentum, quo Recentiorum opinionem de *fluiditatis* natura prorsus convelli, arbitratus est; vel se fuisse deceptum, dum corporum *duritiem* in valida, *mollitiem* in minus forti partium *adhæsione* constituit. Spero autem, tantum Virum minime negaturum, ideo aquam, & oleum durescere in congelatione, quatenus fit actione frigoris, ut illorum corporum partes sibi mutuo valide adhærescant. Sequeretur enim, id si ille negaret, in forti partium *adhæsione* ipsum haud recte corporum *duritiem* collocasse. Neque enim in eo statuenda corporum *durities* est, sine quo haberi *durum* corpus potest.

Sicuti porro a vero alienum putat Vir Cl., corporum *fluiditatem* in partium dissociatione statuere, ita dissonum veritati ille ipse censeret, corporum *duritiem* ab externa subtilis materiæ pressione derivare (a). Id autem duplici ratione ostendit. Prima est, hinc necessario futurum, ut *eiusdem, & æqualis omnino soliditatis sint omnia solida corpora*. Eadem enim omnino est, inquit, subtilis materiæ pressio, eademque aeris crassioris gravitas urget omnia corpora. Sed ex eadem vi non potest impar resistantia oriri. Ergo (concludit) eadem *durities*, seu *soliditas* omnibus esset corporibus, qua divisioni aequaliter omnia resisterent: quod est contra experientiam.

R., negando, necessario futurum, admissa doctrina externæ pressionis, ut omnia *solida* corpora sint *eiusdem, sive æqualis soliditatis*. Cum enim in æstimanda, ut ex Hydrostaticis constat, pressione gravium fluidorum, ratio haberi debeat non tantum *altitudinis* columnæ prementis, sed etiam plani, sive *basis*, quæ pressionem sustinet, nequeunt particulae solidi cujusque corporis contra se invicem a circumambiente fluido ex æquo urgeri, nisi secundum planam æqualem superficiem illæ in omnibus solidis corporibus sese contingant; ac proinde nisi partes ipsæ in omnibus sint æqualis *magnitudinis*, & *eiusdem figuræ*. Id autem cum plane falsum sit, omnino falsum est etiam, corporum *soliditatem* minime posse ex pressione circumambientis liquidi derivari, quin solida quæque corpora æqualis *soliditatis* statuantur. Itaque, nisi ostenderit Vir Cl., secundum planam æqualem superficiem omnes componentes solidi cujusque corporis particulas sese contingere, apteque jungi, patienter ferat, si dixerim, ipsum falli, dum ait, eandem omnino esse subtilis materiæ pressionem, eandemque aeris crassioris gravitatem urgere omnia corpora; persuasum habens, tantum Virum minime negaturum hoc loco, quod alibi docuerat, liquorum scilicet gravitatem in vasis æstimandam esse secundum ipso-

X

rum

(a) Ibidem assert. 4. pag. 259.

rum altitudinem, habita tamen ratione basis (a).

Secunda ratio ita se habet: Si corporum soliditas ab aeris pressione proficiscitur, aut nulla, aut invicta resistentia repugnarent divisioni solida corpora. Vel enim intra solidorum corporum partes aether, sive aer intercipitur, vel non? Si primum: partes illa non resisterent divisioni, quemadmodum latera follis, inter quæ aer existat, occlusis foraminibus divisioni non repugnant. Si secundum: duæ partes solidi corporis se haberent, ut duo marmora laevigata invicem conjuncta; utrobique enim circumambientis ætheris, sive aeris pressio eadem extaret, cui internus aer, qui vel nullus est, vel admodum perexiguus, resistere nequaquam posset. Igitur, qui duas illas solidi corporis partes separare contendit, vel eas invicem conatur disjungere aequaliter, & perpendiculariter, vel per circum, sive ex laterum parte? Si primum: resistentia illarum partium invicta esset, nec posset superari, quemadmodum contingit in duobus illis marmoribus. Si alterum: nulla est partium illarum resistentia, uti & ipsa marmora dijudici invicem lateraliter absque ulla resistentia possunt. Ergo ex data Recentiorum sententia vel nulla, vel invicta esset omnium solidorum corporum resistentia, qua divisioni repugnant. Quorum utrumque absurdum est.

R. falsum esse, consistentiam, sive soliditatem corporum a pressione externi circumambientis fluidi dependere non posse, neque ex illa provenire, quin ipsa corpora vel ne levissime quidem, vel penitus invictæ divisioni resistant. Concedo, nihil prorsus aeris, aut ætheris inter eas corporis particulas intercipi, quæ sese mutuo tangunt. Concedo, partes illas coniungi inter se, perinde prorsus ac in celebri Guerikii experimento duo marmora, seu hemisphæria laevigatissima. Nego tamen, propterea futurum, ut illæ partes nulla prorsus vi divelli a se mutuo possint. Cum enim planæ superficies, secundum quas illæ solidi corporis particulae sese contingunt, sint supra omnem nostram imaginationem exilissimæ, exque sint bases columnarum externi fluidi, a quibus contra se invicem illæ particulae urgentur, manifeste sequitur, ut, sicuti vis illarum columnarum, utpote quæ sunt minimæ crassitie, non est tanta, quæ vinci non possit, ita neque vis, qua particulae ipsæ sibi mutuo, ratione illius pressio- nis, adhærent, nulla potentia valeat superari. Patet ex Cl. Grave- sando. Refert enim, posita segmentorum (sese mutuo secundum planam superficiem contingentium) diametro trium pollicum cum semisse, pondus centum, & circiter quadraginta librarum requiri, ut duo illa segmenta separentur (b). Ergo, ut separentur duæ ex minimis com-

po-

(a) Loco citato Disp. II. q. 4. pag. 78.

(b) Elem. Physices §. 2208.

ponentibus solidi corporis particulis, non major vis requiritur, nisi quæ sit ad pondus *centum*, & *circiter quadraginta librarum*, ut est planum, secundum quod fit mutuus illarum particularum contactus, ad simile planum, cujus diameter sit *trium pollicum cum semisse*. Pressiones enim, quas exercent columnæ ejusdem altitudinis, sunt *directe* inter se, ut bases, quibus illæ columnæ incumbunt. Plana autem superficies, secundum quam mutuus illarum particularum contactus efficitur, quantum deficiat a simili plana superficie, cujus diameter sit *trium pollicum cum semisse*, non est, cur dicam. Judicet ergo Cl. Adversarius, quanto minor vi *centum*, & *circiter quadraginta librarum* vis illa esse debeat, quæ requiritur, ut duæ minimæ componentes solidi corporis particulæ, etiam *tetrahedrica* figura donatæ, a se mutuo divellantur. Mihi certe persuasum est, id si atteato animo ille expenderit, fore, ut candide fateatur, falso dixisse, *resistentiam illarum partium invictam esse, nec posse superari*. Accedit, ipsum quoque docuisse alio loco, ideo, si *clepsydra irrigatoria* sit *majoris altitudinis*, aquam, in ea contentam, non remanere suspensam, sed *effluere*, quia tunc aeris, & aquæ in *clepsydra* contentæ gravitas, & vis longe superior est pressione externi aeris, proindeque istius actionem evincit, eumque cedere loco cogit, & aqua in ejus locum pervadit, a *clepsydra* egrediens (a). Negare ergo nequit, etiam vim, qua duæ quævis duri corporis particulæ sibi mutuo, causa externæ pressionis, adhærent, vinci posse; & ideo non esse verum, quod ille dixerat, ex data scilicet *Recentiorum sententia vel nullam, vel invictam esse omnium solidorum corporum resistantiam, qua divisioni repugnant*.

Unum porro restat, quod, bona tanti Viri venia, dissimulare non possum. Docet, *soliditatem corporum non oriri ex atomis ramosis, & hamatis, ut placet Atomistis* (b). Tum paulo post explicans, quidnam de ejusdem *soliditatis* causa ipse tenendum putet, & reapse teneat, ait, *soliditatem, seu siccitatem* (eas enim habet pro una eademque corporis affectione) *potissimum esse repetendam ex partium configuratione, ac textura, quatenus partes ramorum instar invicem sese arctius complectuntur* (c). Optarem ergo, mihi ostenderet Vir Cl., quomodo stare possit, corporum *soliditatem* non oriri ex *ramosis* particulis, & simul eam provenire ex partibus, quæ *ramorum* instar invicem sese arctius complectantur. Videtur quippe, partes illas non posse *ramorum* instar sese complecti, quin *ramorum* instar conformatæ sint; ac proinde quin *ramosæ*, ut eas Atomistæ appellant, dici pos-

(a) Tom. II. P. I. *Physicæ* Disp. II. q. 6. (b) Ibidem Disp. IV. q. 6. assert. 6. pag. 260. pag. 123.

(c) Ibidem assert. ultima.

possint. Caveat propterea P. Ferrari, ne quis illud ipsum ab eo quærat, quod ipse ab Atomistis postulat, cur nempe, si componentes solidorum corporum particulæ *ramorum* instar, ut ipse ait, conformatæ sint, *etiam manus & digitos eisdem non concedat* (a)? Velim quoque, ne fabulis amandandam dicat (b) opinionem Atomistarum de *soliditatis* origine, nisi, prius demonstraverit, se ab illis distare, quamvis eam *repetendam esse*, doceat, *ex partium configuratione, ac textura, quatenus partes ramorum instar invicem sese arctius complectuntur.*

X I.

101. Inter Recentiores demum convenit, corporum *densitatem*, & *raritatem* a *pororum*, quos componentes illorum particulæ intercipiunt, *magnitudine*, & *copia* unice dependere. Convenit nempe, *rarum* fieri corpus, quod *densum* est, quatenus dilatantur pori, qui per illius substantiam disseminati sunt, vel numero augentur; contra vero, quod *rarum* est, *densum* evadere ob id præcise, quod constriquantur illorum *pori*, vel eorum copia minuatur. Id porro ita *primo* ostenditur. Certum est, nullum esse corpus sensibile, quod innumeros porulos non contineat. Tot sane experimentis id deprehensum est, ut nemo jam sit inter Philosophos, qui de corporum *porositate* vel minimum dubitet. Perspicuum est autem, augeri volumen corporis, quin augeatur illius materia, hoc ipso dumtaxat, quod vel dilatentur, quos illud jam habet poros, vel novos acquirat; contra vero illius volumen decrescere, quin ejusdem materia minuatur, hoc ipso tantum quod ejus pori constriquantur, vel numero pauciores evadant. Ergo, cum corpus rareseat, quatenus, eadem manente illius materia, ejus volumen augetur; & vicissim illud densum fiat, quatenus, non imminuta illius materia, ejus volumen decrescit, relinquitur, corporis *rarefactionem* satis apte ex eo derivari, quod illius pori dilatentur, vel crescat eorum numerus; ex eo vero *condensationem*, quod ipsius pori constriquantur, eorumve numerus minuatur.

Constat 2. corpora *frigore* densari, & *calore* rarefieri. Non aliud autem in corporibus, *frigoris* actione, contingit, nisi partium constrictio, fortis earum mutua adhæsiō, & ipsarum quies; non aliud vero, vi, & energia *caloris*, nisi illarum expansio, dissolutio, & motus (§§. 72., 73., 96., 97.). Ergo sola pororum constrictione *densatio*; sola eorundem dilatatione *rarefactio* efficitur.

Constat *postremo*, vi solius compressionis *densum* plerumque fieri, quod

(a) Ibidem in *prob. assert.* 6. pag. 260.

(b) Ibidem.

quod *rarum* est. Fit autem per compressionem, ut ad se mutuo accedant partes corporis, quæ antea erant disjunctæ; ac proinde ut numero, & magnitudine minuantur pori, qui sunt per illius substantiam dispersi. Ergo per solam pororum constrictionem, eorumque imminutionem corpus, quod *rarum* est, *densum* efficitur. Hinc Gassendus, quemadmodum, inquit, vellus manu diducentes, atque comprimentes, concipimus lanam rarescere, & addensari; ac raritatem fieri, cum prius unitiores, aut viciniore distrabuntur a se invicem, locaque intercipiuntur plura, aut ampliora, in quibus lanæ nihil sit; densitatem vero, cum pili prius distantiores magis ad se mutuo accedunt, locaque pauciora, minorave intercipiuntur; ita penitus concipere licet eandem materiam nunc rarescere in aerem, nunc condensari in aquam, scilicet cum loco pilorum concipere liceat quantalascunque, & qualeiscunque volueris partis materiæ, quæ dissociantur, aut adunentur. Idem vero concipere licet in spongia, & similibus, quæ sunt diductionis, & compressionis, ob solam loculorum interceptorum contractionem, & explicationem, capacia (a).

Hiscæ rationibus adiicienda est auctoritas plurium veterum Philosophorum, ut inde scilicet pateat, Scholasticos, si qui sint, quibus non arrideat, quam modo tradidimus, rarefactionis, & condensationis explicatio, non Recentioribus tantum, sed etiam suæ Scholæ Magistris aperte adversari. Primus ergo occurrit Aristoteles. Ait namque, *densum* quippiam esse; eo quod partes ipsius sibi ipsis propinquæ sint; *rarum* vero, eo quod distent a se invicem (b). Aristoteli adstipulati sunt Ammonius, Porphyrius, & Boetius. Est enim *densum*, inquit Ammonius, *cujus prope invicem sunt partes posite adeo, ut corpus admittere diversi generis nequeant. Rarum, quod diductas habet partes, ut recipere alterius generis corpus valeat* (c). Porphyrius vero ait, *rarum* dici, *cujus partes ita inter se dissident, ut diversi generis corpus inter eas permeare possit, ut spongia. Densum autem, cuius partes inter se sita sunt ita, ut nullum aliud diversi generis corpus intercedere queat, ut aurum* (d). Boetius demum, quod, inquit, dicimus *rarum*, *positio quadam partium est, non qualitas. Nam quia ita partes a se separate distant, ut inter eas alieni generis corpus possit admitti, ideo rarum vocatur, ut spongia, pumicesque, quoniam in eorum cavernis surculus, vel aliud aliquid immitti potest, ita ut inter rimas partium sit, idcirco rarum dicitur. Porro autem spissam, quoniam ita sibi partes vicinæ sunt, atque ad se invicem strictæ, ut inter eas nullum cor-*

pus

(a) Sect. I. *Physicæ* lib. VI. cap. 2.(b) De *predicam.* cap. de *quali.*(c) Comment. *ibidem.*(d) Comment. *ibidem.*

pus possit incidere; atque ideo spissum vocatur, ut est ferrum, & adamantas. Positio ergo quadam partium his inest, non qualitas (a).

Hæc cum ita sint, mirandum sane, non deesse inter Scholasticos, quibus sententia, quam modo demonstravimus, de natura rari, & densi, tametsi ab Aristotele, atque adeo ab eo aperte tradita, qui, ipsos si audiamus,

sapit solus, reliqui umbrarum instar oberrant (b), non penitus placeat, imo plane displiceat. Certe Cl. P. Ferrari, licet fateatur, admittendam esse raritatem, & densitatem, etiam ut docent Recentiores, per ingressum, aut egressum subtilis ætheris, vel aeris, aut aliorum substantialium corpusculorum, propterea quia, inquit, id sane plurima ostendant experimenta (c); contendit tamen, in Physicis admitti posse genus illud raritatis, & densitatis, quæ non aliud præ se ferant, nisi maiorem, vel minorem localem extensionem (d), minime considerans Vir Cl., tunc vel nullas esse rationes, quibus posteriorem sententiam probat, vel si quid illæ evincant, sententiam priorem corruere; sibi que proinde, utpote qui illam, tamquam experimentis consonam, ipse etiam admittendam censet, tunc minime consentire. Id porro ut pateat, rationes singulatim expendemus, quibus suaderi ab se putat Cl. Auctor, admitti posse genus illud raritatis, & densitatis, quæ non aliud præ se ferant, nisi maiorem, vel minorem localem extensionem, suis ipsis verbis expressas.

Prima: mobile, quod intra unius horæ spatium quingentos, verbi gratia, passus acquirit, idem si duplo velocius moveatur, acquireret passus mille. Ergo idem mobile per tarditatem quingentis, per velocitatem mil- lenis partibus correspondet intra eandem horam. Igitur a simili affirmare possumus idem contingere corpori, ut per raritatem majori, per densitatem minori spatio respondeat, & coæquetur; & quidem absque interjectione corpusculorum, quemadmodum in tarditate nec morula, nec interjectum quidpiam habetur. Quare sicuti sine istis intelligitur mobilis intra idem tempus coæquatio successiva nunc majori, nunc minori spatio, ita sine illis possumus intelligere simultaneam coæquationem corporis cum majori, aut minori loco per eandem entitatem, sed per extensionem diversam.

Verum plura sunt, in quibus hæc prima ratio peccat. Primum est, quia principium, cui illa innititur, æque, vel etiam magis nos latet,

(a) Comment. in eundem locum.

(d) Ibidem assert. 3.

(b) Homerus Odys. X.

(c) Tom. II. P. I. Physicæ Disp. IV.

q. 5. assert. 2. pag. 246.

latet, quam sit illud, quod per eam demonstratur. Quis enim ignorat, magis nos latere, in quonam *velocitas*, & *tarditas* motus *formaliter* posita sit, quam per quid *formaliter* corpus densetur, & rarefcat? Testem appello ipsum Virum Cl. Differens quippe de *velocitate*, & *tarditate* motus, aperte fatetur (a), vix definiri posse, quid illæ præ se ferant; imo, cum eorum sententiam oppugnet, qui *velocitatem*, & *tarditatem* motus ex *morularum* interpositione derivant, nihilque præterea addat, quod ad hæc motus affectiones explicandas pertineat, sentire & ipse videtur, eas explicari nullatenus a nobis posse; contra vero, loquens de *raritate*, & *densitate*, ait, exponi eas posse, quemadmodum docent *Recentiores*, scilicet per *ingressum*, aut *egressum substantialium corpusculorum*.

Peccat secundo; quia, si nihil vacuitatis interiicitur inter partes *densi* corporis, dum rarefit, quemadmodum nec *morula*, nec *interjectum* quidpiam, ut ille ait, *habetur* in motu tardo, dicere profecto licet, ut recte argumentatur Gassendus, tot omnino esse, & non plures, neque pauciores complementis aquæ particulas, quam sint particulae spatii, quod completur. Nam (pergit ille) ut totum spatium completur, occupaturve a tota aqua, ita dimidium a dimidia, quadrans a quadrante, pars centesima a centesima, millesima a millesima, atque ita de ceteris; adeo ut ex tota aquæ mole, seu materia nulla omnino sit, quæ in aliqua spatii parte non sit, & nulla vicissim spatii pars sit, in qua non sit pars aliqua aquæ. Nimirum, si esset particula aquæ sine spatii particula, esset corpus sine loco, vel se penetraret cum particula alia, spatii partem vendicante; sicque duo forent in eodem loco corpora: quod per naturam fieri repugnat; & si esset particula spatii sine aquæ particula, illa pars spatii esset inanis, quod qui adversantur, non dabunt; idipsum est enim, quod negant. Est ergo ea commensuratio inter aquam, & spatium, ut sit æqualitas omnimoda partium. Esto deinde illud vas non amplius aqua, sed aere plenum; si nullum omnino interceptum est inane spatiolum, sequetur rursus, totidem, & neque plures, neque pauciores aeris particulas esse, quam sint spatii particulae; quippe ratiocinium perinde procedit, ac pari modo concludetur, eam esse commensurationem inter spatium, & aerem, ut sit omnimoda æqualitas partium. Ecquid exinde sequitur? Nempe ut partes aeris sint æquales partibus aquæ; cum utraque sint numero æquales spatii partibus, & vulgatissimum sit effatum, ea esse æqualia inter se, quæ uni tertio sunt æqualia. Quid rursus? Nempe tantumdem esse materiae, corporisque in aere, quantum est in aqua; quoniam, divisione materiae, corporisque, utriusque facta in particulas, utraque coquantur particulis spa-

(a) Tom. II. P. I. Physicæ Disp. IX. q. 2. pag. 353.

spatii; neque potest dici, ullam esse spatii partem, in qua non sit aliqua particula materiae, corporisve aquae, & aliqua materiae, corporisve aeris, neque vicissim ullam esse particulam materiae, corporisve aquae, ullam materiae, corporisve aeris, quae non sit in aliqua particula ejusdem spatii. Quid tum postea? Fac jam, aquam illam sic rarefcere, ut aer ex illa productus occupare possit vas, cujus capacitas sit, nisi centum, saltem decem pedum. Si in illo vase nullum intercipiatur inane spatium, sequetur pari, quo ante, modo aequalitatem omnimodam esse partium spatii, & aeris, & in hoc porro aere non sunt plures partes materiae, corporisve, quam essent in aqua. Itaque, cum partes spatii tam pedalis, quam decempedalis coequantur ejusdem materiae, corporisve partibus, sequetur, spatium unius pedis aequale esse spatio decempedum, hoc est, partem totius, seu quantitatem minorem majori, quod sane perabsurdum est. Fac etiam, aerem in vase pedali contentum ita condensari, ut occupare possit solum vas, cujus capacitas sit digiti unius; efficietur pari ratione, spatium pedale coequari spatio digitali, hoc est, totum parti, sive quantitatem majorem minori, quod rursus perabsurdum est. Deinde sequetur, tantundem esse materiae aquae in digito uno, quantum in pede integro. Et fac praeterea vas pedale repleti plumbo, aut hydrargyro; efficietur omnino non amplius esse materiae, corporisve in plumbo, aut hydrargyro, quam in aere; cum partes materiae, corporisve tam plumbi, aut hydrargyri, quam ipsius aeris eisdem omnino spatii partibus coequantur. Quid vero exinde consequitur? nimirum, ut aer tam sit densus, quam plumbum, quam hydrargyrus, quam quidlibet aliud: & aqua, plumbum, hydrargyrus, quidlibet aliud tam sit rarum, quam ipse aer: ac uno verbo, ut omnia omnino, quae in Mundo sunt, sint aequae rara, aut aequae densa; sicque nihil rarum densescere, nihil densum rarefcere possit; quae quidem, aliaque id genus nisi absurda sunt, quae, quid esse absurdum valeat (a).

Peccat demum memorata ratio ex capite superfluitatis. Cum enim natura compendio studeat, sive non efficiat modis pluribus, ipsisque dissimilibus, quod uno praestare potest, negandum absolute est, rarefcere, & densari corpora per ingressum, & egressum subtilis aetheris, aut aliorum substantialium corpusculorum, si genus illud raritatis, & densitatis, quae non aliud praeseferant, nisi majorem, vel minorem localem extensionem, admittatur. Certum est praeterea, concedi non posse hoc alterum genus raritatis, & densitatis, nisi quandoque in natura contingat, ut corpora neque rarefcant per dilatationem pororum, sive per ingressum subtilis materiae, neque per pororum

con-

(a) Sect. I. Physicae lib. VI. cap. 2.

constrictionem, seu per *subtilis substantia* egressum ipsa densentur. Sicuti enim P. Ferrari eam ob causam censet, *admittendam esse raritatem, & densitatem, ut docent Recentiores, per ingressum, aut egressum subtilis aetheris, vel aeris, vel aliorum substantialium corpusculorum, quia id sane plurima ostendunt experimenta; ita non dubito, ipsum quoque daturum Recentioribus, admitti non debere genus illud raritatis, & densitatis, quod ipse cum Peripateticis admitti posse contendit, nimirum quæ non aliud præ se ferant, nisi maiorem, vel minorem localem extensionem, nisi aliqua saltem experimenta alterum hoc raritatis, & densitatis genus admittendum esse demonstrent. Nullum autem afferri experimentum potest, quo, dari genus hoc raritatis, & densitatis, ostendatur. Nullum certe huiusmodi affert, imo ne memorat quidem P. Ferrari. Ergo illud genus raritatis, & densitatis, quæ, ut ipse ait, non aliud præ se ferant, nisi maiorem, vel minorem localem extensionem, non est admittendum.*

Ratio secunda: *definitiones, inquit Vir Cl., rari, & densi, proprio ac riguroso sensu acceptæ, non videntur subsistere, nisi raritas, & densitas solam præ se ferant maiorem, aut minorem localem extensionem. Ubi enim intelligitur ingressus, & egressus subtilis aetheris, non jam rarum haberet parum materiae sub magna dimensione, nec densum haberet multum materiae sub parva dimensione; sed & in raro multum extaret materia, & in denso parum. At vero parum, & multum in illis definitionibus non sunt adjuncta extensionis, sed entitatis, quæ parva, & magna dicitur in priori ad dimensiones, quatenus ad ipsas comparatur. Sic dum materia extensa palmariter evadit semipalmaris, dicitur magna respectu hujus novæ extensionis, quia capax est extensionis majoris, quam prius habuit; dum vero fit ex semipalmaris palmaris, dicitur parva respectu novæ extensionis, quia capax est iterum illius minoris. Semper tamen eadem & una est.*

Sed contra primo. Nam falsum est, definitiones rari, & densi non subsistere, si rarum dicatur, quod multos, vel satis amplos habet poros; densum vero, quod paucos, vel valde constrictos poros, ceteris paribus, comprehendit. Cum enim hoc ipso, quod corpus multos, vel satis amplos habeat poros, parum materiae sub magna dimensione contineat, & quod valde constrictos poros habet, multum materiae sub parva dimensione, ut est perspicuum, complectatur, manifeste sequitur, vel perperam etiam ab Aristotele definiri rarum, quod habet parum materiae sub magnis dimensionibus, densum vero, quod habet multum materiae sub parvis dimensionibus; vel definitiones rari, & densi, proprio, & riguroso sensu acceptas, etiam in hypothese Recentiorum egregie subsistere.

Neque officit, quod additur in argumento, *ubi scilicet intelligitur ingressus, & egressus subtilis ætheris, non jam rarum habere parum materia sub magna dimensione, nec densum habere multum materia sub parva dimensione; sed & in raro multum extare materia, & in denso parum.* Cum enim subtilis illa substantia, quæ in rarefactione dicitur corporis poros ingredi, & ex illis vicissim in condensatione erumpere, ad ipsum corpus essentialiter non pertineat, sed sit illi omnino extranea; falsum est, admissa Recentiorum hypothese, in raro multum extare materia, & parum in denso. Illius quippe essentialis, ut ita dicam, materia prorsus eadem est in utroque statu, raritatis scilicet, & densitatis, neque tamen eadem in utroque statu sunt ipsius corporis dimensiones. Quando autem dicitur, in raro parum haberi materia, multum in denso, id non de quacunque materia intelligendum est, sed de illa tantum, ex qua corpus essentialiter coalescit.

Quod si hæc materia distinctio non arrideat Viro Cl., contendatque necessario requiri ad raritatem, ut absolute habeatur parum materia sub magnis dimensionibus; ad densitatem vero, ut vicissim multum materia sub parvis dimensionibus comprehendatur, dicent Recentiores cum Gassendo, *inanis interceptionem, prout multa, paucave est, corpus facere aut rarum, aut densum* (a). Negat quidem Vir Cl., *raritatem haberi beneficio vacui, & densitatem fieri per spatiolorum inanum constrictionem* (b). At vero, dum id probare nititur, manifeste sibi contradicit. Ait enim, *experientiam docere, omnes aquæ effervescentis partes esse calidas, & raras, & ideo in aqua effervescente non extare inania illa spatiola* (c). Sed cum alibi dicat, *calorem semper, vel fere semper cum substantiali calidorum corpusculorum effluvio conjungi* (d); & hoc eodem loco aperte tradat, *admittendam esse raritatem, & densitatem per ingressum, aut egressum subtilis ætheris, vel aeris, aut aliorum substantialium corpusculorum, fateaturque, in aqua calida, & ebulliente multum aeris admisceri, & ideo raram ipsam evadere* (e); dare necessario debet, non omnes effervescentis aquæ partes esse calidas; sed eas tantum, quibus plura caloris corpuscula admixta sunt (f); neque omnes partes ejusdem aquæ esse raras, sed illas dumtaxat, quibus plura ætheris, vel aeris, alteriusve extraneæ materiae corpuscula intericiuntur. Addit præterea, *raritatem, & densitatem in corpore correspondere velocitati motus, adeo ut motus velox dicatur, aut tardus, quem-*

(a) Sect. I. *Physicæ* lib. IV. cap. 2.

(b) Tom. II. P. I. *Physicæ* Disp. IV. q. 5. assert. 1. pag. 245.

(c) Ibidem.

(d) Ibidem q. 3. pag. 231.

(e) Ibidem q. 5. assert. 2. pag. 246.

(f) Vide, quæ diximus §. 72.

quemadmodum corpus dicitur densum, aut rarum. Unde infert Cl. Auctor, sicuti in motus velocitate non intervenit ulla morula, quæ vacuolis correspondeat, ita in corporis raritate spatiola inania non intervenire (a). Verum, si hæc ratio legitima est, recteque concludit, dare debet P. Ferrari, quod docet paulo post, videlicet admittendam esse raritatem, & densitatem per ingressum, aut egressum subtilis ætheris, vel aeris, aut aliorum substantialium corpusculorum (b). Ita enim argumentum conficio; corpus dicitur rarum, vel densum, sicuti motus dicitur velox, aut tardus. In motus autem velocitate non intervenit ulla morula. Ergo neque in raritate corporis intervenire possunt poruli, si-ve extraneæ alicujus substantiæ corpuscula. Itaque vel nulla prorsus illa ratio est, vel etiam suum Auctorem cogit, ut sententiam mutet.

Contra 2. Quia, si definitiones rari, & densi, proprio ac rigoroso sensu acceptæ, non videntur subsistere, nisi raritas, & densitas solam, ut ait P. Ferrari, præ se ferant majorem, aut minorem localem extensionem in sensu Scholastico, falso ille deinde docuit, admittendam esse raritatem, & densitatem per ingressum, aut egressum subtilis ætheris, vel aeris, aut aliorum substantialium corpusculorum. Quippe, ut illius verbis utar, ubi intelligitur ingressus, & egressus subtilis ætheris, non jam rarum haberet parum materia sub magnâ dimensione, nec densum haberet multum materia sub parva dimensione; sed & in raro multum extaret materia, & in denso parum. Male quoque dixisset Aristoteles, densum esse corpus, eo quod partes sibi ipsæ propinque sint; rarum, eo quod distent a se invicem; cum, hoc modo explicata natura rari, & densi, non stet, vere proprieque loquendo, rarum esse illud, quod habet parum materia sub magnis dimensionibus; densum vero, quod habet multum materia sub parvis dimensionibus, quemadmodum utramque hanc corporum affectionem ipse definit.

Tertia Viri Cl. ratio est; quia, inquit, extant in Physicis corpora per se, & ex sui natura densiora, sicut & corpora quadam rariora. Et certe rarissimum elementum ignis est, densissimum terra. Semper enim ignis se explicat, & terra se contrahit. Quod autem semper fit, natura fit. Rursus corpora rariora eadem perfectiora sunt. Accedunt enim magis ad ignem simplicium corporum perfectissimum. Nunc, inquit, sic ratiocinamur. Si corpora essent rara vel propter vacuola, vel per immissionem corpusculorum, jam corpus rarum deberet intra se, tamquam naturæ suæ partem, admittere vel multum de non ente, si-ve vacuo, vel multum de alieno ente, si-ve substantialibus illis corpusculis. Hoc absurdum est. Ergo admittenda est raritas in sola majori locali extensione

Y 2

con-

(a) Loco citato pag. 245.

(b) Ibidem pag. 246.

consistens. Major probatur. Quod per se est rarum, per se quoque est omne illud, a quo in ratione rari constituitur. Atqui corpus rarum constitueretur tale per vacuola, aut corpuscula illa. Ergo corpus rarum esset per se vel vacuola, vel corpuscula illa. Atque adeo inde colligeretur, substantiam unam esse alterius substantia proprietatem, aut non ens esse proprietatem entis. Ignis etiam esset ex sui natura densissimum corpus; quia ex sui natura exposceret corpuscula illa, per qua densissimum redditur. Quæ omnia falsa sunt, & absurda. Igitur &c.

At vero non minus, quam reliquæ, hæc etiam ratio peccat. Primo siquidem potest illa in suum Auctorem ita retorqueri. Absurdum est, ejus judicio, corpus fieri rarum propter vacuola, vel per immisionem corpusculorum, idcirco quia corpus rarum deberet intra se, tamquam naturæ suæ partem, admittere vel multum de non ente, siue vacuo, vel multum de alieno ente, siue substantialibus illis corpusculis. Ergo absurdum est etiam, illud rarum evadere, amittendo extensionem, quam habet, ipsamque in majorem commutando. Quippe etiam tunc, ut est perspicuum, rarum fieret corpus, quatenus multum de alieno ente, scilicet de quantitate, intra se, tamquam naturæ suæ partem, admitteret. Posita autem Cl. Adversarii opinione, corpus palmariter extensum evadit modo bipalmare, dum nempe rarefit, modo semipalmare, scilicet dum condensatur, non retinendo palmarem extensionem, sed eam amittendo, commutandoque in majorem, minoremve (a). Ergo, Cl. Viri sententia admissa, illud ipsum absurdum sequitur, quod sequitur, ut ipse putat, posita sententia Recentiorum.

Secundo: cum ait Vir Cl., extare in Physicis corpora per se, & ex sui natura densiora, sicut & corpora quadam raviora, vel ita intelligit ly per se, & ly ex sui natura, ut velit, raritatem, & densitatem spectare ad essentiam corporis, perinde prorsus atque ad illud attinet forma substantialis; vel ly per se, & ly ex sui natura hoc sensu ipse non sumit. Si primum: non est, cur pluribus ostendam, illum vehementer falli; cum nemo sit, qui ignoret, raritatem, & densitatem ad essentiam corporis nullatenus pertinere, siue essentialiter non mutari corpus, dum densatur, vel rarefcit. Sin alterum: parcat Cl. Auctor, si dixero, ipsum terminis abuti, & nihil prorsus sua rationatione concludere. Abutitur terminis; cum id omne ad rei essentiam spectare vulgo intelligatur, quod dicitur per se, & ex sui natura ad rem ipsam pertinere. Et sane, ex præmissis principio de existen-

(a) Loco citato in responsione ad objectionem pag. 248.

stentia corporum, quæ *per se*, & *ex sui natura* densiora sint, vel rariora, infert Auctor ipse Cl., fore, ut corpus *rarum* admittat intra se, *tamquam natura sua partem*, vel multum de *non ente*, vel multum de *ente alieno*, si esset *rarum* vel *propter vacuola*, vel *per immissionem corpusculorum*. Ergo esse *rarum*, vel *densum per se*, & *ex sui natura*, perinde est omnino, ac *raritatem*, & *densitatem* spectare ad essentiam corporis; cum nisi ad illud *pertineant* hoc modo, verum esse nequeat, corpus admittere intra se, *tamquam natura sua partem*, id, per quod *rarum*, vel *densum* efficitur. Nihil quoque *ratione* sua ipse concludit. Falsum est enim, si corpora essent *rara* vel *propter vacuola*, vel *per immissionem corpusculorum*, jam corpus *rarum* debere intra se, *tamquam natura sua partem*, admittere vel multum de *non ente*, sive *vacuo*, vel multum de *alieno ente*, sive *substantiabilibus illis corpusculis*. Quippe, cum *raritas*, & *densitas* non sint nisi *accidentales* corporum *affectiones*, id spectare nequit ad corpus, *tamquam natura sua pars*, per quod *densatur*, vel *rarefcit*. Ad illius autem probationem quod attinet, dico, verum quidem esse, id, quod *per se est rarum*, *per se quoque esse omne illud*, a quo in *ratione* *rari constituitur*; simul tamen dico, neque *rarum*, neque *densum* esse tale *per se*, & *ex sui natura*, sed *contingenter* omnino, ac *prorsus per accidens* atque hinc non esse absurdum, ut corpus sit *rarum* vel *propter vacuola* intercepta, vel *per immissionem corpusculorum*, a quibus illius pori dilatentur; quemadmodum nihil absurdi in eo est, ut *per intercepta vacuola* corpus sit *porosum*. Eodem siquidem modo, quo corpus est *porosum*, est etiam *rarum*, & *densum*; cum, sicuti *porositas*, ita *raritas*, & *densitas* a partium positione, sive situ unice dependeant. Optarem propterea, attente consideret P. Ferrari, num ratio, qua contra Recentiores ostendere nititur, corpus non posse esse *rarum* *per intercepta spatiosa*, neque *per immissionem extraneorum corpusculorum*, *usui eadem ipsa nonneminis esse possit ad probandum*, nullum esse, nec dari posse corpus *porosum*; atque hinc quomodo illam ipse dilueret, si ei, dum corpus *porosum* admittit, ab aliquo obiceretur. Minime demum fore, quemadmodum dicitur in argumento, ut ignis sit corpus *densissimum*, si *per subtilium corpusculorum ingressum* corpora *rarefcerent*, ex dictis satis est manifestum.

Tandem adeo probat hæc tertia ratio, ut nisi ab ipsomet etiam P. Ferrari solvatur, Vir Cl. sibi nequaquam consentiat. Si enim, ut ille ait, falsum est, si absurdum, corpora esse *rara per immissionem corpusculorum*, admitti ab ipso non possunt *raritas*, & *densitas*, quæ fiant *per ingressum*, & *egressum corpusculorum*, nisi quod, suo iudicio,

dicio, falsum & absurdum est, ipse quoque admittat. Docet, autem, *admittendam esse raritatem, & densitatem, etiam ut docent Recentiores, per ingressum, aut egressum subtilis aetheris, vel aeris, aut aliorum substantialium corpusculorum*. Ergo admittit uno loco (a), quod alio loco (b) ipse absurdum & falsum censet. Videat igitur P. Ferrari, quo etiam hoc loco ipsum impulerit nimia contradicendi libido.

X I I.

102. Satis itaque, nisi mea me fallat opinio, demonstratum manet, *sensibiles corporum qualitates ex mechanicis materiae affectionibus provenire*. Restat modo videamus, an hæc opinio ab iis dissentiat, quæ circa venerabile Eucharistiæ sacramentum docet Ecclesia, & veteres Patres tradidere. Si quid enim vel minimum, ea posita opinione, in fide claudicet, nulla prorsus opinio ipsa est, quantacunque sit vis rationum, quibus demonstratur. Ut enim sapienter more suo observat Cl. Ludovicus Muratorius, *cum sacris literis, cum fide, ac revelatione divina perpetuo & necessario conjuncta est veritas. Aliquid revelante ac tradente Deo omniscio & veracissimo, illic errorem, aut mendacium excogitare, omnium perniciosissimum delirium est*. Contra cum ratione humana, cum Philosophia, cum historia profana, aliisque artibus necessario veritas non habitat, & sæpe error locum habet. Igitur falsum sit, necesse est, quod a perspicua fidei eruditione dissentit. Neque enim alia esse potest Theologorum veritas, alia Philosophorum; alia Dei, alia hominum; ac proinde cedat oportet ratio fidei, non fides rationi, sicuti æquum est, ut homines Deo, non Deus hominibus cedat (c). Nolim tamen arbitrentur rigidiores Scholastici, mechanicum Recentiorum systema censendum esse fidei dissonum, dignumque propterea, quod a Viro catholico rejiciatur, idcirco quia vel non consentiat cum doctrina S. Thomæ, aut Scoti, vel dissentire a fide, ipsis videatur. Nec enim si quid aut Scoticis, aut Thomisticis pronunciatis contrarium est, error illico est, inquit doctissimus Melchior Canus (d); neque satis esse puto ad sententiam de hæresi rite justeque ferendam, hæresim ipsam suspiciant attigisse; sed comprehensione quadam, cum eodem Viro Cl., opus esse, arbitror, ut sine errore de erroribus judicemus (e): quo loco sane, ut ille antea scripserat, arguendi sunt Scholastici nonnulli, qui ex

(a) Tom. II. P. I. *Physicæ* Disp. IV.
q. 5. pag. 246.

(b) Ibidem pag. 247.

(c) Lib. I. de *moderamine ingeniorum* cap. 21.

(d) Lib. VIII, de *locis Theol.* cap. 4. ad
cap. 21.

(d) Ibidem lib. XII. cap. 8. *prope finem*.

(e) Ibidem lib. VIII. cap. 4. *ad concl.* 1.

opinionum, quas in Schola acceperunt, præjudiciis Viros catholicos notis gravioribus inurunt, idque tanta facilitate, ut merito rideantur (a). Inquiram igitur accuratius, quo fieri a me potest, an, rejectis absolutis Scholæ accidentibus, & ex mechanicis affectionibus materiæ desumpta origine sensibilibus qualitatibus, facta tectaque sint omnia, quæ circa venerabile Eucharistiæ sacramentum nobis credenda proponit Ecclesia, docuerunt Patres, & Concilia definire. Candide in medium afferam, quæ tum ex Conciliis, tum ex Patribus desumi possunt & solent contra Recentiores momenta præcipua, subjiciamque singulis, quidnam de illorum valore in re, de qua agimus, mihi sentiendum videatur. Ut enim præclare monet Tullius, ne temere, vel falsæ rei, vel non satis cognita assentiamur, faciendum videtur, ut diligenter etiam atque etiam argumenta cum argumentis comparemus. Nam cum omnibus in rebus temeritas in assentiendo, errorque turpis est, tum in eo loco maxime, in quo judicandum est, quantum rebus divinis, religionique tribuamus. Est enim periculum, ne aut, neglectis iis, impia fraude, aut susceptis, anili superstitione obligemur (b). Itaque

D O G M A I.

103. In venerabili Eucharistiæ sacramento existunt *vere, realiter, & substantialiter* corpus, & sanguis Christi. Ita Concilia, Lateranense sub Innocentio III. cap. 1., Constantiense sess. VIII., Florentinum in decreto unionis, & Tridentinum sess. XIII. cap. 1., & can. 1. contra Berengarium, Carlostadium, Zuinglium, Oecolampadium, Bucerum, Calvinum, aliosque ejusdem furfuris novatores impios, non minus falso, quam inique dogmatizantes, tantum ut in *signo, vel figura, aut virtute* Christum Dominum in Eucharistia contineri.

PRO.

(a) Ibidem lib. VIII. cap. 4. ad *Concl. 1.*

(b) Lib. I. de *divinatione* cap. 4.

PROPOSITIO VII.

Realis praesentia Christi Domini in venerabili Eucharistiae sacramento non exigit, ut qualitates sensibiles panis, & vini sint accidentia absoluta in sensu Scholastico.

104. Hæc propositio probatione non indiget. Cum enim certa prorsus atque perspicua res sit, Christum Dominus opus non habere aliquo *accidente absoluto*, ut *vere, realiter, & substantialiter* eo sit in loco, qui a substantia panis, & vini ante consecrationem occupabatur, (neque enim *species*, inquit Doctor Subtilis (a), *sunt ratio formalis corpori essendi hic; quia non sunt formaliter in corpore Christi, nec per eas aliquid formaliter inest corpori Christi*), manifeste sequitur, perinde omnino esse ad *realem* Christi Domini *praesentiam* in Eucharistia stabiliendam, propugnandamque, siue *sensibiles qualitates* panis, & vini dicantur *accidentia absoluta*, ut contendunt Scholastici, siue ex *mechanicis* materiae *affectioibus*, quemadmodum Recentioribus placet, repetantur. Sane, cum nullus Scholasticorum, quem viderim, Recentiorum hypothesim ex hoc capite oppugnaverit, quamvis iidem ipsi nullum non moveant lapidem, ut illam crimentur, dici non immerito potest, nihil prorsus, ipsorummet etiam Scholasticorum iudicio, colligi jure hinc posse, quod *mechanicæ sensibilibus qualitatibus* origini vere officiat.

DOGMA II.

105. Vi consecrationis fit realis conversio totius substantiæ panis in corpus, & totius substantiæ vini in sanguinem Christi, quam conversionem, mirabilem prorsus, ac singularem, Ecclesia Catholica *transubstantiationem* aptissime appellat. Ita Concilium Lateranense sub Innocentio III. cap. *Firmiter*, & Tridentinum *sess. XIII. cap. 4. de Eucharistia*. Hoc enim, Tridentinum scilicet, contra Lutherum ejusque affectas, inique docentes, panis, & vini substantiam post consecrationem remanere, & una simul cum corpore, & sanguine Christi in Eucharistia existere, eo loci aperte definit, *per consecrationem panis, & vini conversionem fieri totius substantiæ panis in substantiam corporis Christi Domini nostri, & totius substantiæ vini in substantiam sanguinis ejus & hanc conversionem convenienter, & proprie a sancta*

Ca.

(a) Super IV. sententiarum Distin. X. q. 3.

Catholica Ecclesia transubstantiationem esse appellatam : quod etiam repetit can. 2., anathema in eum dicens, qui dixerit, in sacrosancto Eucharistiae sacramento remanere substantiam panis, & vini, una cum corpore, & sanguine Domini nostri Jesu Christi; negaveritque mirabilem illam, & singularem conversionem totius substantiae panis in corpus, & totius substantiae vini in sanguinem, manentibus dumtaxat speciebus panis, & vini, quam conversionem Catholica Ecclesia aptissime transubstantiationem appellat. Itaque, ut facta tectaue sint dogmata fidei, duo demonstranda sunt a Recentioribus. Primum est, absoluta Scholasticorum accidentia non requiri, ut tota substantia panis in corpus, & tota substantia vini in sanguinem Christi, vi consecrationis, convertatur. Alterum vero, opus non esse iisdem accidentibus, ut sacratissimum Christi corpus sub speciebus panis, ejusque sanguis sub speciebus vini in hoc sacramento existat. Quod igitur attinet ad primum, sit

P R O P O S I T I O V I I I.

Stare optime potest transubstantiatio, licet qualitates sensibiles panis, & vini non sint accidentia absoluta in sensu Scholastico.

106. Probatur. Ex doctissimo Cardinali Bellarmino quatuor ad veram conversionem requiruntur. Primum est, inquit ille, ut aliquid desinat esse; non enim est intelligibile, ut unum convertatur in aliud, nisi id, quod convertitur, desinat esse, quod antea erat. Secundum: ut aliquid succedat in locum ejus, quod desinit esse; alioqui non esset conversio, sed corruptio, vel annihilatio, si terminus illius actionis esset non esse rei. Tertium: ut sit connexio quadam, & dependentia inter desitionem unius, & successionem alterius, itaut unum desinat, ut alterum succedat, & vi desitionis fiat successio. Nam si ista non essent connexa, non esset una actio, quae dici posset conversio, sed essent duae actiones per accidens se concomitantes, quarum una annihilatio, altera creatio diceretur. Postremum vero: ut tam terminus a quo, quam terminus ad quem sit vere positivus. In hoc enim distinguitur perfecta conversio non solum a creatione, & annihilatione, sed etiam a naturali conversione (a), in qua, ut Scholastici ipsi docent, terminus a quo est privatio. Hac ergo conversionis generatim sumptae notione praemissa, ita ostenditur propositio. Transubstantiatio non requirit, ut qualitates sensibiles panis, & vini sint accidentia absoluta in sensu Scholastico, si nulla ex conditionibus, in quibus tota conversionis ratio posita est,

Z

acci-

(a) De sacramento Eucharistiae lib. III. cap. 18

accidentia ipsa necessario postulet, nulla ab illis aliquo modo dependeat. Nulla autem earum conditionum *absoluta accidentia* requirit, nulla ab illis necessario dependet. Facta namque hypothefi, profecto non repugnante, ut habeatur substantia omnibus *accidentibus absolutis* spoliata, potest illa ita in aliam converti, ut primo *tota designat esse*; secundo, *ut altera in locum ejus succedat*; tertio, *ut sit connexio, & dependentia inter desitionem unius, & successionem alterius*, ita nempe *ut ponatur una, quia desinit altera, & vicissim ut una desinat, quia altera ponitur*; postremo, *ut uterque terminus in ipsa conversione sit vere positivus*. Ergo non est necesse, *qualitates sensibiles panis, & vini sint accidentia absoluta*, ut habeatur *transsubstantiatio*.

Confirmatur. Nulla *conversio naturalis* ita dependet ab *accidentibus absolutis* Scholasticorum, ut nulla ea sit, si nullum ejuscemodi *accidens* existat. Hoc certe modo ab illis non dependet *generatio substantialis*, neque *alteratio*, quæ *conversionem naturalem* generatim sumtam adæquate dividunt. Non enim prima; cum in eo tantum posita illa sit, ut ex uno corrupto naturali composito alterum specie diversum producat. Neque secunda; cum tam *rarefactio*, quam *condensatio* sit species *alterationis*, quamvis, ut ipsi etiam Scholastici, si non omnes, meliores saltem, ne ipso quidem Aristotele, ut vidimus (S. 101.) excepto, manifeste docent, *raritas, & densitas* non sint *accidentia absoluta*. Ergo nulla *conversio naturalis* ab *absolutis accidentibus* necessario dependet. Quamobrem multo minus ab illis dependet *transsubstantiatio*, utpote quæ Tridentino Concilio teste, *mirabilis prorsus sit, & singularis*. Igitur &c.

Satisfit objectionibus.

I.

107. Opponit Cl. P. Ferrari, *conversionem ex sui notione præ se ferre necessario manere aliquid ex iis, quæ prius erant in re illa, quam dicimus converti*. Quare, cum in ista conversione, quæ *transsubstantiatio* est, non remaneat materia, ut subsistat conversionis notio, reliquum est, manere *accidentia panis*; atque hinc colligimus, *accidentia illa realia esse, ac prius fuisse in substantia panis, quia non dicitur manere, destructis aliis, nisi id, quod fuit prius* (a).

R. primo, negando, *conversionem ex sui notione præ se ferre necessario, manere aliquid ex iis, quæ prius erant in re illa, quam dicimus*

con-

(a) Tom. II. P. Physicæ Disp. IV. q. 1. pag. 202.

converti. Id certe non occurrit in notione *conversionis*, quam tradit, ut vidimus, doctissimus Bellarminus; & licet hanc conditionem requiri dicat Cl. P. Suarez (a), non dubito tamen, eam posse, tuta fide, *conversioni* denegari. Concedo equidem, doctrinam esse Concilii Tridentini, substantiam panis, & vini ita converti in corpus, & sanguinem Christi, ut *sola* panis, & vini *species* maneat. Verum simul contendo, non ideo ex mente Concilii *species* illas manere, quia substantia panis in corpus, & substantia vini in Christi sanguinem convertatur. Hæc enim dumtaxat sive causa, sive ratio illud est, quod modo inficior, quodque a Cl. Adversario probandum erat, non vero, tamquam ex suis terminis notum, principii loco assumendum.

Non me latet, quod ille alio loco tradit, videlicet nisi admitatur, conversionem ex sua notione formali postulare, ut quidpiam permaneat in termino ad quem, quod prius præcessit in termino a quo, fore, ut successiva rerum materialium, & spiritualium creatio, ubi ad unius destructionem altera a Deo produceretur, *conversio* dicenda sit, quod est falsum (b).

Verum nisi manifesta aliqua ratione ostenderit, successivam rerum materialium, & spiritualium creationem, ubi ad unius destructionem altera a Deo producat, non esse veram conversionem, patienter ferat Vir Cl., si id modo inficiar, & perpetuo deinceps sim negaturus. Fortene veræ conversiones dicendæ non sunt illæ, in quibus Mosis virga in serpentes (c), uxor Loth in statuam salis (d), & aqua in vinum in coena Canæ Galileæ mutata est (e)? Quidnam porro aliud tunc fecit Deus, nisi ad unius destructionem alias substantias producere? Dicet forte Cl. Adversarius, in hisce conversionibus eandem numero materiam sub utroque termino fuisse.

Sed contra; nam id non est plane certum, sed tantum probabile, teste doctissimo Bellarmino (f). Ergo contrarium neque certo falsum est, neque absurdum. Profecto docet Cl. P. Suarez, non esse de ratione mutationis ut sic habere subiectum, in quo fiat; quia nempe potest dari conversio, qua non sit ex subiecto (g).

Pergit porro Vir Cl., sed non feliciori successu. Cum, inquit, præsens controversia (de formali ratione conversionis) maxime pendeat a testimonio Tridentini Concilii, ideo etiam dicimus, conversionis nomen

Z 2

(a) Disp. L. in 3. partem S. Thomæ sect. 2.

(b) Tom. II. laudato pag. 217. in respon. ad 8. objectionem.

(c) Exodi cap. VII. v. 10.

(d) Genesis cap. XIX. v. 26.

(e) Joannis cap. II. v. 9.

(f) Lib. III. de Eucharistia cap. 18.

(g) Loco laudato.

eo sensu usurpatum fuisse a Patribus Tridentinis. Voces enim Patres illi tenebant juxta communem tunc apud omnes receptam opinionem. Nemo porro ea tempestate conversionem alio sensu usurpavit, nisi quatenus quidpiam precedens permaneret (a).

Ita ille; sed, iterum dico, non feliciori successu. Falsum namque est, neminem ea tempestate conversionem (adeoque etiam transubstantiationem) alio sensu usurpasse, nisi quatenus quidpiam precedens permaneret. Non ita neque de natura conversionis, ac proinde de natura transubstantiationis senserunt Scholæ Magistri, Doctores Angelicus, Seraphicus, & Subtilis. Nullibi enim, quod invenire potuerim, docent illi, necessarium esse ad conversionem, remaneat aliquid commune utrique termino, & ideo supersint accidentia panis, ut transubstantiatio sit vera conversio; neque locum ullum affert Cl. Adversarius, in quo aliquid illi tradant, quod ipsi faveat; imo non desunt conjecturæ, ex quibus, contra potius eos sensisse, non obscure colligitur. Quærens namque Angelicus Doctor, *utrum in hoc sacramento maneant accidentia panis, & vini post consecrationem*, affirmative respondet; sed hæc una illi ratio est, quia, inquit, *sensu apparet, facta consecratione, omnia accidentia panis, & vini remanere* (b). Si autem ejus fuisset opinio, ad formalem rationem conversionis generatim sumptæ, adeoque etiam transubstantiationis, pertinere, ut quidquam permaneat in termino ad quem, quod præcessit in termino in quo, eccur S. Doctor non probavit ex hoc capite, panis, vinique accidentia post consecrationem in hoc sacramento remanere? Fortene id latuit tantum Virum? Absit omnino. Superest ergo dicamus, illum pro re certa habuisse, non esse de formali conversionis ratione, ut aliquid utrique termino commune in illa habeatur; & ideo remanentiam accidentium panis, & vini in Eucharistia ex hoc principio minime posse demonstrari. Similiter Doctor Seraphicus quærens (c) *sub quo genere motus, vel mutationum contineatur transubstantiatio*, aperte docet, eam assimilari creationi, propterea quia in illa nihil commune manet. Respondens quoque ad argumenta in quibus dicebatur, aliquid etiam in transubstantiatione remanendum fore, idcirco quia illa sit mutatio, & in omni specie motus aliquid maneat, ait, *illud esse verum de mutatione, in qua habent aliquid commune termini; sed hic eos nihil habere*. Sed longe clarius Doctor Subtilis. Dico enim, inquit, *quod, proprie loquenda, transubstantiatio non est mutatio, nec circa hoc oportet laborare ad inquirendum genus transubstantiationis*.

Tum

(a) Loco citato ad objectionem 8.

(b) P. III. q. 75. artic. 5.

(c) Super IV. Sententiarum Distin. XI.

Artic. I. q. 2.

Tum paulo post: *si autem*, ait, *omnino velis extendere mutationem, ut dicatur de transubstantiatione, potest dici, quod sicut secundum Philo. sophum V. Physicorum triplex est mutatio, scilicet a non subjecto in subjectum, a subjecto in subjectum, & a subjecto in non subjectum, & accipitur ibi subjectum pro ente positivo, & non subjectum pro privatione ejus; sic potest versio extendendo ad mutationem supernaturalem distinguere, ut illa, quæ est a subjecto in non subjectum dicatur annihilatio; quæ autem a non subjecto in subjectum, creatio; quæ vero a subjecto in subjectum, transubstantiatio. Sed per hoc quasi nihil habetur de genere remoto transmutationis, quod scilicet est genus versionis, nisi quod utrumque formaliter est inferius ad relationem quamdam ordinis, sive successionis (a). Videat ergo Cl. P. Ferrari, quoniam jure dixerit, neminem ea tempestate (qua nempe Tridentinum Concilium celebratum est) conversionem alio sensu usurpasse, nisi quatenus quidpiam precedens permaneret. Arbitror enim, ipsum minime dicturum, omnes Theologos ab suis Magistris, in quorum verba ferme jurabant, hac super re tunc recessisse.*

Sed demus Viro Cl., omnes tunc conversionem non alio sensu usurpasse, nisi quatenus quidpiam precedens permanet. Demus præterea, Tridentinos Patres in explicando Eucharistiæ sacramento tenuisse vocem conversionis juxta communem tunc apud omnes, ut ipse ait, receptam opinionem. Fortene dicendum ille putat, dogma esse fidei, vel saltem sine nota temeritatis negari non posse, conversionem ex sua notatione formali præ se ferre, ut quidpiam permaneat in termino ad quem, quod prius præcessit in termino a quo? Si affirmative censeat respondendum: ergo doctissimus Card. Bellarminus, alique etiam Viri præstantissimi, qui contra opinantur, gravem notam effugere non possunt: quod certe de tantis Viris nemo dicere audebit. Si autem negative respondeat: eccur ergo ad sacram Concilii auctoritatem ille nos provocat, ad eamque confugit, quasi actum de fide sit, nisi hæc sua opinio de formali ratione conversionis a Recentioribus admittatur? Fatetur ipse, Concilium Tridentinum abstinuisse ex industria a voce accidentis, ne philosophicam Peripateticorum sententiam expresse definiret tamquam fidei catholica dogma (b). Ergo sese quoque abstinere debuisset a voce conversionis, si res illi fuisset comperta, formalem conversionis rationem necessario postulare, ut quidpiam permaneat in termino ad quem, quod præcessit in termino a quo, ne cui scilicet videretur, vel definire voluisse, tamquam dogma fidei, existentiam acciden-

(a) Super. IV. Senten. Distin. XI. q. 1.
S. dico ergo.

(b) Tom. II. P. I. Physicæ Disp. IV. q. 1.
pag. 210. in responsione ad 1. objectionem.

dentium absolutorum; vel litem de nomine, ut ajunt, ipsum voluisse sua auctoritate dirimire. Non abstinuit autem sese a voce *conversionis*, quemadmodum sese abstinuit a voce *accidentis*. Ergo persuasum illi non fuit, *conversionem ex sua notione formali præ se ferre, ut quidpiam permaneat in termino ad quem, quod prius præcessit in termino a quo.*

Ceterum velim demonstret Cl. P. Ferrari, Concilium Tridentinum, non solum adhibuisse vocem *conversionis* juxta communem tunc apud omnes receptam opinionem, nempe prout significat, *quidquam permanere in termino ad quem, quod præcessit in termino a quo*; sed præterea ita vocem hanc illud usurpasse, ut eam sacram fecerit, adeo nimirum ut, ipsam sumere alio sensu, nemini deinceps sine piaculo licitum esse possit. Nec enim, ut vox aliqua sacra dicatur, sufficit, Tridentini, alteriusve Concilii Patres, ipsosque etiam Summos Pontifices eam in condendis fidei decretis adhibuisse. Monente quippe doctissimo Melchiore Cano, *quæ in Conciliorum, vel Pontificum decretis, vel explicandi gratia inducuntur* (ut certe in casu nostro) *vel ut objectioni respondeatur, vel etiam obiter, & in transcurso præter institutum præcipuum, de quo erat potissimum controversia, ea non pertinent ad fidem, hoc est, non sunt catholica fidei judicia* (a); sed, eodem teste, *Summorum Pontificum, Conciliorumque doctrina, si toti Ecclesie proponatur, si cum obligatione etiam credendi proponatur, tum vero de fidei causa judicium est* (b). Nisi ergo ostenderit Vir Cl., Tridentinos Patres hoc sensu sacram fecisse vocem *conversionis*, sumtam juxta communem tunc apud omnes receptam opinionem, fucum facit (absit verbo invidia), dum opinionem suam de formali *conversionis* notione nititur Tridentini Concilii auctoritate stabilire.

R. secundo ad argumentum principale, concedendo, esse quidem de ratione *conversionis* naturalis, ut maneat aliquid ex iis, quæ prius erant in re illa, quam dicimus *converti*; sed negando, id etiam in notione *transsubstantiationis* contineri, ad eamque requiri. Neque enim, ab eo, quod naturaliter contingit, licet sine vitio ad id, quod supra omnes naturæ leges a Deo efficitur, argumentari. Testis sit ipsemet P. Ferrari. Inconsulto, inquit, *Philosophi plerique demonstrationes mathematicas sic adhibent ad res physicas, quasi in rerum natura extensio ita se haberet, ut a Geometris supponitur: cujus quidem rei hæc una ipsi ratio est, quia hoc est transire de genere in genus, ab iis, quæ sunt tantum in ideis nostris, ad rerum naturam* (c). Ergo ii quoque Philo-

(a) Lib. V. de locis Theologicis cap. 5.

(b) Ibidem.

(c) Præfat. in Physicam pag. 9.

Iosophi pari jure agunt inconsulto, qui ex *conversione naturali* ad *supernaturalem* transitum faciunt, sibi que licere putant, unam per aliam explicare. Et hi namque, perinde prorsus ac quos ille redarguit, transeunt a genere in genus. Accedit, *transubstantiationem* dici a Concilio Tridentino *conversionem mirabilem prorsus, ac singularem* (a). Igitur, judicio Tridentinorum Patrum, nobis non licet, notionem *transubstantiationis* in *naturalibus conversionibus* quærere. Nullum enim, inquit Cl. Tournely, *habet (transubstantiatio) in natura exemplum, quia singularis; nec ab humana ratione comprehendi potest, quia mirabilis, hoc est tota in mysteriis recondita* (b).

R. tertio ad argumentum principale, permittendo, *conversionem* generatim sumtam, & quidem prout etiam *transubstantiationem* sub se continet, postulare, *ut maneat aliquid ex iis, quæ prius erant in re illa, quam dicimus converti; sed negando, illud commune necessario debere esse entitatem aliquam absolutam*. Docet enim Cl. P. Suarez (c), qui sane inter Scholasticos non ultimus est, sufficere ad *conversionem* generatim sumtam, ut id, in quod aliud convertitur, succedat illi in eodem loco; ac propterea, ut locus dumtaxat, adeoque nihil reale absolutum, sit utrique termino communis. Itaque ut etiam *transubstantiatio* habeat veram rationem *conversionis*, satis esse puto, remaneat panis *sensibilitas*, sub qua sacratissimum Christi corpus, in quod panis convertitur, delitescat, undecunque demum *sensibilitas* ipsa deriveretur. Nihil ergo pro existentia *accidentium absolutorum* jure conficitur ex *notione conversionis*, quam tradit P. Ferrari, quamque etiam *transubstantiationi* communem esse vult, nisi demonstraverit Vir Cl., vel illud commune utrique *conversionis* termino debere esse *entitatem aliquam realem absolutam*, vel panis *sensibilitatem* manere non posse in Eucharistia, nisi *reales* ipsæ panis *qualitates*, non existente illius substantia, in hoc Sacramento supersint. Nunquam autem fore, ut ille primum ostendat, persuasum mihi ex eo est, quod sufficiat ad *conversionem*, quemadmodum diximus ex P. Suarez, ut *locus dumtaxat* sit utrique *conversionis* termino communis. Quod vero attinet ad secundum, animadvertat velim Cl. Auctor, minime evinci, necessario ad *conversionem* requiri, ut maneat aliquid commune utrique termino, per hoc tantum, quod demonstretur, manere non posse in Eucharistia *sensibilitatem* panis, nisi ipsæ panis *qualitates* in ea remaneant. Id enim, ut patebit confide-

(a) Sess. XIII. cap. 2.

(b) Prælect. Theol. de sacram. Eucharistie q. 3. artic. 2.

(c) Disp. L. in III. Partem S. Thomæ sect. 2.

deranti, verum esse potest, quamvis illud sit falsissimum.

Ea demum illatio mihi animum non subit, qua ex notione ab se tradita *conversionis* colligit P. Ferrari, panis vinique *accidentia* in Eucharistia remanere. Ait enim: *cum in ista conversione, quæ transubstantiatio est, non remaneat materia, ut subsistat conversionis notio, reliquum est, manere accidentia*. Hujus, inquam, illationis vim nullatenus percipio. Ex hoc enim, quod *non remaneat materia*, non tantum sequitur manere *accidentia*, si ejus sint naturæ, ut sine subjecto existere divinitus possint; verum etiam remanere *substantialem* panis formam, utpote quæ, ipso docente (a), sit *entitative* substantia, minusque propterea, quam *accidentia*, a subjecto illa dependeat. Puto ergo, errorem in hunc locum irrepsisse, Typographi oscitantia, videlicet positam ab illo fuisse *materiam* loco *substantiæ*. Certus sum enim, Cl. P. Ferrari cum iis non sentire, qui olim, ut refert S. Thomas, falso arbitrabantur, *facta consecratione, non solum remanere accidentia panis, sed etiam formam substantialem ejus*. (b).

I I.

108. Opponit P. Boucat, ut *absolutorum accidentium* existentiam in Eucharistia & ipse evincat, opponit, inquam, *in eo transubstantiationem differre ab annihilatione, quod annihilation sit destructio totius compositi tum quoad substantiam, tum quoad accidentia*; transubstantiatio vero sit destructio totius substantiæ, manentibus iisdem accidentibus (c).

R. negando assumptum. Falsum est enim primo, *transubstantiationem* in eo ab *annihilatione* differre, quod *annihilatio sit destructio totius compositi tum quoad substantiam, tum quoad accidentia*; at vero *transubstantiatio sit destructio totius substantiæ, manentibus iisdem accidentibus*. Communis quippe Theologorum sententia est, id potissimum inter *transubstantiationem*, & *annihilationem* haberi discriminis, ut terminus ad quem in *annihilatione* sit *negativus*, sive purum nihil; contra vero in *transubstantiatione* sit *positivus*, nempe Corpus Christi. Convenit inter Theologos, inquit Durandus, *conversionem panis in Corpus Christi differre a creatione, & annihilatione, & transmutatione naturali. A creatione quidem, quia illa fit ex nihilo; non autem ista conversio, sed habet substantiam panis pro termino a quo; ab annihilatione vero, quia illa non habet terminum ad quem*

(a) Tom. II. P. I. *Physicæ* Disp. I. q. 1.
pag. 16.

(b) P. III. q. 75. artic. 6.

(c) Tom. VI. *Theol. Patrum* P. II.
Dissert. III. sect. 3. pag. 428. ed.
Venetæ 1736.

quem positivum, sed purum nihil; hac autem habet terminum ad quem positivum, scilicet Corpus Christi; a transmutatione vero naturali, quia omnis transmutatio naturalis habet subiectum commune, hac autem converso nullum habet subiectum commune (a).

Falsum est secundo, annihilationem esse destructionem totius compositi tum quoad substantiam, tum quoad accidentia, si ita id intelligatur, ut ea compositi destructio, in qua sola illius accidentia remanerent, vera annihilatio censeretur non possit. Sicuti namque, si substantia compositi tum quoad materiam, tum quoad formam produceretur, hæc productio esset vera creatio, tametsi illa substantia fieret vel sine accidentibus, vel sub accidentibus præexistentibus (facta hypothese, ut possint præexistere); ita vicissim, si eadem ipsa substantia quoad omnes suas essentielles partes destrueretur, quin illius accidentia deficerent, hæc destructio esset vera annihilatio. Hæc sane utraque actio vim creatæ potentiæ omnino superat; cum potentia quævis creata ita a præexistente subiecto in operando dependeat, ut, si illud non adsit, nihil prorsus moliri ipsa possit. Neque juvat Virum Cl., S. Thomam (b); Scotum (c), omnesque ferme Theologos, ut refert P. Suarez (d), aperte docere, desitionem substantiæ panis in Eucharistia non esse annihilationem. Siquidem non ideo illi negant, substantiam panis annihilari in hoc sacramento, quia illius accidentia remaneant, sed quia, inquit Angelicus Doctor, id, in quod substantia panis est conversa, est aliquid (e), sive, ut ait Subtilis, quia terminus ad quem transitus ipsius panis non est purum nihil, sed corpus Christi (f); vel etiam quia, ut putat P. Suarez, panis substantia non desinit per meram suspensionem concursus Dei, sed ex vi actionis positivæ, & physicæ, ejus nempe, per quam illi succedit corpus Christi; sitque contra rationem annihilationis, ut per positivam actionem fiat, sive consequatur (g). Quis autem non videt, tantos Viros ex eo etiam dicturos fuisse, panis substantiam in hoc sacramento non annihilari, quia illius accidentia in eo supersint, si persuasum habuissent, requiri ad annihilationem, ut totum compositum tum quoad substantiam, tum quoad accidentia deficiat? Falsum est igitur, non solum attenda ratione, verum etiam summorum Virorum spectata auctoritate, annihilationem esse destructionem totius compositi tum quoad substantiam, tum quod accidentia.

A a

Fal-

(a) Super IV. Sententiarum Distin. XI.

q. I. n. I.

(b) P. III. q. 75. artic. 3.

(c) Ibidem q. 4. §. ad questionem.

(d) Disp. L. Sect. 7. in III. Partem S. Thome.

(e) Loco citato.

(f) Loco citato.

(g) Loco citato.

Falsum postremo est, *transubstantiationem esse destructionem totius substantiae, manentibus iisdem accidentibus*. Hæc enim substantiæ destructio est mera *annihilatio*, ut modo ostendimus. Miror autem, P. Boucat, qui in SS. Patribus, Conciliis, atque Theologis non parum versatum se prodit, falsam adeo *transubstantiationis* definitionem tradidisse, quin viderit, Recentiores hinc posse occasionem arripere ipsum criminandi, quod malitiose egerit hoc loco, falsam scilicet exhibendo *transubstantiationis* notionem, ut, quem oppugnat Cl. P. Maignanum, reum faceret violatæ fidei, quasi nempe catholicum *transubstantiationis* dogma, negando *accidentia absoluta*, ille inficiaretur.

III.

109. Ita præterea ex hoc eodem capite urget idem Vir Cl.: *si, peracta consecratione, panis accidentia nequaquam remanerent, non magis dici posset, panem converti in corpus Christi, quam Petrum in Paulum, si, annihilato prorsus Paulo, produceretur in ejus loco Petrus, similis quoad omnia externa accidentia* (a).

R. concedendo assumptum, dummodo tamen inter desitionem Pauli, & productionem Petri ea sit connexio, ut ideo in sui nihilum abeat Paulus, quia in illius loco producitur Petrus; & vicissim ideo in loco Pauli producat Petrus, quia ille in nihilum sui redigatur. Hac enim posita connexione, prorsus me latet, quamobrem hæc conversio Pauli in Petrum vera, & propria *transubstantiatio* dici non possit. Neque enim huic officit, vel quia nihil Pauli tunc remaneat, vel quia Petrus quoad omnia externa accidentia Paulo omnino similis esse dicatur. Non officit primum; quia, ut satis demonstravimus, ad *transubstantiationem* minime opus est, ut aliquid utrique *conversionis* termino commune remaneat; & si id in argumento supponat Vir Cl., peccat vitio *petitionis principii*, ut est perspicuum. Neque officit secundum; siquidem perinde omnino ad *transubstantiationem* esse puto, siue similes, siue dissimiles sint substantiæ, quarum una in aliam tota convertitur. Id si non arridet Viro Cl., contrarium ostendat. Interea autem dicam, satis constare ex modo traditis, admittenda non esse *absoluta Scholasticorum accidentia*, ut in tuto sit *transubstantiatio*.

SCHO-

(a) Loco citato pag. 429.

S C H O L I O N.

110. Tantum abest, salvum esse non posse catholicum dogma *transubstantiationis*, nisi admissis *absolutis accidentibus* Scholasticorum, quin potius defuturus fortasse non sit, qui dicat, illis positis, & ansam dari heterodoxis dogma ipsum cavillandi, & valde minui ac debilitari plurimum eorum momentorum vim, quibus tum ex verbis Christi Domini: *hoc est corpus meum*; tum ex congruentiis illud dogma contra Lutheranos a Catholicis propugnatur.

I.

111. Ansa datur heterodoxis catholicos cavillandi. Sumta enim *quantitate* panis pro *entitate* natura sua *extensa*, & *impenetrabili*, quemadmodum si non omnes, plerique saltem Scholasticorum eam sumunt, manifeste sequitur, dici non posse, *quantitatem* panis in Eucharistia remanere, nisi *extensam*, & *impenetrabilem entitatem*, quæ ad panem pertineat, etiam post consecrationem haberi in hoc Sacramento, heterodoxis concedatur. Jam vero si hoc, dicent illi, in hoc Sacramento haberi substantiam panis. Dicent quippe, non aliud ab se intelligi nomine *substantia corporea*, nisi *entitatem* ipsa sua natura *extensam*, & *impenetrabilem*, sicuti eam sumisse videtur etiam S. Augustinus, & catholici plurimi modo tuta fide propugnant. Ergo (urgebunt ipsi) negari non potest a catholicis, remanere *substantiam* panis in hoc sacramento, si eandem ipsam *entitatem* natura sua *extensam*, & *impenetrabilem*, quæ ante consecrationem habebatur, ipsi quoque in hoc Sacramento remanere concedant. Non parum etiam roboris huic argumento accedere videtur ex eo, quod *sensibiles* omnes panis *qualitates* in hac superstite *extensa*, & *solida entitate*, tamquam in subjecto immediato, ipsorummet Scholasticorum sententia, recipiantur. Dicent quippe heterodoxi, illud totum in hoc sacramento superesse, quod ipsi *panem* vocant. Manent enim *qualitates* panis *sensibiles* una cum illa *extensa*, & *solida entitate*, in qua recipiuntur. Neque multum illis negotii facesset, quod ajunt Scholastici, *extensam* nempe illam, *solidamque entitatem*, quæ una cum *sensibilibus* panis *qualitatibus* in hoc sacramento haberi dicitur, non esse *substantiam*, sed *accidens*, utpote quæ non existat *per se*, sed subjecto naturaliter indigeat; urgebunt quippe, sibi sufficere, si eadem penitus *solida extensio*, eademque *reales sensibiles affectiones*, quæ habebantur

ante consecrationem, etiam post consecrationem in Eucharistia habeantur; cum *panis* nomine nonnisi illud aggregatum ipsi intelligant.

I I.

112. Multum quoque minuitur, hac admissa hypothesi, robur plurium argumentorum, quibus tum ex verbis Christi, tum ex congruentiis *transubstantiatio* probatur. Et primo ad rationem ex verbis Christi quod attinet, ostenditur ex illis *transubstantiatio*; quia, si panis *substantia* remaneret, non esset vera illa Christi propositio: *hoc est corpus meum*, propterea nimirum quia pronomen *hoc* non Christi corpus, ut debet vi propriæ locutionis, sed *substantiam* panis designaret; nihilque sit magis falsum, quam panis *substantiam* esse corpus Christi. Sed admissis *absolutis accidentibus*, quæ remaneant, peracta consecratione, non satis valida apparet hæc ratio. Enimvero, cum *pronomina* non minus afficiant *substantiam*, quam *accidentia*; neque minus composita, quæ sunt *unum per se*, quam ea, quæ non sunt, nisi aggregatum *per accidens*, illa designent (æque proprie namque dicitur *hæc substantia*, *hic homo* &c., ac *hæc quantitas*, *hic color*, *hic acervus lapidum* &c.) videtur, pronomen *hoc* in illis verbis Christi æque significare posse solum Christi corpus, quamvis remaneat panis *substantia*, ac illud ipsum dumtaxat significat, dum sola remanent illius *accidentia*. Qua enim ratione pronomen *hoc*, positis solis *accidentibus*, non cadit supra illorum aggregatum, licet supra illud cadere possit, quemadmodum ipsum dumtaxat nobis apparet; eadem ipsa dicet Lutheranus, pronomen *hoc* non cadere supra *substantiam* panis, quæ remanet, quamvis si esset sola, nempe sine Christi corpore, ipsam dumtaxat afficeret, nobisque indicaret; neque minus falsum esse, subjectum *accidentium*, quod superest, quodque præcipue ab illo *pronimine* affici videtur, scilicet *quantitatem* panis, esse corpus Christi, ac sit falsum, panis *substantiam* esse illud ipsum corpus. Unde Cl. P. Maignan, cum, inquit, *Christus sic ait: hoc est corpus meum, perinde est ac si diceret, hoc nihil est aliud, quam corpus meum; quia hoc non potest esse duo simul, nempe & corpus meum, & quantitas panis, albedo panis &c. certe non magis, quam panis ipse (a)*. Huic proinde argumento non satis occurrit Cl. Tournely, dum ait, causam quare, licet in Eucharistia præter corpus Christi sint *accidentia realia*, hæc propositio sit vera: *hoc est corpus meum*; vera autem non sit,

(a) Append. de speciebus Eucharisticis ad cap. 33. Philos. naturæ n. 47.

si præter illud corpus adesset etiam substantia panis, causam, inquam esse, quia pronomen hoc in hac propositione: hoc est corpus meum, non demonstrat accidentia, quæ corpus Christi non sunt, nec dici possunt; at si præsens esset panis substantia, pronomen hoc illam demonstraret, & ita demonstrando panis substantiam, dici posset, hoc, nempe substantia panis, est corpus Christi, quod certe falsum est (a): apparet, dico, hoc modo argumentum non solvi, nisi rationem dederit Vir Cl., quare pronomen hoc (idipsum & de ceteris dicito) ita solam substantiam afficiat, ut quantitatem, si ponatur extensio solida, & immediatum subiectum accidentium, afficere, nobisque indicare nullo modo pronomen ipsum possit. Accedit præterea, solidam illam quantitatis extensionem, quæ remanere dicitur a Scholasticis post consecrationem, existere instar substantiæ, nempe veluti per se (nulli quippe subiecto tunc inhæret) & ideo aptam videri, ut a pronomine hoc, perinde prorsus ac substantia panis, tunc afficiatur. Neque porro locus est, quemadmodum optime observat laudatus P. Maignan, ut contra id, quod modo diximus, aliquis opponat, non magis esse possibile, ut illud ipsum hoc sit species impressa, & simul corpus Christi. Occurro enim, & dico, magnum esse discrimen; quia de specie, utpote non sensibili nisi ut quo, neque solet usu hominum, neque potest inter demonstrandum intelligi velut simpliciter, & absolute dicta particula demonstrativa hoc. Albedo autem, & quantitas, aliaque sensibilia accidentia, & aggregatum ipsorum sunt quid sensibile ut quod, quatenus ad sui sensibilitatem indigent specie sui: qua sola (cum non detur species speciei, progressu nunquam terminando) est sensibilis per se, & ut quo. De eo autem, quod est sensibile non per se, adeoque est sensibile tantum ut quod, bene ex natura rei tum dicitur, tum intelligitur dictum absolute hoc, nempe hoc sensibile, quod ad sensum exhibetur, atque demonstratur (b). Ergo &c.

III.

113. Quod vero spectat ad rationem ex congruentiis, dogma transubstantiationis ostenditur ex hoc capite a doctissimo Bellarmino, primo: quia, si cum corpore Domini maneret substantia panis, tunc duæ substantiæ haberent ordinem ad eadem accidentia, & ab iisdem accidentibus tamquam externis signis demonstraretur (c). Hoc itaque argumentum valde nutat, si quantitas panis ponatur non solum entitas absoluta realiter distincta ab illius substantia, verum etiam omnium

sen-

(a) Prælect. de sacram. Eucharistiæ q. 3. artic. 2.

(b) Loco citato n. 48.

(c) Lib. III. de Eucharistiæ cap. 3.

sensibilium qualitatum ipsius panis immediatum subiectum. Vel enim etiam *quantitas* corporis Christi dicit ordinem ad *sensibiles qualitates* panis, quemadmodum ad illas ordinem dicit panis *quantitas*, vel non dicit. Si non dicit, licet simul ipsa sit cum *quantitate* panis: ergo neque *substantia* corporis Christi, quamvis simul esset cum *substantia* panis, ordinem aliquem diceret ad illas *qualitates*, neque ab illis demonstraretur. Si autem dicit: ergo si non est absurdum, duas simul *quantitates*, scilicet corporis Christi, & panis, dicere ordinem ad eandem *sensibiles qualitates*, neque ab illis, tamquam ab externis signis, demonstrari (*accidentia* enim primo demonstrant subiectum, quod *immediate* afficiunt) absurdum quoque non est, duas simul *substantias* ordinem habere ad eadem *accidentia*, & ab iisdem designari.

Ita porro hoc idem argumentum prosequitur Vir Cl.: quia *substantia panis* informaretur illis *accidentibus*, non autem corpus Christi, *primarius ordo* ad illa *accidentia* esset *substantiae panis*, *secundarius autem* corporis Christi, & consequenter ipsa *accidentia* per se primo demonstrarent, & significarent panem, *secundario autem* corpus Christi, quod sane absurdum esset. Nam si quis peteret, quid est, quod est in altari? oporteret respondere: est panis triticeus, & etiam corpus Christi; & si quis quæreretur, quid significant illa *accidentia*? respondendum esset, *substantiam panis* illic esse, & simul corpus Christi; & si alius interrogaret, quid frangit Sacerdos, & communicantibus tanta religione distribuit? diceremus, panem triticeum, & simul corpus Christi. Profecto igitur (concludit ille) multo convenientius fuit, ut *solum Christi corpus* ad illa *accidentia* ordinem haberet, & illa soli Christi corpori deservissent (a).

Sed contra est. Cum enim, admissa Scholasticorum doctrina, *accidentia panis* in illius *quantitate*, non autem in corpore Christi recipiantur, *ordo primarius* ad illa *accidentia* erit *quantitatis panis*, *secundarius vero* corporis Christi; & ideo necesse est, *accidentia* ipsa primo demonstrant, & significant *quantitatem panis*, *secundario corpus Christi*, quemadmodum nonnisi *secundario* ipsam quoque panis *substantiam*, si in illa non sunt, nisi quatenus sunt in *quantitate*, nobis designant & exprimunt. Quærenti igitur, quid sit, quod est in altari? respondendum est, admissa Scholasticorum hypothese, *quantitatem panis*, ejusque omnia *accidentia*, & una simul cum illis corpus Christi. Quærenti, quid significant illa *accidentia*? dicendum, ea significare *quantitatem panis*, quam afficiunt, & simul corpus Christi. Quærenti, quid frangit Sacerdos, & fidelibus tanta religione distribuit?

ref-

(a) Lib. III. de Eucharistia cap. 22.

respondendum, *quantitatem panis, & simul corpus Christi*. Sicuti ergo Scholasticis hæc minime absurda sunt, ita neque heterodoxis, quæ illis opponit doctissimus Bellarminus, absurda videbuntur.

Ratio quoque vacillat, quam ex veneratione jure debita tanto Sacramento ille desumit. Ait enim: *si una cum corpore Domini substantia panis sub iisdem accidentibus contineretur, periculum esset, ne simpliciores adorarent panem, quod scilicet illi non distinguant, sed simpliciter adorent, quod sub illis speciebus continetur (a)*.

At, inquam, vacillat hæc ratio, imo & ferme corrui, *absolutis Scholasticorum accidentibus* admissis. Nemo quippe non videt, idem prorsus futurum esse periculum, si remaneat *quantitas* panis una simul cum reliquis omnibus ejusdem panis *sensibilibus qualitatibus*. Neque enim distinguunt simplices, sed id simpliciter adorant, quod illis apparet. Ergo cum, quod illis apparet, sit aggregatum reale ex *quantitate* panis, ejusque *accidentibus*, vel periculum est, ne hoc illi adorent, non corpus Christi; vel neque timendum, quominus iidem ipsi, non Christi corpus, sed panis substantiam, si ibi esset, venerationem.

Tertio: congruum non esse, ait, ut simul maneant cibus ventris, & cibus mentis, panis terrenus, & panis cælestis (b). Verum, si id congruum non est, neque congruum esse potest, ut cum Christi corpore simul maneant *accidentia* panis. Et illa enim vere manducantur; neque minus terrena sunt, ac ipsa panis substantia. Hæc igitur cum ita sint, non est profecto, cur Scholastici in explicando Eucharistiæ Sacramento nimis de sua *absolutorum accidentium* doctrina sibi blandiantur, quasi nempe ea una ipsa sit, in qua tantum catholicæ fidei dogma facilius, quoad fieri ab homine potest, explicetur. Mea est opinio constansque sententia, non minus Scholasticos, quam Recentiores, cum agitur de hoc mysterio, captivare debere intellectum in obsequium fidei, ratur omnes fixumque habentes, in hoc potissimum factam a Deo fuisse *memoriam mirabilium suorum (c)*.

PRO.

(a) Lib. III. de Eucharistia cap. 22.

(b) Ibidem.

(c) Psalm. CX. v. 4.

PROPOSITIO IX.

Necessarium non est, qualitates sensibiles panis, & vini, adeoque etiam corporum reliquorum, sint accidentia absoluta, quæ, consecratione peracta, sine illarum rerum substantia remaneant, ut Corpus Christi Domini sub speciebus panis, ejusque Sanguis sub speciebus vini vere & realiter sint in Eucharistia, nobisque sub illis tradantur.

114. Præscindimus hic a Conciliis, videlicet non quærimus, neque determinamus hoc loco, quid nomine *specierum* panis, & vini, sub quibus dicunt Concilia Corpus, & Sanguinem Christi Domini in Eucharistia existere, eadem ipsa intellexerint (id enim infra ad trutinam revocabitur), sed tantum contendimus, *absoluta* Scholasticorum *accidentia* non requiri, ut Corpus Christi Domini sub *speciebus* panis, ejusque Sanguis sub *speciebus* vini in Eucharistia vere & realiter sint, nobisque in illa se prodant.

Hoc itaque præmissò, sic ostenditur propositio. Corpus Christi existere in Eucharistia sub *speciebus* panis, ejusque Sanguinem sub *speciebus* vini, non est aliud, vere proprieque loquendo, nisi Corpus, & Sanguinem Christi ita in hoc Sacramento existere, nobisque tradi, ut alterum a pane, a vino alter discerni, sensuum ministerio, a nobis nequaquam possit (§. 18.). Ut autem Corpus, & Sanguis Christi Domini hoc modo sint in Eucharistia, nobisque in illa tradantur, non requiritur, *qualitates sensibiles* panis, & vini sint *accidentia absoluta*, sub quibus, consecratione peracta remanentibus, Corpus, & Sanguis Christi Domini, veluti sub velo, in hoc Sacramento delitescant. Satis est enim, ut Christus Dominus ex loco, in quo ante consecrationem erant panis, & vinum, & in quo post consecrationem *vere & realiter* ipse existit, eodem penitus modo sensoria nostra afficiat, quo eadem ipsa a pane, & a vino affici naturaliter solent, & ante consecrationem reapse ab rebus illis afficiebantur (§. 44.). Ergo *absolutis* Scholasticorum *accidentibus* opus non est, ut Corpus Christi sub *speciebus* panis, ejusque Sanguis sub *speciebus* vini in Eucharistia existant.

Sufficere porro ad apparentiam Christi Domini sub *speciebus* panis, & vini in Eucharistia, ut ex loco, in quo ante consecrationem erant panis, & vinum, & in quo post consecrationem ipse est, eodem modo, quo a pane, & a vino immutari solent, sensoria nostra moveat ille

ille, atque afficiat, luculentissime confirmatur ex modo, quo ab Angelico Doctore, & a Viro doctissimo P. Cornelio a Lapide ex apparitiones factæ dicuntur, in quibus Christus Dominus nonnullis piis Viris sub specie pueri, vivæ carnis, & sanguinis in Eucharistia, discipulis euntibus in Emmaus sub specie peregrini, nec non Magdalena, dum ejus corpus e sepulchro clam sublatum credidit, sub specie hortulani sese videndum præbuit. Certum enim est, Angelicum Doctorem si audiamus, apparitiones a Christo Domino interdum factas in hoc Sacramento sub speciebus pueri, vivæ carnis, & sanguinis, ex eo tantum contingere potuisse, quod, ut ille ait, *intuentium oculi tunc immutarentur tali immutatione, ac si expresse viderent exterius carnem, vel sanguinem, vel puerum, nulla immutatione facta ex parte sacramenti* (a), hoc est, nullis novis absolutis accidentibus in subsidium adscitis, sub quibus, prioribus destructis, Christus ipse delitesceret. Ergo ad apparitionem quoque Christi Domini sub speciebus panis, & vini in hoc eodem sacramento satis est, ut externa intuentium sensoria eo modo, quo a pane, & a vino affici naturaliter solent, ab ipso Christo immutentur. Modum similiter explicans doctissimus Cornelius a Lapide, quo Christus discipulis euntibus in Emmaus sub peregrini specie post resurrectionem apparuit, factum id esse, ait, quia corpus Christi, in se licet idem, & immutatum manens, tamen quia Verbo unitum erat, & quia gloriosum, potestatem habebat, uti se occultandi, ac retinendi species sui corporis, ne ad oculos aliorum diffunderentur, sic & visum intuentium immutandi eo modo, quo ipsi libuerit, idque vel divaricando, & diverso modo imprimendo species, vel medium immutando, uti faciunt specula, vel ipsum etiam visus organum immutando. Hoc est enim, quod ait Lucas: oculi eorum tenebantur, a Jesu, ne officio suo fungi possent, perinde ac si velamine quopiam obducti fuissent, unde postea statim, ut voluit Jesus, eum agnoverunt. Idem & multo magis dico de auribus, & auditu, scilicet Christum a discipulis non fuisse agnitum ex voce, quia multo facilius est mutare vocis sonum, ac modum exprimendi, & pronunciandi (b). Loquens quoque idem Vir Cl. de apparitione facta Magdalena sub specie hortulani, causam fuisse, ait, quamobrem illa nesciret, ipsum esse Jesum, quia alia specie, scilicet hortulani, ei apparebat, uti euntibus in Emmaus specie peregrini. Gloriosa enim corpora possunt apparere ea specie, & forma, qua volunt; idque faciunt non mutando ipsam sui vultus figuram, & formam, sed impediendo, ne hac vultus figura integras sui species, sed re-

B b

fra-

(a) P. III. q. 76. artic. 8.

(b) Comment. in Lucam cap. XXIV. v. 16.

fractas, dimidiatas, & distractas ad oculum intuentis jaciat (a). Itaque, sicuti factum fuit sine ullo accidente absoluto, sed sola externorum sensoriorum immutatione, ut Christus Dominus videretur sub specie hortulani, & peregrini, imo etiam præberet sese in hoc sacramento sub speciebus pueri, viva carnis, & sanguinis; ita sola quoque eorundem sensoriorum immutatione fieri potest, ut sub panis, vinique speciebus sese nobis in hoc eodem sacramento videndum exhibeat. Nulla enim ratio apparet, quamobrem si aliquæ ex hisce apparitionibus per solam externorum sensuum immutationem fieri potuerint, omnes non possint.

Posse autem Christum Dominum ex se immediate, nullo scilicet *absoluto accidente* in subsidium assumpto, afficere in hoc Sacramento externa intuentium organa, perinde omnino atque a pane, & a vino ante consecrationem illa afficiebantur, probatione non indiget. *Erroneum quippe est, dicere, inquit S. Thomas, Deum non posse facere per seipsum omnes determinatos effectus, qui sunt per quamcunque causam creatam (b);* utque habet idem S. Doctor alio loco, sicuti in potestate Christi erat, *ut corpus suum videretur, vel non videretur, ita in potestate ejus erat (post resurrectionem), ut ex ejus aspectu formaretur in oculis intuentium vel forma gloriosa, vel non gloriosa, aut etiam commixta, vel qualitercunque se habens (c).* Necesse non est igitur, *qualitates sensibiles panis, & vini sint accidentia absoluta, quæ sine rerum illarum substantia divinitus existant, ut sub speciebus panis, & vini Christus Dominus in venerabili Eucharistiæ sacramento sese nobis videndum exhibeat.*

Opponet aliquis, verum quidem esse ex S. Thoma, apparitiones Christi Domini in hoc sacramento sub specie pueri, viva carnis, & sanguinis propterea tantum contigisse, quod tunc ab ipso Christo perinde immutarentur intuentium oculi, *ac si expresse viderent exterius carnem, vel sanguinem, vel puerum; sed ex eodem quoque constare, id contingere, quando uni videtur sub specie carnis, vel pueri, aliis tamen videtur, sicut & prius, sub specie panis, vel quando eidem ad horam videtur sub specie carnis, vel pueri, & postmodum sub specie panis (d); quemadmodum ex eodem itidem constat, quandoque contingere tales apparitiones non per solam immutationem videntium, sed specie, quæ videtur realiter exterius existere; & hoc esse, quando sub tali specie ab omnibus videtur, & non ad horam, sed per longum tempus ita permanet*

(a) Comment. in Joannem cap. XX.
v. 14.

(b) P. I. q. 105. artic. 2.

(c) P. III. q. 54. artic. 1. ad tertium.

(d) Ibidem q. 76. artic. 8. respondeo dicendum.

net (a). Ergo ex S. Thoma, fieri nequit sine accidentibus absolutis, ut Christus Dominus sub speciebus panis, & vini nobis in Eucharistia appareat; cum sub hisce speciebus ab omnibus videatur, & non ad horam, sed per longum tempus.

R. negando *conseq.* Non enim negat S. Doctor, posse fieri per solam oculorum immutationem, seculis nempe *accidentibus absolutis*, ut Christus Dominus videatur sub *speciebus carnis*, vel *pueri*, adeoque & sub *speciebus panis*, & *vini*, ab omnibus, & non ad horam, sed per longum tempus; verum dumtaxat opinatur (semper enim utitur verbo *videtur*) apparitiones Christi factas in hoc sacramento sub *specie pueri*, vel *carnis* ideo contigisse per solam organorum immutationem, non sic autem ejusdem apparentiam sub *speciebus panis*, & *vini*; quia, cum illi indubia res fuerit, extare *accidentia absoluta*, eaque post consecrationem in Eucharistia remanere, verosimilius esse credidit (& recte quidem, *absolutis accidentibus* admissis) apparitiones Christi sub *specie pueri*, & *carnis* non provenire, quemadmodum ejusdem apparentiam sub *speciebus panis*, & *vini*, ab *accidentibus absolutis*, sed a sola immutatione sensuum externorum; jure scilicet ac merito putans S. Doctor, necessarium non esse ad apparitiones, quæ neque fiunt omnibus, neque multum durant, ut, destructis iis, quæ sunt *panis*, & *vini*, alia *accidentia*, *pueri* nimirum, vel *carnis*, reipsa producantur. Unde Cl. P. Suarez hoc signum a S. Thoma datum vocat *moraliter satis verisimile*; quia *facilius est*, inquit, *ita fieri*; & quando ex aliis conjecturis aliud non constiterit, ita certe existimandum est; quia in omnibus his rebus, quæ miraculose apparent, id semper judicandum est fieri, quod *facilius est* magisque consentaneum apparentibus signis, & ad finem ipsius apparitionis est sufficiens (b).

Mihi porro nunquam fuit animus probandi auctoritate S. Thomæ, apparentiam Christi Domini, quæ modo fit in Eucharistia, sub *speciebus panis*, & *vini*, non dependere ab *accidentibus absolutis* (esset enim, in meridie cæcutire), sed tantum, (& hoc velim alte animo infigatur) opus non esse illis *accidentibus*, ut sub *speciebus panis*, & *vini* Christus in hoc sacramento nobis se prodat, quemadmodum ex S. Thoma sine illis *accidentibus* factum non semel fuit, ut sub *specie pueri*, *viva carnis*, & *sanguinis* a nonnullis piis Viris in hoc itidem sacramento interdum videretur.

Neque quisquam dicet, ut puto, posse quidem Christum Dominum sine *absolutis accidentibus* sese per aliquod breve tempus, & ali-

B b 2. qui.

(a) P. III. q. 76. artic. 8. respondeo (b) Disp. LV. in III. p. S. Thomæ sect. 1. dicendum.

quibus tantum sub *aliena specie*, pueri scilicet, vel *viva carnis*, aut *sanguinis*, exhibere; at non posse sine illis *accidentibus* ita apparere omnibus, diuque multumque in hac apparitione persistere.

Contra est enim. Nam Divina potentia ita limitibus circumscripta non est, ut quod per breve tempus aliquando facit, diu conservare nequeat, quodque in uno agit, simul in pluribus operari non possit. Sane, si dependenter ab *accidentibus absolutis* potest Christus Dominus sub *speciebus* panis, & vini simul apparere pluribus, & diu multumque in hac apparitione durare, alterutrum, velimus nolumus, dicendum est, aut scilicet id totum etiam sine *absolutis accidentibus* fieri ab illo posse, aut non posse Deum facere per seipsum omnes determinatos effectus, qui sunt per quamcunque causam creatam: quod, ut diximus ex S. Thoma, est erroneum.

Nihil proinde juvat Auctorem *Dissertationis Physico-Theologicae de accidentibus Eucharisticis*, anno 1735., suppresso illius nomine, Neapoli editæ, ipsum, inquam, nullatenus juvat, quod ait, apparitiones scilicet Christi Domini sub forma peregrini, hortulani, & pueri, non esse de illis, quæ sensibus constanter apparent, & omnibus, ac semper sunt uniformes; ac propterea non valere ad inanem probandam realium accidentium permanentiam panis, & vini post consecrationem (a). Quippe, ut ex modo traditis manifeste constat, perinde omnino est ad harum omnium apparitionum causam, illæ sive multum, sive parum durent, sicuti etiam sive omnibus, sive aliquibus tantum ipsæ fiant.

Instat idem Auctor: sub specie hortulani, vel peregrini nulla debet realis conversio verificari; cum nullus in Christum hortulanus, nullus convertatur peregrinus. At de Christo sub speciebus Eucharisticis realis est conversio verificanda; cum panis in Christi corpus, & vinum in Christi sanguinem realiter convertantur. Debet ergo realis hujus, ac physica conversionis aliquod reale manere medium, quæ non sunt, nisi accidentia realia panis, ac vini (b).

R. neg. consequ. Aliud est enim, substantiam panis, & vini in corpus, & sanguinem Christi converti; aliud vero, Christi corpus sub speciebus panis, ejusque sanguinem sub speciebus vini in hoc sacramento contineri, nobisque tradi. Necessario non requiri ad transubstantiationem, ut aliquid termini a quo remaneat in termino ad quem; & ideo illam esse in tuto, quamvis nulla qualitas sensibilis panis, & vini sit accidens absolutum, quod, consecratione peracta, supersit, satis, ut puto, in superioribus demonstravimus (§. 106., & seq.).

se vero corpus Christi nobis sese prodere in hoc sacramento sub speciebus panis, ejusque sanguinem sub speciebus vini independentem ab omni accidente absoluto, illud est, quod modo propugandum suscepimus, quodque contendimus, ex dogmate transubstantiationis nelevissime quidem oppugnari.

Urget præterea: *species hortulani, vel peregrini, sub quibus Christus erat, accidentia esse sine proprio subjecto, nullus docet, nullus unquam dixit: at species Eucharisticas accidentia esse sine proprio reali subjecto, Concilia tradunt, Ecclesia docet. Species ergo Eucharistica realia esse debent accidentia, physica, & objectiva (a).*

R. *disting. majorem: nullus docet, nullus dixit, species hortulani, & peregrini, sub quibus Christus apparuit, esse accidentia, hoc est, entitates absolutas, naturaliter exigentes inhærere hortulano, & peregrino, concedo majorem: nullus docet, nullus dixit, illas species esse accidentia, nempe affectiones corporeas, easque existere sine proprio subjecto, hoc est, non existente objecto, quod naturaliter sentienti animæ repræsentant, nego majorem. Hoc enim sensu sumto tum accidente, tum subjecto, dicere omnes necessario debent, species hortulani, & peregrini, sub quibus Christus Dominus apparuit, esse accidentia, eaque tunc sine proprio subjecto extitisse; cum nihil certius sit, quam illas species esse affectiones corporeas, idque reipsa tunc non extitisse, quod repræsentabant. Et distinguo minorem: Concilia tradunt, Ecclesia docet, species Eucharisticas esse accidentia sine proprio reali subjecto, hoc est, illas esse entitates reales absolutas inhærentes substantiæ panis, & vini ante consecrationem, & post consecrationem easdem ipsas numero sine panis, vinique substantia existentes, nego min: Concilia tradunt, Ecclesia docet, species Eucharisticas esse accidentia sine proprio subjecto, hoc est, manere in Eucharistia sensibilitatem panis, & vini, ibi non amplius tunc existente panis, vinique substantia, concedo minorem, & nego conseq. Ut enim fuscè dicemus suo loco, nunquam docuit, nec docet Ecclesia, neque Concilia definire, tanquam dogma fidei, species panis, & vini, sub quibus Christus Dominus in Eucharistia existit, esse illa ipsa accidentia, quæ panis, vinique substantiæ ante consecrationem inhærebant; sed Ecclesia tantum docuit, & Concilia definiunt, corpus, & sanguinem Christi ita in hoc sacramento existere, nobisque tradi, ut, quamvis nulla in eo sit panis, & vini substantia, attamen neque corpus a pane, neque sanguinem a vino discernere sensuum ministerio valeamus.*

Sa-

Satisfit objectionibus.

I.

115. Duplici porro Philosophica ratione ostendere nititur laudatæ Dissertationis Auctor, absoluta Scholasticorum accidentia necessario in hoc sacramento esse admittenda. Ratio illius prima est: etiam facta consecratione, eandem figuram, & albedinem in Eucharistia videmus, eundem panis, & vini saporem gustamus, utriusque eundem percipimus odorem, eandem omnino superficiem tangimus. Ergo, deficiente per consecrationem substantia panis, & vini, permanentia realium accidentium panis, & vini, sensibus ipsis pervia est, ac nota. Constat enim, sensum nullo vitio laborantem decipi non posse circa proprium sensibile debite applicatum. Aliquando falluntur sensus circa proprium sensibile, sed vel ex defectu ipsius organi, ut quando cibi dulces gustantur amari; vel ipsius medii, sic remus etiam rectus apparet in aqua fractus; vel debita distantia, sic gigas a longe visus pigmeus videtur, & Sol maximæ magnitudinis parvus nobis apparet. Quod si nullus sit defectus neque ex parte organi vitiiati, neque ex parte medii improporionati, neque ex parte indebita distantia, sensus circa proprium sensibile decipi non potest. Atqui facta consecratione, nullus ex his defectibus constat. Ergo circa permanentiam realium accidentium sensus decipi non possunt. In hoc ergo sensibus credendum, præsertim ab Adversariis, experientia etiam superstitiose fidentibus (a).

R. disting. añs principalis enthymematis: etiam facta consecratione, eandem percipimus figuram, albedinem, odorem, saporem, & superficiem, hoc est, eandem illarum affectionum impressionem factam in externis sensoriis, quæ menti, dum illas percipit, objecti instar sola occurrit, concedo añs; percipimus eandem figuram, albedinem, odorem &c. hoc est, percipimus, eandem esse entitatem objectivam, quæ tam post, quam ante consecrationem, eas in sensoriis nostris impressiones exciter, quas figura, albedinis, odoris, saporis &c. sensationes in anima consequuntur, nego añs, & conseq. Cum enim, ut demonstratum alibi fuit (J. 38.), id, quod menti sentienti immediate, objecti instar, occurrit, quodque percipit illa, dum sentit, non sit nisi passio, sive motio ex rei sensibilis appulsu in externo sensorio excitata, nihil aliud sane requiritur, ut verum sit, nos eandem prorsus, quam ante, etiam post consecrationem vi-

de-

dere figuram, & albedinem, eundem nos gustare panis, vinique saporem, eundem horum corporum odorem percipere, eandemque omnino superficiem tangere, nisi, ut, quæ ante consecrationem in sensoriiis visus, gustus, olfactus, & tactus fiebant impressiones, eadem ipsæ, etiam consecratione peracta, in iisdem sensoriiis perficiantur. Possè autem easdem prorsus impressiones in illis fieri post consecrationem, quæ in ipsis ante consecrationem fiebant, quin aliquid reale panis, & vini post consecrationem supersit, satis ex dictis manifestum est. Ergo ex hoc, quod, facta consecratione, eandem figuram, & albedinem in Eucharistia videamus, eundem panis, & vini saporem gustemus, eundem penitus percipiamus odorem, eandemque omnino superficiem tangamus, inferre non licet, deficiente per consecrationem substantia panis, & vini, permanentiam realium accidentium panis, & vini sensibus ipsis perviam esse, ac notam.

Ad illud vero, quod additur, de sensuum certitudine, dico, verissimum esse, sensum nullo vitio laborantem decipi non posse circa proprium sensibile debite applicatum. Concedo etiam, facta consecratione, nullum in sensibus haberi defectum neque ex parte organi vitiati, neque ex parte medii improporionati, neque ex parte indebita distantia; & ideo nullam prorsus tunc in sensibus deceptionem contingere. Sed nego, aut idcirco admittenda esse accidentia absoluta in hoc sacramento, aut dicendum, in illo decipi sensum circa proprium sensibile, quin vel ex parte organi, vel ex parte medii, vel ex parte distantia defectus aliquis habeatur. Ut enim egregie observat P. Maignan, notitia sensuum experimentalis, & quodcunque est eorum experimentale iudicium, in hoc versantur, ut impressionem a sensibili factam sensus non modo excipiant passive, tamquam subjecta inertia, vel sine anima; sed praterea percipiant active, id est, agnoscant, se excipere; id enim est sentire, ut suo loco explicui. At vera circa hoc præcise nulla potest in sensibus esse deceptio. Cum enim sensus non habeat notitias, nisi simplices, aut ad summum complexas, id est, non componant, neque dividant, & multo minus discurrant, consequenter de objecto non percipiunt, seu non norunt, nisi id, quod ab eo excipiunt; neque aliud ab eo excipiunt, quam quod ab ipso impressum eis est, solam scilicet speciem impressam. Unde quia iudicium sensuum (quodcunque illud est, ut dixi, iudicium) non est nisi sensatio; hac vero non est aliud, quam solius impressæ speciei perceptio (& eatenus apprehensio, eaque incapax falsitatis) manifestum est, non esse posse in iudicio sensuum deceptionem ex parte speciei, ut percepta; cum esse nequeat ex parte ejusdem, ut excepta, quacunque tandem res dicatur

spe-

species, & a quocunque impressa. Perinde enim, & aque species a sensu excipitur, sive ea sit formaeducta de potentia subjecti, ut dicitur, sive sit actio objectiva (imò nisi hæc affuerit, illa erit inutilis ad movendum sensum) item sive ab homine imprimatur, sive ab angelo apparente, sive a pane, vel quantitate &c. ut dicitur, sive a Deo supplente &c. ut superius dixi. Hinc vero consequens est, in Eucharistia sacramento minime decipi v. g. visum, ubi percipit veram, quam vere excipit, panis impressam speciem, quamvis hæc imprimatur a Christo, cui est aliena, & non ab aliqua, ut dicitur, quantitate, albedine &c., aut aliis ex parte residuis, quibus ea sit propria; cum, ut dixi, facultatis visivæ non sit judicare, vel discernere quid, vel a quo principio effectivo sit ea species, an scilicet a Christo (nempe tradente se ut manducandum, ita cernendum, & attrectandum sub specie panis) an a præsumtis illis quantitate, albedine &c. Sicut nec est ejusdem facultatis visivæ judicare, vel discernere, an species albi sit a nova cadaveris albedine, an a veteri, quæ erat in vivente, item ab homine, an ab angelo apparente in specie hominis (a). Itaque, nisi demonstraverit Cl. Adversarius, non quæ in externis sensoriis a pane, & a vino impressiones fiunt, sed quæ illorum corporum substantiæ reales affectiones inhærent, illud esse, quod visu, gustu, olfactu, & tactu ab sentiente anima ante consecrationem immediate percipiebatur; in ævum stabit, sensus ipsos non decipi, dum eadem prorsus tam post, quam ante consecrationem illis apparet figura, eademque albedo, idem odor, & sapor, tametsi nihil prorsus panis, qui ante consecrationem habebatur, ea peracta, supersit. Et sane, si, ut præclare monet S. Augustinus, non solum oculi, sed etiam omnes corporis sensus ita renunciant, ut afficiuntur, quid ab eis amplius exigere debeamus ignoro (b). Injustum est enim, eodem teste, ab eis exigere, plusquam possunt (c).

At vero (pergit laudatus P. Maignan) si cui visum fuerit, ut forte videbitur Cl. Adversario, aliisque etiam, sensuum in hoc deceptionem esse aliquam, ex eo quod in Eucharistia sensibus exhibetur immediate percipienda species panis, non ea, quam facit, atque emittit conaturaliter panis, sive quantitas, albedo, aliaque panis accidentia sensibilia, sed ea, quam semoto pane, semotisque ejus accidentibus, Christus, sive Deus supplens, facit supernaturaliter; & simul visum fuerit, istius

(a) In appendice de speciebus Eucharisticis n. 43. ad cap. 33. *Philos. naturæ.*

(b) Lib. de vera Religione n. 62., alias cap. 33.

(c) Lib. III. contra Academicos n. 26., alias cap. 12.

istius generis deceptionem esse talem, ut omnino dedeceat hujus sacramenti dignitatem, sitque propterea arcenda, restitutis panis accidentibus: si cui, inquam, ita visum fuerit,

Dicam cum eodem celeberrimo Auctore, me non satis videre, cur non ibi quoque sit suo modo, & quidem de se multo fœdior deceptio, ex eo quod in eodem sacramento sensibus eisdem exhibetur non id, quod ex vi sensitivæ externæ perceptionis existimatur, siue interius judicatur exhiberi, sed aliud quid maxime ab eo diversum: nempe exhibetur non substantia panis, sed Christi Domini corpus. Quia tamen deceptionis posterius istud genus tum Ecclesia post D. Thomam in eo rithmo admittit, ex quo visus, tactus, gustus in te fallitur; tum necessarium omnino fuit ad sacramenti veritatem, non est inconveniens, ut prius illud alterum genus deceptionis toleretur; cum id sacramenti veritati minime officiat, sed solum eam tegat (& quidem tegat aptissime) quam omnino tegi fuit necessarium ex institutione Dei. Et vero si aliqua circa hoc religione tenemur, longe majus piaculum est admittere deceptionem in sensu interno, qui præcipuus, imo solus proprie, & vere sensus est, quam admittere in oculo, & manu, aliisque externis organis. At in sensu interno manifeste ac necessario cogimur admittere eam deceptionem; cum evidenter non minus decipiat in hoc sacramento (quantum ad existimatam panis materialis veritatem superstitem) homo prout animal, atque etiam prout rationalis præcise, idest prout nondum fide illuminatus, quam deciperetur brutum, quatenus aque homini, ac bruto subtrahitur veritas ejus, quod sub tali specie albi, sapidi &c. solet præberi, quodque verius, nempe ut quod, ab illis percipi solet, quam percipiatur albedo, sapor &c. quia hæc nonnisi ut quo percipiuntur (ut cum iis loquar, cum quibus disputo) panis autem secundum se percipiatur ut quod. Imo quia D. Thomas per ipsummet D. Thomam explicandus est, non sane ille putat esse deceptionem, ubi pro accidentibus, ut dicitur, quantitatis, albedinis &c. eorumque speciebus naturaliter impressis, ponuntur eorundem; seu potius ipse panis, ut albi, ut sapidi &c. sola a Christo, seu Deo miraculose impressæ species. Afferit enim clare S. Doctor 3. p. q. 76. art. 8. non esse deceptionem, quando (apparente, ut aliquando factum est, carne, vel sanguine, vel puerulo in Eucharistia) formatis divinitus speciebus, immutantur oculi tali immutatione, ac si expresse viderent exterius carnem, vel sanguinem, aut puerum. Item non putat esse deceptionem, quando Christus apparuit in specie peregrini &c. Si vero non est deceptio, dum divinitus a Christo formantur species non propriæ Christo, sed carni, sanguini, puero, peregrino &c. quæ ratio est, ut dicatur deceptio, dum aque divinitus, ab eodem scilicet Christo,

C c

seu Deo formantur species, non ipsius Christi propria, sed panis, in cuius nimirum specie sicut vult manducari a fidelibus, ita & vult eisdem apparere (a). Constat igitur (concludit Vir Cl.) nullam sensibus deceptionem fieri ex eo quod sentienda eis exhibeatur in Eucharistia species impressa panis albi &c. non vero quantitas, ut dicitur, aliqua ex pane superstes, item albedo &c. Non, inquam, in hoc, vel ex hoc deceptio fit ulla sensibus; quia de quantitate, albedine &c. quid rei sint, vel an sint, vel quomodo sint, non judicant sensus, quatenus ad summum non excipiunt, nisi speciem quantitatis (si qua est ea quantitas) impressam; item nonnisi speciem albedinis (si qua ea est albedo) impressam &c. At non minus excipiunt speciem (quam ego dico) impressam panis quanti, item speciem impressam panis albi &c. quam speciem quantitatis &c. adeoque non minus istam excipientes immunes sunt a deceptione, quam excipientes illam (b). Addit porro, & recte quidem, quod potius deciperentur sensus, si forte judicarent, se quantitatem, albedinem &c. residuas accidentales percipere sensibilibus: fallarentur, inquit, revera tunc, eo quod nulla talis in rebus est quantitas, vel albedo &c. ut puto satis a me probatum suis locis. Et saltem deberet adversarius probare prius huiusmodi quantitatis, & albedinis &c. veluti formarum e subiectis educatarum existentiam in rebus, & postea convenientius inferret fieri sensibus deceptionem, dum eis pro quantitate, albedine &c. sibi notis, exhiberetur percipienda sensibilibus species panis, ut quanti, panis ut albi &c. (c).

I I.

II 6. Ita secundo argumentatur laudatus Auctor: permanentia realium accidentium panis, & vini ante consecrationem non magis sensibus pervia est, ac nota, quam sit permanentia realium eorundem accidentium post consecrationem, ut certum est. Atqui permanentia realium accidentium panis, & vini ante consecrationem est certissima, ac infallibili sensuum experimento comprobata. Quis enim ante consecrationem panis motum, figuram, molem, seu trinam dimensionem (ut verbis utar adversariorum) suo sensu non percipit, vel percipiendo, sapienter de illorum existentia, ac reali permanentia dubitare audebit? Quod enim sensibus constanter apparet, omnibus, & semper, verum est, ne Authorem naturæ, ipsum Deum, etiam erroris, ac falsitatis inducat Authorem. Permanentia igitur realium accidentium panis, & vini post consecrationem est certissimo, ac infallibili nostrorum sensuum experimento comprobata.

(a) Loco citato n. 44. 45. 46.

(b) Ibidem n. 51.

(c) Ibidem n. 52.

probata: quæ cum sit ab omnibus, ac singulis, & semper eadem claritate percepta sensibus, in dubium sapienter revocari non potest (a).

R. primo, argumentum nimis probare. Evincit enim, non *accidentia* tantum, verum & ipsam panis *substantiam* post consecrationem remanere. Sic namque confici potest argumentum ex eo ipso principio, cui uni tota Cl. Adversarii ratiocinatio innixa est: *quod sensibus constanter apparet, omnibus, & semper, verum est, ne Authorem naturæ, ipsum Deum, etiam erroris, ac falsitatis inducat Authorem.* Certum est autem, non minus ante, quam post consecrationem, sensibus nostris constanter id apparere panem, quod in Eucharistia existit. Ergo si, quod sensibus constanter apparet, adeo verum, etiam cum de Eucharistia differitur, habendum a nobis est, ut, quemadmodum ille ait, *in dubium sapienter revocari non possit*, dicamus oportet, non tantum *accidentia* panis, sed etiam illius *substantiam*, consecratione peracta, remanere. Profecto non dissimili argumento utuntur Lutherani, ut evincant, nullam in hoc sacramento *transubstantiationem* fieri, sed illum ipsum panem in eo manere, qui ante consecrationem habebatur.

Dicit forte Vir Cl., objectum sensuum non esse *substantiam*, sed tantum *accidentia*; & ideo de illis tantum habere locum axioma: *quod sensibus constanter apparet, verum est.*

Sed contra: quia licet sensus nonnisi circa *accidentia* versentur, ipsaque sola, sensuum ministerio, a nobis percipiantur, indubia tamen res est, nos uti testimonio sensuum, non solum ut de *accidentibus*, verum etiam ut de ipsa corporum *substantia*, sive natura pronuntiemus. Constat enim, *aurum* a nobis dici, in quo *accidentia* auri, *argentum*, in quo argenti *accidentia* deprehendimus, & ita porro de ceteris. Ergo, quamvis sola *accidentia* sint objectum sensuum, dicendum tamen est, vel non sufficere sensuum testimonium, ut panis *accidentia* in Eucharistia remanere, tuto dicamus; vel etiam *substantiam* panis, si illorum testimonio stare *absolute* velimus, in hoc sacramento, penitus contra fidem, admitti oportere. Hinc S. Thomas ita canit in rithmo ad sacram Eucharistiam: *visus, tactus, gustus in te fallitur*, ut scilicet nos moneret atque instrueret, de tanto sacramento ex testimonio sensuum minime esse judicandum.

R. 2. *negando suppositum*, cui hæc tota objectio innititur, videlicet ipsa corporum *accidentia*, sive *qualitates*, seu *affectiones* esse id, quod, instar objecti, nobis in sensatione occurrit, & a nobis, dum sentimus, immediate percipitur. Satis namque ostendimus (§. 38.),

C c 2 *non*

(a) Dissert. laudatæ pag. 24.

non objectum extra nos positum, a quo sensoria immutantur, sed passionem, sive motionem in ipsis sensoriis ab eo excitatam, illud esse, quod anima nostra sentiendo percipit, & percipiendo sentit. Quæ igitur non magis ante, quam post consecrationem sensibus nostris pervia sunt, ac nota, non sunt, ut dicitur, & pro certo habetur in argumento, *realia accidentia panis, & vini*, sed tantum certæ quædam motiones, in organis ipsorum sensuum a pane, & a vino ante consecrationem, post consecrationem vero a Christo Domino excitatæ, per quas deinde ipsæ panis, vinique affectiones sentienti animæ repræsentantur. Hallucinatur propterea Vir Cl., dum ait, *permanentiam realium accidentium panis, & vini ante consecrationem esse certissimam, ac infallibili sensuum experimento comprobata*; hallucinatur, inquam, si putat, affectiones panis, & vini ante consecrationem ita a nobis per sensus percipi, ut illæ in se sint immediatum objectum quod ipsius perceptionis. Fallitur quoque, dum ait, neminem ante consecrationem panis motum, figuram, molem, seu trinam dimensionem suo sensu non percipere, neque percipiendo posse sapienter de illorum existentia, ac reali permanentia dubitare: fallitur, dico, si id memorato eodem sensu intelligat. Ante consecrationem quippe non aliud nobis certum est, neque aliud infallibili sensuum testimonio comprobatum habemus, nisi a pane, & a vino eas motiones in sensoriis nostris excitari, quas tunc percipimus. Nemo similiter ante consecrationem eas impressiones suo sensu non percipit, quæ in externis sensoriis factæ sunt, & fiunt a panis motu, figura, & dimensione; neque potest aliquis, dum hæc impressiones percipit, sapienter dubitare, quominus impressiones ipsæ a pane, & a vino proveniant. Cum enim certi simus, circa panem ante consecrationem nullum prorsus factum esse miraculum, nullamque illusionem tunc in nobis contingere, sed naturaliter fieri, quæcunque tunc fiunt, non est, cur ne vera sint de pane, quæ de illo ex ejus actione percipimus, vel levissime dubitemus. Quoniam autem etiam post consecrationem eadem in sensoriis nostris impressiones fiunt, quæ in illis ante consecrationem agebantur, judicandum quidem esset ex testimonio sensuum, non aliud, nisi panem, tunc etiam haberi; verum, cum Divina auctoritate nobis certissime constet, tunc non haberi panem, sed corpus Christi, dicere & firmiter credere debemus, ibi non esse amplius, quod antea ibi erat, sed aliud omnino diversum, quamvis ob similes impressiones in sensoriis factas idem prorsus esse videatur. Concedimus itaque Cl. Adversario, sensus nostros eodem penitus modo, quo ante, etiam post consecrationem immutari; & ideo, quod est in

Eucharistia post consecrationem, non posse, ministerio sensuum, ab eo discerni, quod ante consecrationem nobis obiciebatur. Sed negamus, existentiam *realium accidentium* inferri hinc posse, nisi primo demonstret Vir Cl., sine illis non posse fieri, ut eodem modo tam ante, quam post consecrationem sensus nostri afficiantur. Concedo etiam, verum esse, quod sensibus constanter apparet. Persuasum tamen simul habeo, Cl. Adversarium mihi quoque concessurum, posse in Eucharistia constanter apparere panem, quin propterea verum sit, ibi esse panem; & ideo vulgatum illud: *verum est, quod sensibus constanter apparet*, ita esse intelligendum, ut sit sensus, *quod sensibus constanter apparet, tale reipsa esse, quale illis apparet*, si tale appareat sensibus, quale, nullo prorsus interveniente miraculo, sed tantum spectatis naturæ viribus, illis ipsum appareat, necesse est.

III.

117. Opponit Cl. P. Boucat, & quidem primo, miracula sine ulla necessitate in hoc sacramento a nobis multiplicari. Etenim, inquit, si juxta Peripateticos accidentia sint absoluta, unicum solummodo (miraculum) admittitur, quo nempe Deus, facta consecratione, sustentat quantitatem panis, & vini, cui quidem quantitati aliæ omnes qualitates, & modi inherent. At vero, si accidentia nihil aliud sint, quam impressiones divinitus factæ in sensibus nostris, tot erunt admittenda miracula, quot erunt homines unam videntes hostiam, & aspicientes; imo tot miracula in uno homine patrari necesse est, quot diversæ in diversis sensibus impressiones fiunt. Igitur miracula sine necessitate in hoc systemate multiplicantur (a).

R. neg., a nobis multiplicari miracula sine necessitate. Neque enim id ex eo legitime sequitur, quod, admissa quantitate, quæ & distinguatur a substantia, & sit reliquorum omnium accidentium immediatum subjectum, unum sufficiat miraculum ad salvandum, quomodo in Eucharistia non sit panis, & tamen panis in ea haberi videatur; contra vero in nostra hypothesis tot admitti debeant miracula ad salvandam eandem illam panis apparentiam, quot sunt homines unam videntes hostiam; imo tot, quot diversæ in diversis sensibus impressiones fiunt. Quæ siquidem nos urget necessitas ad tot miracula admittenda, ratio illa est, qua demonstravimus, quantitatem corporum non esse entitatem absolutam ab illorum substantia realiter distinctam, neque

(a) Tom. VI. Theol. Patrum P. II. Dissert. III.
sect. 3. pag. 429. edit. laudatæ.

que *sensibiles* eorundem *qualitates* esse *accidentia absoluta*, nempe *entitates* ejus naturæ, quæ sine substantia, quam afficiunt, existere divinitus possint. Primo ergo hanc, quam ipsi negamus, evincat P. Boucat, esse *quantitatis*, ceterarumque *sensibilium qualitatum* naturam, & tunc fateri cum illo non dubitabimus, miracula sine ulla prorsus necessitate à nobis multiplicari. Moneo solum, ad ponendam *quantitatem* distinctam a *substantia*, & *sensibiles* corporum *qualitates* ejus naturæ stabiliendas, cujus eas esse volunt Scholastici, minime sufficere, multa in hoc sacramento hinc vitari miracula, illudque humano captui magis accommodari. Quandoquidem, si valeret hæc ratio, dicendum esset, *absoluta* ipsa *accidentia* etiam naturaliter existere posse sine subjecto, & corpus *locali* sua *extensione*, *entitativa*, ut ajunt, non amissa, naturæ viribus posse privari; cum certe, hisce positis, plura circa Eucharistiam explicentur, quin ad Divinam extraordinariam potentiam recursus fiat (a). In hoc itaque sacramento nihil negotii facessere nobis debent miracula; cum in nulla hypothesis illud valeat sine miraculis explicari, & jure quidem. Est enim Eucharistia, inquit doctissimus Bellarminus, *memoriale omnium miraculorum* (b).

IV.

118. Opponit ille *secundo*, Recentiorum opinione admissa, nullam amplius fieri posse *realem fractionem* in Eucharistia, quam tamen fieri, certum est. Hac enim *facta hypothesis*, inquit ille, *nihil frangitur in divisione hostiæ, quæ fit in Missa*. Non quidem corpus Christi; de eo enim canit Ecclesia: nulla rei fit scissura, signi tantum fit fractura. Neque etiam frangi potest *substantia panis*; jam enim nulla superest, ut fides docet. Relinquitur igitur, *quantitatem panis, & vini*, *facta transubstantiatione*, remanere, quæ sit *accidens absolutum*, proprio denudatum subjecto, cujus ope pro more frangi possit *hostia in sacrificio* (c).

R. primo, non esse adeo certum, *realem* esse *fractionem*, quæ in *hostia consecrata* peragitur, ut, qui eam nonnisi *apparentem* dixerit, censendus sit perperam in fide sentire. Fuisse olim, qui de *Eucharistica fractione* ita opinarentur, quin de religione propterea apud illos actum fuerit, testatur Magister Sententiarum. Inquit enim: *quibusdam*

(a) Vide Scotum in IV. senten. Distin. XI. q. 3.

(b) Lib. III. de sacramento Eucharistiæ cap. 9.

(c) Loco citato.

dam placet, quod non sit ibi fractio, sicut videtur, sed dicitur frangi, quia videtur frangi. Quibus obiicitur, quod ait Ambrosius: nihil falsi putandum est in sacrificio veritatis, vel sicut fit in Magorum præstigiis, ubi delusione quadam falluntur oculi, ut videant esse, quod non est. Ad hoc illi dicunt: non fallit nos visus, nec fallitur, quod esset, si crederetur, ita frangi, ut videtur. Nec illusio est; quia ad utilitatem fidei, non ad deceptionem ita fit, sicut & Christus se ostendit duobus discipulis in via in specie peregrini; nec in eo tamen talis forma erat, sed oculi eorum tenebantur, ne eum agnoscerent (a). Itaque, sicuti panis apparet, quod nobis in Eucharistia traditur, licet panis revera non sit; ita videtur, fractionem in ea fieri, quamvis reapse nulla ibi fractio peragatur: uno verbo, nonnisi apparenter frangimus, quod nonnisi apparenter est panis; & ideo sicuti nullum requiritur accidens absolutum, ut Christus Dominus sub panis specie in Eucharistia nobis appareat, ita nullo haud dissimili accidente opus est, ut, quod in illa existit, frangi videatur.

Sed contra arguit P. Picinardus. Ubi, inquit, non apparens, sed verus, & realis adest fractionis terminus, ibi vera, & realis, nedum apparens fractio est. Sed in sacramento adest verus, & realis fractionis terminus, scilicet multiplicatio positionum corporis Christi in diversa pixide, in qua collocatur, vel in diverso hominum ore, quibus communicatur, aliter nec ibi realiter, sed apparenter existere diceretur corpus Christi, neque istis realiter, sed apparenter communicaretur, quod hæreticum est. Ergo & fractio vera, & realis esse debet (b).

R. disting. ma: ubi non apparens, sed verus, & realis adest fractionis terminus, ibi vera, & realis, non autem tantum apparens habetur fractio, si ille terminus vere & realiter per ipsam fractionem producat, concedo maiorem; si vere ille non producat per ipsam fractionem, nego maiorem; & distingo minorem: multiplicatur realis præsentia Corporis Christi per fractionem, ita ut fractio sit vera & realis illius multiplicationis causa, nego minorem; ita ut fractio non sit vera & realis causa illius multiplicationis, concedo minorem, & nego consequentiam. Fateor, veram & realem debere esse fractionem, per quam non apparenter tantum, sed vere & realiter aliquid producit; sed nego, realem illam esse debere, si nihil reale per eam fiat. Ita res se habet, loquendo de præsentia sacramentali Christi Domini, quæ per fractionem specierum dicitur multiplicari. Multipli-

(a) Lib. IV. Sententiarum Distin. XII.

(b) De imputato Scholasticis studio effræni in Aristotelem cap. VII. §. 2.

plicatur quidem sacramentalis positio Corporis Christi in loco, dum sacramentales panis species frangi videntur; efficiens tamen illius multiplicationis causa non fractio, sed Deus ipse est. Is nempe sicuti efficit sua omnipotenti virtute, ut, quod in Eucharistia nobis panis apparet, Sacerdotum manibus frangi videatur; ita ille ipse efficit solus, ut, dum videtur frangi, quod a nobis in illa conspicitur, præsens reapse fiat pluribus simul locis, quod, nempe Corpus Christi, sub illis speciebus ineffabiliter delitescit.

Neque porro ex hoc, quod fractio *specierum sacramentalium* ponatur tantum *apparens*, timendum est propterea, ne quis falso putet, Christum Dominum neque *realiter* esse in hoc Sacramento, neque *realiter* nobis in illo tradi, sed dumtaxat *apparenter*; quandoquidem, cum ad realem Christi præsentiam in Eucharistia perinde sit omnino, ut vidimus (§ 104.), sive species panis, & vini, sub quibus ille nobis in ea traditur, sint, sive non sint *accidentia absoluta*, vel nihil prorsus periculi circa fidem de reali præsentia Christi Domini in hoc sacramento timendum est, sola admitta fractione *apparente*; vel idem prorsus periculum timendum est etiam, posita fractione *reali*. Et sane, licet sola externorum sensuum immutatione factum fuerit, sicuti visum est ex S. Thoma, ut Christus Dominus appareret in Eucharistia sub speciebus *vivæ carnis*, *pueri*, vel *sanguinis*; nemo tamen dubitare jure potest, quominus *vere*, *realiter*, & *substantialiter* Christus in illa tunc existeret. Ergo, ratione non dissimili, quamvis non *realiter*, sed tantum *apparenter* frangantur *Eucharistica* panis species, non propterea licet ambigere, quominus Christus Dominus *vere*, *realiter*, & *substantialiter* in hoc Sacramento habeatur.

Urget tamen laudatus P. Picinardus: *sine nova*, inquit, *reali consecratione non incipit de novo esse Corpus Christi sacramentaliter sub speciebus altaris. Sed juxta hoc subterfugium ita inciperet sine nova consecratione per solam apparentiam fractionis. Ergo prædictum subterfugium nequit amplius sustineri (a).*

R. primo, hoc argumentum ita posse in suum Auctorem retorqueri: *sine nova reali consecratione*, inquit ille, *non incipit de novo esse Corpus Christi sacramentaliter sub speciebus altaris. Sed fractio realis*, perinde omnino atque *apparens*, non est nova consecratio; neque per illam nova consecratio fit, quemadmodum nova consecratio per fractionem *apparentem* nequaquam efficitur. Ergo neque per fractionem *realem*, sicuti id non contingit per *apparentem*, potest Christi Corpus esse sub speciebus altaris *sine nova consecratione*; & ideo vel etiam fra-

(a) Loco citato.

fractio *realis*, vel neque *apparens*, merum effugium est, neque potest sustineri.

R. *secundo*, *permessa majori*, *neg. minorem*. Sicuti enim ideo, positis *absolutis* Scholasticorum *accidentibus*, nova consecratione opus non est, ut Christus Dominus, dum illa *realiter* franguntur, sub singulis eorundem partibus totus existat, quia per *realem* illam fractionem Christus ipse non incipit esse sub parte aliqua, sub qua ante fractionem non erat: ita eadem plane ratione consecratio nova non requiritur, ut sub apparentibus apparentis hostiæ partibus, quæ per *apparentem* fractionem a se mutuo separari videntur, Christus ipse vere sit, nobisque se prodatur. Etenim neque in hypothese de fractione *apparente* Christus Dominus sub aliqua apparente apparentis hostiæ parte existere incipit, sub qua ante *apparentem* illam fractionem non haberetur. Universaliter enim nova consecratione tunc solum est opus, cum nova habetur panis, vinique substantia in Christi Domini corpus, & sanguinem convertenda.

R. *secundo* ad objectionem principalem, non requiri *accidentia absoluta*, ut vera & realis fractio in Eucharistia peragatur. Pervetusta enim, si credimus Magistro Sententiarum, sententia est, *corpus Christi essentialiter frangi & dividi, & tamen integrum & incorruptibile existere* (a). Ita certe senserunt olim Walterius Abbas S. Victoris Parisiensis, Abbaudus itidem Abbas, Odo Episcopus Cameracensis, Guitmundus Archiepiscopus Aversanus, & Algerus, occasionem nacti sic opinandi ex illa fidei formula, quam in Concilio Romano sub Nicolao II. profiteri compulsus fuit Berengarius, suoque subscripto nomine, juramento firmare. Falsus namque ille est, *panem, & vinum, quæ in altari ponuntur, post consecrationem non solum sacramentum, sed etiam verum Corpus, & Sanguinem Domini nostri Jesu Christi esse; & sensualiter non solum sacramento, sed in veritate manibus Sacerdotum tractari, frangi, & fidelium dentibus atteri*. Cum enim Corpus Christi Domini manibus Sacerdotum tractari & frangi *sacramento*, perinde sit, ac illud tractari & frangi in iis *speciebus*, sub quibus latet, consequens videtur, ut Corpus illud a nobis tractari & frangi, atque atteri fidelium dentibus *in veritate*, non sit aliud, nisi illud manibus Sacerdotum tractari, & frangi, & fidelium dentibus atteri in sua *substantia*, quin idcirco integrum esse desinat & incorruptum. Berengarii itaque confessione præmissa, ita contra Petrum Abaelardum, qui sola panis *accidentia*, ut modo in Scholis dicitur, frangi in Eucharistia arbitrabatur, in primis scribit Walterius: *Iste Schola-*

D d

sti-

(a) Lib. IV. *Sententiarum* Distin. XII.

sticus (Abaelardus scilicet) sic exponit: vere quidem, ait, est (nempe corpus Christi tractari, & frangi), sed in sacramento tantum. Item ait: sane dici potest fractio illa, & partitio non in substantia corporis, sed in ipsa forma panis sacramentali fieri, ut vera fractio, & partitio sit ibi, quæ sit non in substantia, sed in sacramento, id est, in specie Ideoque illa Berengarii verba ita distinguenda sunt, ut, sensualiter non modo sacramento, sed in veritate dicatur corpus Christi tractari manibus Sacerdotum, frangi quoque, & atteri dentibus. Vere quidem, sed in sacramento tantum. Vera est igitur ibi attritio, & partitio. Ecce (urget Vvalterius) dum catholicam fidem, nulla prorsus distinctione indigentem, solitis sibi argumentationibus distinguit, alterum se probat Berengarium. Nam sicut ille assererat: omnia fiunt, sed in sacramento tantum; ita & hic. Ille vero correctus addidit sacramento, & fractioni, attritioni etiam dentium veritatem, quam negabat; iste contra in omnibus veritatem subtrahit, dum asserit omnia fieri non in substantia, sed in specie visibili, & forma panis, & sacramento tantum (a). Injuste tamen Vvalterius, ut recte observat Cl. P. Natalis ab Alexandro (b), ait, Abaelardum se tunc alterum Berengarium demonstrasse. Non enim ille, ut Berengarius, realem Christi Domini presentiam in Eucharistia inficiatus est; non realem conversionem totius substantiæ panis, & vini in corpus, & sanguinem Christi negabat; sed tantum opinabatur, quemadmodum S. Thomas (c), S. Bonaventura (d), ceterique demum Scholastici absoluta accidentia admittentes, tuta fide cum Sententiarum Magistro deinde docuere, fractionem illam, & partitionem non in substantia corporis, sed in ipsa forma panis sacramentaliter fieri (e). Abbaudus vero hæc habet: secundum fidem Evangelii, quod dicit: Benedixit, ac fregit; Apostoli quoque, qui dicit: Panem, quem frangimus; Luca autem Evangelistæ, qui dicit: Panis fractionis, contestante nihilominus spirituali ratione fultus, corde credo, ore confiteor ad salutem, quia veraciter corpus Christi manibus frangitur Sacerdotis. Hic mihi (pergit ille) forte insultatur ab illis, qui noverunt, Christum a dextris Patris sedere, non utique dimidium, aut debilem, sed totum integrum. Quasi vero Apostolus, cum diceret: Panis, quem frangimus, communicatio corporis Domini est, oblitus fuerit, de quo to-

ties

(a) Lib. III. contra quatuor Labyrinthos Franciæ, nempe Abaelardum, Petrum Lombardum, Petrum Pictavensem, & Gilbertum Porretanum cap. 11.

(b) Tom. VI. Hist. Ecclesiasticæ Dissert. I. in historiam sæculi XI, & XII. artic. 13.

(c) P. III. q. 77. artic. 7.

(d) Super IV. Sententiarum Distin. XII. artic. 3. q. 2.

(e) Magister Sententiarum lib. IV. Distin. XII.

ties memoraverit, quod sedet ad dexteram Patris, oblitus fuerit, de quo cum tanta constantia dixit, quod resurgens a mortuis, jam non moritur, mors illi ultra non dominabitur. Quomodo ergo de uno eodemque corpore queritur, quod integrum maneat in cælo, & frangatur in terra? Hic maxime apparet, quod superius dixi, ideo Apostolum, & Evangelistam verbum fractionis præcipue posuisse, ut hoc sua auctoritate firmaretur, unde facilius cor humanum dubitaret. Valde enim sibi ipsi adversa videtur assertio, cum de uno eodemque corpore prædicatur, quod integrum maneat, & frangatur. Sed has angustias non patitur humana inopia. Divina autem potentia metas præfigere non valet humana infirmitas, etsi conetur temeritas. Quæ enim impossibilia sunt apud homines, possibilia sunt apud Deum. Alioquin numquid hoc solum de Christi corpore asseritur humana rationi contrarium, & juxta legem humanorum corporum impossibile? Nonne de eodem corpore asseritur, quod per nativitatis sue mysterium ad humanos oculos clauso utero Virginis exiit, & ad discipulos ejus per resurrectionem clausis januis introivit, seque ipsum & palpabile, & tamen incorruptibile demonstravit? Ecce tria, ut hoc jam non sit solum, sed quartum eorum, quæ ratio non comprehendit; fides tamen divina potentia concedit. Sed quantum alienus fuerit Abbaudus ab illorum approbanda opinione, qui dicunt, fractionem Eucharisticam in solis panis speciebus fieri, luculentissime ostendunt verba, quibus huic suo opusculo finem ille imponit. Cogitaveram, inquit, & illis aliqua respondere, qui dicunt, ipsum corpus non frangi, sed in albedine ejus, & rotunditate aliquid factitari; sed recogitans, ineptum esse in Evangelio Christi de albedine, & rotunditate disputare, amaturis talia auribus dimovens, Dialecticis, aut certe pueris talia permisi; præsertim cum quivis facile videat, albedinem, seu rotunditatem ab ipso corpore, quod vel album, vel rotundum est, separari non posse, ita ut ab ipso non fracto, hæc per se singulariter non frangantur. Et revera quid opus cuique fideli in fide sua hac circuitione verborum (a)? Odo autem Cameracensis Episcopus, exponens illa verba, quæ in Missæ canone dicuntur: Benedixit, ac fregit, exclamans ait: O miraculum! frangebatur inter digitos, sedens incolumis inter discipulos. Erat integer, & dividebatur in partes; in manibus tenebat seipsum, & de manibus Discipulis se porrigebat edendum. Hoc signabat David, qui secundum aliam translationem coram Achis rege in suis manibus ferebatur. Sic nos quotidie Christum in altari consumimus, & permanet; manducamus, & vivit; atterimus dentibus, & integer est.

D d 2

Con-

a) Tract. de fractione Corporis Christi, quem primo publici juris fecit doctissimus

Mabillonius Tom. III. veterum Analectorum pag. 52.

Consumimus autem, manducamus, & atterimus non tantum specie, sed & re, non solum forma, sed & substantia (a). Guitmundus quoque, agens contra Berengarianos, qui nefas putabant, Christum dentibus atteri, ego, inquit, in primis quæro, quid dicant, significare atteri. Si enim intelligunt atteri, velut pressius tangi, aut fortius premi, quæro quare non sit fas, Christum dentibus atteri? Nam si idcirco hoc ipsum non est fas, quia non possit fieri, eadem ratio est, quam de natura dicunt, scilicet quia natura non potest pati. Et mirum vana ratio! Nulla quippe rerum impossibilitas potest impedire voluntatem Dei. Deinde quare non possit dentibus premi, qui manibus Thomæ & post resurrectionem potuit attrahi? Et sanctæ mulieres, quibus occurrit post resurrectionem, scriptum est, quia tenuerunt pedes ejus. Nulla namque ratio est, ut non possit tangere dens, quod tangit manus. Nam sicut ad manus, ita & ad totum corpus pertinet tactus. Quare quidquid tangit manus, potest & toto corpore tangi; potest igitur & dentibus tangi. Porro quod potest vel leviter tangi, cum solidum corpus sit, cur non possit etiam fortiuscule tangi, quod est atteri? Si ergo corpus Domini post resurrectionem manibus Thomæ Apostoli, & sanctarum mulierum potuit tangi, cur hodie a credentium dentibus non possit vel levius, vel pressius tangi, id est, atteri, nulla ob stare ratio videtur (b). Ita demum Algerus: quod in Christi corpore permissum est malis ad suam damnationem, nec ignominiosum visum est Deo Patri propter nostram salutem, multo magis ipsi placitum, & gloriosum est, ut fidelium suorum manibus devote in sacramento frangatur, dentibus atteratur, sicut ipse præcepit in suam commemorationem, non ut in veritate quidem passionis, crucifixionis, mortis, ut supra dictum est, sed significante mysterio, ut ipse quidem fractus, & attritus, integer permaneat, & redemptionis suæ gratia omnibus divisa proficiat (c). Et ne quis dubitet, quominus eodem penitus sensu, quo Berengarius in memorata Romana Synodo fateri compulsus fiterat, ipse etiam tenuerit, Christi corpus fidelium manibus tractari, & frangi, eorumque dentibus atteri, confessionem, quam (inquit ille) de hujus rei catholica fide Berengarius scripsit, integram subiicit. Itaque si cui Scholasticorum non plane arrideat, apparentem dumtaxat esse fractionem, quæ in Eucharistia peragitur, quemad-

mo-

(a) In exposit. can. Missæ Distin. III. (Tom. XXI. Bibliothecæ veterum Patrum edit. Lugdun. 1677. pag. 224.)

(b) Lib. I. de veritate Eucharistiæ (Tom. XVIII. Bibliothecæ veterum Patrum edit. laudatæ pag. 442.)

(c) Lib. I. de Sacramento corporis, & sanguinis Domini cap. 19. (Tom. XXII. ejusdem Bibliothecæ pag. 271.)

modum nonnisi apparenter est panis, qui nobis in illa exhibetur, habet ex modo traditis luculentissimis Veterum testimoniis, & quod magis urget, ex formula fidei Berengariana, quomodo illa fractio vera sit, & *realis*, quin aliquod *accidens absolutum*, necesse sit, in hoc sacramento propterea admittatur.

V.

119. Contendit postremo laudatus P. Boucat, Recentiorum posita doctrina de natura *qualitatum*, corruere prorsus penitusque convelli *Eucharisticorum accidentium* proprietates. *Accidentia enim*, inquit ille, secundum communem opinionem primo possunt agere, & immutare externa corpora. Secundo: corrumpi valent. Tertio: ex iis vermes generari possunt. Quarto: nutrire queunt. At quomodo id prestarent accidentia, quæ non sunt nisi mere impressiones in sensibus nostris factæ, quasi vero impressiones nutrent, & ex iisdem vermes generentur (a)?

R. Speciebus panis *Eucharisticis* eas proprietates non competere, imo neque competere posse, quæ in argumento memorantur. Ad illarum siquidem primam quod spectat, non inficior, communem esse Scholasticorum opinionem, *absoluta* corporum *accidentia* posse agere, & externa corpora immutare. Verum simul persuasum habeo, res ut ita sit, nullatenus sufficere, Scholasticos ita sentire. Negamus itaque, non solum *Eucharisticas* panis *species* esse *accidentia absoluta*, sed etiam, si qua huiusmodi *accidentia* in rerum natura existant, illud habere proprium, ut agere, & externa corpora immutare ipsa possint. Cum enim omnis actio corporea in motu unice consistat, nihilque corporeum valeat alteri communicare motum, nisi sit *impenetrabile*, consequens est, nullum *accidens* posse agere ex se, & externa corpora movere, nisi sit aliquod natura sua *impenetrabile*; ac proinde, nisi sit corpus (§. 19.). Hinc diximus supra, nullum *accidens absolutum*, si quod huiusmodi Scholasticis concedatur, posse ex ipsa sua natura a nobis immediate sentiri (§. 58.).

Ad secundam proprietatem quod attinet, videlicet *accidentia*, sive *Eucharisticas* panis *species* posse corrumpi, dico, ita nobis videri quidem, sed revera non ita esse. Corruptio enim, quæ in illis *speciebus* fieri apparet, vere in illis non fit, sed in substantia, quæ eo ipso memento ibi a Deo producit, quo hostia, si non esset consecrata, corrumpetur. Sane, si hostia consecrata, in iis circumstantiis esset

pe-

(a) Loco citato.

penitus incorruptibilis, in quibus eadem ipsa, si non esset consecrata, naturaliter corrumpetur, ex illa incorruptibilitate certissime, ut patet, nobis constaret, eam esse consecratam; possemusque propterea consecratam hostiam ab iis omnibus, quæ minime consecratae sunt, cum fidei jactura discernere. Ut ergo maneat fides de tanto sacramento, substantiæ defectum supplet Deus, eam scilicet tunc ibi producendo, vel substituendo, cum prævidet, fore ut substantia panis, si ibi esset, naturaliter corrumpetur. Prætereundum porro silentio non est, Guitmundum, atque Algerum opinatos olim fuisse, corruptiones, quæ in Eucharistia fieri videntur, non esse reales, sed tantum apparentes. *Sicuti tunc, inquit Guitmundus, cum inter homines mortalis adhuc Christus viveret, circa ejus carnem agebatur, ita etiam quamdiu Ecclesia ejus usque ad consummationem sæculi mortalis erit, pro eadem utilitate Ecclesiæ, qua illa tunc fiebant circa ipsam eandem carnem, salva incorruptione ejus, tale quid specie tenus apparere potest, unde scandalizentur, & contenebrentur semper increduli; exerceantur autem, & illuminentur magis electi.* Quapropter desinant homines mente corrupti, & putridi, corruptelam, & putredinem opponere Sacramentis Dei; quia sicut assumpta peregrini, vel hortulani, vel leprosi species fidelium negligentiam vel increpavit, vel corripuit, vel fidem, dilectionemque probavit, veritatem tamen essentiæ Christi non evacuavit; ita si quando putredo, vel aliud simile indecens quid in Ecclesiæ sacramentis appareat, ad negligentiam ministrorum puniendam, vel corrigendam, vel certe ad fidem, dilectionemve probandam, ut diximus, valet; veritatem tamen essentiæ Dominicæ carnis, & sanguinis evacuare non potest (a). Algerus quoque ait: possunt Eucharisticæ species videri mucida, & putrida, quamvis ita non sint, sicut Christus hortulanus, & peregrinus, prout erant intuentium mentes (b). Hæc tamen opinio immunis ab omni censura non est, ejusque Auctores, quamvis a venerabili Petro Cluniacensi (c) ceteroquin apprimè laudati, propterea notantur (d). Si enim non realis, sed tantum apparens esset sacramentalium specierum corruptio, sub illis etiam corruptis Corpus Christi existeret: quod Theologi, & jure quidem, nequaquam admittunt.

Ex hisce patet responsio ad tertium de vermium generatione. Omis-
sa enim sententia Guitmundi, & Algeri, contendentium (e), uti

mu-

(a) Lib. II. de veritate Eucharistiæ (Tom. XVIII. Bibliothecæ Patrum laudatæ edit. pag. 448.)

(b) Lib. II. de sacramento corporis, & sanguinis Domini cap. I. (Tom. XXI. Bibliothecæ Patrum pag. 277.)

(c) Lib. de sacrificio in initio.

(d) Vide Bellarminum, de Script. Ecclesiasticis: de Guitmundo, & Algero.

(e) Locis citatis.

mucedinem, & putrefactionem, ita & *vermes*, qui ex consecratis hostiis quandoque nasci videntur, *reales* non esse, sed tantum *apparentes*, dico, vel generari illos vermes ex substantia, quam Deus eo ipso momento ibi creat, quo naturaliter corrumpetur hostia, ex eaque vermes nascerentur, si non esset consecrata; vel, & fortasse melius, vermes illos oriri ex ovulis, qui aut præfuerunt in pixide ante consecrationem, aut consecratione peracta in eam vel deciderunt ex aere, vel volitantes muscæ in illa, imo & super ipsas consecratas particulas deposuerunt. Nec enim alia naturalis vermium generatio est, ut jure ac merito post Cl. Vallisnerium pro comperto habent recentiores Philosophi, & satis in Physica demonstravimus (a); neque multiplicari debent miracula sine necessitate.

Non secus demum respondendum videtur ad quartum de *nutritione*, quæ in nobis fit, assumptis pluribus hostiis consecratis. Dicendum nempe est, nutritionem eam fieri per substantiam ab ipso Deo tunc immediate productam, ne scilicet fides de tanto sacramento in nobis deficiat, quemadmodum dubio procul deficeret, si ex consecratis hostiis minime nutrireretur. Putat quidem Guitmundus, & post ipsum Algerus (b), quibus consentit Thomas Waldensis (c), nutritionem illam penitus esse miraculosam. Sed hæc opinio communi calculo a Theologis rejicitur, quod nulla scilicet necessitas occurrat, quamobrem tam grande miraculum admittatur.

Me tamen, ut verum fatear, cohibere non possum, quin stupendum dicam, argumentum hoc, ex vermium scilicet generatione, & humana nutritione desumptum, adhiberi a P. Boucat, aliisque etiam, ut *absolutorum accidentium* existentiam contra Recentiores evincant. Vel enim putant illi, ex ipsa suorum *accidentium* entitate, tamquam ex præexistente *materia*, formari vermes, & homines nutriri; vel ipsis quoque persuasum est, novam *substantiam*, sive *materiam* tunc a Deo produci, ex qua deinde vermes illi naturaliter fiant, & hominis nutritio perficiatur. Non certe primum eos dicturos puto. Repugnat enim, ut ex *accidentibus*, tamquam ex *materia*, nova *substantia* producat. Dicent ergo secundum. At si hoc, manifeste apparet, illa *accidentia* penitus esse frustranea, nisi forte velint Viri illi doctissimi, *absoluta accidentia* requiri, ut substantia tunc a Deo producat: quo certe nihil absurdius.

ANI-

(a) Tom. IV. *Physicæ* §. 4877.

(c) Tom. II. de sacramentis cap. 62.

(b) Locis citatis.

ANIMADVERSI O I.

120. Animadvertendum tamen est, idque velim alte animo infigatur, sacratissimum Christi corpus (eodem modo etiam de sanguine ratiocinare) non ideo tantum sub *localibus* hostiæ *dimensionibus*, atque *figura* nobis in hoc sacramento se prodere, quod in oculorum nostrorum fundo imaginem efficiat, illi omnino æqualem, ac prorsus similem, quam naturaliter in eodem fundo depingit hostia non consecrata; sed præterea quia *revera*, *omni* scilicet *seclusa*, *omni*que *neglecta sensoriorum immutatione*, Corpus illud sanctissimum tanto præcise spatio realiter in Eucharistia præsens est, quantum ab illa hostia, antequam consecraretur, reapse occupabatur. Nulla etenim repugnantia in hoc esse potest, quæ etiam Scholasticos ex æquo non premat. Illorum siquidem admissa doctrina, corpus Christi sub superstite hostiæ *quantitate* totum, & totaliter est; ac proinde non majori spatio illud reapse tunc præsens existit, quam *revera* ab ea *quantitate* repleatur. Ergo etiam omni rejecta superstite *quantitate*, tanto præcise spatio, quantum replet hostia non consecrata, *vere*, & *realiter* præsens ex æquo illud esse potest. Neque enim, ut etiam dictum est alibi ex Doctore Subtili, *species sunt ratio formalis corpori essendi hic; quia non sunt formaliter in corpore Christi, nec per eas aliquid inest formaliter corpori Christi* (a).

S C H O L I O N I.

121. Modum hunc existendi, quem tribuimus Christi corpori in Eucharistia, æquo animo ferre nequit P. Uldaricus Weis Benedictinus Urfinensis. Quod enim, inquit, aliqui Philosophi eousque deveniant, ut a corpore Domini idem sub eadem figura, & *dimensione* repleari, occuparique spatium, quod a pane consecrato videtur occupari, atque repleari, defendant, vix absurdius quidquam in ipsa Scholastica hypothese videtur occurrere. Equidem si Christus tantumdem, & idem ejusdem figura prorsus spatium occupet, quod ab hostia consecrata teneri sensoria perhibent, ut corpus Christi monstruoso modo præsens sit necesse est; erit diminutum in *extensione*, compressum in *latitudine* &c. adeout pedes sacerrimi tantumdem a capite distent, ac inter se scapula; thorax cum tergore compressissimus, totum corpus undique fere circulare, & adee sacratissima membra necessario jam compenetrata, jam laxata, & distenta

(a) Super IV. Sententiarum Distin. X. q. 3.

stenta immaniter, si cum aliis conferantur, id quod horrent alioquin admittere Autores illi. Quæ, & quam portentosa configuratio Theandrici corporis, si in quascunque quarumcunque figurarum particulas, & atomos fere vel casu dissiliat hostia, vel diffringatur temere? Taceo absurda grandia, & innumera, quæ ex illa declivi alveo fluunt hypothese, præ quibus satius videretur Scholasticam hypothesein amplecti, modo extensionem localem per soliditatem diserte explicarent, eamque a Divino corpore tolli permetterent, hoc est, immane mysterium, & Ternarium Divinæ unitatis prope superans, sacramentum non affectarent reddere vel mirabilius, portentosiusque, vel obscurius. Certe quæ, & in quantum soliditas glorioso corpori competat, nescimus, cum neque gloriosi corporis ideam concipere, aut efformare possimus; & sic magno Sectariorum numero accidimus frequentes Doctrinam Ecclesiæ cavillandi occasiones, nempe tanto, quantus est, qui realem, veramque Corporis Christi, pane tamen, vinoque superstitute, præsentiam credunt; ex alio enim capite præsentia Corporis Christi asseri debet, ex alio cessatio panis, & vini; neque enim ideo, quia Christus hic præsens est, sequitur panem abesse debere, quod est manifestum (a). Hæc ille. Verum justene, an injuria, suscepti muneris ratio postulat, accuratius, quo fieri a nobis potest, expendamus.

I.

122 Primo itaque videtur, negari a Viro catholico tuta fide non posse, sacratissimum Christi Corpus ita in Eucharistia existere, ut tanto præcise spatio præsens in ea sit, quantum vel replet hostiæ quantitas, si remanet post consecrationem, ut placet Scholasticis, vel quantum ab illa ante consecrationem replebatur, si, ut videtur Recentioribus, nihil prorsus reale panis, consecratione peracta, supersit. Certissima namque res est, totum Christum vere, realiter, ac substantialiter sub speciebus consecratæ hostiæ contineri. Id enim a Tridentino Concilio expresse definitum est (b). Hoc autem verum esse nequit, nisi Christi Corpus in Eucharistia sit vere & realiter præsens tanto præcise spatio, quantum ante consecrationem ab hostia occupabatur, sive quantum *Eucharistica species*, sub quibus latet, occupare videntur. Nisi enim Corpus illud sanctissimum esset vere, & realiter præsens illi spatio, non esset in Eucharistia vere, realiter, & substantialiter, quemadmodum Concilium definit. Nisi vero totum ipsum Corpus esset præsens

E e toti

(a) Lib. de emendatione intellectus humani P. I. cap. 5. notæ in §. 165. pag. 172. edit. typis Christiani Starck Kauffburi, 1747.

(b) Sess. XIII. cap. 3., & can. 3. de Eucharistia.

toti illi spatio, totus Christus, ut est etiam ab eodem Concilio determinatum, sub speciebus Eucharisticis non haberetur. Nullum quippe corpus sub velo totum est, nullus liquor totus vase continetur, si qua vel minima illorum pars extra velum, atque vas habeatur. Igitur verum esse non potest, totum Christum vere, realiter, & substantialiter in Eucharistia contineri, quin sit verum, totum illius Corpus tanto præcise spatio præsens in ea existere, quantum ante consecrationem occupabat hostia, & post consecrationem species sacramentales occupare videntur; & ideo vel illud primum negandum est, quod a Viro catholico negari tuta fide non potest; vel etiam hoc alterum ab omnibus, qui catholicæ fidei dogmata profitentur, sine ulla prorsus hæsitazione est admittendum.

I I.

123. Hinc vel nulla sunt absurda, quæ contra hanc positionem Corporis Christi in Eucharistia opponit Cl. P. Weis, vel ea nos cogunt, ut realem Christi Domini præsentiam in hoc Sacramento cum Calvino, Zuinglio, ceterisque sacramentariis inficiemur. Opponit, ut vidimus, Vir Cl., necessario futurum, hac admissa positione Christi Domini in Eucharistia, ut illius Corpus sanctissimum sit diminutum in extensione, compressum in latitudine, adeo ut pedes sacerrimi tantumdem a capite distent, ac inter se scapula; thorax cum tergore sit compressissimus; totum Corpus sit undique fere circulare, & adeo sacratissima membra necessario jam compenetrata, jam laxata, & distenta immaniter. Contra ergo sic conficitur argumentum: Corpus Christi vel potest esse præsens in Eucharistia tanto præcise spatio, quantum Eucharistica panis species occupare videntur, quin sit diminutum in extensione, compressum in latitudine; quin illius pedes sacerrimi tantumdem a capite distent, ac inter se scapula; quin thorax cum tergore sit compressissimus; ac demum quin evadat undique circulare, & quin sacratissima ejusdem membra sint compenetrata, laxata, & distenta immaniter: vel nequit Corpus illud sanctissimum hoc modo existere in Eucharistia, nisi hæc absurda sequantur. Si nequit: ergo, cum vere, realiter, & substantialiter Christus Dominus existere in Eucharistia non possit, nisi ejus Corpus illo modo in ea existat, sequitur, negandam esse cum sectariis realem Christi præsentiam in hoc Sacramento, ne tot, tamque enormia absurda in Christi Corpore admittere cogamur. Si vero potest: ergo fucum facit P. Weis, dum contra doctrinam, quæ illi non placet, absurda opponit, quæ, ea admif.

missa, nequaquam, ut ipse veluti certum tradit, necessario sunt sequutura.

I I I.

124. Non est porro, cur miremur, nihil absurdius visum fuisse P. Weis ea praesentia, quam Corpori Christi in Eucharistia existenti ipsi tribuimus. Persuasum quippe illi est, omnino repugnare, ut corpus *entitative* extensum sit in loco vel penitus inextenso, vel cujus dimensiones sint longe minores dimensionibus ipsius corporis; quin *entitativa extensio* corporis ejusdem aut penitus tollatur, aut proportionaliter reipsa minuatur: uno verbo, repugnare ille putat, ut minui, vel tolli queat *localis corporis extensio*, quin itidem *extensio* ejusdem *entitativa* aut pereat tota, aut pari proportionem decreseat. Inquit enim: *uti vero Scholae accidentia sine substantia conservare sic melius, quam Aegyptii mumias suas norunt, sic & facili negotio substantiam omnibus accidentibus spoliant: praeclarius specimen, quam facile ipsis sine mente loqui sit vix exhiberi potest, quam in Corpore Christi Theandrico sub speciebus Eucharisticis latitante; ajunt, illud retinere quantitatem, ejusque effectum primum, extensionem nempe partium in ordine ad se, seclusa tamen extensione in ordine ad locum: non cunctantur, fateri Christum hic esse praesentem, nec tamen esse in loco. Quid est autem, quæso, illud extendi in ordine ad se, & in ordine ad locum? vi extensionis in ordine ad se partes sunt extra partes, pes extra caput &c., quid est hoc extra? an sibi vult tantum, pedem non esse caput? an etiam ad situm pertinet, itaut pes extra caput realiter situs sit? Quod si nonnisi distinctionem capitis a pede portendat ea phrasis, præterquamquod occasio sit falsa illusoriaque idea, vi cujus in mente excitanda, proprie loquendo, pes extra caput non est, sed corpus Domini velut in glomum monstruosum convolutum, atque contractum vix corporeo modo praesens dici potest, & caput intra pedem, & vicissim pes intra caput, & sic omnia reliqua membra intra se mutuo continerentur. Si vero positum caput extra pedem est: ergo situm caput extra pedem est, per mera synonyma loquor: ergo ibi caput non est, ubi pes est: ergo alibi est: ergo in alio loco est: ergo inter pedem, & caput designabile spatium est, quod thorax, truncusque corporis Theandrici occupat: ergo extensum corpus Christi in ordine ad locum etiam eo ipso est, quod in ordine ad se extensum est (a).*

Verum enimvero an hæc doctrina P. Weis digna jure ac merito sit, quæ aliqua censura notetur, judicet ille, qui toti Ecclesiae præest, ut sic ejus sententia a tota Ecclesia teneatur (b). Moneo solum, videri, non

E e 2

ita

(a). Loco citato pag. 169.

(b) S. Thomas 2. 2. q. 1. artic. 10.

ita facile eam posse cum Ecclesiæ doctrina componi. Certo certius est enim, utpote a Tridentino Concilio expresse definitum (a), totum Christum sub speciebus consecratæ hostiæ contineri; & ideo ita sub illis esse, ut, quemadmodum supra ostendimus, nihil prorsus illius extra ipsas species habeatur. Communis est etiam Scholarum, & Ecclesiæ sententia, inquit Card. Bellarminus, in Eucharistia totum Christum existere cum magnitudine, & omnibus accidentibus, excepta relatione ad locum cælestem, quam habet, ut est in cælo, & iis, quæ ad existentiam in eo loco consequuntur: & contra in cælo totum Christum existere cum magnitudine, & omnibus accidentibus, excepta relatione ad species panis, quam habet, ut est in Eucharistia: & præterea corporis Christi partes, & membra non se penetrare, sed ita distincta esse, & disposita inter se, ut figuram, & ordinem habeant corpori humano convenientem..... Et hanc esse doctrinam Ecclesiæ (prosequitur Vir celeberrimus) dubitari non potest. Nam Ecclesia universa, ut patet ex Concilio Tridentino Sess. XIII. can. 1., non solum corpus, & sanguinem, sed etiam animam, & Divinitatem, atque adeo totum Christum in Eucharistia esse docet (b). Constat autem, animam non esse in corpore nisi disposito, & organis instructo; neque ex corpore, & anima hominem fieri, nisi illud fuerit organicum. Ergo vel Christus, prout in Eucharistia existit, homo non est, quod nefas est dicere, vel etiam prout est in illa, habet corpus organicum, adeoque extensum; cumque longe minori spatio in ea sit præsens, quam sit absoluta sui corporis magnitudo, sequitur, aut negandum a nobis esse, Christum Dominum vere, realiter, & substantialiter in Eucharistia existere; aut concedendum, minui divinitus posse, imo etiam penitus tolli localem corporis extensionem, quin extensio ejusdem entitativa itidem vel auferatur, vel decrescat. Hoc certe potissimum argumentum est, quo Calvinus primum, tum Petrus Martyr, ceterique demum sectarii, qui realem Christi Domini præsentiam in Eucharistia insectari cum illis sunt, dogma catholicum inficiari nituntur. Hac est propria corporis veritas, dicebat Calvinus, ut spatio contineatur, & suis dimensionibus constet, ut suam faciem habeat. Faceffat igitur stultum illud commentum, quod tam mentes hominum, quam Christum pani affigit (c). Et Petrus Martyr: videtur, inquit, implicare contradictionem, ut corpus trium cubitorum contineatur sub dimensionibus frustuli panis unius digiti; nam si ita fiat, erit idem corpus majus; & minus; ac proinde majus, & non majus respectu ejusdem. Similiter: si corpus Domini suam habet in Eucharistia

(a) Sess. XIII. cap. III., & can. 3. de Eucharistia.

(b) Lib. III. de sacram. Eucharistiæ cap. 5.

(c) Lib. IV. Instit. cap. 17. §. 29.

ristia figuram, & partium distributionem, & ordinem: ergo distant pedes magis, quam pectus a capite. At distantia major, & minor sine relatione ad locum intelligi nequit; illa enim magis distant inter se, inter quae majus intervallum interjectum est. Demum: de essentia quantitatis est habere partem extra partem: ergo ubi est una pars, non est alia. Non igitur tota quantitas corporis Domini in eadem hostiae particula esse potest (a).

Non sum nescius, etiam Gassendo, & P. Maignan id visum fuisse captu apprime arduum, ne dicam ferme impossibile. Hæc (nempe posse partes unius corporis v. g. Christi Domini in Eucharistia, constitui simul penetrative omnes intra unam quantumvis minimam, imo in loco indivisibili, retenta nihilominus tota illa extensione, quam ex vi quantitatis habet in ordine ad se): hæc, inquit P. Maignan, fateor tam esse subtilia, ut captum meum omnino fugiant; neque enim aliquando potui conceptum formare rei tam evidenter implicatoriae (b). Gassendus vero, postquam dixit, nihil aliud esse quantitatis essentiam, quam externam, ut vocant, extensionem, mihi crede, inquit, si sit ulla partium extensio in ordine ad se, non fit hoc absque eo, quod illæ sic posite sint, ut una hanc, alia illam loci partem possideat, adeo ut si situalet hanc, & ordinatam in loco extensionem sustuleris, non possint partes ullum ordinem retinere inter se, sed necessario prorsus confundantur (c). Fateor & ipse, ne quid dissimulem, hanc corporis positionem in loco, per quam scilicet illud careat extensione locali, retenta entitativa, humanæ mentis captum prorsus excedere. Verum certo certius una simul habeo, id nequaquam sufficere, ut illa positio corporis in loco ne ipsi quidem Deo possibilis censeatur. Neminem quippe esse arbitror, qui eo dementiæ devenerit, ut id dumtaxat velit esse possibile, quod humana mens percipere potest; id vero penitus impossibile, quod comprehendere ipsa non potest. Dare ergo ne dubitemus, ut loquar cum S. Augustino ad Volusianum, Deum aliquid posse, quod nos fateamur, investigare non posse (d); eosque idcirco omnes perperam argumentari, qui ex hoc uno inficiantur, posse corpus locali extensione privari, vel ipsam in illo minui, retenta, neque imminuta entitativa, quod minime id ipsi valeant mente complecti. Satis tamen non video, quamobrem Corpus Christi manens extensum quoad se, nequeat sine contradictione existere in loco vel penitus inextenso, vel longe minoris extensionis, quam illud sit in seipso; possit vero, quin aliqua hinc sequatur contradictio esse

(a) Lib. contra Gardinerum object. 74.

(b) Philof. emis. cap. VIII. num. 16, & 17.

(c) Lib. II. Exercit. Paradoxicarum ad
vers. Aristotel. exercit. 3. nu. 10.

(d) Epist. 137. n. 8. alias 3. cap. 2.

esse *organicum* in coelo, & simul *non organicum* in hostia consecrata; illic possit habere suas partes extra se invicem positas, hic vero easdem ipsas habere simul compenetratas, ac veluti ad punctum redactas; illic demum possit esse *quantum*, hic veto carere *quantitate*, licet *quantitas* ab ipsius corporis substantia *realiter* non distinguatur (§. 46.). Ii certe omnes, quibus molestiam creat distinctio illa *extensionis* quoad se, & quoad locum, velint nolint, fateri alterutrum debent, aut scilicet Corpus Christi, nullatenus imminuta *entitativa* sua *extensione*, posse in Eucharistia tanto præcise spatio esse præsens, quantum ante consecrationem ab hostia occupabatur; aut Corpus illud sanctissimum simul esse *organicum* in coelo, & *non organicum* in Eucharistia; illic habere partes extra se invicem positas, hic eas habere inter se compenetratas; illic demum esse *quantum*, hic vero *quantitate* carere. Vidit Gassendus, rejecta illa distinctione duplicis *extensionis* vulgo in Scholis traditæ quoad se, & quoad locum, necessario dicendum fore, partes omnes corporis Christi revera esse in hoc sacramento *secundum substantiam*, at non habere eam *extensionem*, *distinctionem* &c. quam habent in coelo; simul tamen ingenue fassus ille est, non propterea a nobis posse percipi, quomodo in ipso sacramento *nulla sit confusio partium corporis Christi*. Unde hisce verbis finem fecit Vir Cl. difficillimæ disceptationis: *solum adorandum censeo incomprehensibilem Dei majestatem, & potentiam, Auctorem puta operis tanti, cujus ego intelligendi, perscrutandique sum incapax* (a). Quamdiu ergo P. Weis nodum tantum non solverit, tamdiu dicam, omnino injuste eos omnes ab illo irrideri, qui ajunt, nihil prorsus pugnæ, quod vinci divinitus non possit, in eo esse, ut sacratissimum Christi Corpus, retenta eadem ipsa magnitudine *entitativa*, & *organica* partium *dispositione*, quam habet in coelo, sit in Eucharistia *vere, realiter, & substantialiter* præsens tanto spatio duntaxat, quantum ab hostia ante consecrationem occupabatur. Et si id nequeat P. Weis mente comprehendere, alte sibi animo infigat præclara illa verba Abbaudi Abbatis, quem alio etiam loco laudavimus, videlicet: *de illo corpore (nempe Christi in Eucharistia) secundum legem aliorum corporum ratiocinari velle, viventem cum mortuis quærere est. Desinat ergo homo, qui proprii corporis infirmitates investigare, atque enumerare non sufficit, de Dei corpore alta sapere; discat humilibus consentire. Meminerit quod quidam sapiens cum de eo loqueretur, dixit: ET IN PLURIBUS OPERIBUS EJUS NE FUERIS CURIOSUS* (b).

(a) Lib. Exercit. Paradox. exercit. III. n. 11.

(b) Tract. laudato de fractione Corporis Christi in fine.

I V.

125. Longe majus tamen negotium mihi faceffit, quod postremo loco habet Vir Cl., *ex alio nimirum capite præsentiam Corporis Christi (in Eucharistia) asseri debere, ex alio cessationem panis, & vini, sive non ideo quia Christus hic præsens est, sequi, panem abesse debere.* Si namque ex alio capite asserenda sit præsentia realis Corporis Christi in Eucharistia, ex alio desitio panis, adeo nimirum ut non ideo panis in illa deficiat, quia Christus Dominus vere in ea præsens existit, sequitur, dogma *transubstantiationis* ex illis verbis Christi Domini: HOC EST CORPUS MEUM (a) quibus ejusdem præsentia realis in Eucharistia ostenditur, contra sectarios demonstrari non posse; & ideo errasse olim veteres Patres, & modo eos omnes Theologos falli, qui ad demonstrandum catholicum *transubstantiationis* dogma laudatis Christi verbis utuntur, probantque, illa verba Christi non posse esse vera, nisi panis substantia in Christi Corpus, illorum vi, convertatur, eaque tota in hoc Sacramento deficiat. Sequitur etiam, neque Patres Tridentinæ Synodi aliquam a nobis mereri fidem, dum agentes de hoc Sacramento aperte dixere, QUONIAM Christus Redemptor noster Corpus suum id, quod sub specie panis offerebat, vere esse dixit; IDEO persuasum semper in Ecclesia Dei fuisse, idque nunc denuo Sanctam Synodum declarare, per consecrationem panis, & vini conversionem fieri totius substantia panis in substantiam Corporis Domini nostri, & totius substantia vini in substantiam sanguinis ejus (b). An itaque liberum sit Viro catholico, non sentire tantum, verum & aperte docere, ex alio capite asserendam esse realem præsentiam Christi Domini in Eucharistia, ex alio cessationem panis, & vini, sive non ideo quia Christus in hoc Sacramento præsens est, propterea abesse panem, aliorum esto judicium.

Miror tamen, a Viro Cl. id manifestum dici; cum ne ipsi quidem sectariorum primipili tantum audeant. Lutherum primo audiamus. Is ergo ex laudatis verbis Christi eo compulsus a Catholicis, ut vel Christo denegaret fidem, vel desitionem substantiæ panis in Eucharistia fateretur, respondit: ego sane si non possum consequi, quomodo panis sit Corpus Christi, captivabo tamen intellectum meum in obsequium Christi, & verbis ejus simpliciter inharens, credo firmiter, non modo Corpus Christi esse in pane, sed panem esse Corpus Christi (c). Hinc Zacha-

(a) Matthæi cap. XXVI. v. 26.

(c) Lib. de Captiv. Babylonica cap. de Eucharistia.

(b) Sess. XIII. cap. 4.

Zacharias Ursinus Hidelbergenſis, *Lutherani*, inquit, *accuſant Chriſtum mendacii*; negant enim, panem eſſe ipſius corpus, ſed dicunt, corpus eſſe in pane. Videant igitur, quomodo in extremo iudicio de hac blaſphemia ſint Chriſto reſponſuri. *Papiſta magis retinent verba Chriſti* (a). Calvinus quoque, urgens *Lutheranos*, fatetur, verba illa Chriſti: *HOC EST CORPUS MEUM*, obvio proprioque ſenſu ſumi non poſſe, quin *transubſtantiatione* neceſſario inferatur. De *Papiſtis*, ait ille, *non loquor, quorum tolerabilior, vel ſaltem magis verecunda eſt doctrina*..... Si opinio ex his duabus eligenda eſſet, mallet nos *præſentiam Chriſti ſub ſpeciebus, & accidentibus credere, quam cum Zuinglianis veram & realem præſentiam contra tam aperta Chriſti verba negare* (b). Salmaſius demum adverſus Grotium, ſi ad litteram, inquit, accipiantur verba Chriſti, ut debere accipi contendunt doctiſſimi *Lutherani Theologi*, longe magis doctrina Pontificiorum favent, quam *Lutherana*. Dixit Chriſtus: *HOC EST CORPUS MEUM*, cum panem traderet. Ergo non amplius panis eſt, ſed Corpus Chriſti, ut ille, qui veritas eſt, affirmavit (c). Tam longe itaque a vero eſt, poſſe manifeſtum dici, quemadmodum ait P. Weis, non ideo quia Chriſtus hic præſens eſt, abeſſe panem, ut ii etiam, qui *transubſtantiationis* vocabulum ne audire quidem poſſunt, vel negent realem præſentiam Chriſti in hoc Sacramento, ne deſitionem ſubſtantię panis cogantur in illo admittere, vel fateantur inviti, minime ab ſe poſſe intelligi, quomodo panis ſit Corpus Chriſti.

Non inſicior, fuiſſe olim inter Scholaſticos, qui opinaretur, conversionem ſubſtantię panis in Corpus Chriſti non omnino ad evidentiam poſſe ex S. Scriptura oſtendi. Ita ſenſiſſe dicuntur Scotus, Ochamus, Cameracenſis, Paludanus, Argentinas, aliique. Sed aliud eſt, dogma *transubſtantiationis* non poſſe ad evidentiam ex S. Scriptura demonſtrari; aliud vero, eſſe manifeſtum, ut ait P. Weis, non ideo, quia Chriſtus hic præſens eſt, panem abeſſe. Primum ipſe etiam doctiſſimus Bellarminus dicit non eſſe omnino improbabile (d). Alterum negabunt Catholici omnes, quod perſuaſum illis ſit cum laudato Viro Cl., dogma *transubſtantiationis* tanta evidentia ex S. Scriptura evinci, quanta, ut ille ait, poteſt cogere hominem non protervum (e). Accedit etiam, eodem teſte, quod licet in verbis Domini eſſet aliqua obſcuritas, vel ambiguitas, ea tamen ſublata eſt per multa Concilia Catholica Eccleſiæ, & Patrum conſenſum (f). Neque porro

omit.

(a) Miscell. cathec. 7.

(b) Refutatio conſenſus Orthodoxorum.

(c) Pag. 516.

(d) Lib. III. de Sacramento Euchar. cap. 23.

(e) Ibidem.

(f) Ibidem cap. 19.

omittendum puto, hæc tantum ad rem præsentem pertinentia haberi apud Scotum, quem unum ex memoratis Scholasticis consulere potui: *non videtur*, inquit ille, *expresse haberi* (in Scriptura) *non esse ibi* (scilicet in Eucharistiæ Sacramento) *substantiam panis* (a). Ex quibus, nisi vehementer fallar, liquido apparet, Doctorem Subtilem non favere opinioni P. Weis. Loquitur enim Scotus non *absolute*, sed *dubitanter* (ait quippe, *non videri*), atque insuper non *docendo*, sed *opponendo*, ait, conversionem panis *non haberi expresse*, hoc est, plane ad evidentiam, in S. Scriptura; at vero P. Weis *manifestum esse* dicit, *ex alio capite realem præsentiam Christi in Eucharistia asseri debere*, *ex alio cessationem panis, & vini*; neque ideo quia Christus hic præsens est, abesse panem. Itaque, ut finem prolixæ digressioni imponam, caveat P. Weis, ne, quemadmodum ipse non veretur irridere Aristotelicos, quod *Aristoteles loco veteris Testamenti, & Thomas novi Evangelista* ipsis sit (b), ita neque illi piaculum ducant, ejus doctrinam, veluti Religioni non plane consonam, criminari. Nam, ut præclare scripserat Tullius, *qui admonent amice, docendi sunt; qui inimice insectantur, repellendi* (c).

S C H O L I O N II.

126. Dixeram in prima hujusce meæ Dissertationis editione (d), Corpus Christi tanto præcise spatio in hoc Sacramento realiter præsens existere, quantum ab hostia ante consecrationem occupabatur, & ab ipso corpore occuparetur, si re ipsa quoad entitativas suas dimensiones esset hostiæ non consecrata æquale. Id non arridet Cl. P. Ferrari. Proinde ut illud oppugnet, respondet, Christi Corpus sub Eucharisticis speciebus non esse in loco circumscriptive, sed definitive; & ideo non esse in loco, sicuti locum replebat hostia non consecrata (e). Sed fallitur Vir Cl. Primo namque, doctrinam illam meam ut oppugnet, satis non est, ipsam absolute inficietur, sed demonstrare debet, in quonam illa sit a vero aliena: debet nempe ostendere, quamobrem dici non possit, Corpus Christi tanto præcise spatio in Eucharistia præsens revera existere, quantum Eucharistica panis species occupare videntur. Verbis non credimus (dicebat ipse respondens Recentioribus, negantibus formam substantialem absolutam in corporibus, quæ carent vita). Argu-

F f

men-

(a) Super IV. Sententiarum Distin. XI.
q. 3. §. Hæc duo &c.

(b) In Opere laudato P. I. cap. 4. n. 137.
pag. 143.

(c) Lib. I. de natura Deorum cap. 3.

(d) §. 103.

(e) Tom. II. P. I. Physicæ Disp. IV. q. 1.
pag. 217. ad secundum.

mentis probare oportet, quod gratis dicitur (a). Grave igitur illi ne sit, si iisdem ipsis verbis & ipse hoc loco utar. Fallitur secundo, dum præsentiam, quam in Eucharistia tribuimus Corpori Christi, a circumscriptiva non distinguit. Negat enim, ideo illud esse præsens in Eucharistia tanto spatio, quantum ab non consecrata hostia replebatur, quia, inquit, *Christi Corpus sub Eucharisticis speciebus non est in loco circumscriptive*. Ipsum autem tunc falli, dico. Nam corpus esse in loco circumscriptive, est illud ita commensurari loco, cui præsens est, ut, quantum est corpus, tantus sit locus, quem occupat; & quot sunt partes in corpore, totidem sint partes loci, quibus illæ respondent. Hoc autem modo non esse in loco Corpus Christi, per hoc quod sit præsens tanto spatio, quanto præsens erat hostia ante consecrationem, neminem fore puto, qui non videat. Nescius quoque, ut arbitror, nemo est, alterum horum modorum existendi in loco ex altero non posse inferri. Etenim, cum etiam in hypothesi Scholastica de remanentia quantitatis panis in hoc Sacramento, Corpus Christi præsens in eo sit, ut vidimus (§. 103.), tanto præcise spatio, quanto præsens erat hostia non consecrata, in illa quoque hypothesi dicendum esset, Corpus Christi, in Eucharistia existens, esse in loco circumscriptive. Peccat postremo, dum ait, *Christi Corpus sub speciebus Eucharisticis esse in loco definitive*. Communis quippe Theologorum sententia est, Corpus Christi Domini in hoc sacramento non esse in loco circumscriptive, nec definitive, sed sacramentaliter. Non circumscriptive, propter rationem paulo antea traditam. Neque definitive; quia, ut ait S. Thomas, *sic non esset alibi, quam in hoc altari, ubi conficitur hoc sacramentum* (b). Esse enim in loco definitive est taliter ibi esse, ut quod in eo est, simul non sit alibi, sive, quemadmodum habet Cl. Iuenin, *ut alibi simul esse non possit* (c). Superest ergo dicamus, sacratissimum Christi Corpus (quod etiam de ejusdem sanguine dicendum est) esse in Eucharistia sacramentaliter, nempe tali ratione, quam etsi verbis, ut sapienter monet Concilium Tridentinum, *exprimere vix possimus, possibilem tamen esse Deo, cogitatione per fidem illustrata assequi possimus, & constantissime credere debemus* (d). Quod si esse in loco definitive, perinde omnino sit Viro Cl., ac definiri certo quodam spatio, ita, ut, quemadmodum ait doctissimus Bellarminus, *in toto illo sit, & non in majori* (e), nolo de nomine, ut vulgo dicitur, litem cum illo movere; unde concedo,

(a) Ibidem Disp. I. q. 1. pag. 21.

(b) P. III. q. 76. artic. 5. ad primum.

(c) Dissert. IV. de Eucharistia q. 4. cap. 2. artic. 4.

(d) Sess. XIII. cap. 1.

(e) Lib. III. de Sacramento Eucharistiae cap. 4.

cedo, Corpus Christi sub Eucharisticis speciebus esse in loco definitive. Consideret tamen P. Ferrari, serioque animadvertat, modum hunc existendi in loco nullatenus cum eo pugnare, quem Corpus illud sanctissimum in Eucharistia habere contendo. Testis sit laudatus Card. Bellarminus. Inquit enim, statim post verba modo relata: *hoc modo Corpus Domini in qualibet hostia potest dici esse definitive; quia est in tanto spatio, quantum occupat hostia consecrata, & non in majori* (a): quo certe an aliquid clarius dici possit ad nostram summi alicujus Theologi auctoritate confirmandam opinionem de modo, quo Christus Dominus in Eucharistia existit, prorsus ignoro.

S I C H O L I O N III.

127. Definit quidem Tridentina Synodus (b), in venerabili Eucharistiæ sacramento sub *singulis* hostiæ *partibus totum Christum contineri*; sed cum addat: *separatione facta*, nihil prorsus inferri hinc potest, quod jure prohibeat, quominus dicamus, sacratissimum Christi Corpus præsens esse in Eucharistia tanto spatio dumtaxat, quantum, quæ manent *species* panis, occupare videntur. Sequitur enim, inquit Auctor præclari operis *de re sacramentaria* inscripti, *fidei non esse*, ante separationem factam, *totum Christum sub qualibet hostiæ particula contineri*; atque adeo, *salva fide defendi posse, quod habeat corpus ejus actualem extensionem* (c).

A N I M A D V E R S I O II.

128. Considerandum præterea est, non solum *locales dimensiones*, sub quibus Corpus Christi Domini in Eucharistia *realiter* delitescit, iis esse æquales, sub quibus erat hostia ante consecrationem; verum etiam Corpus illud sanctissimum ita in hoc sacramento existere I. *ut vere & realiter eodem ipso pondere premat subjecta corpora, quo ante consecrationem naturaliter ab hostia premebantur*. II. *ut lumen ex illo loco regeat quoquoque, eadem ratione modificatum, qua ex eodem loco, scilicet ex hostiæ superficie, ante consecrationem reflectebatur*. III. *ut circumambientem aerem, quaque in eo sunt salina, sulphurea, alteriusve cujusque generis corpuscula, eodem modo ex illo loco moveat, nerveasque sensoriorum nostrorum fibras iis ipsis legibus ex ipso loco Divina sua virtute vellicet, atque percellat, quibus aer ipse, latentia in eo corpuscula,*

F f 2

G

(a) Lib. III. de Sacram. Eucharistiæ cap. 4.

(c) Lib. IV. q. 6. sect. 1. cap. 4. §. 2.

(b) Sess. XIII. can. 5.

& nerva sensoriorum fibra ab non consecrata hostia naturaliter movebantur. Ut enim ex Angelico Doctore alibi etiam monuimus, erroneum est dicere, Deum non posse facere per seipsum omnes determinatos effectus, qui sunt per quamcunque causam creatam; unde, cum corpora moveantur immediate a causis creatis, nulli debet venire in mentem, quin Deus possit movere immediate quodcunque corpus (a). Hinc nonnulla sequuntur, maxime in hoc negotio considerata.

COROLLARIUM I.

129. Sequitur primo, Christum Dominum ita in Eucharistia existere, ut, habita ratione tum spatii, cui realiter præsens est, tum modi, quo ex illo Divina sua virtute operatur, ab hostia non consecrata ipsum discernere nulla penitus ratione possimus.

COROLLARIUM II.

130. Sequitur secundo, sensibilitatem panis, sub qua in hoc sacramento Christus latet, non esse mere extrinsecam, hoc est, unice positam in organorum, qua sensationibus inserviunt, immutatione, cujusmodi est sensibilitas angeli sub specie alati juvenis, & fuit sensibilitas ipsiusmet Christi sub specie hortulani, & peregrini; sed præterea illam esse aliquo modo intrinsecam, sive formalem, & objectivam. Est enim Christus Dominus in hoc sacramento instar panis, non tantum quia sensoria nostra, panis instar, immutat & afficit; verum etiam quia, nulla habita sensuum ratione, omnique illorum immutatione seclusa, I. non majori spatio vere, realiter, & substantialiter ille in hoc Sacramento præsens est, quam occupet hostia non consecrata. II. quia eodem pondere premit subiecta corpora, quo a non consecrata hostia naturaliter premi solent. III. quia eodem plane modo ex illo loco agit in circumambientem aerem, & in reliqua, quæ illi spatio circumstant, corpora, quo hostia, antequam consecraretur, ex eodem loco operabatur. Hinc

COROLLARIUM III.

131. Sequitur tertio, Christum Dominum esse in hoc sacramento instar panis, sive sub panis sensibilitate, quamvis in sensoriis nostris nulla earum motionum fiat, quæ naturaliter a pane excitari in illis solent.

(a) P. I. q. 105. artic. 2.

COROLLARIUM IV.

132. Demum, quoniam nullum requiritur *accidens absolutum*, neque ut Christus Dominus sit præsens tanto præcise spatio, quantum replebat hostia ante consecrationem; neque ut ex illo loco ea omnia immediate ipse efficiat, quæ ex eodem efficeret hostia non consecrata, relinquitur, *hec omnia vera esse de Christo etiam in clausa pixide existente, quamvis nullum detur accidens absolutum, sub quo ille in ea delitescat.* Unde manet, *et si quidem delitescat, non efficitur.*

COROLLARIUM V.

133. Nullum absolutum accidens necessaria requiri, ut Christus in Eucharistia, etiam dum clausa pixide continetur, sub panis sensibilitate vere proprieque existat; penitusque sufficere, referetur pixis, ut panis instar ille nobis appareat.

S C H O L I O N.

134. Dixi, ut in prima, ita in hac altera hujusce *Dissertationis* editione, *sensibilitatem panis, sub qua Christus in Eucharistia existit, non esse mere extrinsecam, hoc est, dependentem a sola externorum sensoriorum immutatione; sed esse certo modo intrinsecam, & obiectivam, tametsi a nullo absoluto accidente proveniat.* Id non placet Cl. P. Ferrari, putatque Vir Cl., ab se mihi factum satis hoc ipso tantum, quod responderit, *formalem, & obiectivam sensibilitatem in sacramento altaris a se non intelligi, eo quod Christus Dominus præstet munera panis, propterea nimirum quia id omne ad efficientem causalitatem pertineat (a).* Sed fallitur. Non enim dixi, *sensibilitatem panis, sub qua in hoc Sacramento Christus latet, ideo esse aliquo modo formalem, & obiectivam, quia Christus in illo præstet munera panis, hoc est, quia sensoria nostra panis instar afficiat; sed quia, omni secluso sensu, non majori loco in illo præsens existit, ac fuerat hostia ante consecrationem; eodem prorsus, quo hostia, pondere gravitat; eodemque modo ex illo loco lumen regerit, movetque circumambientem aerem, quo ab hostia non consecrata regerebatur lumen, & circum-*
stans

(a) Tom. II. P. I. *Physicæ* Disp. IV. q. 1.
in respons. ad 8. *objectionem* ad secundum pag. 217.

stans aer movebatur. Quod si velit Cl. Auctor, eam dumtaxat panis *sensibilitatem* dici posse *formalem*, & *objectivam*, quæ oritur ab *accidentibus absolutis*, bene ei sit, dummodo tamen liberum quoque relinquat Recentioribus, contra sentire. Nec enim, ut sæpius cum Tullio (a) dixi, tantum apud illos præjudicata opinio potest, ut etiam sine ratione valeat auctoritas.

DOGMA III.

135. Eucharistia est vere & proprie *Sacramentum*, non solum cum a fidelibus sumitur, verum etiam cum in clausa pixide asservatur. Id quoad utramque partem a Concilio Tridentino expresse definitum est. Anathema enim dixit S. Synodus tum contra eos, qui negaverint, *Eucharistiam* esse *vere & proprie Sacramentum* (b), tum contra illos, qui temere effutierint, *in hostiis*, seu *particulis consecratis*, quæ post communionem *reservantur*, vel *superfunt*, non remanere *verum Corpus Domini* (c).

Hypothesis VI.

136. Certum puto, tuta fide dici posse, id, quod in Eucharistia habet rationem *Sacramenti*, esse ipsum *Corpus*, & *Sanguinem Christi Domini*, quatenus sub *speciebus panis*, & *vini* in illa existunt. Ita inter alios profecto non paucos tenent Juenin (d), Tourneli (e), & Auctor præclari Operis *de re sacramentaria* (f), a quo etiam dicitur, id constare *ex communi Patrum loquendi more*, *sensuque ipso fidelium*, nec quidquam in contrarium facere *Scholarum subtilitatem* (g).

PROPOSITIO X.

Absolutis Scholasticorum accidentibus opus necessario non est, ut Eucharistia tam extra, quam intra pixidem posita, in eaque latens, sit vere & proprie sacramentum.

137. *Probatum*. Ut Eucharistia sit vere & proprie *sacramentum*, non solum cum extra pixidem posita est, verum etiam dum illa continetur.

(a) Lib. I. *de natura deorum* cap. 5.

(b) Sess. VII. *de Sacramentis* can. 1.

(c) Sess. XIII. can. 4. *de Eucharistia*.

(d) Tom. VII. *Instit. Theol.* Dissert. IV.

q. 1. cap. 1., & in *Opere de Sacramentis* Dissert. IV. q. 1.

(e) *De Sacramento Euch.* q. 4. artic. 1.

(f) Tom. I. lib. IV q. 1. §. 3.

(g) *Ibidem*.

netur, non aliud requiritur, nisi ut Christus Dominus tam extra, quam intra pixidem sub panis, vinique *speciebus* vere, realiter & substantialiter existat (§. 136.). Potest autem Christus tam extra, quam intra pixidem vere, realiter & substantialiter existere sub *speciebus* panis, & vini, quamvis nullum detur *accidens absolutum*, quod in pane, & vino fuerit, & peracta consecratione, remaneat, sub quo deinde Christus ipse veluti delitescat (§. §. 114., 133.). Ergo nullum *accidens absolutum* requiritur, ut Eucharistia tam extra, quam intra clausam pixidem existens, sit vere & proprie *sacramentum*.

Confirmatur quoad primam partem. Sumeretur Christus Dominus sub vera, & propria ratione *sacramenti*, si sub *speciebus viva carnis*, aut *sanguinis* ille nobis seipsum traderet. Nulla quippe sufficiens ratio occurrit, quamobrem Christus Dominus habeat veram rationem *sacramenti*, dum nobis traditur sub *speciebus panis*, & *vini*; minime vero, si sub *speciebus viva carnis*, aut *sanguinis* ille ipse nobis exhibeatur. Constat autem (§. 114.), ipsomet etiam Angelico Doctore, ut vidimus, confirmante, nullum requiri *accidens absolutum*, ut Christus Dominus sub *speciebus viva carnis*, aut *sanguinis* nobis occurrat, & sub illis a nobis sumatur. Ergo nullo hujuscemodi *accidente* opus itidem est, ut Eucharistia extra pixidem posita sit *sacramentum*.

Confirmatur quoad secundam partem. Positis *absolutis* Scholasticorum *accidentibus*, ideo Eucharistia etiam in clausa pixide verum *sacramentum* est; quia Christus in illa existit instar panis, solaue sufficit pixidis referatio, ut panis instar ille nobis appareat. Res autem non secus se habet, etiam *accidentibus* illis rejectis. Quippe, etiam illis rejectis, Corpus Christi non majori spatio vere & realiter præsens in Eucharistia est, ac naturaliter eidem spatio sit præsens hostia non consecrata; neque ut ex illo loco, perinde ac si esset panis, nobis appareat, aliud requiritur, nisi ut pixis referetur (§. 133.). Ergo non minus rejectis *accidentibus absolutis*, quam iisdem positis, Eucharistia etiam, dum clausa pixide continetur, est vere & proprie *sacramentum*.

Satisfit objectionibus.

I.

138. *Opponitur primo.* Reliqua omnia sacramenta ita sunt signa sensibilia gratiæ, quam conferunt; digne sumentibus, ut simul illud ipsum in iisdem revera sit, quod sensibus apparet. Ergo idem prorsus etiam de Eucharistia dicendum est, adeoque &c.

R.

R. *concesso ante, negando conseq.* Vel enim de ratione *sacramenti* est, ut id revera in illo habeatur, quod sensibus in eo apparet, vel *sacramenti* ratio id nequaquam postulat. Si hoc alterum: argumentum, ut patet, nullum est. Sin autem primum: ergo, sicuti in reliquis sacramentis manet substantia rerum earum, ex quibus conficiuntur, ita quoque in Eucharistia, ut *sacramentum* vere sit, panis, vinique substantia remanere deberet. Hoc autem sine hæresi manifestum dici non potest. Ergo de ratione *sacramenti* non est, ut id, quod sensibus apparet, revera in illis existat.

I I.

139. *Opponitur 2.* Est de intrinseca ratione *sacramenti*, ut sit *signum*. Communi enim Theologorum consensu, *sacramentum* dicitur *invisibilis gratiæ sensibile signum*. Est autem *signum* ex S. Augustino id, quod præter speciem sui, quam ingerit sensibus, aliud aliquid a se facit in cognitionem venire (a). Ergo, ut Eucharistia sit *sacramentum*, debet in ea esse aliquid, quod veram habeat rationem *signi*. Nihil autem hujusmodi in illa est, nisi *absoluta accidentia* panis; cum jam panis substantia nequaquam in illa supersit. Ergo *absolutum* aliquod panis *accidens* necessario in Eucharistia admittendum est, ut illa vere & proprie sit *sacramentum*.

R. *concedendo totum argumentum principale, & neg. minorem subsumtam*, videlicet nihil esse in Eucharistia, quod habere queat rationem *signi*, nisi *accidentia absoluta*, quæ fuerint in pane ante consecrationem, & post consecrationem in illa remaneant. Quod enim in Eucharistia habet rationem *signi sensibilis gratiæ*, ipse Christus est, quatenus sub panis, vinique *sensibilitate* in ea existit (136.). Neque obstat, sensibile esse in propria specie id, quod in aliis Sacramentis habet rationem *signi*. Latissimum quippe discrimen est. In sola enim Eucharistia fit *transsubstantiatio* sensibilibus earum rerum, ex quibus illa conficitur; in eaque dumtaxat ipse gratiæ Auctor Christus vere, realiter, & substantialiter nobis exhibetur. Nimis proinde probat argumentum. Probat enim, etiam in Eucharistia, quemadmodum in reliquis sacramentis, remanere debere illarum rerum substantiam, ex quibus conficitur, ut nempe ipsa quoque, sicuti illa, sit vere *signum sensibile*. Itaque sicuti stat, Eucharistiam esse vere, & proprie *sacramentum*, adeoque *invisibilis gratiæ sensibile signum*, li-

cet,

cet, non ut in reliquis, panis, vinique substantia in ea remaneat, ita stare optime potest, Eucharistiam esse vere & proprie sacramentum, tamen nullum *accidens absolutum*, quod in pane, & vino fuerit, & cui deinde ratio signi tribuatur, in illa supersit.

III.

140. *Opponitur* 3. Eucharistia ideo ex S. Augustino est sacramentum, quia *aliud* in illa videtur, *aliud* intelligitur. *Ista, Fratres* (panis scilicet, & vinum) *ideo*, inquit ille, *dicuntur Sacramenta*, quia *in eis aliud videtur*, *aliud intelligitur* (a). Nequit autem in Eucharistia haberi *aliud*, & *aliud*, nisi panis, vinique *accidentia* in ea existant. Hæc quippe tantum esse possunt id, quod dicitur *aliud* a Corpore, & Sanguine Christi. Ergo &c.

Et *permissa majori, disting. min.* nequit in Eucharistia haberi *aliud*, & *aliud*, nisi positis *accidentibus absolutis*, si per ly *aliud*, & *aliud* intelligi debeat *entitas realis absoluta*, a Corpore, & Sanguine Christi omnino diversa, & una simul cum illis in Eucharistia reapse existens, *concedo minorem*; si per ly *aliud*, & *aliud* non exprimatur nisi diversitas modorum, quibus eadem res simul in hoc Sacramento existit, *nego minorem*, & *conseq.* Opinor ergo, per ly *aliud*, & *aliud* non intelligi a S. Augustino distinctionem *realium entitatum*, quarum una appareat sensibus, altera in hoc Sacramento concipiatur mente, & fide credatur; sed distinctionem dumtaxat modorum, quibus una eademque res, nempe Corpus, & Sanguis Christi, in illo existit. Mea nimirum opinio est, non aliam hoc loco fuisse mentem S. Augustini, nisi fideles admonere, ut firmissime credant, id, quod illis in Eucharistia exhibetur, omnino diversum ab eo esse, quod eorum sensibus in ea apparet. Unde ipsos alloquens, ait S. Doctor: *quod videtis, panis est, & calix, quod vobis etiam oculi vestri renuntiant. Quod autem fides vestra postulat instruenda, panis est Corpus Christi, calix sanguis Christi* (b). Posse autem Corpus Christi Domini videri *panem*, ejusque sanguinem nobis in Eucharistia apparere, veluti a *vino* minime diversum, quin dentur *absoluta* panis, vinique *accidentia*, sub quibus lateant, satis ex dictis patet (§. 114. & seq.) Ergo illis *accidentibus* opus non est, ut, quemadmodum ait S. Augustinus, *aliud* in Eucharistia appareat sensibus, *aliud* revera in illa existat.

G g

Huc

(a) Serm. CCLXXII. Hunc quoque refert integrum S. Fulgentius Ruspensis Episcopus *epist. XII. ad Ferrandum num. 15. alias cap. 11.*

(b) Ibidem.

Huc porro apprime facit, quod eodem loco habet idem S. Doctor. Non enim ait, *quod videtur* (in Eucharistia) esse corporale, sed *speciem habere corporalem* (a). Si autem in Eucharistia existerent *accidentia* panis *absoluta*, cum illa sint aliquod corporale, non haberet tantum *speciem corporalem* id, quod nobis in illa traditur, sed aliquo modo esset corporale. Ergo, cum ait S. Augustinus, *aliud* in Eucharistia *videri*, *aliud* intelligi, mens ejus non fuit, nos docere, id, quod in Eucharistia apparet sensibus, aliud esse reipsa ab eo, quod nobis in illa exhibetur; adeoque *absoluta* Scholasticorum *accidentia* in Eucharistia, ut sit Sacramentum, admitti oportere.

I V.

141. Opponitur 4- tria in Eucharistia distingui, nempe *sacramentum tantum*, *rem tantum sacramenti*, simulque *rem*, & *sacramentum*; atque ex Innocentio III. *sacramentum tantum* esse species panis; & vini; *rem tantum sacramenti* corpus, & sanguinem Christi; *rem vero*, & *sacramentum* corpus ipsum, & sanguinem simul cum speciebus. *Distinguendum est*, inquit ille, *inter tria, quæ sunt in hoc sacramento discreta, videlicet formam visibilem, veritatem corporis, & virtutem spiritualem*. Forma, est panis, & vini; veritas, carnis, & sanguinis; virtus, unitatis, & charitatis. Primum est sacramentum; secundum est sacramentum, & res. Tertium est res, & non sacramentum (b). Ergo necesse est, species panis, & vini sint aliquod reale, quod vere existat, ut rationem sacramenti habere illæ possint.

R. primo cum Cl. Tournely, *distinguendo* assumtum: species sunt sacramentum tantum, sumendo sacramentum adæquate, pro eo nempe, quod significat, simulque producit gratiam, *nego assumtum*; sumendo sacramentum inadæquate, scilicet pro eo, quod tantum significat gratiam, *concedo assumtum*, & *nego consequentiam*. Potest enim sensibilitas panis, & vini, quæ in Eucharistia habetur, undecunque illa proveniat, significare gratiam, sed non potest gratiam producere, quemadmodum necesse est, ut adæquata Eucharistici sacramenti ratio in ipsa panis sensibilitate jure statuatur. Hinc laudatus Vir Cl., cum, inquit, tria requirantur ad sacramentum vere, & adæquate sumtum, nempe sensibilitas, significatio, & efficacia, ac speciebus due tantum priores conditiones competant, non tertia, sequitur, citatos Auctores (sci-

(a) Serm. laudato.

(b) Lib. III. Decretalium tit. de celeb. Missarum cap. cum Marthæ.

(scilicet Innocentium III., & S. Thomam, qui idem docet) *sensu adequato, & perfecto nomen sacramenti non usurpasse, cum dixerunt, in Eucharistia species esse tantum sacramentum. In Eucharistia igitur species sunt sacramentum tantum (supple, inadequate sumtum); gratia sanctificans est res tantum sacramenti; corpus vero Christi, sub speciebus contentum, est & res sacramenti, & sacramentum simul (a).*

R. 2. Innocentium III. dixisse quidem, tria in sacramento Eucharistiae distingui, & species panis esse id, quod in ea habet rationem tantum sacramenti; sed neutrum nobis proposuisse tamquam divina fide credendum; alioquin Theologi plurimi, qui contrarium tenent, non essent a culpa immunes: quod profecto nemo cordatus dicet. Nec refert, illam doctrinam in Decretalibus contineri. Ut enim recte observat Cl. Melchior Canus, *neque statim ac si quidquam Juris Canonici volumine continetur, fidei dogma esse, credendum est (b); sed, ut habet Cl. Contensonus, tunc intendunt Ecclesiastici Judices rem ad fidem spectare, cum vel sub interminatione anathematis, vel sub panis haereticis infligendis aliquid proponunt, oppositumque ajunt Ecclesiae regulis, Scripturae, & sacrae traditioni adversari (c): quod factum non esse in casu nostro, nemo non videt.*

V.

142. Opponitur 5. ex P. Picinardo, corpus Christi (illius sunt verba) in caelo, & alibi, prater Eucharistiam, in adversa sententia, scilicet Recentiorum, sacramentum apparere posse. Nonne enim, inquit, etiam hoc pacto in caelo obiective apparenter menti Joannis in Apocalypsi sub specie agni in altari quoque caelesti apparebat? Vere igitur & in caelo sacramentum fuit. Nonne antea sub specie Solis in Tabor, nonne postea sub specie peregrini offerentis & panem in Emaus pariter apparebat? Quid igitur ipsi defuisset, ut juxta hypothesim Recentiorum extra Eucharistiam corpus Christi apparenter licet, non vere, sacramentum utique dici posset (d)? Haec autem absurda sunt. Ergo &c.

R. primo, hoc argumentum, si quod probat, non tantum contra Recentiores, verum & contra Scholasticos, ipsumque suum Auctorem ex aequo pugnare. Demus enim, extare *accidentia absoluta*, qualia sibi fingunt Scholastici. Dubitandum certe non est, quin efficere possit Deus, ut non solum in Eucharistia, sed etiam extra illam sine

G g 2

sub-

(a) Prælect. Theol. de sacramento Eucharistiae q. IV. artic. 1.

(b) Lib. V. de locis Theol. cap. 5.

(c) Tom. I. Theol. mentis, & cordis

lib. V. Dissert. Præambula coroll. 1.

(d) Lib. de imputato Scholasticis studio effræni in Aristotelem cap. VII. §. 2.

subiecto existant. Inficiabitur quoque Scholasticorum nemo, ut puto, Deum efficere posse, si velit, ut sacratissimum Christi Corpus non in Eucharistia tantum, verum & extra Eucharistiam sub *accidentibus* alienis, e. c. *agni*, nobis occurrat, videlicet posse efficere, ut, quemadmodum in Eucharistia sub *accidentibus panis*, ita extra Eucharistiam sub *accidentibus agni* corpus illud sanctissimum *vere*, & *realiter* nobis exhibeatur. Hoc ergo posito, sic conficio argumentum: corpus Christi si nobis occurreret sub *accidentibus agni*, vel esset *vere*, & *proprie sacramentum*, vel non. Si non: ergo neque fuit *sacramentum*, quando sub *specie peregrini* discipulis apparuit, tamen tunc, perinde ac modo in Eucharistia, illa apparitio non ab *absolutis accidentibus*, sed a sensuum immutatione unice fuerit. Si autem esset *sacramentum*, quæro, an id dici queat sine piaculo, & *vere*; num vero neque *vere*, neque sine piaculo a Viro catholico illud dici possit. Si primum: ergo non est absurdum, *Corpus Christi in cælo, & alibi præter Eucharistiam*, Recentiorum sententia admissa, *apparere sacramentum posse*. Sin alterum: ergo Scholasticorum quoque opinio rejicienda est, quod ex illa, perinde atque ex opinione Recentiorum, tam grande absurdum, ut illud habet P. Picinardus, necessario sequatur.

R. *secundo*, unum quærens a Cl. Adversario, num scilicet, quando Christus in Eucharistia apparuit sub *speciebus vivæ carnis, & sanguinis*, veram tunc habuerit rationem *sacramenti*, an non. Si dicat, illum veram *sacramenti* rationem tunc etiam habuisse: ergo *sacramenti* rationi non officit, *sensibilitatem* rei alienæ, sub qua Christus Dominus nobis in Eucharistia se prodit, a sola externorum sensuum immutatione provenire; cum etiam ex ipsomet S. Thoma certa res sit (114.), apparitiones Christi Domini factas in hoc Sacramento sub *speciebus vivæ carnis, & sanguinis* propterea contigisse, quod *intuentium oculi immutarentur tali immutatione, ac si expresse viderent exterius carnem, vel sanguinem*. Si autem dicat P. Picinardus, non fuisse *Sacramentum*, cum Christus in Eucharistia sese præbuit sub *speciebus vivæ carnis, & sanguinis*, dicat quoque oportet, Christum Dominum sumtum ab iis non fuisse *sacramentaliter*, qui, ut ex Ecclesiasticis Historiis habemus (a), illum sumere sub *speciebus vivæ carnis, & sanguinis*; & ideo rationem *Sacramenti* in eo non esse positam, ut sit *invisibilis gratia sensibile signum*; cum minime dubitandum videatur, quominus, qui Christum Dominum sub illis *speciebus* com-

(a) Vide Nicephorum lib. XIII. *Hist. Ecclesiasticæ*, Sozomenum lib. VIII. cap. 5., Amphilochem in vita S. Basilii, & Joan-

nem Diaconum in vita S. Gregorii Magni lib. II. num. 41.

communicantes acceperunt, ipsum sumserint *aliena specie occultatum*, & maximam gratiam ex hac sumtione obtinuerint.

R. *tertio* in forma ad argumentum, & dico, non esse absurdum, loquendo, ut ajunt, *de possibili*, *Corpus Christi in cælo*, & *alibi præter Eucharistiam sacramentum posse apparere*. Nullam certe causam affert P. Picinardus, neque ullam ipse video, cur id Deus facere non debeat, ne absurdum efficere dicatur. Ad probationem autem concedo, neque apparitionem Christi Domini sub *agni specie* factam Joanni, & ab eo in *Αποκαλύψει* relatam, neque apparitionem ejusdem Christi factam sive Petro, Jacobo, & Joanni in monte Thabor sub *specie Solis*, ut ille ait, sive duobus discipulis euntibus in Emmaus sub *specie peregrini*, ut refert Scriptura, fuisse *sacramentum*. Nego tamen, ejusmodi apparitiones ideo non fuisse *sacramentum*, quia factæ fuerint independenter a quovis *accidente absoluto*, & per solam externorum sensuum immutationem. Cur enim illæ non fuerint *sacramentum*, non hæc causa est; sed quia non fuerunt *sanctificantis gratiæ efficax signum*, in quo *sacramenti* ratio consistit. Ob hanc certe causam, inquit doctissimus Bellarminus, *excluduntur a ratione sacramenti lingue illæ igneæ, quæ apparuerunt super Apostolos in die Pentecostes*. Significabant enim *charitatem ardentissimam*, quæ tum Apostolis infundebatur una cum sapientia, & eloquentia plane divina, sed *sacramentum non erant*; quia non vi earum linguarum infundebatur illis *charitas* (a); cum scilicet, ut optime docet idem Vir celeberrimus, ad rationem *sacramenti* non sufficiat, ut *significet*, sed *requiratur etiam*, ut *efficiat sanctitatem*, seu *sanctificationem*; imo magis proprium est *sacramenti sanctificare*, quam *significare* (b). Patet igitur, quid sit respondendum Cl. Adversario quærenti, quidnam deficiat apparitionibus ab eo in argumento memoratis, quominus *sacramentum* vocari possint: dicendum nempe est, id illis defuisse, in quo potissimum ratio *sacramenti* consistit. Non enim fuerunt, ut patet, invisibilis gratiæ efficax signum. Mirandum tamen, eam a Viro Cl. apparitionem obiici, in qua Christus Dominus *sub specie agni in altari cælesti menti Joannis apparuit*. Illa quippe non fuit *sensibilis*, sed pure *mentalis*, sive in *spiritu* (c); neque Christus Dominus *vere, realiter*, & *substantialiter* sese tunc præbuit Joanni, quemadmodum illum nobis sese præbere in Eucharistia, certissimum est.

143.

(a) Lib. I. de sacramentis in genere
cap. 9.

(c) Apocalypsis cap. I. v. 10.

(b) Ibidem cap. 12.

143. Opponitur postremo ex P. Ferrari. *Dum sacramentum*, inquit ille, *in pixide clausum est*, nihil reipsa tunc habetur, nisi Corpus Christi. Ibi sane (ita prosequitur Vir Cl.) non sunt species ut sensatæ; quippe nulla est sensuum nostrorum motio; sed nec species extant ibi ut sensibiles; quia Christus nihil tunc agit, ut sensus vellicet nostros, & solam tunc habet remotam potentiam movendi, quoniam nec panis nos moveret, si ibidem clausus existeret (a). Ergo &c.

R. *disting. assumtum*: dum sacramentum Eucharistiæ in pixide clausum est, nihil reipsa tunc habetur, nisi Corpus Christi, ibi existens modo naturali, *nego assumtum*; ibi existens modo nullatenus ab eo diverso, quo ante consecrationem ibi extabat panis, *concedo assumtum*. Ad probationem autem dico, non haberi quidem in clausa pixide species panis ut *sensatas*, hoc est, nullam earum motionum tunc fieri in sensibus nostris, quæ naturaliter in illis solent a pane excitari; sed haberi species panis ut *sensibiles*, hoc est, Christum Dominum in ea existere instar panis; nimirum ea ratione, ut, quemadmodum supra explicavimus (§§. 120., 128., & seq.), non majori spatio illud in ea sit præsens, ac erat hostia non consecrata; pixidem premat, æque ac ab hostia ante consecrationem premebatur, solaque sufficiat reformatio pixidis ad eas motiones in sensoriis nostris excitandas, quas panis sensatio naturaliter comitatur. Negabit quidem P. Ferrari, sufficere hunc modum existendi in clausa pixide, quem Christi Corpori tribuimus, ut sub speciebus panis sensibilibus Corpus illud sanctissimum in ea esse, vere proprieque dicatur. Sed nisi rationem aliquam attulerit Vir Cl., quamobrem id admitti non possit, ab hac opinione non recedam. Neque enim sufficiens mihi ratio est, ipsum dixisse. Interea vero falsum esse puto, ideo in clausa pixide, rejectis accidentibus absolutis, Christum non existere sub speciebus panis sensibilibus, quia, ut ait Cl. Auctor, Christus nihil tunc agit, ut vellicet sensus nostros. Nam vel nulla est hæc ratio, vel neque positis accidentibus absolutis dici potest, sub speciebus panis sensibilibus Christum Dominum in clausa pixide contineri. Constat enim, neque illis accidentibus positis sensus nostros tunc a Christo Domino vel levissime vellicari. Falsum est etiam, in pixide clausa solam haberi remotam potentiam movendi sensus. Cum enim sola sufficiat reformatio pixidis,

ut

(a) Tom. II. P. I. *Physices* Disp. IV. q. 1.

ut motio propria panis in sensibus nostris a Christi Corpore excite-
tur, non *remota*, ut ait Vir Cl., sed *proxima* movendi *potentia* in
illa est. Miror autem, P. Ferrari uti exemplo panis in clausa itidem
pixide existentis, ut evincat, nonnisi *remotam* movendi potentiam in
illa haberi. Nam hinc sequitur, Christum Dominum neque positis
accidentibus absolutis sub *speciebus* panis *sensibilibus* in pixide clausa
contineri; cum scilicet illis positis, perinde prorsus atque iisdem re-
jectis, sola remota potentia movendi sensus nostros, sicuti in pa-
ne, ut ille ait, ita in Christo habeatur: quæ non sufficit, Virum ip-
sum Cl. si audiamus, ut Christus Dominus sub *speciebus* panis *sen-
sibilibus* in pixide clausa existere dicatur. Propterea quo justius S.
Augustinus (a) doctrinas Pelagianorum, eo iniustius P. Ferrari (b)
vocat responsiones Recentiorum ad Scholasticorum argumenta *sen-
tentiarum portenta*, *inopinata mysteria dogmatum novorum*, *parado-
xa mirabiliora Stoicorum Philosophorum*. Quantum mea opinio est,
nescio cum Cl. Muratorio, quo pacto *justi* ac *prudenter* nomen reti-
nere possit, qui ita in hostem irruit, ut se quoque incaute ledat (c).

PROPOSITIO XI.

*Neque testimonio veterum Patrum, qui decem prioribus Chri-
sti sæculis in Ecclesia floruerunt, neque Theologorum aucto-
ritate potest evinci, panis vinique sensibilitatem, sub qua
Christus Dominus in Eucharistia existit, oriri ex illarum
rerum accidentibus, quæ in hoc sacramento divinitus sine
subiecto supersint.*

144. Hæc propositio duas, ut patet, habet partes. Prima est,
existentiam *accidentium absolutorum* in Eucharistia evinci non posse
testimonio veterum eorum Patrum, qui decem prioribus Christi sæ-
culis in Ecclesia floruerunt. Altera, eorundem *accidentium* existentiam
in hoc Sacramento non posse ostendi auctoritate Theologorum.

ANIMADVERSI O.

145. Loquor de Patribus, qui floruerunt in Ecclesia ante *undeci-
mum* Christi sæculum, videlicet antequam Scholastica Philosophia
pedes

(a) Lib. III. *contra Julianum* cap. 3.

(b) Loco citato.

(c) Lib. II. *de moderamine ingeniorum* cap. 3.

pedes in Scholis catholicis figeret, & sacrae Facultati amico foedere jungeretur. Nimis apertum est enim, B. Lanfrancum Cantuariæ Archiepiscopum, qui obiit anno 1089, & a quo prima Scholasticorum ætas initium habuisse dicitur, S. Anselmum, S. Thomam, S. Bonaventuram, aliosque etiam, qui non minus pietatis, quam doctrinae gloria clari in Ecclesia fuerunt, *qualitates corporum sensibiles* tamquam *entitates absolutas* a corporea substantia distinctas habuisse; atque ex his, divinitus sine subiecto in Eucharistia remanentibus, panis, vinique *sensibilitatem*, sub qua Christus Dominus in illa existit, derivasse. Hac itaque animadversione præmissa, memorique animo insculpta,

O S T E N D I T U R

Pars prima Propositionis, scilicet ex testimonio veterum Patrum.

146. Ad veterum ergo Patrum auctoritatem in primis quod attinet, citra dubium puto, nihil prorsus ex hoc capite colligi jure posse, quod faveat Scholasticorum opinioni, si constiterit, Patres, qui *undecimum Christi sæculum* in Ecclesia præcesserant, minime tenuisse, panis, vinique *sensibilitatem*, quæ, non remanente illarum rerum substantia, in Eucharistia superstes manet, ex *absolutis* rerum earundem *accidentibus*, divinitus, ut Scholasticis persuasum est, in ipso sacramento sine subiecto existentibus, provenire. Tunc quippe solum auctoritas S. S. Patrum certam fidem facit in rebus ad Religionem pertinentibus, cum omnes in una eademque re aperte consenserint. *Persuasum esse debet*, inquit doctissimus Melchior Canus, *Sanctorum omnium communem sensum certam fidem facere catholicorum dogmatum; ac proinde ex omnium auctoritate certa argumenta depromi Theologicis conclusionibus confirmandis* (a): omnium, inquam. Eodem siquidem teste, *plurium Sanctorum auctoritas, reliquis, licet paucioribus, reclamantibus, firma argumenta Theologo sufficere & præstare non valet* (b). Constat autem, Patres, qui ante XI. Christi sæculum in Ecclesia claruerunt, id non tenuisse de origine atque natura *sensibilitatis* panis, & vini, sub qua Christus Dominus in Eucharistia continetur, quod docent Scholastici.

Etenim *primo* communis Eruditorum omnium sententia est, omnes, vel ferme omnes veteres Patres uni Platoni in rebus ad Philosophiam

(a) Lib. VII. de locis Theol. cap. 3. ad conclus. 6.

(b) Ibidem concl. 3.

sophiam spectantibus nomen dedisse. *Theologi veteres omnes*, inquit Franciscus Patricius, qui & sacrosanctæ fidei jecerunt fundamenta, & Ecclesiam ante extruxerunt, D. Dionysius, Justinus, Clemens Alexandrinus, Origenes, Cyrillus, Basilus, Eusebius, Theodoretus, Arnobius, Lactantius, Augustinus, Ambrosius, alii plerique omnes, quia scirent, paucis mutatis, Platonicos facile Christianos fieri posse (Augustini verbis utitur) Platonem, ejusque sectatores hosce Philosophos reliquis omnibus antetulerunt (a). Similia habet Hieronymus Dandinus, quamvis Aristoteli, si quis alius, addictissimus. Ait enim: Platonem inter ceteros maxime complexa Antiquitas est, priscique Ecclesiæ nostræ Doctores probarunt. Aristotelem admirari maluerunt, quam sectari (b). Citra dubium est autem, Platonem non per entitates absolutas realiter a corporea substantia distinctas, ut vulgo faciunt Scholastici; sed per mechanicas exilium corpusculorum affectiones, quemadmodum nunc præstant Recentiores, sensibilibus qualitatibus naturam explicasse. De hisce namque agens divinus ille Philosophus, sic primo caloris, atque frigoris naturam definit. In primis, inquit, qua ratione ignis calidus dicitur, videamus: quod ita demum perspicimus, si discretionem, divisionemque ab eo in nostro corpore factam consideremus. Quod enim acumen quoddam ea passio est, ferme est omnibus manifestum. Tenuitatem vero angulorum, laterumque subtilitatem, parvitatem particularum, motus velocitatem, quibus omnibus vehemens, & penetrans est, velociterque, quod occurrit, dividit semper & dissipat, considerare debemus, figuræ ipsius generationem memoria repetentes. Ea quippe, non alia natura, corpora nostra dividens, & in partes exiguas partiens, merito passionem illam, quæ legitime calor nominatur, inducit. Contraria vero huic passio, licet cuique manifesta, sua explanatione non careat. Humida namque partes corporum partibus nostris humidis grandiores, cum in corpus influunt nostrum, minores quidem partes extrudunt, sed in earum sedes sese insinuare non possunt; humorem autem nostrum coagulant, atque ex inequali & agitato immobilem propter aequalitatem, coagulumque faciunt. Quod autem præter naturam coactum est, secundum naturam renititur, seque revocat in contrarium. In hac reluctatione, quassationeque tremor, rigorque consistit, omnisque hujusmodi passio frigus, quodque eam infert, frigidum nominatur. Agens vero de saporibus, hæc habet: Tenduntur a lingua vena ad cordis sedem saporum nunciæ, in quas si qua inciderint, ut humidam carnis molliem penetrantia, terrestri

H h

sua

(a) Epistola, qua novam suam Philosophiam Gregorio XIV. Pontifici maximo anno 1591. nuncupavit.

(b) Præf. ad tres libros de anima. Vi-
de Launojum de Varia Aristotelis fortu-
na cap. 19.

sua natura modice liquefacta, venas ipsas contrahant, arefaciantque, sapores huiusmodi pariunt. Videlicet, si asperiora sint, acerbos, acresque, sin minus, austeros, & ponticos. Quæ & illas pungant, & si qua lingua inhærescunt, abluunt, si ultra modum id faciant, naturæque ipsius nonnihil liquefaciant, qualis est in nitro potentia, amara omnia nominantur. Sin autem vim nitro temperatiorem habent, leviusque abstergunt, falsa sine amaritudinis asperitate, magisque amica nobis apparent. Quæ autem applicata oris caliditati, ab eoque mollita & liquefacta, ipsum vicissim fervesciunt, suæque levitate sursum ad sensum elewantur, suoque attractu singula dividunt, propter huiusmodi vires acuta vocantur..... Quando autem ingredientium qualitas humida est lingue qualitati naturaliter concors, & consentanea, ac lenit mollique eam, contractamque demulcet asperitatem, & quæ in nobis præter naturam contracta, vel sparsa fuerunt, relaxat, & colligit, ac summatim naturalem singulis restituit habitum, suave huiusmodi omne, amicumque est omnibus, violentarum quoque passionum medicina atque remedium, dulceque vocatur. Omnis quoque odor, illius sententia, aut fumus est, aut caligo; color vero veluti flammula quadam, fulgorque a singulis corporibus emanans, partes habens visui ad sentiendum accommodatas (a). Indubium est itaque, sensibiles corporum qualitates habitas non fuisse a Platone tamquam entitates absolutas a substantia, quam afficiunt, realiter distinctas, sed ex mechanicis affectionibus corpusculorum, quibus naturalia quæque corpora composita sunt, eas omnes ab illo derivari; & ideo cum, ut diximus ex Dandino, Platonem inter ceteros maxime complexa Antiquitas sit, priscique Ecclesiæ Doctores probarint, videtur, eos quoque non quam tradunt Scholastici, sed quam Recentiores propugnant, sensibilibus qualitatibus naturam posuisse.

Præterea cum nullus veterum Patrum, quem ego quidem sciam, ob id criminatus Platonem fuerit, quod mechanicam ille esse docuerit originem sensibilibus qualitatibus, maximo sane argumento id mihi est, eos ne dubitasse quidem, quominus, hac admissa doctrina, facta prorsus tectaue sint, quæ circa venerabile Eucharistiæ sacramentum sunt a nobis divina fide credenda. Credibile non est enim, tantos Viros aut non vidisse, illam opinionem cum fide de mysterio nostræ Religionis præcipuo componi non posse, si revera cum illo componi ipsa nequiret; aut id vidisse quidem, sed, nimio erga Platonem amore captos, illud dissimulare voluisse. Primum quippe eximie illorum doctrinæ, alterum vero nimis officit eorundem sanctitati.

Secun-

(a) In Timæo.

*Secundo: quia non est certum, Aristotelem admisisse accidentia absoluta. I. etenim nullibi ille absolutorum accidentium mentionem facit; neque ex definitione accidentis ab eo tradita inferri potest, ut optime probat P. Maignan (a), quantitatem, & qualitatem esse revera tale ens, quod physice in subiecto sit inhasive, cum reali sui ab illo distinctione. Neque obstat, quod de Aristotele habet doctissimus Bellarminus (b), illum nempe docere, inhærentiam non esse de essentia accidentis, propterea quod dixerit, aliud esse magnitudinem, aliud magnitudinem esse, hoc est, existere, & alio loco quærat, an spatium censendum esset vacuum, ubi solus esset calor, aut sonus. Hæc, inquam, non obstant. Non certe primum. Nam si hoc probat aliquid, non aliud probat, nisi existentiam aliquo modo distingui ab essentia: quod non sufficit, quemadmodum patebit consideranti, ut magnitudo pro absoluto accidente habeatur. Neque secundum. Quandoquidem non dicitur possibile, solum colorem, aut sonum esse in spatio; sed tantum quæritur, quid dicendum sit de spatio, in quo solus haberetur color, aut sonus: quæ sane quæstio locum habet, tametsi hypothetis repugnet; eamque repugnare, ne ipsi quidem Scholastici negare possunt, cum illis quoque comperta modo res sit, sonum in tremulo aeris motu consistere; & impossibile sit, motum huiusmodi in vacuo spatio absolvi. II. quia sensibiles ipsas corporum qualitates, de quibus potissimum controversia est, ita, ille explicat, ut promeris potius modificationibus materiæ, quam pro formis absolutis subiecto inhærentibus eas habuisse videatur. Vocat enim calorem, qui contrahit, ac eodem iuncta genere cogit (c). Frigus autem, quod cogit, & eodem iuncta genere, juxta ac alienigena, contrahit. Humorem, qui ut non suis finibus, ita alienis probe circumscribitur. Siccitas vero, inquit, contra se habet (d). Lumen appellat actum perspicui, qua perspicuum est (e); colorem autem motivum ejus, quod est perspicuum actu, & id esse, ait, ipsius naturam (f). Odorem dicit fumosam evaporationem (g). Gustabile demum, inquit, tangibile quoddam est (h); utque visibile est color, sic est gustabile sapor (i). III. quia in libris *Αὑτάματα μοῖς* adeo abstruse loquitur Aristoteles, ut certo definire nemo possit, quid abstractis vocabulis actus, forma, accidentis, qualitatis &c., quibus in illis sæpissime utitur, revera intellexerit. Profecto scribens ipse ad Magnum Alexandrum, qui moleste tu-*

H h 2

lerat,

(a) Philos. entis cap. VII.

(b) Lib. III. de sacramento Eucharistiæ cap. 24.

(c) Lib. II. de gen. & corruptione tex. 8.

(d) Ibidem tex. 9.

(e) Lib. II. de anima tex. 69.

(f) Ibidem tex. 67.

(g) Lib. de sensu, & sensibili cap. 2.

(h) Lib. II. de anima tex. 101.

(i) Ibidem tex. 102.

lerat, ejus libros in vulgum missos, scito, inquit, illos neque editos esse, neque non editos; quoniam iis solis, qui nos audiunt, cognobiles erunt (a); ut propterea non immerito dixerit Themisti-
us simile esse, si quis speret, se ex Aristotelis scriptis sententiam ejus penitus assecuturum (b); quod nempe, ut observat Cl. Vives, plerumque non tam sint ejus verba intelligenda, quam nutus interpretandi (c). IV. quia in libro *Problematum*, in quo Aristoteles Physicum physice agit, non per abstracta qualitaturn, formarum, accidentium, actus, & potentia, aliaque id genus vocabula, quæ ansam dederunt Scholasticis multiplicandi in quovis corpore absolutas entitates, ipsaque absoluta accidentia concipiendi; sed per magnitudinem, figuram, combinationem, & motum exilium corpusculorum, meatusque interspersos exponit naturæ opera, ejusque phœnomena explicat. Hæc igitur cum ita sint, temere non agunt, qui absolutorum accidentium systema non Aristoteli, sed Arabibus illius Commentatoribus adjudicandum putant; tuncque solum in Scholas invec-
tum, cum ex Africa in Hispaniam, & ex Hispania in Galliam delatis illorum operibus, ea methodo in Parisiensi potissimum Schola tradi cepit Philosophia, qua fuerat ab illis exposita, subtili scilicet, abstracta, & contentiosa, nempe sæculo Christi XI., vel circa; adeoque postquam Patres, de quorum auctoritate modo agitur, diem objerant.

Sed demus, Aristotelem aperte docuisse, qualitates corporum sensibiles esse entitates absolutas, ut eas modo sumunt & explicant Scholastici. Dicendum adhuc est, veteres Ecclesiæ Patres idipsum nequaquam sensitse. Ea non fuit enim in Scholis catholicis ante XI. Christi sæculum Aristotelis fortuna, ut Christianis Doctoribus religio fuerit, in rebus ad Physicam pertinentibus ne latum quidem unguem ab illius doctrina discedere. Si quis ignoret, quam male de Aristotele senserint veteres Patres; qualem notam ejus operibus inusserit Concilium Parisiense anno 1209. Lutetiæ celebratum; & sub quibus penis cautum tunc fuerit ab Apostolicæ Sedis Legato, ne opera ipsa in Parisiensi Academia publice legerentur, libellum consulat (d), quem, de varia Aristotelis fortuna inscriptum, Launojus edidit. Notum est præterea, nonnisi circa sæculum Christi XI. Doctores catholicos miscere Scholasticam Philosophiam cum Theologia cœpisse, eamque huic vectigalem quodammodo reddidisse. Fertur quippe, ut etiam initio monuimus, B. Lanfrancum Cantuariensem Archiepiscopum,

(a) Aulus Gellius lib. XX. *Noctium Atticarum* cap. 4.

(b) Ex Ludovico Vives lib. I. *de causis corruptarum Artium*.

(c) Ibidem.

(d) Cap. 1, 2, & 4.

copum, qui anno 1089. e vita decessit, fuisse primum, vel inter primos haberi, qui Scholasticæ Philosophiæ nomen dederit. Primam certe Scholasticorum ætatem a laudato Lanfranco, vel, ut aliis placeat, a Petro Abaelardo, qui anno 1143., & a Petro Lombardo, dicto *Magistro Sententiarum*, qui anno 1164. diem supremum obiit, initium habuisse, res comperta est (a). Nihil ergo juvat Scholasticos, loquendo de Patribus Ecclesiæ, ipsummet etiam Aristotelem pro *absolutis accidentibus* manifeste stetisse.

Tertio: Constat, Abbaudum Abbatem, qui vixit sæculo XI., in tractatu, quem scripsit de *fractione corporis Christi*, aperte dixisse, ut supra retulimus, facile quemquam videre, *albedinem, seu rotunditatem ab ipso corpore, quod vel album, vel rotundum est, separari non posse*; imo, quod valde notandum puto, *ineptum esse in Evangelio Christi de albedine, & rotunditate disputare, seque dialecticis, aut certe pueris talia permittere*. Ergo opinio de separabilitate *sensibilium qualitarum* a substantia corporis, quam afficiunt, deque miraculosa earundem conservatione in Eucharistiæ sacramento, nova suo tempore erat in Scholis, non admissa a Theologis, & sanctis Ecclesiæ Patribus prorsus invisa. Hæc quippe si fuisset Scholarum, Theologorum, Patrumque doctrina, non dixisset ille adeo confidenter, facile videre quemquam, *albedinem, seu rotunditatem ab ipso corpore, quod vel album, vel rotundum est, separari non posse*; neque adeo irreverenter, se nonnisi *dialecticis, aut certe pueris talia permittere*.

Postremo de panis, vinique *sensibilitate*, sub qua Christus Dominus in Eucharistia existit, nobisque se tradit, ita loquuntur Patres, ut nihil prorsus reale, quod ante consecrationem in pane fuerit, & post consecrationem sine pane remaneat, sed meram tantum panis *apparentiam* tunc superesse, pro comperto habuisse videantur. Inquiunt enim, quod in sacramento relinquitur, *speciem* esse panis, *apparentem* dumtaxat illius *formam, exteriorem figuram, & merum vocabulum*. Illorum verba non recenseo, tum ne nimius sim, tum quia facile legi apud eos. possunt, qui *transubstantiationis* dogma, Patrum testimoniis, confirmant, & contra sectarios invictissime demonstrant. Nullibi siquidem clarius, quam ubi de *conversione* panis in Corpus Christi res illis est, explicant Patres, quomodo, licet revera non sit panis, quod in hoc sacramento nobis traditur, sed Corpus Christi; illud tamen non Christi Corpus, sed panis, sensus nostros si consulamus, appareat. Dignissimum porro consideratione est, Lanfrancum,

(a) Vide Capassum in *Synopsi Histor. Philos.*
lib. IV. cap. 6.

cum, a quo, ut diximus, prima coepit ætas Scholasticorum, ita respondere Berengario obiicienti, Christi Corpus vere non esse in Eucharistia, idcirco quia in sacris literis dicatur *species, similitudo, figura, signum, mysterium, sacramentum* (a), ut, ne memoratis quidem accidentibus absolutis, per meras apparentias rem totam conficiat. Hicce enim, inquit, *vocabulis in nullo præscribitur fidei, qua credimus, & veritati, quam defendimus. Species namque, & similitudo illarum rerum vocabula sunt, quæ ante fuerunt, & ex quibus corpus Christi, sanguisque conficitur..... Porro signum, mysterium, sacramentum, & si quid hujusmodi est, Dominicæ passionis designativa nomina sunt, si tamen sacramentum ea significatione accipiatur, qua sacrum esse signum in libro de civitate Dei a B. Augustino definitur..... Quod vero panis dicitur, consueto sacrorum codicum more id fit, qui res quaslibet sæpe vocat nominibus illarum rerum, ex quibus fiunt, seu quæ esse putantur, & non sunt, sive quibus aliquo modo similes existunt..... Et Dominus Jesus Christus propter quasdam similitudines in eisdem literis vocatur leo, agnus, vermis, lignum, petra, lapis angularis, multaque in hunc modum. Sic & corpus Christi vocatur panis, vel quia ex pane conficitur, seu quia contuentium oculis, cum caro sit, panis videtur, sive quod corporali, & visibili pani similitudine quadam conjungitur* (b). Dixi autem consideratione dignissimum, Lanfrancum ita Berengario respondisse. Neminem quippe fugit, quanto facilius Berengario fecisset satis Lanfrancus, si dixisset, Corpus Christi Domini, in Eucharistia existens, *panem, speciem, figuram, similitudinem, & sacramentum* a Patribus nuncupari propter ipsius panis accidentia, sub quibus remanentibus Corpus illud sanctissimum quasi obvelatum delitescit. Temere ergo non judicabit, qui dixerit, hac via incedere noluisse Lanfrancum, quod optime sciret, *absoluta accidentia* neque nota fuisse veteribus Ecclesiæ Patribus, quorum testimoniis Berengarius abutebatur; neque illa necessario requiri, ut Corpus Christi nobis instar panis in hoc sacramento appareat, & panis *speciem, figuram, & similitudinem* in illo remanere, dicatur.

Contra tamen arguit Cl. P. Ferrari, contendens, *urgeri hoc argumento etiam ipsos Recentiores. Neque enim, inquit, ullus veterum Patrum Eucharisticas species appellavit actiones obiectivas, & puras impressiones, aut species intentionales. Attamen Patres consulto abstinerunt a nomine accidentis; quia vox accidentis præ se fert connaturaliter*

(a) Lib. de corpore, & sanguine Domini
cap. 20.

(b) Loco citato.

ter actuale inhaerentiam subjecto ; cum e converso per divinam virtutem Eucharistica species sine subjecto existant. Sed ex aliis predicatis, quæ Patres attribunt Eucharisticis speciebus, fas est colligere, eas species esse reales, non vero solum intentionales Postremo aliud est, esse speciem, sive apparentiam, aut imaginem substantiæ panis, aliud est, esse speciem, seu imaginem accidentium panis. Primum illud docent Patres, non vero secundum, quod opinioni Recentiorum congruit. Hinc Patres Eucharistica accidentia appellaverunt species, quoniam de iis tantummodo loquuti sunt, quæ externam sensibilem apparentiam panis, & vini constituunt. Sed illa externa sensibilis apparentia est realis, & in ipso sacramento, non autem in sensibus nostris, ac mere intentionalis (a).

Sed contra. Falsum est enim primo, ideo hoc argumento urgeri etiam Recentiores, quia nullus veterum Patrum Eucharisticas species appellaverit actiones obiectivas, & puras impressiones, aut species intentionales. Hoc ipso enim, quod veteres Patres dixerint absolute, & absque addito, nonnisi panis speciem in Eucharistia haberi, sequitur, sumtum ab illis fuisse speciei vocabulum, non prout significat realem aliquam entitatem, quæ sit in objecto, cuius species dicitur, sed prout meram rei apparentiam, quæ ab sensorii passione unice dependeat, vocabulum ipsum designat. Patet ex S. Augustino. Tardioribus, inquit, ingenis difficillime persuaderi potest, formari in sensu nostro imaginem rei visibilis, cum eam videmus, & eandem formam esse visionem. Sed qui forte adverterint, quod commemorabo, non ita in hac inquisitione laborabunt. Plerumque cum diuicule adtenderimus quæque luminaria, & deinde oculos clausimus, quasi versantur in conspectu quidam lucidi colores varie sese commutantes, & minus minusque fulgentes, donec omnino desistant: quos intelligendum est reliquias esse formæ illius, quæ facta erat in sensu, cum corpus lucidum videretur, paulatimque, & quodam modo gradatim deficiendo variari. Nam & insertarum fenestrarum cancelli, si eos forte intuebamur, sæpe in illis apparere coloribus, ut manifestum sit, hanc affectionem nostro sensui ex ea re, quæ videbatur, impressam. Erat ergo etiam, cum videremus, & illa erat clarior, & expressior; sed multum conjuncta cum specie rei ejus, quæ cernebatur, ut discerni omnino non posset, & ipsa erat visio. Quin etiam cum lucernæ flammula modo quodam divaricatis radiis oculorum quasi geminatur, duæ visiones fiunt, cum sit res una, quæ videtur. Singil-

(a) Tom. II. P. I. Physicæ Disp. IV. q. I. in respons. ad primam obiectionem pag. 210.

gillatim quippe afficiuntur idem radii de suo quisque oculo emicantes, dum non sinuntur in illud corpus intuendum pariter, conjuncteque concurrere, ut unus fiat ex utroque contuitus. Et ideo si unum oculum clauderimus, non geminum ignem, sed sicuti est unum videbimus. Cur autem, sinistro clauso, illa species desinit videri, quæ ad dextrum erat, vicissimque, dextro clauso, illa intermoritur, quæ ad sinistrum erat, & longum est, & rei præsentis non necessarium modo querere, atque disserere. Quod enim ad susceptam quæstionem satis est, nisi fieret in sensu nostro quadam imago simillima rei ejus, quam cernimus, non secundum oculorum numerum flammæ species geminaretur, cum quidam cernendi modus adhibitus fuerit, qui possit concursum separare radiorum (a). Sic ergo conficitur argumentum: certum est, speciem fumi hoc loco a S. Augustino non pro entitate reali objectiva, sed pro mera rei imagine facta in sensorio a re sensibili, cujus illa dicitur species, tametsi S. Doctor speciem ipsam non appellaverit actionem objectivam, puram impressionem, & speciem intentionalem. Ergo necesse quoque non fuit, species Eucharistica dicerentur a Patribus actiones objectivæ, puræ impressiones, & species intentionales, ut nobis certo constaret, eos in hoc Sacramento explicando, absoluta accidentia nomine specierum non intellexisse.

Fatur præterea P. Ferrari, Concilium Tridentinum, agens de hoc Sacramento, abstinuisse ex industria a voce accidentis (specierum vocabulo loco illius adhibito) ne Philosophicam Peripateticorum sententiam expresse definiret tamquam fidei catholica dogma (b). Ergo speciei vocabulum, absolute loquendo, illud ipsum omnino non significat, etiam judicio P. Ferrari, quod accidentis nomen designat; alioquin frustra, ut patet, Tridentinum Concilium sese ab hoc vocabulo abstinuisset; unde sibi non consentit Vir Cl., dum, ut veteres Patres jure dici possint hoc super negotio fuisse doctrinæ Recentiorum, satis non fuisse contendit, specierum vocabulum absolute & sine addito ipsos adhibuisse, quasi nempe perinde omnino fuerit, si ve speciei, si ve accidentis vocabulo illi uterentur.

Accedit etiam, non tantum speciem panis, verum etiam panis imaginem, figuram, symbolum, signum, effigiem, & similitudinem, quod remanet panis in hoc Sacramento, a Patribus nuncupari. Videtur autem, hisce vocabulis non satis apte exprimi realem entitatem, quæ ante consecrationem fuerit in substantia panis, & post consecrationem sine illa vere proprieque existat. Ergo veteribus Ec-

clesiæ

(a) Lib. XI. de Trinitate n. 3. & 4., alias cap. 2.

(b) Loco citato in responsione ad secundum.

clesiæ Patribus persuasum fuisse videtur, nihil reale absolutum panis, sed meram dumtaxat illius apparentiam in Eucharistia remanere.

Neque audiendum puto laudatum Virum Cl., dum ait alio loco, *Patres non per tropos & figuras, sed proprio & riguroso verborum sensu loquutos fuisse, fidei nostræ mysteria exponentes* (a). Constat enim, Patres, qui quatuor prioribus Ecclesiæ sæculis illam illustrarunt, involutis, & subobscuris verbis, ut ait Cl. Tournely, de difficilioribus fidei nostræ Sacramentis loqui, ne forte adesset aliquis paganus, & non initiatus, qui ea irrideret, & Christianis vitio verteret (b). Sed hac cautela utebantur præcipue, cum de Eucharistia dicendum illis erat. Unde Cl. Juenin, omnibus, inquit, quibus aliquis ad Patres aditus patuit, persuasum est, Scriptores quarti sæculi diligenter cavisse, ne infideles, quibuscum tunc vivebant, aliquid de Eucharistiæ mysterio audirent (c): id quod luculenter probat Vir Cl. ex S. Cyrillo Hierosolymitano, ex Synodo Alexandrina apud S. Athanasium, ex S.S. Epiphonio, Basilio Cæsariensi, Augustino, & Ambrosio.

Secundo: nulla est ratio, propter quam putat P. Ferrari, veteres Patres sese in hoc mysterio explicando ab accidentis vocabulo abstinuisse: hujus nempe fuisse causam, quia vox accidentis præ se ferat connaturaliter actualem inherentiam subjecto; cum e converso per divinam virtutem Eucharisticæ species sine subjecto existant. Si quid enim probaret hæc ratio, probaret etiam, a specierum quoque vocabulo sese abstinere debuisse. Nam sicuti accidens naturaliter exigit subjectum, cui reapse inhæreat; ita species rei sensibilibiles naturaliter objectum requirunt, a quo producantur, & conserventur; neque magis impossibile est naturæ viribus, haberi accidens sine subjecto, quam manere in oculo species rei, quæ videtur, quin res ipsa nobis præsens existat. Unde S. Augustinus, informatio, inquit, sensus, quæ visio dicitur, a solo imprimitur corpore, quod videtur, id est, a re aliqua visibili, qua detracta, nulla remanet forma (scilicet ipsius rei species) quæ inerat sensui, dum adesset illud, quod videbatur. Sensus tamen ipse remanet, qui erat, & priusquam aliquid sentiretur, velut in aqua vestigium tamdiu est, donec ipsum corpus, quod imprimitur, inest, quo ablato, nullum erit, cum remaneat aqua, quæ erat, & ante quam illam formam corporis caperet (d). Igitur periculum, quod, P. Ferrari si audiamus, movit veteres Patres, ne accidentis vocabulum adhiberent, vel plane ridiculum est, vel ipsos quoque movere debuisset,

I i ne

(a) Tom. II. P.I. Physicæ Disp. IV. q. i. pag. 207.

(b) Prælect. Theol. de Sacram. Eucharistiæ q. 2. artic. 4.

(c) Dissert. IV. de Sacram. Eucharistiæ q. 4. cap. I. artic. 6.

(d) Lib. XI. de Trinitate n. 3. alias cap. 2.

ne voce *speciei* uterentur. Neque juvat, per *divinam potentiam*, ut ait Cl. Auctor, *Eucharisticas species sine subjecto existere*. Nam etiam *accidentia* per *divinam potentiam* sine *subjecto* extare possunt. Hinc verosimilius videtur, veteres Patres ideo *speciei*, potiusquam *accidentis* vocabulum adhibere voluisse, quod persuasum illis fuerit, nihil prorsus reale panis, consecratione peracta, remanere.

Tertio: nulla sunt ea prædicata, quæ Patres attribuunt *Eucharisticis speciebus*, & ex quibus, ut dicitur in argumento, *fas est colligere, eas species esse reales, nempe accidentia absoluta*. Demonstravimus enim, neque fractionem *specierum sacramentalium* (§. 118.), neque rationem *sacramenti*, quæ salva esse debet in *Eucharistia* (§. 137.), neque vermes, quæ ex corruptis *speciebus* quandoque in pixide apparent; neque demum nutritio, quæ in nobis fit ex hostiis consecratis (§. 119.), necessario postulare, ut *species illæ sint entitates absolute in sensu Scholastico*.

Postremo: intelligere nullo modo possum, quod ultimo loco habet Vir Cl., aliud nempe esse *speciem, sive apparentiam, aut imaginem substantiæ panis*, aliud *speciem, seu imaginem accidentium*: primum docere Patres, non vero secundum. Cum enim substantia, si omnes *sensibiles affectiones* re, vel cogitatione ab illa separentur, non sit *sensibilis*, præsertim stando opinioni ipsiusmet P. Ferrari docentis (a), substantiam non esse ex se *impenetrabilem*, sed id habere a *quantitate* distincta, impossibile videtur, ut ipsa substantia suis *qualitatibus* nudata habeat *speciem, imaginem, & apparentiam*; penitusque dissonum rationi est, veteres Patres, utpote doctissimos, id docuisse.

Dicet fortasse Vir Cl., per *speciem, imaginem, & apparentiam* panis intellecta fuisse a Patribus *absoluta* ipsius panis *accidentia*, quatenus scilicet substantia panis per illa a nobis cognoscitur.

Sed contra est. Nam *primo*, ut recte observat Cl. P. Maignan, nonnisi valde improprie, & cum ἀμφιβολία doctis Viris prorsus indigna, vox, atque res *accidentium* potest per rem, vocemque *specierum* intelligi, atque illarum unam loco alterius usurpari. Quippe, inquit ille, cum dicunt passim Theologi, modo loquendi apud Patres etiam usitato, *Christum in sacramento Eucharistiæ tradere nobis verum corpus, & verum sanguinem suum non in specie propria, quæ est humani corporis, & humani sanguinis; sed in specie panis, & vini*, haud dubie, nisi in tam paucis verbis amphibologiam habeant minime tole-

(a) Tom. I. P. I. *Logicæ* Sect. I. cap. 6.,
& Tom. II. P. I. *Physicæ* Disp. IV.
q. 1. pag. 209.

tolerandam, sumunt eodem utrobique sensu, & significatione vocem speciei, nempe tum quando negant speciem corporis, atque sanguinis, tum quando speciem adstruunt panis, & vini. Atqui dum negant speciem corporis, atque sanguinis, non negant corporis, & sanguinis accidentia propria, & intrinseca, vel inhærentia, seu quæ sunt ejus, quæcunque illa sunt, quæ dicuntur quantitas, albedo &c. Nam D. Thomas 3. p. q. 76. art. 4. docet, ea remanere, vi concomitantia. Ergo negant sola extrinseca, nempe illa, quibus emissis, & impressis potentiam sensitivam afficiunt. Et quia ni sit, ut dicebam, amphibologia &c. necesse est, ut speciei genus illud idem, quod negant, cum dicunt non in specie corporis humani &c., idipsum adstruant præcise, cum dicunt in specie panis &c., sequitur in isto non debere intelligi panis assertam quantitatem &c. cum in illo non intelligatur negata corporis quantitas &c. (a). Secundo: quia dato etiam, realia corporum accidentia posse aliquo modo species substantiæ corporum eorundem nuncupari, non propterea admittendum videtur, accidentia ipsa posse dici, vere propriæque loquendo, ejusdem substantiæ apparentiam, atque imaginem. Nihil quippe illa nobis exhibent substantiæ, nihil repræsentant. Non inficior, ex cognitio rei qualitatibus in cognitionem substantiæ ipsius rei nos deduci. Verum hoc ideo contingere, quia rei substantia tunc nobis appareat, & in suis qualitatibus, veluti in sui imagine, a nobis conspiciatur, illud est, quod intelligi jure posse, & a veteribus Ecclesiæ Patribus, dum de panis speciebus loquebantur, fuisse intellectum, nunquam concedam.

Satisfit argumentis in oppositum.

I.

147. *Obiicitur primo. Ex S. Irenæo Eucharistia duabus rebus constat, terrena, & cælesti (b). Nomine autem rei terrena intelligere non potuit Irenæus, nisi realia accidentia, quæ ibi remaneant, quemadmodum nomine rei cælestis non nisi ipsum Christi Corpus intellexit. Ergo accidentia absoluta & nota fuerunt S. Irenæo, & in Eucharistia ab illo admissa.*

R. nego minorem. Dico enim, S. Irenæum nomine rei terrena non intellexisse aliquid reale, & positivum panis, quod, consecratione per-

I 2 *acta,*

(a) Appen. de speciebus Eucharisticis n. 50. ad cap. 33.

Philos. naturæ.

(b) Lib. IV. contra hæreses cap. 18. num. 5.

acta, in hoc Sacramento superest maneat, quodque, veluti pars altera, una cum Christi Corpore, quod dixerit *rem caelestem*, Eucharistiam constituat; sed ipsummet Corpus Christi per *rem terrenam* intellexisse; illudque ideo dixisse *terrenam rem*, ut errorem exploderet Valentinianorum, falso contententium, Christum Dominum e coelo detulisse corpus suum, perque Virginem Matrem, quemadmodum aqua per tubum transit (a), in terram descendisse. Hanc autem eo loci fuisse mentem S. Irenæi, tenet Cl. P. Renatus Massuet post Viros doctissimos Claudium Sanctesium, & Card. Perronium, a Cl. Tournely (b) laudatos. Inquit enim: *quæ autem res illa terrena, ex qua (ut ait Irenæus) constat Eucharistia, nisi corpus, & sanguis Domini, quibus ali carnem nostram mox dixerat Irenæus? Ea vero rem terrenam vocat, ut hinc hæreticos confutet, negantes, Christum quidquam sibi terreni corporis adscivisse: terrenam, inquam, quia ex terreno pane, & vino, in Christi corporis, & sanguinis substantiam converfis & transmutatis, fit verum Domini corpus, verusque sanguis. Ex quo sequitur, Christum sibi corpus ex terrena materia concretum & factum, veramque carnem, ac verum sanguinem assumpsisse, quod inficiabantur hæretici. Quæ vero res illa cælestis, ex qua etiam constare Eucharistia dicitur, nisi ea, cujus paullo ante facta mentio est, Verbum scilicet Divinum, filius Patris unigenitus, quem creata Jesu Domini nostri natura vere ac substantialiter unitum fuisse, volebant hæretici? Recte igitur asserit Irenæus, Eucharistiam ex duabus rebus constare, terrena, & cælesti. His enim catholicam sententiam adversus hæreticorum blasphemias egregie munit; probatque ex Eucharistia, quam corpus, & sanguinem esse Domini fatebantur illi, Christum Dominum ut verum hominem, sic & verum Deum, Filium Dei, & Verbum Patris unigenitum extitisse, Verbumque humanam Christi naturam, corpus, & sanguinem vere ac substantialiter univisse sibi (c). Suaderi autem id etiam potest ex eo, quod, hoc posito, illud prono alveo fluat, quod Vir sanctus contra Valentinianos ostendere nitebatur, videlicet eos perperam contendere, nihil terrenum posse Deo offerri. Enimvero, cum Eucharistiam, in qua aliquid terrenum est, nempe Corpus Christi, ipsi etiam Deo offerrent, affirmabant factis, quod verbis negare non verebantur. Recte propterea S. Doctor illos arguit palmaris inconstantiae, cogitque, ut aut sententiam mutant, aut abstineant offerendo, quæ prædicta sunt (d).*

Nec

(a) S. Irenæus lib. I. cap. 1.

(b) Prælect. Theol. de sacramento Eucharistiae q. 2. art. 4. in responsione ad objectionem 3. ex Irenæo.

(c) Dissert. III. in libros Irenæi artic. 7. n. 84.

(d) Laudato lib. IV. cap. 18. n. 5.

Nec refert, Valentinianos negare, Christum Dominum corpore constare terreno. Cum enim, inquit Cl. Tournely, *id invicte alibi probasset S. Doctor, merito hic supponit (a)*. Fateor equidem, si *absoluta panis, vinique accidentia nomine rei terrena* ab Irenæo intellecta fuisset dicantur, adhuc stare, aliquod terrenum etiam a Valentinianis Deo offerri. Nonnulla tamen me movent, ut de mente S. Irenæi contrarium sentiam. Est enim primum, *accidentia absoluta* nonnisi valde improprie potuisse *rei nomine* a S. Irenæo designari. *Res* quippe, proprie loquendo, idem prorsus, quod *substantia* significat. Secundum est, ejusmodi *accidentia* nullibi a S. Irenæo antea memorari. Id enim fecisset ille, si nomine *rei terrena* ea hoc loco intellexisset. Postremum est, satis non fuisse ad rem, de qua tunc agebatur, ut *absoluta accidentia* a S. Irenæo admitterentur; sed præterea necessarium fore, etiam admitterentur a Valentinianis, ut hinc scilicet inconstantia jure meritoque eos postularet Irenæus, quatenus nempe *absoluta accidentia* una cum Christi Corpore in Eucharistia Deo offerrent; tum nihil terrenum, cujusmodi certe illa sunt, Deo offerri posse arbitrarentur.

I I.

148. *Obiicitur secundo.* Doctissimus Cornelius a Lapide exponens illud Geneseos: *FIAT LUX*, refert, S. Basilium *Homil. VI. in Hexameron*, Theodoretum, & Nazianzenum *orat. in novam Dominicam* putare, *solam lucis qualitatem hic sine subiecto fuisse creatam*; idque notandum censet Cl. Auctor *contra hæreticos, negantes in Eucharistia accidentia sine subiecto posse existere*. Ergo veteres Patres non tantum agnoverunt, sed & admiserunt *absoluta accidentia* Scholasticorum.

R., bona tanti Viri venia; neque S. Basilium, neque Nazianzenum docuisse, *lucem*, quam Summus Mundi Opifex primo die creaverat, fuisse *accidens* sine subiecto, sumto *accidente* prout in hac disputatione sumitur; Theodoretum vero nedum id non tradidisse, sed potius docuisse contrarium. Etenim primo ad S. Basilium quod attinet, hæc habet S. Doctor, de primigena illa *luce* differens: *incredibile*, inquit, *nemini videatur, & a fide abhorrens, quod dictum mihi est, aliud nimirum quiddam esse a luce splendorem, aliud item corpus subsidens luci, ac subiectum*. Primum enim *res omnes compositæ sic a nobis dividi solent in ipsam essentiam susceptricem, & in eam, qua ipsi accidit, qualitatem*. Ut igitur *diversa sunt hæc natura, albedo, inquam,*

&

(a) Loco citato in responsione ad objectionem:

& corpus dealbatum, sic & ea, quæ modo diximus, differunt quidem unita tamen sunt potentia Creatoris. Itaque ne mihi dixeris, fieri hæc non posse, ut lux a corpore Solis separetur. Neque enim ego lucis a Solis corpore separationem mihi, ac tibi possibilem esse dico; sed asserendum esse censeo, quæ mentis sola agnitione, cogitationeque dissipari a se possunt, ea reipsa sejungi facultate Creatoris utriusque naturæ posse (a). Hæc ille. Eatenus ergo dicendum videtur, *lucem*, S. Basilii sententia, esse *accidens absolutum*, quatenus primo S. Doctor ait, eam esse aliud a corpore Solari, quemadmodum *albedo* est aliud a corpore dealbato; secundo quatenus eam habet veluti *qualitatem*; postremo quatenus docet, fieri non posse, naturæ viribus, sed tantum *facultate* Creatoris, ut *lux* a Solis corpore sejungatur. Sed ex horum nullo res conficitur. Vera sunt enim omnia, si dicamus, primigeniam *lucem*, opinione S. Basilii, esse substantiam quamdam subtilissimam, maximeque actuosam, ac vividam, quam sine ullo crasso inertique corpore prima die condiderit Opifex sapientissimus; tum die quarta in Sole posuerit, tamquam *formam* in *subiecto*, a quo deinde in gyrum, pro toto successive illuminando Orbe, indefinenter deferretur. Neque huic obstat, *lucem* a S. Basilio comparari cum *albedine*, & inter corporum *qualitates* recenferi, vel etiam, si placet, *qualitatem* ab illo nuncupari. Nemo quippe Scholasticorum inficiabitur, *qualitatem* dici quidquid in subiecto est, & *quale* illud denominat, sive demum, in se spectatum, sit *substantia*, sive *accidens*. Atque ita revera sensit S. Basilium, suadent plura. Primo etenim nimis inconveniens videtur, tantum Virum in exponenda prima rerum creatione ad miracula confugere voluisse; docente S. Augustino, convenire, nos quærere *secundum Scripturas ejus*, quemadmodum Deus instituerit naturas rerum, non quid in eis, vel ex iis ad miraculum potentia sua velit operari; neque nos propterea debere ita eos refellere, qui asserunt, *istarum aquarum naturam super sidereum calum esse non posse*, ut dicamus, *secundum omnipotentiam Dei*, cui cunctaabilia sunt, oportere nos credere, aquas etiam tam graves, quam novimus, atque sentimus, cælesti corpori, in quo sunt sidera, superfusas (b). Neque contrarium sensit S. Basilium; cum illi quoque certo constiterit, plane historicam esse, quam Moyses tradidit de Mundi creatione narrationem; unde eos ipse quoque reprehendit, qui Scripturæ verba, non prout sonant, accipiunt. Ego vero, inquit, cum *fœnum* audio, *fœnum* intelligo, & *stirpem*, & *piscem*, & *feram*, & *jumentum*, omnia uti di-

(a) Homil. VI. in Hexameron.

(b) Lib. II. super Genesim ad litteram n. 2.,
alias cap. I.

ita sunt, ita accipio (a). Fieri autem sine maximo miraculo non potuisse, ut, si *lux* primigena fuerit *accidens* in sensu Scholastico, tunc extiterit sine subiecto, nemo non videt. Ergo, ne dicamus, S. Basilium in explicanda prima rerum creatione ad miracula confugisse, dicendum superest, ipsum non ita de *luce* primigena fuisse opinatum, ut crediderit, illam & esse verum *accidens physicum*, & sine subiecto, cum primo creata fuerat, divinitus extitisse. *Secundo*: quia ille ipse paulo ante memorata verba aperte docet, *lucem* esse in Sole, non quemadmodum *albedo* in corpore albo, sed quemadmodum domestica lux in lucerna, videlicet non ut in subiecto, cui vere inhæreat, sed ut in vehiculo, quo in gyrum deferatur. Inquit enim: *lucem pro splendore, & illuminatione posuit. Non adversantur hac illis sane, quæ de luce sunt dicta. Tunc enim ipsa natura lucis producta est; nunc autem hoc Solis corpus eo conditum est, ut illi primogenita luci vehiculum esset. Nam, ut alia, diversaque sunt, & non eadem ignis, atque lucerna; & ignis quidem illuminandi vim obtinet; lucerna autem idcirco facta est, ut vel moderatam lucem subministraret egentibus, sic & illi purissima, sincera, immaterialique luci ceu vehiculum nunc ipsa luminaria sunt extructa (b).* *Postremo*: quia loquens de sensibilibus terræ qualitatibus, docet, eas ne cogitatione quidem a terræ substantia sejungi posse, quin illa in sui nihilum abeat. Sic enim ait: *in nihilum omnino deferis, si singulas eas, quas obtinet qualitates, ratio- cinando coneris auferre. Nam si nigredinem, si frigiditatem, si gravitatem, si densitatem, si denique qualitates eas, quas sibi gustus vindicat, aut si quas alias inesse terræ videmus, amoveris, nullum relinquetur subiectum (c):* quod profecto haud recte dixisset, si qualitates rerum sensibiles haberet tamquam *accidentia absoluta*. Possent quippe tunc ab rerum ipsarum substantia non solum cogitatione, sed etiam re separari, quin in sui nihilum illa propterea redigatur.

Quod vero spectat ad Nazianzenum, hæc sunt, quæ in laudata Oratione de primigena luce leguntur: *Conveniebat Magno Lumini opificium suum a lumine auspicari, quo tenebras, vastamque illam rerum congeriem, & confusionem omnia occupantem solvit ac depulit. Nec vero id organicum a principio, nec mea quidem sententia, solare protulit, verum incorporeum, & Solis expers. Sed postea ad orbem terrarum illustrandum Soli traditum est. Nam, cum in aliis rebus hanc rationem tenuisset, ut materiam prius conderet, ac deinde eam forma convestiret, ordine videlicet, ac figura, magnitudineque unicuique rei impositis,*
hinc

(a) Homil. IX. in Hexameron.

(b) Ibidem Homil. VI.

(c) Ibidem Homil. I.

hinc ut majoris cujusdam miraculi specimen ederet, formam materiam priorem protulit (forma enim Solis lumen est) ac postea materiam induxit, Solem hunc, nimirum diei oculum fabricatus. Ideo ergo primigena lux ponenda est accidens ex Nazianzeno, quia Solis forma ab illo dicitur. Sed hæc ratio nulla est. Constat enim, non tantum accidens physicum, sed etiam substantiam actuosam & vividam recipi posse in subiecto, ejusque formam nuncupari. Præterea cum dicat Nazianzenus, Summum rerum Conditorum in rebus aliis efficiendis hanc rationem tenuisse, ut materiam prius conderet, ac deinde eam forma convestiret, ordine videlicet, ac figura, magnitudineque, videtur non aliam in rebus pure corporeis formam ille quoque admisisse, nisi quæ a magnitudine, figura, & ordine partium dependet; ac proinde eam ipsam, quam in rebus iisdem statuunt Recentiores. Ergo Nazianzenus nedum Recentioribus non adversatur, sed in præcipuo Mechanici systematis capite cum illis prorsus consentit.

Quod demum pertinet ad Theodoretum, videre nescio, cur iis ille accenseatur, qui primigenam lucem ab accidente physico nequaquam discernunt. Adeo abest enim, ita de luce sensisse Theodoretum, quin contrarium potius, ut monui, ille aperte docuerit. Hæc enim habet. *Didicimus aperte, tenebras esse necessarias. Quod autem non sint substantia, sed res quædam accidentaria, facile est intelligere, nempe quod sint cæli, & terræ adumbratio. Quamobrem, oriente Sole, evanescent tenebræ. Lumen autem SUBSTANTIA est, & SUBSISTIT (a).* Equidem non nego, neque negare possum, tenebras a Theodoreto accidens, sive rem accidentariam vocari. Verum an absoluta accidentia tunc ille in mente habuerit, volueritque, tenebras esse accidens hujuscemodi, neminem Scholasticorum futurum spero, qui adeo palmaris erroris Theodoretum infimulet. Puto etiam dicturum neminem, Theodoretum sumere substantiam pro essentia, ut a Patribus non raro factum legitur; quippe, cum Theodoretus lucem non tantum appellaverit substantiam, sed præterea illam subsistere dixerit, clarius luce ipsa videtur, sumtam ab illo fuisse substantiam proprie & in rigore, prout nempe ab accidente physico ea distinguitur.

Unus porro non fuit inter veteres Patres Theodoretus, qui lucem dixerit entitative substantiam. Hujus quippe opinionis fuisse etiam S. Augustinum, certum est. Ait enim: *si corpus est, quidquid majoribus, & minoribus suis partibus majora, & minora spatia locorum obtinentibus constat, corpora sunt etiam ista, quæ commemoravi: corpus est aer, corpus est lux ista visibilis, & omnia, sicut dicit Apostolus,*

cor-

(a) In Genesim q. 7.

corpora caelestia, & corpora terrestria (a).

Respondet Cl. P. Ferrari, probabili satis fundamento dici posse, primum quidem a Deo creatas fuisse quasdam lucidas substantias, quæ exinde in Solem, & stellas formata sunt; unde lux pro materiali est substantia: quod S. S. Patres intendunt, qui subtilem hanc questionem non evolvere. Ita lux ratione subjecti sui dicitur mobilis, & motum efficere, quamquam pro formali sit qualitas, ut loquitur S. Joannes Damascenus lib. II. de fide orthodoxa cap. 7. (b).

Verum contra arguitur. Nam primo ex S. Augustino lux est corpus, quemadmodum, ut ipse ait, corpus est aer, & omnia corpora caelestia, & corpora terrestria. Sed aer, cælum, terra, quæque illis continentur corpora, non sunt corpora tantum pro materiali, sive ratione subjecti, ut putat Cl. Adversarius (non enim sunt in subjecto) sed pro formali. Ergo etiam lux ex S. Augustino non ratione subjecti tantum, sed ratione sui formaliter est corpus. Secundo: quia contra regulas Logicæ peccasset S. Augustinus, si lucem dixisset corpus, quia in corpore recipitur. Logicalium quippe regularum una est, eaque verissima, subjectum prædicari directe non posse de forma. Ecquis sane, qui prima Logicæ rudimenta vel ab ipso limine salutarit, ignorat, hæc esse falsa: anima rationalis est corpus organicum; albedo est paries; raritas est aer? Nisi ergo Cl. P. Ferrari sibi licere putet de S. Augustino, ceterisque Patribus, qui lucem dicunt esse substantiam, tam male sentire, ipsum ne pudeat, candide fateri, a vero aberrasse, cum dixit, lucem ex S. Augustino, & aliis Patribus tantum pro materiali, sive ratione subjecti, esse substantiam. Postremo, si vera atque legitima sit hæc prædicatio: lux est corpus, quamvis revera lux non sit corpus, sed tantum in corpore recipiatur; vera quoque & legitima, dicent Lutherani, erit illa Christi Domini propositio: Hoc est corpus meum, tametsi id, quod Christus manibus suis tunc ferebat, tradebatque Discipulis, ut manducarent, non esset suum Corpus dumtaxat, sed etiam substantia panis, sub qua Corpus illud veluti sub velo lateret. Ecce enim, urgebunt illi, ut hæc sit vera: lux est corpus, satis est, corpus sit subjectum lucis; contra vero ut sit vera illa Christi Domini: Hoc est Corpus meum, non sufficiat, Corpus illud sanctissimum sit sub panis substantia tamquam sub velo; sed necessario requiratur, ut non amplius illa in hoc Sacramento existat?

Falsum demum est, S. Joannem Damascenum docere, ut ille ait;

K k

lib.

(a) Lib. IV. de anima, & ejus origine num. 17., alias cap. 12.

(b) T. III. P. III. Physicæ Disp. III. q. 5. de luce in respons. ad 3. object. pag. 420.

lib. II. *de fide orthodoxa* cap. 7., *lucem pro formali esse qualitatem*. Id enim non habetur in laudato capite, neque alibi, quod invenire potuerim. Imo, cum in ipso cap. 7. lib. II. memorati operis *de fide orthodoxa* lucem ab igne non distinguat, videtur ab illius mente prorsus alienum, lucem esse qualitatem. En ejus verba: *ignis*, inquit, *unum quatuor elementorum existit, ceterorum levissimum, & occissime sursum emicans, adustivum, & illuminativum, prima die a rerum Opifice conditum*. Inquit enim Divina Scriptura: & dixit Deus: *Fiat lux, & facta est lux*. Neque enim aliud est *ignis*, quam *lux*. Addit quidem S. Doctor: *ut quidam ajunt*. Sed cum neque hoc loco, neque alibi hanc ille opinionem rejecerit, eam ab ipso quoque approbatam fuisse, dicendum est. Unde doctissimus Pererius, exponens illa verba Geneseos: *FIAT LUX*, sibi videri, ait, *Damascenum existimasse, lucem illam fuisse elementum ignis* (a).

I I I.

149. *Obiicitur* 3. In epistola, quam *de morte S. Hieronymi* scripsit Eusebius, illius, ut seipsum appellat, discipulus, ad Damasum Portuensem Episcopum, & Theodosium Romanorum Senatorem legitur, S. Senem, quamprimum cernere potuit Sacrum Domini Corpus, quod ad ipsum ultimo morbo correptum delatum fuerat, ut communicaret, in hæc verba ad illud conversum prorupisse: *O ineffabilis admiratio! O omnium novitatum novitas! Oculi in te vident albedinem, saporem sentit gustus, odorem olfactus, tactusque subtilitatem reperit. Sed auditus cordi repræsentat, in te illa non fore accidentia*. Hic certe per se sola existunt accidentia sine subjecto; quia non, ut humanis videtur sensibus, panis es, sed Iesus Christus integer, sicut in cælo ad Patris dexteram resides Deus, & homo (b). Ergo absoluta accidentia Scholasticorum nedum nota fuerunt S. Hieronymo, sed etiam ab illo in hoc Sacramento admissa; adeoque &c.

R., hanc epistolam *de morte S. Hieronymi*, omnium Eruditorum calculo, supposititiam esse, penitusque indignam, cui vel minima fides a nobis præbeatur. *Nihil in ea habetur*, inquit, & recte quidem, Erasmus in illius censura, *in quo bonarum horarum ullam partem quis collocet. Nec eget D. Hieronymus hujusmodi fucis, nec dignatur a tam insulso pingi artifice*. Ecclesiasticorum quoque annalium Parens Baronius,

(a) Comment. in *Genesim* lib. I. n. 72.

1706., Tom. XI. edit. Veronensis anni

(b) Legitur hæc epistola Tom. V. *Opera S. Hieronymi* edit. *Parisiensis* anni

1742. colum. 288.

ronius, narrata morte S. Hieronymi, iisque ejusdem operibus memoratis, quæ desiderari posse videntur (a), nunc nobis, inquit, de S. Hieronymo ingesta ab imperitis & impostoribus sunt explodenda mendacia, non quæ in scripta, sed quæ irrepperunt in acta, dum nonnulli de rebus gestis S. Hieronymi complura confinxere commenta. Equidem, ut puto, sicuti fecit olim presbyter Asianus, qui amore Pauli, ut ex Tertulliano diximus, periodos Pauli, & Thecla confinxit, ita & isti amore Hieronymi plurima commenti sunt; digni sane & ipsi, ut eidem ab Ecclesia sententiæ subiicerentur, & pena, quam ille tunc iuste irrogatam subire coactus est..... Quamobrem diversi pro ingenii diversitate diversa excogitarunt inventa, dum vel Eusebii, vel Augustini, vel Cyrilli Hierosolymorum Episcopi nomine, conscripserunt epistolas, quibus res gestas ex animi cujusque sententia adinventas atque commentas conscriberent. Et ne ullus dubitandi locus esset, eas subintroduxerunt personas, quas ipsi licet errantes putarint illis vixisse temporibus. Sed ex his mendaces detecti sunt, & impostores, ex quibus conati sunt videri veraces. Quis enim (ambo te) audiens Cyrilli Episcopi Hierosolymorum nomen ad ista referri tempora, quem ante annos triginta, ipsius assertione S. Hieronymi, constat esse defunctum, non statim ea indignabundus excutiat? Sed & quod ex ipsa inscriptione minime temporibus congruente, cuncta, quæ in opere essent, arguerentur erroris, qui postea mendaciorum polinctor accessit, atque delinens foris casurum parietem, ad temporum suffulciendum mendacium satis putavit fore consultum, si titulum sic mutaret, ut loco Damasi Papæ poneret Damasum Episcopum Portuensem, & pro Theodosio Imperatore redderet Theodosium Senatorem hoc modo: Patri Reverendissimo Damaso Portuensi Episcopo, & Christianissimo Theodosio Romanorum Senatori Eusebius &c. Quis ista non videat, & non rideat adeo inconcinne compositam fraudem? sicut & cum in multis aliis certam reperiet imposturam, ut cum ait, veste muliebri illum Roma fugatum, inde profectum esse Constantinopolim; cum, quæ ex ejus scriptis dicta sunt superius, te satis monere possint, eo tempore, quo ipse recessit ab Urbe, esse profectum recta Hierosolymam, & Gregorium Nazianzenum jam, antequam Romam redierit, audivisse (b).

Refert præterea, S. Hieronymum tunc quoque dixisse, sacrificium a malo sacerdote oblatum non tantum cedere in ipsius offerentis præjudicium, & damnationem, verum etiam iis, pro quibus fit, non prodesse (c): quod tamen quam longe fuerit a mente tanti Doctoris,

K k 2

ex

(a) Tom. V. ad annum 420. num. 42.

(b) Ibidem num. 43., & seq.

(c) Cap. 49.

ex ejusdem dialogo contra Luciferianos manifestum est. Merito ergo optimoque jure dixit doctissimus Card. Bellarminus (a), hanc epistolam, sicuti etiam duas, quæ sequuntur, alteram nempe Augustini ad Cyrillum *de magnificentiis S. Hieronymi*, alteram vicissim Cyrilli ad Augustinum *de illius miraculis* (sunt enim omnes, ut consentiunt Critici, ejusdem auctoris) manifeste prodere non solum novitatem suam, sed etiam imperitiam, & imposturam: quod confirmat Ovdinus, hæc tria opuscula vocans *absurdissima, & falsissima* (b). Sane, quæ Cyrilli ad Augustinum inscripta est, *confundit tempora*, ut ait laudatus Cl. Bellarminus, *hæresim monothelitarum pro fide catholica vendit, Cyrillum, Augustinum, & Hieronymum pro magna laude hæreticos monothelitas facit* (c). Hæreticum quippe vocat Sabinianum quemdam, & hæreticorum fautorem, eo quod dixerit, duas in Christo esse voluntates; eumque in tanti flagitii sui poenam, miraculo S. Hieronymi, repente periisse, a corpore detruncato capite, *tamquam si ense spiculatoris manus amputasset ictu uno* (d). Quanti ergo faciendum sit argumentum, quod pro *accidentibus absolutis* ex epistola Eusebii ad Damasum sumtum est, ipforummet Scholasticorum esto iudicium.

Dicent fortasse, ex laudata epistola Eusebii ad Damasum Portuensem inferri quidem non posse, *absoluta accidentia* fuisse a S. Hieronymo in Eucharistia admissa; verum satis ex illa constare, doctrinam de *accidentibus absolutis* habuisse locum in Scholis catholicis ante sæculum Christi XI., eamque apud Theologos, secus plane atque a nobis dictum fuerit, pro explicando Eucharistiæ sacramento longe antea illud sæculum in usu fuisse. Ovdino siquidem teste (e), auctor illius epistolæ fuit Damasus ipse, cui inscripta est, quique anno 891 sub Formosi nomine Romanam sedem tenuit.

Sed contra. *Primo* etenim nullæ sunt conjecturæ, quibus suadere nititur Ovdinus (f), auctorem illius epistolæ fuisse Damasum Episcopum Portuensem, qui anno 891 ad summi Pontificatus apicem evectus, Formosus dictus est. Id ille probat primo, quia nullus alius fuit Damasus Portuensis Episcopus, nisi qui anno 891 sub Formosi nomine Pontificatum gessit. Secundo: quia jam constat, illum consuevisse, opuscula sua sub aliorum nominibus publicare. Verum, ut dixi, hæ conjecturæ nullæ sunt. Nutat prima, tum quia non apparet,

(a) Lib. de Scriptoribus Eccl. de S. Hieronymo.

(b) Tom. I. de Script. Ecclesiasticis. Dissert. de scriptis S. Hieronymi cap. 5. colum. 837.

(c) Loco citato.

(d) Cap. 49.

(e) Tom. II. de Script. Eccl. Dissert. de vita, moribus, & scriptis Damasi Portuensis Episcopi cap. 7. colum. 388.

(f) Ibidem.

paret, cur auctor illius epistolæ is censeretur, cui inscripta est. Profecto si valeret hæc ratio, dicendum foret, Cyrilli quoque, & Augustini eas esse epistolas, quæ de *magnificentis*, & *miraculis S. Hieronymi*, illis inscriptæ leguntur: quod non dabit Ovdinus, nefas jure ac merito ipse quoque putans, ut credo, summis illis Viris opuscula tribuere, quæ, ejus etiam judicio, *omnium absurdissima* sunt, atque *falsissima*. Secunda quoque conjectura vacillat. Si namque Damasus dici deberet auctor illius epistolæ, quia aliorum nominibus soleret opuscula sua inscribere, aliis quoque haud dissimili ratione tribui illa posset, iis nempe omnibus, quos jam constat, reos esse ejusdem criminis. Neque enim unus tantum fuit Damasus Portuensis Episcopus, qui consueverit, ut de Damaso ait Ovdinus (a), opera sua *alienis, & absurdis inscriptionibus occultare*.

Secundo: quia momenta non desunt, quibus, auctorem illius epistolæ fuisse XI. Christi sæculo posteriorem, suadeatur. Desumitur primum ex iis ipsis verbis, quæ B. Hieronymo in argumento tribuuntur. Doctrinam quippe referunt, quæ, ut satis valide ostensum est, nonnisi sæculo Christi XI. locum in Scholis habere coepit. Secundum ex eo colligitur, quod *absoluta panis accidentia* frangi in hoc Sacramento dicantur. Fertur enim, S. Hieronymum tunc quoque exclamasse: *O humanorum illusio sensuum! Franguntur illa, quæ humanis sensibus in te videntur accidentia, & tamen nec frangeris, nec corrumpis* (b). Id porro argumento esse, auctorem illius epistolæ fuisse XI. Christi sæculo posteriorem, patet ex dictis de *fractione Eucharistica* (g. 118.). Vidimus enim, Petrum Abaelardum, qui anno 1143. a Christo nato ex hac vita migravit, fuisse primum, vel inter primos haberi, qui docuerint, *fractionem Eucharisticam* in *accidentibus* fieri, quæ in Sacramento supersunt. Illum certe non reprehendisset Walterius, quasi ob hanc causam male in fide sentiret, si hæc opinio de *fractione Eucharistica* nova tunc non esset in Scholis, Majoribusque invisa. Postremum est, quia in epistola Cyrilli ad Augustinum de *miraculis S. Hieronymi* Sylvanus quidam *sancta Nazareth Ecclesiæ* ARCHIEPISCOPUS non semel tantum, sed bis, ter, quaterque appellatur (c). Certum est autem ex Ughello (d), Nazarenam Metropolitanam Sedem constitutam fuisse a Latinis post captam anno 1099., Gotifredo Duce, Regiam Hierosolymorum civitatem. Ergo auctor illius epistolæ posterior est anno Christi 1099.

Is

(a) Loco laudato.

(b) Cap. 49.

(d) Cap. 4, & 5.

(d) Tom. VII. *Italia Sacra* de Archiepiscopali Nazarena Sede *colum. 769.*
edit. Venetæ 1721.

Is autem, ipsomet fatente Ovdino (a), nec dissentiente Erasmo, auctor quoque fuit epistolæ Eusebii ad Damasum. Ergo hujus epistolæ auctor posterior fuit sæculo Christi XI.; & ideo stat, nihil prorsus ex illa posse colligi, quod Recentioribus jure molestiam creet.

I V.

150. Obiicitur postremo, dari ex sanctis Patribus ἀναλογίαν quamdam inter sacramentum Eucharistiæ, & mysterium Incarnationis, unumque per aliud ab illis exponi. Patet, ut alia præteream, ex celebri epistola S. Joannis Chrysostomi ad Cæsarium Monachum. Sic enim in ea loquitur S. Doctor: & Deus, & homo Christus. Deus propter impassibilitatem, homo propter passionem: unus filius, unus Dominus, idem ipse proculdubio unitarum naturarum unam dominationem, unam potestatem possidens, etiamsi non consubstantiales existant, & unaquæque incommixtam proprietatis conservat agnitionem, propter hoc quod inconfusa sunt duo. Sicut enim antequam sanctificetur panis, panem nominamus; Divina autem illum sanctificante gratia, mediante Sacerdote, liberatus est quidem ab appellatione panis, dignus autem habitus est Dominici corporis appellatione, etiamsi natura panis in illo permansit, & non duo corpora, sed unum corpus filii predicatur; sic etiam hic, Divina natura in ipso insidente, unum filium, unamque personam, utrumque constituit (b). Jam vero, si nihil panis reale & positivum in Eucharistia remaneret, cui Christi Corpus per intimam præsentiam veluti unitum existeret, nulla esset hæc similitudo; neque pro dualitate naturæ in unitate personæ, contra Eutychianos demonstranda, S. Joannes Chrysostomus eam recte adhibuisset. Igitur comperta illi res fuit, aliquid panis reale & positivum in Eucharistia remanere. Certum est autem, illud non esse substantiam panis. Erit ergo ejusdem panis accidentia absoluta; adeoque nedum illa non latuisse veteres Ecclesiæ Patres, sed de illorum existentia ipsos ne levissime quidem dubitasse, dicendum est.

Re primo, certo non constare, hanc epistolam esse genuinum S. Joannis Chrysostomi foetum. Dubitant enim plerique, neque immerito. Dubium est, inquit Cl. P. Natalis ab Alexandro, sitne S.

Joan-

(a) Tom. I. de Script. Eccl. colum. 837.

(b) Hanc epistolam, quam plurimi faciunt sectarii, & maxime Albertinus, quod putent, ex illa evinci, panis substantiam, Chrysostomi testimonio, in Eucharistia remanere, primus omnium memoravit Pe-

trus Martyr, non indicato loco, ex quo eam eruerit, neque Græco originali textu, ex quo illam verterit. Latinam versionem manuscriptam invenit Cl. Bigotius in Bibliotheca P. P. Prædicatorum Florentiæ, eamque typis mandari curavit.

Joannis Chrysostomi hac ad Cæsarium epistola. Quamvis enim vetus Auctor, qui contra Severianos, & Acephalos scripsit, a Turriano in lucem editus, S. Joannes Damascenus in Tractatu contra Acephalos ab eodem vulgato, & Nicephorus Patriarcha Constantinopolitanus in Disputatione adversus imaginum impugnatores, quæ MSS. extant in Bibliotheca Colbertina, ipsam laudent; dubium faciunt conjectura non leves, an revera sit S. Chrysostomi. Primo quod, exorta Eutychetis hæresis, quam diserte refellit (*), scripta videatur. Secundo, quod Veteres, qui adversus Eutychianos scripsere, & Patrum testimonia luculenta contra ipsorum errorem congefferunt, hanc epistolam non laudaverint: quod sane minime prætermisissent, si a sancto Chrysostomo scripta fuisset. Tertio, quod Theodoretus in Dialogis, ubi eodem argumenti genere contra Eutychianos utitur, quo epistola illius Auctor, ejus non meminerit; cum tamen alia S. Joannis Chrysostomi loca minus expressa proferat (a).

R. secundo, argumentum desumptum ex hac epistola nimis probare, si strikte sumatur comparatio, quæ in ea fit inter Eucharistiam, & Incarnationem, quemadmodum strikte sumi debet, ut, quod Scholasticis in votis est, ex illa evincant. Perfecta enim similitudo statui nequit inter Eucharistiam, & Incarnationem, nisi non tantum absoluta panis accidentia, sed ipsammet etiam ejusdem substantiam in Eucharistia remanere, dicatur; ac proinde nisi catholicum transubstantiationis dogma vacillet & corruat. Sicuti namque duplex in Christo est natura substantialis, Divina, & humana, nullaque humanitatis in Divinam Christi naturam contra Eutychetem facta conversio est; ita duplex in Eucharistia admittenda esset substantia, panis nempe, & Corporis Christi, ut locum haberet instituta comparatio. Certe non aliam ob causam modernis sectariis, Albertino præsertim, Basnagio, & Picinino, maximo hæc epistola in pretio est, neque ob aliam causam pro genuino Chrysostomi foetu eam habendam volunt Caveus, & Ovdinus, nisi quia persuasum habent, dogma transubstantiationis hoc Chrysostomi testimonio prorsus convelli. Propterea

R. tertio, Auctorem hujus epistolæ, quicumque ille fuerit, sicuti etiam reliquos veteres Patres, qui Incarnationem cum Eucharistia com-

pa-

(*) Hæresis Eutychiana de una natura in Christo post S. Joannis Chrysostomi obitum exorta est; ut proinde ab illo oppugnari nequaquam potuerit. Ex hac enim vita discessit S. Doctor anno a Christo nato 407., initium vero Eutychianæ hæreseos alii anno 442. ex fragmento epistolæ Domni Episcopi Antiocheni ad Theodo-

sium Imperatorem a Facundo lib. VIII. c. 5. relato; alii anno 448. ex epistola XVI. Gelasii Papæ ad Episcopos Dardaniæ, consignandum censent. Vide Cl. P. Franciscum Pagium Tom. I. Brev. de Gestis Pontificum ad annum 440. de S. Leone Papa n. 10. & 11.

(a) Tom. VI. Hist. Ecclesiasticæ Dissert. XII. in seculum XI., & XII. artic. 16. n. 5.

parant, non ita debere intelligi, quasi eorum mēns fuerit, perfectam, omnique ex parte absolutam similitudinem inter illas haberi, sed aliquam dumtaxat: videlicet id unum, S.S. Patrum sententia, utrique huic mysterio esse commune, ut, quod foris in illis apparet, aliud reipsa ab eo sit, quod intus latet; atque insuper ut, quemadmodum exterior panis forma in Eucharistia non impedit, quominus unum tantum corpus, scilicet Christi, in ea habeatur; ita humanitas in Christo non prohibeat, quominus ille una tantum sit persona, & unus filius. Hinc Auctor sermonis *de cœna Domini*, S. Cypriano olim falso adscripti, *panis*, inquit, *quem Dominus discipulis porrigebat, non effigie, sed natura mutatus, omnipotentia Verbi factus est caro; & sicut in persona Christi humanitas videbatur, & latebat Divinitas, ita in sacramento visibili ineffabiliter se infundit essentia* (a). Egrege propterea rem hanc exponit, mentemque declarat S. Joannis Chrysostomi, & aliorum veterum Patrum, qui ad alterum horum mysteriorum ex altero explicandum hac comparatione usi sunt, Vir Cl. Marchio Scipio Maffejus ad Basnagium scribens. *Assai meglio*, inquit *Vir doctissimus, dell'altre (similitudini) procede quella, di cui ora trattiamo, usata però anche da altri Scrittori; poiche c'insegna, che siccome nell'Eucaristia il corpo del Signore, e il complesso delle proprietà naturali del pane non si mischiano insieme, benchè il solo corpo del Signore, si nomini, e il sacramento sia un solo, così nell'Incarnazione la Divinità, e la umanità non si trasfondono in una cosa sola, come credevano i Sinusisti (*), ma restano due distinte, e confuse, benchè il Salvatore sia un solo: c'insegna, che siccome nell'Eucaristia non si vede, che pane, e pur c'è il corpo del Signore, così in Cristo non si vede, che uomo, e pur c'è Dio: c'insegna, che siccome, benchè l'Eucaristia si denomini il corpo del Signore, senza far menzione del pane, non per questo il corpo è confuso punto, ne mischiato col pane, che apparisce, così nell'Incarnazione benchè si dica solamente Cristo, non per questo le due nature son fatte una, ne punto confuse, o mischiate insieme. Tanto basta, anzi sopravanza di molto, perche fra questi due misteri possa instituirsi ragionevole, e plausibile comparazione; e ridicola cosa è il pretendere, che debbano corrispondere in ogni parte* (b). Cum

igi-

(a) Hujus sermonis Auctor fuisse dicitur Arnoldus Abbas Bonæ-vallis in Diœcesi Carnotensi, qui floruit sæculo Christi XII. Hadriano IV. Summo Pontifice, ad quem scripsit librum *de cardinalibus Christi operibus*, in quo ille sermo habetur.

(*) Sinusistæ hæretici ex eo sic appellati sunt, quod Christi Domini carnem Di-

vinitati coæternam, ejusque naturæ infinitam, permixtamque esse, arbitrarentur.

(b) Epist. ad Jacobum Basnagium data Florentiæ sub die 12. Augusti anno 1721. Legitur ad calcem *Historiæ Diplomaticæ*, quam ille edidit Mantuæ anno 1727. typis Alberti Tumermanni.

igitur satis ostensum fuerit (§. 114.), nullum requiri *accidens absolutum*, ut Corpus Christi vere & realiter in Eucharistia sub panis *sensibilitate* existat; ac propterea, ut aliud vere in illa sit, aliud in ea extare nobis videatur, apertum manet, nullo ejusmodi *accidente* ad eam quoque tuendam comparationem opus esse, quam inter *Eucharistiam*, & *Inarnationem* veteres Patres plerumque instituunt; atque hinc non constare veterum Patrum auctoritate, sacratissimum Christi Corpus sub *absolutis* panis *accidentibus* in Eucharistia contineri; proindeque recentiores Philosophos ob id jure non posse reprehendi, quod illa *accidentia* non admittant, quasi nempe in hoc Sacramento explicando a doctrina veterum Patrum idcirco recesserint. *Neque enim*, inquit Cl. Muratorius, *temeritas est, neque crimen perniciosum, id affirmare, quod a sacris Auctoribus negari, non constat; aut id negare quod ab iisdem affirmari, manifeste non liquet* (a).

DEMONSTRATUR

Pars secunda Propositionis, nempe ex auctoritate Theologorum.

151. Demonstranda modo est altera propositionis pars, videlicet *Theologorum auctoritate non satis evinci, panis, viniq; sensibilitatem, sub qua Christus Dominus in Eucharistia existit, ex absolutis rerum illarum accidentibus, quæ divinitus in ea remaneant, provenire*. Id ergo ita ostenditur: demonstrari nequit auctoritate Theologorum, *sensibilitatem* panis, & vini, quæ in hoc Sacramento superstes est, oriri ex *absolutis* rerum illarum *accidentibus*, si Theologi non pauci, iique graves, vel expresse teneant oppositum, nempe cum Recentioribus sentiant; vel aperte dicant, Recentiorum sententiam posse a Viro catholico, salva religione, tutaque fide, defendi. Quemadmodum enim ingenue fateor cum Cl. Melchiore Cano, ex *Autorum omnium Scholasticorum communi sententia, in re quidem gravi, usque adeo probabilia sumi argumenta, ut illis refragari temerarium sit* (b); ita cum eodem Viro doctissimo citra omnem prorsus dubitationis aleam positum esse puto, *Theologorum Scholasticorum etiam multorum testimonium, si alii contra pugnant Viri docti, non plus valere ad faciendam fidem, quam vel ratio ipsorum, vel gravior etiam auctoritas comprobavit: videlicet, in Scholastica disputatione plurimum auctoritatem obruere Theologum non debere; sed si paucos Viros, modo graves, secum habeat, posse sane adversum plurimos stare* (c). Ex Scholasticis au-

L I

tem

(a) Lib. I. de moderamine ingen. cap. 21.

(c) Ibidem concl. 1.

(b) Lib. VIII. de locis Theol. cap. 4. concl. 2.

tem Theologis nonnulli olim fuerunt, & modo sunt non pauci, & quidem non inferioris subsellii, qui vel expresse tenuere hac super re, & tenent modo, quod docent Recentiores; vel aperte dixerunt, & modo dicunt, Recentiorum opinionem de sensibilitate panis in Eucharistia superstitere posse, salva religione, tutaque fide, a Viro catholico propugnari.

I. etenim Cl. P. Robertus Holcot ex conspicua P. P. Prædicatorum Familia, qui doctrina clarus anno 1349. ex hac vita decessit, hac de re ita loquitur: *quarto differt (transubstantiatio) ab aliis mutationibus; quia omnia accidentia post transubstantiationem manent, quod non est in aliis transmutationibus; ex quo patet, quod accidentia substantiarum materialium sunt alia, & distincta ab ipsis substantiis. Non tamen hoc semper tenui; quia aliquando dicebam oppositum, idest quod album non potest fieri nigrum, nisi per corruptionem substantie, vel per motum localem substantie, vel substantiarum, sicut in mixtionibus; quia una mixtio causat unum colorem, & alia alium. Tamen potest dici, quod post consecrationem nihil manet ibidem continue, & regulariter, sed intentiones solum, & species accidentium; unde solebant vocari species panis, & vini, & non qualitates post consecrationem; & ideo sensus utitur speciebus pro rebus, & sic iudicat, idem manere. Nihil tamen dico hic assertive (a).*

II. Huic succedit Petrus de Alliaco S. R. E. Cardinalis, & Episcopus Cameracensis, qui claruit sæculo XV. (obiit enim anno 1426.). Quærens namque Vir doctissimus, *utrum accidentia panis maneant in Eucharistia sine subiecto*, hæc habet: *Tertia opinio potest imaginari talis, scilicet quod, licet accidentia panis, si essent aliquantulum distincta a substantia panis, possent separari a subiecto, & manere separata; tamen de facto non manent sine subiecto; quia diceret hæc opinio, quod nulla sunt accidentia distincta a substantiis, & per consequens nec accidentia panis. Et ad determinationem Ecclesie, quæ ponit, quod corpus Christi est sub specie panis, diceret consequenter, quod debet intelligi sub conditione, scilicet supposito, quod sint aliquæ species accidentales distinctæ a substantiis; sed si non sint tales, tunc sensus est, sub specie, id est, ubi apparet esse panis, & ubi prius erat. Et si dicatur contra, quod tunc esset ibi deceptio, & illusio, cum appareant ibi species esse, siue accidentia, diceret ista opinio consequenter, quod non plus apparet ibi species, vel accidens panis, quam substantia panis, & apparet, quod comedatur, & videatur panis, & tamen oppositum iudicatur per fidem,*
sic

(a) Super IV. Sententiarum q. 3. §. Quarto videndum est &c.

sic in proposito. Unde hic diceretur, sicuti quadam opinio, quam recitat Magister Distin. XII., respondet de fractione, quæ ibi apparet, scilicet quod ibi non est fractio, sed dicitur frangi, quod videtur. Nec tamen fallit nos visus, nec fallitur, quod esset, si crederetur, ita frangi, ut videtur; nec est illusio, quia ad utilitatem fidei ita fit. Et ponit exemplum de Christo, qui se ostendit duobus discipulis in via in specie peregrini; nec in eo tamen talis forma erat, sed oculi eorum tenebantur &c. Sed prædicta opinio esset extranea a communi Philosophia, quæ ponit, accidentia esse res distinctas a substantiis, sicut albedo est distincta a re alba, & albedo panis ab ejus substantia, licet hoc non sit evidens &c. Ideo quamvis prædicta negarentur, tamen dubium est, utrum debeat haberi tamquam hæretica, & videretur, quod non; quia sicuti illa, quæ inferuntur ex his, quæ sunt fidei, sicut Scriptura Sacra, & per consequentiam non evidentem, sed solum probabilem, non videntur proprie pertinere ad fidem, nec eorum opposita esse hæretica in fide; sic illa, quæ inferuntur per consequentiam evidentem, tamen virtute aliqujus medii, vel assumti in antecedente, quod non est evidens, nec pertinens ad fidem, sed est aliquod Philosophicum probabile, & communiter concessum, non videretur etiam pertinere ad fidem, sic quod eorum opposita sint habenda ut hæretica in fide. Modo quod accidentia panis maneat ibi, hoc inferitur ex hoc, quod præsupponitur, quod substantia panis transubstantiatur, & accidentia panis sunt aliud ab ejus substantia. Istud autem secundum nec est evidens, nec est in Scriptura expressum, nec ab Ecclesia determinatum, sed est unum probabile, tamen receptum communiter ab iis, qui sequuntur Philosophiam communem Peripateticorum; sed si esset aliquis, qui diceret oppositum hujus, non esset propter hoc tamquam hæreticus habendus (a).

III. Doctissimus Præsul Jacobus Bossuet in expositione ab eo edita *Doctrinæ Christianæ*, quam probarunt, summisque laudibus exornarunt quamplures S. R. E. Cardinales, & insignes Theologi, ipseque Summus Pontifex INNOCENTIUS XI. commendavit plurimum, ita explicat, quomodo Christus Dominus sit in Eucharistia sub speciebus panis, & vini, ut non solum nullam prorsus absolutorum Scholæ accidentium mentionem faciat, sed præterea per exteriores tantum panis apparentias, & impressiones, peractas in externis sensoriis, rem totam absolvat. Inquit enim: *Au reste, la vérité, que contient l'Eucharistie dans ce qu'elle a d'intérieur, n'empêche pas qu'elle ne soit un signe dans ce qu'elle a d'extérieur, & de sensible; mais un signe de telle nature, que bien loin d'exclure la réalité, il l'emporte nécessairement avec*

Ll 2

soi

(a) Super IV. Sententiarum q. 6. artic. 3.

soi, puisqu'en effette cette parole, Ceci est mons Corps, prononcée sur la matiere que JESUS-CHRIST a choisie, nous est un signe certain qu'il est present: & quoique le choses paroissent toujours les memes à nos sens, notre ame en juge autrement qu'elle ne feroit, si une autorité supreme n'étoit pas intervenue. Au-lieu donc que de certaine especes, & une certaine suite d'impressions naturelles, qui se font en nos corps ont accotumé de nous désigner la substance du pain, & du vin, l'autorité de celui à qui nous croïons fait que ces memes especes commencent à nous désigner une autre substance. Car nous écoutons celui qui dit que ce que nous prenons, & ce que nous mangeons, est son Corps; & telle est la force de cette parole, qu'elle empêche que nous ne rapportions à la substance du pain ces apparences exterieures, & nous le fait rapporter au Corps de JESUS-CHRIST present: de-sorte que la presence d'un obiet si adorable nous étant certifiée par ce signe, nous n'hésitons pas à y porter nos adorations (a). Versio autem Italica anno 1730. apud Franciscum Storti Venetiis edita sic habet: *Nel resto, la verità, che contiene l'Eucaristia in ciò, ch'ella ha d'interiore, non toglie, che non sia un segno in quello, che ha di esteriore, e di sensibile; ma un segno di tal natura, che non solo non esclude la realtà, ma necessariamente la porta seco; poiche in effetto le parole: Questo è il mio corpo, pronunciate sopra la materia, che Gesù Cristo ha scielta, sono un segno certo, ch'egli è presente; e benché le cose appariscano sempre le medesime a nostri sensi, l'anima nostra ne giudica altrimenti ch'ella farebbe, se non vi fosse intervenuta un'autorità superiore. In luogo dunque che certe specie, e una certa serie d'impressioni naturali, che si fanno ne' nostri corpi, sono state solite di significarci la sostanza del pane, e del vino, l'autorità di colui, al quale noi crediamo, fa che queste medesime specie comincino a significarci un'altra sostanza. Imperocché noi ascoltiamo colui, che dice: quel che noi prendiamo, e quel che noi mangiamo, esser il suo Corpo; e tal è la forza di questa parola, che c'impedisce di riferir' alla sostanza del pane quelle apparenze esteriori, ma ce le fa riferire al Corpo di Gesù Cristo presente, in modo che venendoci da questo segno assicurata la presenza d'un oggetto così adorabile, non dubitiamo punto di portarvi le nostre adorazioni. Ita ergo doctissimus Bossuet juxta versionem Italicam, quam subiiciendam censui Gallico textui, utpote, iis permittentibus impressam, quibus jus est, ne quid in lucem edatur, quod doctrinam parum in fide tutam comprehendat.*

IV. Cl. Ludovicus Antonius Muratorius, *illud porro, inquit, certis-*

(a) Cap. XIII. edit. Parisiensis anno 1730.

tissimum est, oportere semper, ut antea quam pronuntietur, an sacrorum codicum, & orthodoxa Theologiae documentis opinio quapiam consonet, si-ve repugnet, perspectissima sint Ecclesiasticis Iudicibus tum negantium, tum affirmantium rationes, non solum quatenus Theologiam respiciunt, sed quatenus etiam ad singularem aliquam disciplinam spectant. Quae res necessario exposcit, ut ea saltem disciplina pars cognoscatur, unde rationum cognitio pendet. Si, exempli gratia, queratur, an Fidei doctrina adversetur Cartesius, quum essentiam corporis physici statuit in extensione quantitatis, neque substantiam ab ipsa quantitate secernit: erunt profecto complures, quibus conciliari non posse videbitur huiusmodi placitum cum Ecclesiae sententia de augustissimo Altaris sacramento. Heic profecto necesse est, ut de ista controversia iudicaturus, Peripateticam Scholam aliquantisper terat, donec substantiae, specierum, atque accidentium nomina ad historiam probe norit; ad ejus quippe Scholae sententiam respexisse videntur Tridentini Patres de transubstantiatione loquentes. Tum delatam ad Ecclesiasticum tribunal Cartesii opinionem si serio, si recte expendere velit, huius quoque Philosophi theorematum de natura corporis perscrutetur oportet, rationesque perpendat, quibus ille suam sententiam ingeniose munivit. Id plurimum interest. Nam, ut alibi diximus, verum vero adversari nequit; atque uti cum veritatibus Theologicis Philosophica, ita cum Philosophicis Theologica revera pugnare non possunt. Quamobrem tam ex his illa, quam ex illis ista lucem mutuo accipiunt, & certa incertis dant legem, ut si, exempli gratia, aliquid in Physica certum sit, inde incerta sacrarum Scripturarum verba sint explicanda; & contra certis divinatorum Librorum sententiis incerta Physicae documenta se conformare debeant. In hac autem controversia statim occurrit, jam spectare ad Fidem, certissimumque esse debere inter catholicos, substantiam panis, & vini in sacramento altaris converti in substantiam corporis, & sanguinis Christi, permanentibus tamen, & perdurantibus in sacramento pristinis speciebus panis, & vini, itaut externis sensibus nulla illic appareat facta substantiae mutatio, atque non amplius sit, neque appellari proprie possit panis, & vinum, quod ante consecrationem panis, & vinum proprie fuerant. Quam ergo verissimum, certissimumque hoc sit in Fidei Theologia, id quoque in Philosophia verum certumque sit, necesse est; & fallacia laborabunt quaecumque verisimiles, ingeniosaeque rationes a Philosopho excogitentur contra firmissimum hoc fidei documentum. Propterea se rem non inficiari, se rem credere; Cartesiani catholici ubique ajunt. Modum tantummodo, quo huiusmodi prodigium fiat, & quomodo pereat, intactis speciebus, panis, ac vini substantia, ab Ecclesia minime fuisse con-

constitutum, affirmare se posse arbitrantur sine injuria Theologia. Tum nervis omnibus contendunt, ut ostendant, nihil dogmati Fidei repugnare naturam, ac essentiam corporum, quam tradunt, suamque opinionem conciliari posse cum Ecclesia decretis. Utrum isti vera, an somnia nobis narrent, qui judicare prudenter cupiat, necesse est in primis, ut sollicite vestiget, intelligat, & expendat Cartesianæ sententiæ rationes, tum perspiciat, an uti rem, ita modum Ecclesia quoque statuerit. Si enim vera & certa deprehenditur Cartesii de natura corporum opinio, neque modum physicum sacramenti definivit Ecclesia, neque reipsa Aristotelicum placitum consecrare illi animus fuit, jam non est, cur Cartesianam sententiam explodamus; quum præcipue in ea fuisse S. Augustinus videatur; immo tunc non aliud, quam quod Cartesius, sensisse Ecclesiam, excogitare licebit. A Cartesianis autem putatur, minime Tridentinis Patribus fuisse consilium consecrandæ Peripatetica de natura corporum sententia (ab his enim questionibus divimendis Ecclesia abstinere solet) & consulto ipsos Patres vocabulo specierum fuisse usos, quum accidentia nominare potuerint, ut ea voce solum significarent sensationes illas, quæ, sublata panis, ac vini in sacramento substantia, adhuc in sensibus nostris fiunt, & fieri non negant cum Peripatetici, tum Cartesiani. Contendunt insuper, Ecclesiam nequaquam statuisse, quæ species in sacramento sine substantia panis, ac vini permaneant. Quibus diligenter ab Ecclesiastico Judice examinatis, tum constare poterit, num absurda, num falsa sit illa Cartesii opinio (qualis certe erit, ubi cum certo, & vero dogmate Ecclesiæ consentire non posse dignoscatur), an potius toleranda sit, sive etiam laudanda (a). Persuasum non est ergo Cl. Muratorio, opinionem hanc Cartesii hæcenus ab Ecclesia proscriptam fuisse, alioquin non dixisset Vir eximius, examinatis Peripateticorum, & Cartesianorum rationibus ab Ecclesiastico Judice, tum constare posse, num falsa illa sit, an potius toleranda, sive etiam laudanda.

V. Sed clarius Cl. P. Serry. Demonstrans enim Vir eximius, præcautione tunc opus esse Viro Theologo, non illi præcipitandum judicium, non illico in Philosophicas opiniones, tamquam Dei verbo contrarias, ferendam censuram, cum vel aliqua in sacris Literis occurrunt sive ad Physicam, sive ad Astronomiam pertinentia, quæ non satis prima fronte cum receptis Disciplinarum illarum Theorematibus congruunt; vel aliqua vicissim in recentium Philosophorum systematibus obversantur, quæ cum aliquo Fidei nostræ capite sacris in Literis revelato collidere prima facie videntur; sed omni ope, ac studio adnitendum,

ut

(a) Lib. I. de moderamine ingeniorum cap. 24.

ut cum sacrarum Scripturarum loquendi formulis probata Philosophorum systemata concilientur, ne aut fallere putetur Dei verbum, quod recte rationi repugnet, aut delirare humana ratio videatur, quod supremæ Veritati adversetur: hæc, inquam, demonstrans, pluribusque exemplis egregie explicans Vir Cl., alia quid referam, ait, recentis Scholæ systemata inconsideratis quorundam Theologorum censuris impeti solita? Essentiam corporis physici in extensione quantitatis plerique nunc Philosophi ponunt, Cartesium secuti, ipsamque substantiam a quantitate minime distinguunt. Verane, an somnia narrent, non inquirō; at, quod certo novi, ita illos philosophari permittit Ecclesia. Quid tu ergo, Doctor egregie, censuris illos inuris? Et quos communis Mater fovet ut filios, tamquam ethnicos, & publicanos execraris, quod tibi forte sacrosanctæ Eucharistiæ fidem labefactare videantur? Studium, zelumque pro Domino Dei laudo maxime, atque commendo; at secundum scientiam velim esse. Melior longe Theologus eris, si permissum interim, ac toleratum ab Ecclesia systema cum Eucharistiæ fide conciliaveris. Quod forte non incommode fiet, si dixeris, substantiæ quidem panis mutationem, in Eucharistiæ sacramento fieri solitam, ab Ecclesia fuisse definitam; non ita tamen definitum esse mutationis modum; perindeque stare mysterium, si mutata simul cum quantitate substantia, solæ maneant sensationes externæ nostris in sensibus factæ (quod Cartesius existimat) ac si sola mutata substantia, vera cum ceteris accidentibus quantitas maneat, quæ reipsa sensus nostros afficiat, quod Peripatetici arbitrantur. Eaque de causa Tridentinos Patres specierum, sublata substantia, remanentium vocabulo fuisse usos, cum accidentia nominare potuissent: videlicet, ut ea voce specierum sensationes illas simpliciter significarent, quas in sensibus nostris perinde fieri, & Cartesiani, & Peripatetici profitentur, seu cum substantia indistincta quantitas pereat, seu distincta non pereat. Id ni dicas, sed Cartesianos, donec in eos sententiam Ecclesia tulerit, violatæ fidei postules, non Theologus es, sed audacissimus censor; non pro fide, sed pro anteceptis opinionibus pugnas; non pro Ecclesia, sed pro Aristotelica Schola decertas (a).

VI. Auctor quoque præclari Operis de re Sacramentaria hæc habet: de accidentibus, inquit, physicis quæ eorum natura sit, Philosophorum questio est, ad eorum tribunal summo jure devoluta. Volunt alii, esse formas absolutas, & materiales, realiter a subjecto, & entitative uti loquuntur, distinctas. Contendunt alii, hujusmodi formas, quæ ne-

que

(a) Tom. I. Prælect. Theol. Disput. de
opificio Mundi Prælect. 1. pag. 132. edit.
Venetæ 1742.

que materia sint, neque contexta ex materia, chymeras esse; hancque suam doctrinam argumentis haud contemnendis confirmant; unde inferunt, formas omnes corporum (sola anima rationali excepta) nihil aliud esse, nisi certam materiae modificationem, quæ non sit entitas a materia diversa. Hoc posito, dicimus, affirmari quidem non posse, Christi corpus realiter in Eucharistia contineri, quin simul dicantur remanere species, sive apparentiæ sensibiles panis, & vini, quæ nimirum eodem modo sensus afficiant, ac ante consecrationem afficiebant; sed negamus, necessario dici debere, quod residuæ sint quantitatis, coloris, odoris, saporis absolutæ, & materiales, ut loquuntur, entitaturæ. Christum enim in Eucharistia realiter contineri, dogma catholicum est, divinitus revelatum, & in Religione præcipuum; accidentia vero materiales esse entitates, a subjecto realiter distinctas, Arabum Aristotelis interpretum opinio, nec fidei, nec rationis lumine roborata; imo penitus rationi (iudicio multorum) contraria. Itaque non putamus, unum sequi ex altero; multoque minus credimus, veritatem Eucharistiæ, nisi absoluta accidentia admittantur, defendi non posse, quod videmus, incaute ab aliquibus affirmari, quasi nimirum Divina veritas arbitrariis egeret ad sui defensionem hominum opinionibus (a). Similiter Cl. P. Vanroy, quærenti, an sit definitum, quod species in Eucharistia remanentes sint accidentia Peripatetica, respondet negative; quia, inquit, non oportet asserere, Ecclesiam, vel Concilia quæstiones Philosophicas decidiisse, nisi clare & evidenter id pateat. Atqui ostendi non potest, quod Ecclesia præsentem de speciebus quæstionem determinaverit. Ergo &c. Sane ex Pallavicino habemus, quod Patres Tridentini etiam quæstiones Theologicas, quæ inter Catholicos in utramque partem ventilantur, decidere noluerint. Ex quo conjicere licet, quod multo difficilius ad altercationes Philosophicas dirimendas procedat Ecclesia, quando ab illis nullum fidei punctum dependet (b).

VII. Demum P. Joannes Laurentius Berti respondens ad sacramentarium argumenta, quorum alterum ex eo petebatur, quod nequeat corpus sua extensione privari; alterum ex hoc, quod corporea substantia constituatur certa partium tenuissimarum combinatione, quæ in hostia consecrata adhuc manet conspicua, hæc habet ad primum: docent Peripatetici, quod essentia corporis nequaquam in dimensione sit posita, cum in hoc sit constituenda, quod extensionem naturaliter tantum exigit; nam per hoc solum a spiritu sufficienter distinguitur res

cor-

(a) Tom. I. Lib. IV. q. 6. sect. 1 cap. 4.
§. 2. in respons. 2. ad instantiam 6. pag.
429. edit. Venetæ anni 1737.

(b) Theol. moral. P. IV. cap. 5. q. 1.

corporea. Recentiores quidem nonnulli contendunt, non posse corpus esse, aut excogitari, nisi extensum sit; sed fatentur tamen, contineri idem corpus nunc arctiori loco, nunc ampliori, easdemque partes habere pullum in ovo, seu plantam in semine, ac habeat pullus explosus, & arbor patula, licet partes in ovo, aut in semine nondum ex involucris sint explicatae, sed compressa simul, atque contracta. Sunt praeterea, qui contendunt, incompertam nobis esse rerum omnium essentiam, nec illam aliud censent, nisi quod sepositis omnibus proprietatibus, reliquum manet. Prior itaque obiectio nulla est, siue dicas, extensionem esse corpori accidentariam, siue teneas, Christi corpus in Eucharistia occupare locum angustiorum, siue ingenue fatearis, nescire te quid sit corpus. Eligas autem ex his tribus eam, quae arrideat magis, sententiam. Hoc tantum admoneo, si amplectaris secundam, ne mente excidat canon tertius sess. XIII. Tridentini Concilii: si quis negaverit, in venerabili sacramento Eucharistiae sub unaquaque specie, & sub singulis cujusque speciei partibus, separatione facta, totum Christum contineri, anathema sit. Saltem ergo, separatione facta, in qualibet parte totum Christi corpus agnoscas, si vis ante separationem habuisse extensionem aliquam actualem. Piaculum ergo non putat Cl. Auctor, negare, extensionem, siue quantitatem esse entitatem absolutam, a corporea substantia realiter distinctam. Hæc vero habet idem ipse ad secundum: Juxta diversa Philosophorum placita diluitur obiectio altera. Indubitatum quippe est, permanere in Eucharistia panis, & vini accidentia, ut cum universis Theologis scribit Lib. IV. de sacramento altaris Innocentius III. Damnarunt quippe Guilelmus Archiepiscopus Cantuariensis, cujus judicium confirmavit Urbanus VI., & Synodus Constantiensis sess. VIII. propositionem Wiclefi: accidentia panis non manent sine subiecto in sacramento altaris. Hinc inferunt Theologi prestantissimi, inter quos noster Lupus in sextum Romanum Concilium S. Gregorii VII. Tom. V. pag. 316. meras esse nugas, quæ de accidentibus a subiecto indistinctis tradit Cartesius. MULTI tamen, a quibus alienus non est Vanroy cap. V. de Eucharistia q. I., & 2., accidentia, & species panis, ac vini remanere fatentur, sed negant, esse entitates tenues a substantia distinctas. Hi nimirum ajunt, species panis, ac vini esse imaginem impressam materia subtili panem ambienti, quæ imago, seu materia subtilis pressio persistit, etiam consecratione peracta, eandem in organo visus excitans affectionem, ac si panis adesset. Atque idem docent de accidentibus, quæ sensibus reliquis obiciuntur. Conantur id explicare exemplo Christi, qui sub hortulani specie Magdalena dicitur apparuisse, quod nempe hujus mulieris visus a materia cælesti eodem modo fuerit affectus, quomodo fuisset, hortulano præ-

sente. Possunt his aliquam asferre lucem, quæ lib. X. cap. 14. scripsimus de apparitionibus angelorum. Hac autem nec REFELLO, nec PROBO (a). Igitur huic etiam Viro Cl. persuasum est, opinionem Recentiorum de mechanica sensibilibus qualitatibus origine catholice fidei dogmatibus non adversari; & ideo sine fidei iactura a Viro catholico posse defendi; alioquin non dixisset Vir Cl., opinionem hanc ab se nec probari, nec refelli. Nequit ergo evinci auctoritate Theologorum, panis, vinique sensibilitatem, sub qua Christus Dominus in Eucharistia existit, ex absolutis illarum rerum accidentibus, quæ divinitus in ipso sacramento supersint, provenire.

PROPOSITIO XII.

Haecenus definitum ab Ecclesia non est, neque nobis, tamquam certo indubitanterque credendum, ab illa expresse traditum, dari absoluta Scholasticorum accidentia, ex quibus, divinitus in Eucharistia remanentibus, ea oriatur panis, vinique sensibilitas, sub qua Christus Dominus vere, realiter, & substantialiter in hoc sacramento existit.

152. *Probatum primo.* Si enim definitum esset ab Ecclesia, nobisque ab illa expresse traditum, tamquam ad fidem pertinens, dari absoluta Scholasticorum accidentia, sub quibus, sine subiecto in Eucharistia divinitus remanentibus, Christus Dominus in illa lateret, nullus plane Theologorum catholicorum id inficiaretur, vel si quis illorum id negare auderet, gravem notam haudquaquam effugeret. Tanti enim momenti res huiusmodi est, ut ab Ecclesia dissimulari non possit. Plures autem Theologi catholici modo etiam aperte negant, definitum esse ab Ecclesia, ab eaque nobis traditum, tamquam certo indubitanterque credendum, dari accidentia absoluta, eaque in Eucharistia remanere, quin aliqua vel levissima nota illis propterea iniusta ab Ecclesia haecenus fuerit. Primo etenim Cl. Tournely, licet communi, ac pervulgata in Scholis sententia inhærendum censeat, ait tamen, *expresse definitum ab Ecclesia non esse, accidentia Eucharistica absoluta esse, & a materia distincta, Philosophi sensu (b).* Doctissimus Muratorius, ut paulo antea vidimus, non dicit, jam constare, sententiam Cartesii de speciebus Eucharisticis falsam esse, & ab-

(a) Tom. VII. de Theologicis Disciplinis lib. XXXIII. cap. 9. pag. 303. edit. Romæ anno 1743.

(b) Prælect. Theol. de Sacram. Eucharistiae q. 1. art. 5. in solutione objectionis ductæ ex accidentibus.

surdam, ut profecto dixisset, si fuisset ab Ecclesia censorio stygmate confixa; sed tunc solum, inquit, fore ut constet, *num absurda, & falsa ea sit, an potius toleranda, sive etiam laudanda*, cum Peripateticorum, & Cartesianorum rationes fuerint ab Ecclesiastico Iudice diligenter ad trutinam revocatæ (a). Cl. P. Serry scribit, *Ecclesiam permittere, ita philosophentur, qui substantiam a quantitate non distinguunt: ab Ecclesia permissam, ac toleratum dicit systema Recentiorum; & hisce non contentus, addit præterea, non Theologum esse, sed audacissimum Censorem; non pro fide, sed pro anteceptis opinionibus pugnare, non pro Ecclesia, sed pro Aristotelica Schola decertare, qui Cartesianos, donec in eos sententiam Ecclesia tulerit, violatæ fidei postulat* (b). Auctor quoque operis de re sacramentaria ex eadem inclyta Prædicatorum Familia, negat, *quod residua sint in Eucharistia quantitatis, coloris, odoris, saporis absolutæ, & materiales entitatula*. Fateretur, *dogma catholicum esse, divinitus revelatum, Christum in Eucharistia contineri; accidentia vero materiales esse entitates, a subiecto realiter distinctas, Arabum Aristotelis interpretum opinionem appellat, nec fidei, nec rationis lumine roboratam*. Negat demum, *se credere, veritatem Eucharistia, nisi absoluta accidentia admittantur, defendi non posse; eosque incautos vocat, qui contrarium affirmant, quasi nimirum divina virtus arbitrariis egeret ad sui defensionem hominum opinionibus* (c). Non minus aperte itidem loquitur Cl. P. Vanroy. Quærenti namque, *an sit definitum, quod species in Eucharistia remanentes sint accidentia Peripatetica*, respondet *negative*, contendens, *clare & evidenter, prout requiritur, ostendi non posse, quod Ecclesia præsentem de speciebus questionem determinaverit* (d). Demum Cl. P. Berti, ut itidem vidimus, expresse ait, *ab se nec refelli, nec probari eorum opinionem, qui Eucharisticas species per solam externorum sensoriorum immutationem cum Cartesio explicant* (e): quod profecto in alma Urbe non scripisset Vir Cl., si hæc opinio jam fuisset ab Ecclesia proscripta. Definitum ergo non est, panis, vinique sensibilitatem in Eucharistia superstitem ex remanentibus accidentibus provenire.

Confirmatur hæc ratio: nam licet plurimi Scholasticorum Theologorum hæreticam dixerint opinionem negantem accidentia absoluta; non pauci tamen, quamvis illam non approbent, imo aperte etiam rejiciant, non idcirco audent, ipsam tam atro carbone notare. Sic

M m 2

Cl.

(a) Lib. I. de moderamine ingeniorum cap. 24.

(b) Tom. I. Prælect. Theol. Disp. de opificio Mundi Prælect. I.

(c) T. I. lib. IV. q. 6. sect. I. cap. 4. §. 2.

(d) Theol. moral. P. IV. cap. 5. q. 1.

(e) Tom. VII. de Theol. Disciplinis lib. XXXIII. cap. 9.

Cl. P. Natalis ab Alexandro, etsi *falsam, & erroneam*, dicat, ab se existimari doctrinam Cartesii de accidentibus, *nemo tamen*, inquit, *dixerit eam esse hæreticam* (a). Cl. Juenin, quærens, *in quonam posita sit natura accidentium, quæ post consecrationem in Eucharistia remanent*, ait quidem, opinionem Recentiorum, quæ ponit, *nec accidentia, saporem nempe, colorem, nec ipsam etiam quantitatem esse aliquid, quod ex parte obiecti, seu a parte rei existat, sed esse modificationes in sensibus factas immediate a Deo*, graves pati difficultates; verum nullam refert determinationem Ecclesiæ, nullam Conciliorum definitionem, propter quam nemini catholicorum licere dicat, illam sententiam propugnare (b). Ipse demum P. Ferrari, ille nempe, qui *summo animi dolore sese affici ait, cum catholicam juventutem hisce enutriti principis* (Recentiorum scilicet) *animadvertit* (c); fatetur tamen, ab se non investigari, *utrum Peripatetica sententia* (de accidentibus absolutis) *sit fidei dogma expresse definitum ab Ecclesia, adeo ut quisquis illi refragetur, velut hæreticus sit habendus. Non enim*, inquit, *ii sumus, qui tantum rebus nostris tribuamus; optatque, ut prudens Peripateticus optime animadvertat, Recentiorum opinionem ut hæreticam damnari non posse* (d).

Non me latet, quadraginta Theologos numerari a Raynaudo, plures etiam a Picinardo (e), qui *hæreticam* dixere opinionem negantem *accidentia absoluta*. Verum, ut præteream, etiam doctissimum Card. Bellarminum inter eos a Picinardo (f) recenseri, quamvis loco, quem is laudat, scilicet lib. I. *de Eucharistia* cap. 4., Vir ille Eminentissimus ea de re ne verbum quidem faciat; dicam iterum cum Cl. Melchiore Cano, *Theologorum Scholasticorum etiam multorum testimonium, si alii contra pugnant Viri docti, non plus valere ad faciendam fidem, quam vel ratio ipsorum, vel gravior etiam auctoritas comprobavit* (g). Certe, ut ille recte habet, *ubi variæ sunt doctissimorum hominum, discrepantesque sententiæ, Academicorum temperamentum imitari, a rebus incertis certam assensionem cohibere debemus. Quid enim tam temerarium, tamque indignum sapientis gravitate atque constantia, ut Cicero elegantissime tradit, quam quod non satis explorate perceptum sit & cognitum, id sine ulla dubitatione defendere? Quo loco sane* (pergit

(a) Tom. VI. *Hist. Eccles.* Dissert. VII. in *hist. sæculi XI., & XII. artic.* 6. in *scholio*.

(b) *Comment. de Sacramentis* Dissert. IV. q. 4. cap. 4.

(c) Tom. II. P. I. *Physicæ Disp.* IV. q. 1. pag. 206.

(d) *Ibidem* pag. 194.

(e) De imputato Scholasticis studio efræni in Aristotelem cap. VII. §. 2.

(f) *Ibidem*.

(g) Lib. VIII. *de locis Theologicis* c. 4.

git ille) arguendi sunt Scholastici nonnulli, qui ex opinionum, quas in Schola acceperunt, præjudiciis Viros catholicos notis gravioribus incurrunt, idque tanta facilitate, ut merito rideantur (a). Hi etenim, eodem teste, & optime quidem ad rem nostram, in eo primum errant, quod Scholæ opiniones à certis constantibusque decretis non separant. Deinde errant in eo, quod duo rerum genera confundunt, unum earum, quæ ad Religionem attinent; earum alterum, quæ hanc ne attingunt quidem (b). Prætereundum porro non est silentio, eam quoque opinionem ab iisdem Theologis cenferi hæreticam, quæ negat, quantitatem a corporea substantia realiter distingui. Hæc igitur censura aut vera est, aut falsa. Si vera: ergo laudatus Melchior Canus, alique etiam gravissimi Theologi, qui realem illam quantitatis distinctionem, ut est alibi visum (S. 51.), inficiantur, debent hoc atro carbone notari: quod profecto de tantis Viris nemo cordatus dicet. Sin autem illa censura sit falsa: ergo ea quoque eodem jure penitus falsa censenda est, quam de sententia negante *accidentia absoluta* iidem ipsi pronunciant.

Probatur secundo. Existentia *accidentium absolutorum* in venerabili Eucharistiæ sacramento nullibi ab Ecclesia definita est. Ergo &c. Probatur assumptum, solvendo argumenta, quibus Scholastici doctrinam suam ex hoc capite demonstrare nituntur.

Argumenta Scholasticorum.

I. *Argumentum de Concilio Constantiensi.*

153. *Arguunt primo ex Concilio Constantiensi.* Inter plures Wiclefi propositiones censorio stigmate ab illo confixas (c), hæc, inquit, una est, ordine secunda: *accidentia panis non manent in Eucharistia sine subiecto*. Vera est igitur, quæ huic contradictorie opponitur, videlicet: *accidentia panis manent in Eucharistia sine subiecto*; & ideo, nisi licitum putetur, Constantiensi Concilio refragari, *absoluta Scholasticorum accidentia* sunt admittenda.

R. *primo*, argumentum nimis probare. Si namque *absolutorum accidentium* existentia in Concilio Constantiensi definita est, illi Concilio manifeste adversantur Tournely, Muratorius, Serry, Auctor operis *de re sacramentaria*, Vanroy, Berti, alique Viri in Theologia præstantissimi, utpote qui aperte docent, opinionem negantem

acci-

(a) Loco citato

(b) Ibidem cap. 5.

(c) Sess. VIII.

accidentia absoluta ab Ecclesia non esse proscriptam. Præterea, cum neque inter Scholasticos desit, ut vidimus, qui id ingenue fateatur, non ita hoc argumentum urget Recentiores, ut Scholastici sint ab illius pressura prorsus immunes.

R. *secundo disting. añs*: damnata fuit illa Wiclefi propositio: *accidentia panis non manent in Eucharistia sine subiecto*, quatenus enunciat, in Eucharistia remanere substantiam panis, *concedo añs*; quatenus, nulla habita hujus Sacramenti ratione, negat, *accidentia* panis posse existere sine subiecto, *nego añs*, & *distinguo coñs*; vera est, quæ illi propositioni contradictoriè opponitur, sumta propositione contradictoria, quatenus asserit remanentiam substantiæ panis in Eucharistia, *concedo conseq.*; sumta illa propositione, quatenus, nulla habita ratione Sacramenti, affirmat *accidentia* remanere, *nego conseq.* Observandum est igitur, controversiam, quæ Wiclefum inter atque catholicos vertebatur, non fuisse *philosophicam*, sed *dogmaticam*. Agebatur enim *directè*, & *per se*, ut ajunt Scholæ, de *conversione* substantiæ panis in Corpus Christi, deque *reali præsentia* ipsius Christi in Eucharistia; *indirectè* vero, & tantum *per accidens* de panis, ceterarumque rerum sensibilibus qualitatibus. Negabat Wiclefus catholicum dogma tum *præsentia realis*, tum *transubstantiationis*, contendens homo impius, *hostiam consecratam esse Corpus Christi tantum in figura*, & *verum panem in natura*, seu *verum panem naturaliter*, & *Corpus Christi figuraliter* (a). Observandum præterea, omnibus persuasum tunc fuisse, easdem ipsas *reales qualitates*, quæ ante consecrationem erant in substantia panis, post consecrationem remanere; ac proinde panis *sensibilitatem*, quæ in Eucharistia superstes manet, ex eodem prorsus *formali* principio provenire, ex quo ante consecrationem illa oriebatur. Colligitur id *primo* ex censura secundæ propositionis Wiclefi, quam Concilii Patribus Theologi exhibuere. Ita namque illa se habet: *Hoc est falsum* (secundum nempe Wiclefi assertum) & *erroneum*, & *sapiens hæresim universaliter intellectam*; quia si talis quantitas, quæ fuit quantitas panis, non manet sine subiecto in Sacramento altaris, erit tunc vel in corpore Christi, vel in pane, vel in aere circumstante (b). Nemo autem non videt, dici ab illis minime potuisse, necessarium fore, ut, si panis quantitas non maneat in Eucharistia sine subiecto, ea sit vel in corpore Christi, vel in pane, vel in aere circumstante, nisi pro certo haberent, eandem numero

(a) Tom. XVI. collectionis Labbeanæ
Conciliorum edit. Venetiis. 1731.
column. 242.

(b) Ibidem column. 846.

mero quantitatem, quæ ante consecrationem in pane fuerat, post consecrationem superesse. Ergo de remanentia qualitatū panis sensibilibus in Eucharistia illi ne quidem levissime dubitabant. Colligitur secundo ex Thoma Valdense. Cum enim, inquit, accidentia ad sensum spectent, seipsis subsistere necesse est. Corpus enim Christi, cum sit corpus gloria, novas accidentium corruptibilibus impressiones non recipit; & accidentia migrare de subiecto in subiectum non minus impossibile est apud naturam, quam habere subsistentiam propriam (a). Ut ergo contra Catholicos evinceret Wiclefus, substantiam panis non converti in Corpus Christi, sed in Eucharistia manere, impossibilem penitusque repugnantem suadere simplicibus nitebatur existentiam accidentium sine subiecto. Dicebat proinde, referente Valdense laudato (b), accidens non tantum inesse, sed esse subiectum; & per hoc, quam impossibile est, idem esse simul, & non esse, tam esse impossibile, accidens permanere, sublato subiecto: albedinem, cum sit substantiam esse albam, non posse esse sine subiecto: accidens non esse, nisi modum accidentalem substantiæ: nullam qualitatem esse, nisi substantiam esse qualem, nec aliquam formam, nisi illam, quæ est, substantiam esse formatam, vel formosam; ideo idem esse ponere, quod qualitas sit per se sine substantia, & ponere, quod substantia sit qualis sine hoc, quod sit substantia; & sic includere formalem contradictionem, quod sit accidens sine substantia subiecta. Hinc Catholicos criminabatur, quod non possent declarare, nec intelligere accidens sine subiecto; impie præterea effutens, fructum istius dementiæ, quæ fingitur accidens sine subiecto, fore blasphemare in Deum, scandalizare sanctos, & illudere Ecclesiam per verbum accidentis (c). Neque dissimili ratione utebatur Joannes Hus ad idem transubstantiationis dogma impugnandum. Ideo namque & ipse dicebat, manere panem post consecrationem, sicut antea (d), quia vides albedinem, rotunditatem, saporem panis, & fracturam audis (e). Hisce ergo tam perniciosis erroribus ut occurrerent Patres Constantienses, damnarunt propositionem illam Wiclefi, quæ prima in ordine est, videlicet substantiam panis materialem, & similiter substantiam vini manere in Sacramento altaris, utpote catholico dogmati transubstantiationis directe contrariam. Quoniam vero ipsi etiam pro re comperita habebant, qualitates sensibiles panis, quæ ante consecrationem inhærebant illius substantiæ, post consecrationem entitative remanere, ideo

(a) T. II. de sacram. Eucharistiæ cap. 75.

(b) Ibidem cap. 78. III. de do.

(c) Tom. XVI. Conciliorum laudatæ edit. colum. 242.

(d) Ibidem colum. 254.

(e) Ibidem colum. 255.

ideo secundam quoque Wiclefi propositionem confixerunt, quod viderent Viri illi doctissimi, eam quoque catholico *transubstantiationis* dogmati adversari. Impossibile enim est, easdem tam ante, quam post consecrationem haberi *sensibiles panis qualitates*, nisi vel sint in Eucharistia sine subjecto, si in illa non adsit substantia panis; vel panis substantia in sacramento superfit, si non sine subjecto in illo existant. Itaque, sicuti damnata fuit prima Wiclefi propositio, quia *directe*; ita propositio ejusdem secunda fuit proscripta, quia *illative* catholico dogmati *transubstantiationis* adversabatur, data quidem, sed minime determinata, utpote nequaquam ad fidem pertinente, de remanentia *sensibilium qualitatum* doctrina. Is unus fuit Patrum Constantiensium scopus, inquit Vir doctissimus, ad hoc ipsum, quod nobis objectum est, argumentum respondens, contra Wiclefi perfidiam definire, panem in Christi corpus converti, adeoque, consecratione facta, accidentium subjectum non esse: quod vero ad ipsa accidentia attinet, quæ aliquatenus insinuantur sine subjecto manere, incidens hac propositio est, ad fidem minime pertinens. Theologorum enim consensus est, in Conciliorum definitionibus distinguendas esse propositiones principales ab incidentibus, & a rationibus, quæ in probationem afferri possunt. Sæpe namque contingit, incidentem propositionem mere esse probabilem, imo falsam, licet principalis ad fidem pertineat: cujus rei præter cetera, quæ communiter afferuntur exempla, convincens in Concilio VII. Generali habemus; in hac, inquam, Synodo Patrum unus (Joannes Thessalonicensis) inde probavit, licitum esse, angelos pingere, quia, inquiebat, corporales sunt, cui a Patribus acclamatum: etiam Domine. Hæc enim Antistitum approbatio non cadit, nisi in angelorum imagines, quæ & pingi possunt, & licite retineri, minime vero in adjacentem Joannis propositionem: quia corporales sunt; cum constet, angelos omnes esse expertes materiæ (a). Unde Cl. Binius in notis ad actionem V. hujus Synodi, notandum, inquit, quod hac actione Joannes Thessalonicensis ait, angelos, & animas esse corporeas, idemque cum Basilio, & Athanasio universam Ecclesiam sentire, falsum est, & ab Ecclesia nequaquam receptum. Quod autem ex professo, & instituto Synodi allegabat, angelos, & animas pingi posse, judicio Ecclesiæ probatum est. Rationem, quam ille intulit, Synodus non curavit, ut pote quod de retinendo usu imaginum dumtaxat in ea ageretur (b). Ita ergo in re, de qua modo disceptamus, videlicet secundam Wiclefi propositionem: non manent accidentia sine subjecto in

(a) Auctor de re Sacramentaria Tom. I. lib. IV. q. 6. sect. 1. cap. 4. §. 2. in responsione ad instantiam 8.

(b) Tom. VIII. Conciliorum edit. laudatæ colum. 1304.

in Sacramento altaris damnarunt Patres Constantienses, non quia credendum vellent, tamquam necessario ad fidem pertinens, *accidentia corporea* ejus esse naturæ, quæ possint divinitus sine subiecto existere; sed quia dogma fidei est, panis substantiam converti in corpus Christi; ac proinde illam, adeoque subiectum *accidentium*, quæcunque demum esse dicatur physica illorum natura, in Sacramento altaris non remanere.

Ceterum, proscriptam fuisse in Concilio Constantiensi secundam propositionem Viclefi, non quia negat, possibilem esse existentiam *accidentium* panis sine subiecto; sed quia *transubstantiationi* contraria est, nonnullis momentis invicte demonstratur. Desumitur *primum* ex ea ipsa illius propositionis censura, quam Constantiensis Concilii Patribus Theologi exhibuerunt. Ita siquidem illa se habet: *secundus articulus* (propositio scilicet Viclefi, de qua agimus) *est directe contra transubstantiationem prædictam, in principio expositam, de qua, ut dictum est, loquitur Ecclesia in verbis suæ fidei, & determinationis in hac materia* (a).

Desumitur *secundum* ex Thoma Valdense. Is namque *petenti rationem decreti Concilii de fide accidentium sine subiecto*, dicendum, inquit, *quia fides principalis articuli hoc concludit. Quia data carne Christi propria, & præcisa in sacramento secundum essentiam ad formam verborum Christi: Hoc est corpus meum, nec hoc, scilicet panis, annihilatur, vel corrumpitur, quia fit corpus, nec in seipso manet, factus jam vere, id est, proprie Christi corpus. Maxime quia nihil plus est, quam corpus; quia non plus dicit Christus, quam corpus meum. Transubstantiatur ergo in corpus, ne maneat ultra panis, sed corpus tantum secundum substantiam. Cum igitur accidentia ad sensum spectent, seipsis subsistere necesse est. Corpus enim Christi, cum sit corpus gloriæ, novas accidentium corruptibilium impressiones non recipit, & accidentia migrare de subiecto in subiectum non minus impossibile est apud naturam, quam habere subsistentiam propriam. Liquet igitur, quomodo ex prima fide Evangelica: Hoc est corpus meum, pure, sine vitio, & proprie intellecta, infugibiliter sequantur transubstantiatio, & accidentium positio absoluta* (b). Tanto autem Viro plane constitisse, quoniam sensu singulæ Viclefi propositiones fuerint a Concilio Constantiensi proscriptæ, res plane certa est; cum & illius Concilii tempore ipse claruerit, & opus suum *de sacramentis*, Martino V. approbante, in lucem ediderit.

N n

Mo-

(a) Tom. XVI. Conciliorum edit. laudatæ colum. 875.

(b) Tom. II. de Sacramentis cap. 75.

Momentum *postremum* ex Cardinali de Alliaco desumitur. Docuit, ut visum est (§. 151.) Vir Eminentissimus, *non esse evidens, nec in Scriptura expressum, nec ab Ecclesia determinatum, quod accidentia panis sint aliud ab ejus substantia; & ideo si quis oppositum dixerit, non esse propter hoc tamquam hæreticum habendum.* Is autem non solum Constantiensi Concilio interfuit, verum etiam totum ipse negotium direxit damnationis Viclefianæ. Hæc enim leguntur in quodam ipsius Concilii decreto: *Item quod prædicti Commissarii recipiant relationem D.D. Cardinalium Cameracensis (scilicet de Alliaco) tit. S. Marci, & Florentinensis de processu factò super condemnatione librorum, & articulorum tam 45. in Parisiensi, & Pragensi, quam 265. in Oxoniensi studiis facta, nec non super condemnatione memoria Joannis Viclef, ac confirmanda sententia lata in Concilio Romano super condemnatione, & combustione librorum prædicti Joannis Viclef, & relationem super præmissis faciant nationibus, & huic sacro Concilio (a). Credibile non est autem, tantum Verum exhibuisse Concilii Patribus, ut tamquam hæreticum censorio stigmate ab illis configeretur, id, cujus oppositum ipse alias aperte dixerat *non esse evidens, nec in Scriptura expressum, nec ab Ecclesia determinatum, sed tantum unum probabile;* addito insuper, habendum non esse *tamquam hæreticum*, qui illud doceret. Ergo in proscribenda secunda Viclefi propositione non fuit Constantiensis Concilii mens, aliquid determinare circa naturam *qualitatum sensibilium*; sed tantum catholicum dogma *transsubstantiationis* stabilire.*

Fateor equidem, Cardinalem de Alliaco longe ante Concilium Constantiense scripsisse, *non esse determinatum ab Ecclesia, quod accidentia panis sint aliud ab ejus substantia.* Damnatus quippe fuit Viclefus a Patribus Constantiensibus anno 1415., ut ex illius Concilii actis manifestum est. Alliacus vero, referente Launojo (b), anno 1375. capit Magistri Sententias legere, & subtilius, & plenis commentariis illustrare; adeoque longe antequam Viclefi doctrina in Constantiensi Concilio proscriberetur. Sed adhuc optime stat conjectura, qua testimonio Alliaci demonstravimus, illud Concilium non damnasse in Viclefo, quod de *sensibilium qualitatum* natura Recentiores propugnant.

Comperta enim res est, impiam Viclefi doctrinam etiam longe ante Concilium Constantiense fuisse ab Ecclesia proscriptam. In examen quippe vocata fuit Londini in Anglia anno 1376. a Simone Subdu-

(a) Tom. XVI. Conciliorum laudatæ edit. colum. 95.

(b) P. III. Hist. Gymnasii Parisiensis lib. I. cap. 4.

durienti Cantuariæ Archiepiscopo, & paulo post Romæ a Gregorio XI. stigmate censorio confixa; literis quoque datis ad Richardum Regem, ad Cantuariensem, & Londinensem Episcopos, ad Oxoniensem Academiam, quibus, ut scribit Cl. P. Natalis ab Alexandro, eos excitavit, ut omni, quo possent studio, ac diligentia nascentem hæresim opprimerent (a). Constat quoque, referente eodem Viro doctissimo (b), Guillelmum Courtenejum, qui Simoni Subduriensi in Archiepiscopatu Cantuariensi successit, Synodum Londini in conventu F. F. Predicatorum ad Viclefi confingendam atque profligandam hæresim celebrasse anno 1382. Ergo ignorare non poterat Alliacus, quid de Viclefi doctrina sentiret Ecclesia, quidque de illa, licet non adhuc in Generali Concilio solemniter condemnata, a Viro catholico doceri deberet. Propterea, si ille scripsit, non esse ab Ecclesia determinatum, quod *accidentia panis sint aliud ab ejus substantia*, neque *hereticum* censei posse, qui diceret *oppositum*; dicendum est, neque in Concilio Constantiensi damnatam fuisse secundam Viclefi propositionem, quatenus negat existentiam *accidentium*, sed quatenus ponit, panis substantiam remanere; & ideo quatenus, ut diximus, *transsubstantiationis* dogmati adversatur.

Accedit etiam, tantum Virum post celebratum Concilium nullibi revocasse, (id enim nullibi factum legitur) quod de identitate *accidentium cum substantia* antea docuerat. Id quod profecto fecisset Vir ille eximius, utpote piissimus (c), si quid vel minimum declarasset Concilium, quod cum doctrina ab se antea tradita componi nequireret. Non inficior, pro Scholastica opinione stetisse Alliacum. Sed nihil exinde sequitur, quod Recentioribus jure creare aliquam molestiam possit. Non enim dicunt, Cardinalem Alliacum favere eorum doctrinæ; sed in eo toti sunt, ut evincant luculentissimo tanti Viri testimonio, Concilium Constantiense opinionem negantem *accidentia absoluta* in Viclefo non damnasse.

Falso tamen, ait Cl. P. Ferrari, Purchotium *imponere Lectoribus suis* (d), dum ait, secundam Viclefi propositionem damnatam fuisse in Concilio Constantiensi *non absolute, ita ut opinionem, qua dicuntur omnia prorsus accidentia physica, seu qualitates sensibiles esse entitates accidentales a subiecto separabiles, ad fidem pertinere voluerit; sed facta relatione ad mentem Viclefi, qui docebat, ea accidentia vere esse*

N n 2

esse

(a) Tom. VII. *Hist. Eccl.* in synopsi Historiæ seculi XIII. cap. 3. artic. 22. §. 6. num. 1.

(c) Vide Launojum loco citato.

(b) Ibidem n. 2.

(d) Tom. II. P. I. *Physicæ* Disp. IV. q. 1. pag. 199.

esse in subjecto proprio, seu pane, nec panem in Christi Corpus fuisse conversum; atque hanc responsionem sibi suppeditasse Petrum de Alliaco Nec quemquam eo melius nosse posse, quæ fuerit mens Concilii Constantiensis, cum ipse ei interfuerit (a). Falso, inquam, ait P. Ferrari, Purchotium Lectoribus suis hoc loco imponere. Non enim dixit Purchotius, ita respondere Alliacum, quemadmodum ita loqui debuisset, ut impostoris nota jure illi appingi posset; sed tantum ait, illam responsionem sibi Alliacum suppeditasse, hoc est, viam sibi aperuisse, ut ita responderet. Non nego tamen, in hunc errorem lapsum fuisse Auctorem operis de re sacramentaria, utpote qui ad hoc idem argumentum respondens, scripsit, *Alliacum affirmare, hoc decreto Patres (Constantienses) nihil aliud, nisi Viclefi errorem, proscribere voluisse* (b). Absit tamen, ut huic Viro eximio aliquid vel minimum propterea detractum velim. Absit, ut contra illum ea S. Joannis Chrysostomi ipse verba usurpem, quæ contra Purchotium ob eandem causam, licet injuste, ut vidimus, adhibet P. Ferrari (c). Alta quippe mente mihi repositum est, præclarum illud Quintiliani, alibi etiam memoratum, *modeste scilicet, & circumspecto judicio de magnis Viris pronunciandum esse, ne, ut plerisque accidit, damnemus, quæ non intelligimus* (d).

Negat porro laudatus P. Ferrari, Cardinalem Alliacum retractare debuisse, quod in Commentariis asseruit; cujus ipsi ratio est, quia non omnes Viclefi propositiones, tamquam hæreticæ, proscriptæ fuerant (e). Sed contra ita arguitur: docet ipse, Patres Constantienses secundam Viclefi propositionem damnasse eo sensu, quo ab Concilii Theologis fuit intellecta (f). Illi autem Theologi, ipso quoque docente, dixerunt, secundam Viclefi propositionem esse falsam, erroneam, & sapientem hæresim universaliter intellectam (g). Ergo vel hæc censura non afficit illam propositionem, quatenus negat realem distinctionem accidentium a substantia; vel si illam afficit, quatenus illam distinctionem inficiatur, dare necessario debet Vir Cl., aut Cardinalem Alliacum retractare debuisse, quod in Commentariis asseruit, videlicet esse tantum probabile, quod accidentia panis sint aliud ab ejus substantia, neque habendum esse tamquam hæreticum, qui diceret oppositum hujus; cum Concilii Patres id expresse damnaverint tamquam falsum, erroneum, & sapiens hæresim; aut concedat Cl. Auctor necesse est, licere

no.

(a) P. I. Physicæ Sect. V. cap. 1.

(b) Tom. I. lib. IV. q. 6. sect. 1. cap. 4. §. 2. in respons. ad instantiam 7.

(c) Loco citato.

(d) Lib. X. Instit. Oratoriarum cap. 1.

(e) Tom. II. P. I. Physicæ Disp. IV. q. 1. pag. 202.

(f) Ibidem pag. 198.

(g) Loco citato.

nobis, quemadmodum juxta ejus doctrinam licuit Cardinali Allia-
co, minime revocare, quæ, sacro determinante Concilio, falsa, er-
roneaque sunt, & hæresim sapiunt. Hoc autem alterum ille certe
non dabit. Ergo fateatur oportet, se errasse, vel cum dixit, Allia-
cum revocare non debuisse, quod de identitate *accidentium* cum *sub-*
stantia in Commentariis scripserat; vel cum docuit, secundam Vicle-
fi propositionem damnatam non fuisse a Patribus Constantiensibus,
quatenus *substantiam panis permanere connotat* (a); sed quatenus neg-
gat, panis *accidentia*, consecratione peracta, remanere.

Verum contra solutionem argumenti principalis ita instat primo
laudatus Auctor: *Concilium Constantiense inter alias Viclefi propositio-*
nes damnavit tres sequentes. I. Substantia panis materialis, & simili-
ter substantia vini materialis manet in Sacramento altaris. II. Acci-
dentia panis non manent sine subiecto in eodem Sacramento. III.
Christus non est in eodem Sacramento identice, & realiter in pro-
pria præsentia corporali. *Prima propositio refert errorem Viclefi com-*
muniem aliis etiam hæreticis, qui iccirco impanatores appellati fuerunt.
Tertia alterum Viclefi errorem continet, quem alii etiam hæretici te-
nent, dicti subinde Sacramentarii. *Secunda autem potissimum significat*
Viclefi opinionem. Porro cum tres in Concilio expressæ fuerint proposi-
tiones, totidemque iis adhibitæ damnationes, ut primæ, ac tertiæ pro-
positionis damnatio impanatores impetit, & sacramentarios; sic pro-
scriptio secundæ speciatim impetit Viclefum ipsum, qui sæpe blateraverat
adversus catholicos Doctores, asseverantes permanere in Sacramento alta-
ris realia, & absoluta accidentia sine subiecto. Jam vero si secunda Vi-
clefi propositio eo tantum sensu proscripta fuit, quo coincidit cum prima,
omnino supervacanea fuisset distincta illa propositionum expressio, ac tri-
plex damnatio. Immo Patres consulto abstinere debuissent ab expressa
damnatione secundæ illius propositionis, ne proscriptio istius secundæ pro-
positionis, quæ in suis terminis, ac sensu diversa apparet a prima, occa-
sionem erroris cuiquam aliquando præberet. At Patres Concilii Constan-
tensis id non præstitere. Non ergo reprobarunt secundam Viclefi proposi-
tionem eatenus tantum, quia substantiam permanere connotat, quo sensu
coincidit cum prima propositione. Rursus catholici Theologi ostendunt Lu-
theranis, substantiam panis non permanere in Sacramento altaris una cum
Christi corpore, quoniam Concilium Constantiense damnavit primam ex-
positam Viclefi propositionem. At si licet recentioribus Philosophis confun-
dere damnationem secundæ propositionis cum damnatione primæ, inde
etiam Lutherani affirmare possent, damnatam fuisse primam propositio-
nem,

(a) Loco citato.

nem, quatenus coincidit cum tertia, quoniam Viclefus sic substantiam panis permanere dicebat, ut realem corporis Christi præsentiam excluderet. Non ergo tres illæ damnationes sunt confundendæ; sed ut omnino distinctæ sunt, ita singulis proprium correspondet objectum. Atque adeo secunda illa Viclefi propositio non eatenus proscripta fuit, quia substantiam panis permanere connotat, ut recentiores Philosophi commentantur (a).

Sed contra est. Primo etenim animadvertat velim Cl. Adversarius, Viclefi errorem in prima illius propositione proscriptum, communem esse non impanatoribus (*) tantum, sed etiam consubstantiatoribus (**), imo & sacramentariis (***). Hi siquidem omnes falso credunt, perperamque contendunt, nihil prorsus panis, vi consecrationis, in hoc sacramento deficere. Velim secundo consideret, impanatores non ideo sic fuisse appellatos, quia senserint cum Viclefo, panis substantiam in Eucharistia remanere (ita siquidem sentiunt etiam consubstantiatores, & sacramentarii), sed quia Christum inter, & substantiam panis realem unionem haberi arbitrabantur. Tertio: falsum est, secundam propositionem potissimum significare Viclefi opinionem, quasi nempe fuerit peculiaris illius error, negare, accidentia panis sine subiecto in hoc sacramento existere. Ita namque necessario sentire ii omnes debent, qui ajunt, panis substantiam in Eucharistia remanere, nempe tam impanatores, quam consubstantiatores, & sacramentarii. Si enim in Eucharistia manet substantia panis, vel negandum profecto ab illis est, substantiam esse subiectum accidentium, vel necessario dicant oportet cum Viclefo, accidentia panis sine subiecto in hoc sacramento non manere. Hinc quarto fallitur Vir Cl., dum ait, quoniam tres in Concilio expressæ fuerint propositiones, totidemque iis adhibitæ damnationes, ut primæ, ac tertiæ propositionis damnatio impanatores impetit, & sacramentarios, sic proscriptionem secundæ speciatim impetere Viclefum ipsum, qui sæpe blateraverat adversus catholicos Doctores asseverantes, permanere in sacramento altaris realia, & absoluta accidentia sine subiecto. Fallitur, inquam, Vir Cl.; quia, ut modo vidimus, non solum primæ, & tertiæ, verum etiam secundæ propositionis proscriptio æque prorsus impetit impanatores, sacramentarios, &

(a) Tom. II. P. I. Physicæ Disp. IV. q. I. pag. 196.

(*) Impanatores dicuntur, qui putant, Christum Dominum ita esse in Sacramento altaris, ut per consecrationem, veluti per novam quamdam incarnationem, panis ab ipso Christo assumatur, & cum illo istime conjungatur.

(**) Consubstantiatores ii omnes hæretici vocantur, qui ajunt, una simul cum Christi corpore substantiam panis in Eucharistia existere, quin aliqua tamen unio realis inter ipsas substantias habeatur.

(***) Sacramentarii dicuntur ii omnes solent, qui realem Christi Domini præsentiam in Eucharistia inficiantur.

consubstantiatores, ac ipsum Viclefum. Quinto: falsum est, si secunda Viclefi propositio eo tantum sensu proscrip̃ta fuerit, quo coincidit cum prima, omnino supervacaneam fuisse distinctam illam propositionum expressionem, ac triplicem damnationem. Quamvis enim secunda Viclefi propositio damnata non fuerit, nisi quatenus transubstantiationis dogmati & ipsa adversa est; superflua non propterea dici debet illius distinctio a prima, ejusque distincta condemnatio. Differt siquidem secunda illa propositio a prima, perinde ac conclusio ab altera præmissarum, ex quibus derivatur, nec non veluti corollarium a propositione, cui subiicitur. Ut enim dixerat Cardinalis de Alliaco, quod accidentia panis maneat ibi (in Eucharistia) hoc infertur ex hoc, quod præsupponitur, quod substantia panis transubstantiatur, & accidentia panis sunt aliud ab ejus substantia. Sane nonne & ipsi Scholastici distinctis propositionibus dicunt, non esse in Eucharistia substantiam panis, & accidentia panis in illa manere sine subjecto? Sed demus, supervacaneam fuisse distinctam illam propositionum expressionem. Id certe non Concilii Patribus, sed Viclefo vertendum vitio est; cum illas ipse distincte docuerit. Interrogatus quippe Hieronymus de Praga, jussu Sacri Concilii, an inter ceteros errores in libris Viclefi contentos etiam infra scripti haberentur. I. quod substantia panis materialis, & similiter substantia vini maneret in sacramento altaris post consecrationem. II. Item accidentia panis non manent sine subjecto altaris. III. Item Christus non est in eodem sacramento identice, & realiter in propria præsentia corporali: fateor, respondet Pragensis, duas primas propositiones in suis libris legisse, de tertia non recordor (a). Sicuti ergo tres illæ propositiones distinctæ fuerunt a Viclefo, ita necesse fuit, ut distincte a Concilio proscriberentur, quamvis secunda errorem non contineat diversum ab errore primæ, sive tametsi utraque transubstantiationi adversetur. Sexto: me valde movent verba, quæ sequuntur, videlicet: Patres consulto abstinere debuissent ab expressa damnatione secundæ illius propositionis, ne proscriptio istius secundæ propositionis, quæ in suis terminis, ac sensu diversa apparet a prima, occasionem erroris cuiquam aliquando præberet. Me, inquam, valde movent hæc verba; quia non alius error mihi occurrit, cui illa secunda Viclefi propositio, si ob id fuerit proscrip̃ta, quod transubstantiationi, quemadmodum prima adversetur, præbere occasionem possit, nisi is ipse, in quem, causa illius censuræ, Cl. Adversarius lapsus modo est, dicendi nempe, definitum hinc fuisse in Concilio Constantiensi, dari

(a) Tom. XVI. Collectionis Conciliorum
Labbenæ Column. 351.

dari *accidentia absoluta*, quæ sine subiecto existere divinitus possint, & reapse in Eucharistia sine subiecto existant. Tamdiu certe ita sentiam de errore, quem P. Ferrari ex illa positione futurum timet, donec alium, quem non video, ipse in aprico posuerit. Interim vero dicam, bona illius venia, Constantienses Patres eatenus reprobasse secundam Viclefi propositionem, quatenus, ut dixerant censores Theologi, *transubstantiationi, de qua loquitur Ecclesia in verbis suæ fidei, & determinationis in hac materia*, illa quoque adversatur (a). Septimo: concedam Viro Cl., catholicos Theologos ostendere Lutheranis, *substantiam panis non permanere in Sacramento altaris una cum Christi Corpore, quoniam Concilium Constantiense damnavit primam expositam Viclefi propositionem*. Verum ipse quoque mihi dabit, ut spero, etiam ex secundæ damnatione illud dogma ab iisdem demonstrari. Auctor certe eximii Operis *de re Sacramentaria*, ostendens ex Concilio Constantiensi (b) dogma *transubstantiationis*, memorat secundum Viclefi articulum, qui censorio stigmate confixus in eo fuerat, atque ex illo uno, primo scilicet ne quidem nominato, dogma illud demonstrat. Necesse est præterea, manifestum efficiat P. Ferrari, Theologos catholicos ita ostendere dogma *transubstantiationis* ex hoc, quod Concilium Constantiense damnavit primam expositam Viclefi propositionem, ut simul iidem ipsi aperte dixerint, censuram in eodem Concilio factam secundæ Viclefianæ propositionis, ad illud dogma demonstrandum eatenus usui esse non posse, quatenus non ideo proscripta illa fuerit, quia *substantiam panis permanere connotat, ut*, quemadmodum ipse ait, *recentiores Philosophi commentantur*. Neque enim, ut credamus, censuram secundæ illius propositionis huic muneri, Theologorum iudicio, minime esse aptam, sufficere arbitror, P. Ferrari ita sentire. Ceterum quanti faciant sectarii auctoritatem Conciliorum Constantiensis, & Tridentini in iis præsertim, quæ spectant ad dogma *transubstantiationis*, & *præsentiae realis* Christi Domini in Eucharistia, norunt Theologi. Id ergo consideret Vir Cl., tum iudicet, quanti a Lutheranis fieret argumentum, quo Theologus catholicus illis suadere niteretur, *substantiam panis non permanere in Sacramento altaris una cum Christi Corpore, quoniam Concilium Constantiense damnavit primam expositam Viclefi propositionem*. Demum non video (nec me pudet, id candide fateri), quorsum respiciant illa verba: *si licet recentioribus Philosophis confundere damnationem secundæ propositionis cum damnatione primæ, inde etiam Lutherani affir-*
ma-

(a) Tom. XVI. Conciliorum laudatę edit. (b) Tom. I. lib. IV. q. 6. sect. 2. §. 1. colum. 875.

mare possent, damnatam fuisse primam propositionem, quatenus coincidit cum tertia, quoniam Wiclefus sic substantiam panis permanere dicebat, ut realem Corporis Christi præsentiam excluderet. Demus enim, affirmari a Lutheranis, damnatam fuisse in Concilio Constantiensi primam Viclefi propositionem: *substantia panis materialis, & similiter substantia vini materialis manet in Sacramento altaris*, quatenus coincidit cum tertia, cum ea scilicet, in qua ille dicebat, *Christum non esse in eodem Sacramento identice, & realiter, in propria præsentia corporali*. Fortene hinc inferre illi possunt, aut Christum Dominum non esse *vere, realiter, & substantialiter* in Eucharistia, aut una simul cum panis, vinique substantia ipsum in ea existere? ἡμῖς πάντων. Ego sane neque hoc, neque aliud periculum in sancta Religione hinc videre valeo sequuturum. Perinde siquidem nobis esse arbitror, siue affirmant, siue negent Lutherani, ceterique sectarii, primam Viclefi propositionem damnatam fuisse in Concilio Constantiensi, quatenus coincidit cum propositione ejusdem tertia, dummodo ratum nobis fixumque sit, utramque in illo fuisse proscriptam. Non inficior, dixisse Viclefum, *substantiam panis permanere in Eucharistia, ut realem Corporis Christi præsentiam excluderet*. Credebat enim homo impius, se eversum catholicum dogma præsentiae realis, si evinceret, panis substantiam in Eucharistia remanere. Unde mirum videri non debet, si tum in desitionem substantiae panis, tum in remanentiam *accidentium* sine subjecto tot, tamque horrendas blasphemias ille effuderit. Sed videre nequeo, quid inde sequatur, de quo gloriari sectarii, & vicissim catholici timere jure ac merito possunt.

Arbitror *secundo*, Lutheranos nunquam dicturos, primam Viclefi propositionem coincidere cum tertia, eamque ideo in Concilio Constantiensi fuisse proscriptam, quatenus cum hac coincidit. Lippis enim atque tonsoribus notum est, substantiam panis una simul cum Christi Corpore in Eucharistia a Lutheranis componi; ac propterea illos negare, ideo panis substantiam in hoc Sacramento deficere, quia Christi Corpus *vere, realiter, ac substantialiter* in illo habeatur.

Certum *postremo* mihi est, tria hæc, videlicet I. *desitionem substantiae panis in Eucharistia*. II. *manentiam specierum, siue accidentium in eadem sine subjecto*. III. *realem Christi Domini præsentiam in ipso Sacramento*, adeo connexa esse inter se, sibique mutuo adeo manus dare, ut, quovis illorum posito, reliqua duo necessario sequantur. Hæ siquidem omnes illationes legitimæ sunt atque verissi-

mæ I. in Eucharistia non habetur substantia panis; ergo in ea existit Corpus Christi, & panis species ibi sunt sine subjecto. II. species panis sunt in Eucharistia sine subjecto; ergo in illa non habetur substantia panis, sed Corpus Christi. III. Christus vere, realiter, & substantialiter existit in Eucharistia; ergo in ea non habetur substantia panis; quæque ibi apparent panis accidentia, sunt sine subjecto. Sicuti ergo horum uno determinato, reliqua duo sequuntur; ita pari ratione, una trium propositionum Viclefi proscripta, sequitur, & binas reliquas, tamquam falsas, a nobis reiici oportere; atque hinc dici posse, imo dicendum fore, primam Viclefi propositionem damnatam fuisse, quatenus coincidit cum tertia, hoc est, quatenus illa vera esse nequit, nisi sit falsum, Christum Dominum vere, realiter, & substantialiter in Eucharistia existere; sicuti non potest esse verum, Christum Dominum existere in Eucharistia vere, realiter, & substantialiter, nisi falsum sit, panis, vinique substantiam in Eucharistia remanere. Audiendus itaque non est P. Ferrari, dum ait, secundam Viclefi propositionem non eatenus proscriptam fuisse, quia substantiam panis permanere connotat; neque aliquid negotii facessere nobis debet, si, confundentibus recentioribus Philosophis damnationem secundæ propositionis ejusdem Viclefi cum damnatione primæ, inde etiam Lutherani affirmant, ut ille ait, damnatam fuisse primam propositionem, quatenus coincidit cum tertia.

Instat secundo idem Vir Cl.: Tomo XVI., inquit ille, Conciliorum Labbei, ubi Constantiense Concilium exhibetur, eaque recensentur, quæ ad idem Concilium pertinent, pag. 846. refertur quadam Theologorum Constantiensium brevis censura 45. articulorum Viclefi anno 1415. in Concilio prodita. Constituta autem prima Viclefi propositione: substantia panis materialis, & similiter substantia vini manent in Sacramento altaris: hæc propositio declaratur falsa, erronea, & hæretica. Tum secunda exaratur Viclefi assertio: accidentia panis non manent sine subjecto in Sacramento altaris. Ac postea illius propositionis character sic constituitur: hoc est falsum, erroneum, & sapiens hæresim universaliter intellectam; quia si talis quantitas, quæ fuit quantitas panis, non manet sine subjecto in Sacramento altaris, erit tunc vel in Corpore Christi, vel in pane, vel in utroque, vel in aere circumstanti. Non primum; quia Corpus Christi non est quantum tali quantitate; esset enim tunc monstruosum; tum quia talem formam habet, qualis in judicio apparebit. Non secundum; quia tunc panis iste non esset conversus in Christi corpus..... quod est hæreticum. Nec tertium; nulla enim substantia remanet in Sacramento, nisi

Cor.

Corpus Christi.....Nec quartum; quia aer circumstans est locus illius quanti, vel ultima superficies ejus. Patet etiam hæresis istius conclusionis; quia qui aliter sentit de Sacramentis Ecclesiæ, quam Romana Ecclesia, hæreticus est. Romana autem Ecclesia sentit, *accidentia esse sine subjecto in Sacramento altaris*, De celeb. Missarum, Decretalium lib. III. tit. 41. cap. 6. *cum Martha*; De hæreticis, Decretalium lib. V. tit. 6. cap. 9. *Ad abolendam*, ideo &c. *Demum tertia ponitur Viclefi propositio*: Christus non est in eodem Sacramento identice, & realiter in propria præsentia corporali. *Eaque declaratur falsa, erronea, & hæretica. Eodem pariter Tomo* (prosequitur ille) *pag. 871. diffusam quadam refertur condemnatio articulorum Viclefi exarata a Theologis Concilii, quæ in examine illius secundæ propositionis sic habet*: nequaquam illæ substantiæ panis, & vini remanent in sacramento altaris, sed *species panis, & vini sine subjectis*, sub quibus, sicut speciebus peregrinis, Corpus, & Sanguis Christi veraciter continetur. *Et infra*: si in Sacramento altaris non manet ipsa substantia panis, & tamen *ibi remanet tota species per se sensibilis* ipsius panis, quæ non potest esse in aliquo alio subjecto, quam in pane, sequitur, quod talis *species panis stetit ibi sine subjecto*, & quod substantia panis..... conversa est totaliter in verum corpus Christi, & in sacramentalem cibum, & mysticum, sacramentaliter sub specie panis contentum, sicuti credit fides Ecclesiæ prædicta, & habetur intentum, quod ibi fiat *transubstantiatio* sæpe dicta (a).

Ex hisce ergo ita argumentatur Vir Cl.: *Patres Constantienses secundam Viclefi propositionem damnarunt eo sensu, quo ab Concilii Theologis fuit intellecta. Neque enim aliud illius propositionis judicium in Concilio proditum fuit. Porro Theologi illi errorem secundæ propositionis arbitrati sunt longe diversum ab errore primæ. Etenim primam propositionem absolute hæreticam pronuntiarunt: secundam vero dixere sapientem hæresim universaliter intellectam; quod nempe illativè tantum in sensu Viclefi foret hæretica. Deinde Theologi illi absolute docuerunt, accidentia, & species panis esse sine ullo subjecto; & hoc eodem sensu intellexere decreta Romanæ Ecclesiæ, ubi etiam aperte loquuntur de subjecto receptionis, dum affirmant, species panis non posse esse in alio subjecto, nec in Christi Corpore, nec in aere: quo loquendi modo significabatur recipi in alio, & ab illo dependere. Ergo Patres Constantienses spectavere secundam illam Viclefi propositionem veluti ab errore primæ propositionis distinctam, & diversam; ac per damnationem illius secundæ propositionis declararunt, accidentia realia manere in Sacramento altaris*

O O 2

sine

(a) Loco citato.

sine subiecto receptionis, ut putant Peripatetici. Non ergo subsistit allata Recentiorum responsio (a).

R. permissa majori, negando minorem, videlicet Theologos Constantienses arbitratos fuisse, errorem secundæ propositionis Viclefi longe diversum esse ab errore primæ. Falsitas huiusce assertionis ex illo ipso iudicio manifesta est, quod de tribus memoratis Viclefi propositionibus fecerunt Censores Theologi, & Concilii Patribus exhibuere. En illius verba: *relinquitur ex prædictis fides summe rationabilis in hac materia, quod sub speciebus panis, & vini sanguis, & corpus Christi veraciter continetur, transubstantiatis pane in Corpus, & vino in Sanguinem, transubstantiatione sæpe dicta. Hac prædicta tanta, quæ pro præsentī negotio videntur superflua, ideo dixerim, ut occasione talium ostendatur primo incredulis apostatis, quam rationabilis, & recta est prædicta fides, & determinatio Ecclesiæ circa sacramentum altaris Item ut ostendatur tertio, quod illi primi tres articuli (Viclefi) de quadraginta quinque sunt hæretici. Primus: substantia panis materialis, & similiter substantia vini manent in Sacramento altaris. Secundus: accidentia panis non manent sine subiecto in eodem Sacramento. Tertius: Christus non est in eodem Sacramento identice & realiter in propria præsentia corporali. Nam supponendo ex quid nominis, & significatione vocabuli, quod substantia panis materialis dicitur, quæ ipse panis substantialiter est panis materialis, tunc directe est contra prædictam transubstantiationem per Ecclesiam determinatam, quod substantia panis materialis remaneat in Sacramento altaris. Tunc enim non transubstantiaretur panis in Corpus Christi prædicta transubstantiatione; & similiter de vino est dicendum. SECUNDUS ARTICULUS EST DIRECTE CONTRA TRANSUBSTANTIATIONEM prædictam, in principio expositam, de qua, ut dictum est, loquitur Ecclesiæ in verbis suæ fidei, & determinationis in hac materia. Tertius etiam articulus est contra eandem determinationem &c. (b). Nihil ergo magis falsum est, quam Constantienses Theologos fuisse arbitratos, ut ait P. Ferrari, errorem secundæ propositionis (Viclefi) longe diversum esse ab errore primæ; cum illi, ut est modo visum, aperte docuerint, secundum articulum Viclefi, æque prorsus ac primum, esse directe contra transubstantiationem.*

Neque conjecturæ, quibus Vir Cl. assertionem illam suam suadere conatur, intentum probant. Non certe prima. In eo enim hæc consistit, quia illi Theologi primam (Viclefi) propositionem absolute hæreticam pronunciarunt; secundam vero dixere sapientem hæresim

uni-

(a) Tom. II. P. I. Physicæ Disp. IV. q. 1.
pag. 197.

(b) Tom. XVI. Conciliorum laudatæ edit.
column. 873. 874. 875.

universaliter intellectam. Hæc autem corrui tota, si dicamus, ideo primam propositionem Viclefi dictam fuisse absolute *hereticam*, secundam vero tantum *sapientem heresim*, non quia utraque minime adversetur *transubstantiationi*; sed quia huic dogmati non adversantur ambæ eodem modo. Prima siquidem *immediate*, secunda vero *mediate* tantum, siue *illative* illi contraria est. Nulla est enim *transubstantiatio*, si *accidentia* panis, & vini sine subiecto in Eucharistia non existant. Nam, cum subiectum *accidentium* panis sit illius substantia, manere illud non potest in Eucharistia, quin panis substantia in ipso Sacramento remaneat; ac propterea quin nulla prorsus sit *transubstantiatio*.

Hanc porro fuisse illorum Theologorum mentem, facili negotio ostenditur. Quamvis enim in ea censura articulorum Viclefi, quæ, excerpta ex MSS. Lipsiensi, *brevis* inscribitur (a), secunda Viclefi propositio non absolute *heretica*, ut prima, sed *sapiens heresim* dicatur; verumtamen in censura eorundem articulorum, quæ, ex MSS. Cæsareo Vindobonensi desumpta, *diffusa* dicitur (b), eadem secunda Viclefi propositio, æque prorsus ac prima, & tertia, absolute *heretica* pronunciatur. Dicitur enim: *primi tres articuli (Viclefi) de quadraginta quinque sunt heretici*. Igitur, nisi velit P. Ferrari, hosce Theologos inter se neutiquam consentire, dicat oportet, eos modo absolute *hereticam*, modo tantum *sapientem heresim* eandem propositionem pronunciasse, non quia judicaverint, eam modo uni, modo alteri errori favere; sed quia illam spectarunt aliquando, prout absolute catholico *transubstantiationis* dogmati contraria est; quandoque vero, prout illi *illative* tantum adversatur.

Sic præterea urgeri potest argumentum: ex hoc, quod secunda Viclefi propositio dicta fuerit in una illius censura non absolute *heretica*, quemadmodum prima, sed *sapiens heresim*, infert P. Ferrari, Theologos Constantienses fuisse arbitratos, errorem secundæ propositionis *longe diversum* esse ab errore primæ. Ergo pari ratione ex hoc, quod eadem propositio in alia ejusdem censura absolute *heretica*, æque prorsus ac prima, dicta ab iisdem fuerit, inferre possunt Recentiores, Theologos ipsos judicasse, errorem secundæ propositionis minime diversum esse ab errore primæ.

Demum P. Ferrari, & quidem longe verius, quam ipse dixerat de Purchotio, imponit Lectoribus suis, dum absolute, quasi nempe omnes ita senserint, scribit, Constantienses Theologos primam Vi-

clefi

(a) Tom. XVI. *Conciliorum* edit. laudatæ colum. 846.

(b) Vide *ibidem* colum. 870.

clesi propositionem absolute *hereticam*, secundam vero nonnisi *sapientem heresim* pronunciasse. Hoc enim de hac propositione non fuit iudicium illorum Theologorum, qui diffusam Viclefianarum propositionum censuram Patribus Concilii exhibuerunt.

Puto autem, Virum Cl. minime dicturum, diffusam illam censuram vel sibi non innotuisse, vel ab se, tamquam genuinam, nequaquam admitti. Primum quippe nimis illi indignum est, cum utraque censura in eodem Conciliorum Tomo habeatur; eamque ipse etiam non commemoret tantum, verum etiam contra Recentiores aperte adhibeat (a). Alterum vero si dicat, ab eo quæram *primo*, cur plura verba illius censuræ ipsemet etiam, ut monui, contra Recentiores suo in argumento retulerit? *Secundo*: quid respondendum putaret Recentioribus, si, quemadmodum ipse *diffusam*, ita illi *brevem*, quam ipse approbat, & cui maxime innititur, audiendam non esse contenderent? Aut enim utrique, nisi vehementer fallar, habenda ex æquo fides est; aut, nisi P. Ferrari discriminis causam dederit, illa utrique est deneganda. Et hæc quidem de prima conjectura, qua ille ab se ostensum putat, Constantienses Theologos iudicasse, errorem secundæ propositionis Viclefi *longe diversum* esse ab errore primæ.

Veniendum modo ad secundam, videlicet, *Theologos illos absolute docuisse accidentia, & species panis esse sine ullo subiecto; & hoc eodem sensu intellexisse decreta Romana Ecclesiæ; eosque aperte loqui de subiecto receptionis, dum affirmant, species panis non posse esse in alio subiecto, nec in Christi Corpore, nec in aere*. Hæc ille. Verum, ut prima, ita hæc altera conjectura omnino vacillat. Concedo enim, Constantienses Theologos docuisse, *accidentia, & species panis esse* (in Eucharistia) *sine subiecto*. Concedo, *hoc eodem sensu intellexisse decreta Romana Ecclesiæ*. Verum me fugit, quomodo ex his sequatur, existentiam *accidentium absolutorum* habitam ab illis fuisse, tamquam perpetuam Ecclesiæ doctrinam; multoque minus, ipsos iudicasse, huic doctrinæ adversari secundam Viclefi propositionem; & ideo illam proposuisse Patribus Concilii, ut atro carbone ab ipsis notaretur. Mea etenim sententia, unum tantum sequitur, illudque do libentissime, nempe non manere in Eucharistia subiectum *accidentium*, sive substantiam panis; hancque fuisse perpetuam atque constantem catholicæ Ecclesiæ doctrinam.

Ad illud autem, quod addit de *subiecto receptionis*, de quo loquuntur Theologi, *dum affirmant, species panis non posse esse in alio subie-*

(a) Loco citato pag. 198.

subiecto, nec in Christi corpore, nec in aere: dico, hoc utique esse verum; sed hinc dicendum fore, ita eos loquutos fuisse, non ut probarent, absoluta Scholæ suæ accidentia existere, sed ut ostenderent, nullum in Eucharistia esse subjectum, cui superstites panis species reapse adherescant. Inquiunt enim: si talis quantitas, quæ fuit quantitas panis, non manet sine subiecto in Sacramento altaris, erit tunc vel in Corpore Christi, vel in pane, vel in utroque, vel in aere circumstante (a). Quis autem non videt, hoc argumentum eo vitio laborare, quod vocant petitionis principii, si ad probandam non deficientiam subiecti, sed realem distinctionem quantitatis a substantia, Constantienses Theologi illud adhibuissent? Corruit quippe totum, si dicatur, nihil reale panis, consecratione peracta, remanere. Nullæ itaque sunt conjecturæ, quibus P. Ferrari ab se demonstratum putat, persuasum fuisse Theologis Constantiensibus, errorem secundæ propositionis Viclefi longe diversum esse ab errore primæ; atque hinc secundam illam propositionem non eatenus fuisse proscriptam, quia substantiam panis permanere connotat, ut contendunt Recentiores; sed quia absolutorum accidentium existentiam negat, ut ipse cum Scholasticis arbitratur.

Antequam tamen manum de tabula moveam, lubet ex iis ipsis Constantiensium Theologorum censuris, in quibus Cl. Adversarius tantam spem collocat, unum, qualecunque demum sit, argumentum conficere. Concedo itaque Viro Cl., Patres Constantienses secundam Viclefi propositionem damnasse eo sensu, quo ab Concilii Theologis fuit intellecta. Concedo, illos Theologos errorem secundæ propositionis arbitratos fuisse longe diversum ab errore primæ; ac proinde Concilii Patres per damnationem illius secundæ propositionis declarasse, accidentia realia manere in Sacramento sine subiecto receptionis, ut putant Peripatetici. Hæc, inquam, omnia permitto, ut verissima. Fore tamen spero, P. Ferrari mihi quoque concedat, memoratam secundam Viclefi propositionem proscriptam fuisse a Patribus Concilii sub ea nota, quam censores Theologi illi inusserunt; & ideo, cum Theologi eam dixerint hæreticam, dabit Vir Cl., illam, tamquam hæreticam, in Concilio Constantiensi fuisse proscriptam; cumque, ipso contendente, proscripta non fuerit, quatenus substantiam panis permanere connotat, sed quatenus absolutorum accidentium existentiam inficiatur, fateri necessario debet Cl. Auctor, opinionem negantem accidentia absoluta, utpote, illius iudicio, minime diversam a secundam
Vi.

(a) Tom. XVI. Concil. colum. 346.

Viclefi propositione, esse *hæreticam*. Opinio autem negans *accidentia absoluta* ipsa Recentiorum sententia est. Ergo hæc opinio, iudicio P. Ferrari, est *hæretica*. Contrarium autem ille aperte docet. Ait enim in ipso quæstionis limine, *Recentiorum opinionem ut hæreticam damnari non posse* (a). Ergo vel seipsum corrigat, dum ait, *Patres Constantienses per damnationem secunda propositionis (Viclefi) declarasse, accidentia realia manere in sacramento altaris sine subiecto receptionis, ut putant Peripatetici*; vel candide fateatur, se nimia modestia peccasse, dum scripsit, *partem esse prudentis Peripatetici, optime animadvertere, Recentiorum opinionem ut hæreticam damnari non posse*; cum scribere debuisset, illam opinionem nedum damnari posse ut *hæreticam*, sed jam ut *hæreticam* a Constantiensis Concilii Patribus in Viclefo fuisse proscriptam.

Præterea, si prudentis Peripatetici est, ut ipse ait, optime animadvertere, *Recentiorum opinionem ut hæreticam damnari non posse*; ejusdem quoque erit, ipsiusmet P. Ferrari iudicio, ut spero, ingenue candideque fateri, eandem opinionem tamquam *falsam, erroneam, & sapientem hæresim* minime posse proscribi. Æque enim in Recentiorum ignominiam cedit, siue absolute *hæretica*, siue *falsa* dumtaxat, *erronea, & sapiens hæresim* illorum doctrina censeatur. Secunda autem Viclefi propositio in ea ejusdem censura, quæ *brevis* inscribitur, & ex qua Vir Cl. suum contra Recentiores argumentum desumit, *falsa, erronea, & sapiens hæresim* pronunciatur. Ergo vel dare ille debet, secundam Viclefi propositionem non fuisse proscriptam, quatenus *absolutorum accidentium* existentiam negat; vel fucum facit, dum *prudentis Peripatetici* esse ait, optime animadvertere, *Recentiorum opinionem ut hæreticam damnari non posse*; neque tantum ab se tribui rebus suis (b).

I I.

154. *Arguunt secundo ex Concilio Tridentino*. Expresse, inquiunt, definitum in illo est (c), totam panis, vinique substantiam converti in corpus, & sanguinem Christi Domini, & solas rerum illarum *species* in ipso sacramento remanere, anathemate in eos dicto, qui id negare auderent. Certo certius est autem, nomine *specierum* panis, & vini, quæ manere dicuntur, non aliud intelligi, nisi rerum illarum *sensibiles qualitates*; cum, præter *substantiam, & qualitates*, nihil aliud in re sensibili habeatur. Ergo ex Tridentino Concilio cer-

(a) Tom. II. P. I. *Physicæ* Disp. IV.
q. I. pag. 194.

(b) Loco citato.

(c) Sess. XIII. de *Eucharistia* can. 2.

certum est, *qualitates sensibiles* panis, & vini in Eucharistia remanere. Illæ autem remanere non possunt, nisi sint *entitates absolute*, five *accidentia* in sensu Scholastico. Ergo *absoluta* Scholasticorum *accidentia* necessario, si Tridentini Concilii doctrinæ stare velimus, sunt admittenda.

¶ *Re. permessa majori, distinguendo minorem*: certo certius est, nomine *specierum* panis, & vini non aliud intelligi a Scholasticis, nisi rerum illarum *qualitates*, quas dicunt esse *entitates absolute*, concedo *minorem*; certum est, eiusmodi *entitates* intellectas fuisse a Patribus Tridentinis nomine *specierum*, nego *minorem*, & *conseq.* Omissa ergo quæstione, an *specierum* nomine possint, vere proprieque loquendo, *sensibiles qualitates* rei, cuius illæ dicuntur *species*, a nobis intelligi, dico, Tridentinos Patres, nomine *specierum* panis, & vini, *absoluta* rerum illarum *accidentia* non intellexisse, vel saltem id definire noluisse. *Primo* siquidem rem penitus indubiam esse arbitror, nomen *specierum* panis, & vini, sub quibus Christus Dominus in Eucharistia existit, eodem plane sensu sumtum fuisse in Concilio Tridentino, quo in Lateranensi IV. anno 1215. sub Innocentio III. celebrato. Sicuti enim in Tridentino (a) *vere, realiter, ac substantialiter*, ita in Lateranensi (b) *veraciter*, dicitur, Christum Dominum *sub speciebus panis, & vini contineri*. Certum est autem, nomen *specierum* sumtum non fuisse in Concilio Lateranensi, quatenus significat illud ipsum, quod *absolutorum accidentium* nomine Scholastici designant. Ita namque si Lateranenses Patres sumissent vocabulum *specierum*, sique ea fuisset illorum mens, ut *species Eucharistica* hoc sensu ab omnibus sumerentur, id profecto neque S. Thomam, utpote qui illius Concilii decretalem eximio Commentario illustravit, neque Cardinalem Petrum de Alliaco, quippe qui, referente Launojo (c), ubique gentium *qua pius, qua scientissimus* prædicabatur, latuisset; & ideo neque ille ex uno sensum testimonio, quemadmodum ex illo uno ipsam probat (d), sed ineluctabili Lateranensis Concilii auctoritate, *accidentium* remanentiam in Eucharistia demonstrasset; neque dixisset Alliacus, *non esse ab Ecclesia determinatum, quod accidentia panis sint aliud ab eius substantia* (e). Igitur si non in Lateranensi, neque sane in Concilio Tridentino sumtum est vocabulum *specierum*, quatenus *absoluta* Scholasticorum *acciden-*

P P *tia*

(a) Sess. XIII. cap. I. de Eucharistia.

(b) De fide catholica cap. firmiter creditus.

(c) P. III. Hist. Gymnasii Parisiensis lib. I. cap. 4.

(d) P. III. q. 75. art. 5., & q. 77. art. 1.

(e) Super IV. Sententiarum q. 6. art. 3.

tia designat; vel saltem mens non fuit Tridentinorum Patrum, ut hoc sensu illud ab omnibus sumeretur.

Secundo: consideratione dignissimum est, *accidentis* vocem ne semel quidem in Tridentino Concilio fuisse usurpatam, quamvis Patres, atque Theologi, qui illi interfuere, in suis scriptis, & Scholis ea sæpissime uterentur; imo persuasum haberent, *qualitates sensibiles* corporum esse *accidentia absoluta*, atque ex hisce, in Eucharistia divinitus remanentibus, *sensibilitatem* eam provenire, sub qua Christus Dominus in hoc sacramento existit. Certum est enim, Tridentini Concilii Patres, atque Theologos, utpote doctissimos, non latuisse, *Eucharisticas* panis, vinique *species* aliter explicari a plerisque posse, quam per *accidentia absoluta*. Igitur vel persuasum illis fuit, id licere viro catholico sine ulla fidei suæ iactura, vel non. Si primum: vitio verti nequit Recentioribus, quod illas *species* per *absoluta accidentia* non explicent, contendantque, Tridentinos Patres nihil prorsus hoc super negotio determinare voluisse. Sin alterum: ergo peccarunt Patres ipsi, illud minime definiendo, quod in re tanti momenti definire debuerant. Ut enim habet S. Augustinus, *Ecclesia Dei, inter multam paleam, multaque zizania constituta, multa tolerat; & tamen, quæ sunt contra fidem, vel bonam vitam, non approbat, nec tacet, nec facit* (a), Unde Cl. Muratorius, *disimulare, inquit, Conciliis licet, quæ ad fidem non pertinent. At fidei repugnantia disimulare non licet. Neque Ecclesiam fugere potest, quid doctrina ab Apostolis, & Patribus tradita adversetur; & ab Ecclesiæ munere abhorret, sinere, hanc doctrinam, se audiente & disimulante, violari. Error enim (ut habetur 83. distin. cap. error) cui non resistitur, approbatur, nisi forte ejusmodi disimulatio inde oriatur, quod ad maturius examen controversia ipsa reservetur* (b). Vim huius conjecturæ optime vidit etiam Cl. P. Ferrari; unde candide fatetur, *Concilium Tridentinum abstinuisse ex industria a voce accidentis, ne (illius sunt verba) philosophicam Peripateticorum sententiam expresse definiret tamquam fidei catholicæ dogma* (c).

Vereor tamen, ut ingenue est ipse dicam, quod sentio, ne hæc tam sincera confessio in damnum cedat sui Cl. Auctoris. Si namque Concilium Tridentinum ex industria abstinuit a voce accidentis, *ne philosophicam Peripateticorum sententiam* (existentiam scilicet accidentium absolutorum) *expresse definiret tamquam fidei catholicæ dogma*, manifeste profecto sequitur primo, in nullo prorsus eorum Conciliorum, quæ Tri-

den-

(a) Epist. LV. n. 35, alias. CXIX. cap. 19.

(b) Lib. I. de moderamine ingeniorum cap. 13.

(c) Tom. II. P. I. *Physicæ* Dip. IV. q. 1. in solutione primæ objectionis, ad secundum pag. 210.

dentinum præcesserant, ac proinde neque in Constantiensi id fuisse determinatum. Nihil enim, quod in uno Conciliorum definitum est, potest in altero, quod postmodum celebratur, ex industria dissimulari, ne scilicet ansam hinc arripiant sectarii Concilium illud criminandi, quasi nempe in fide peccaverit. Hinc sequitur *secundo*, secundam illam Viclefi propositionem: *accidentia panis non manent in Eucharistia sine subiecto*, proscriptam non fuisse in Concilio Constantiensi, quatenus *absolutorum accidentium* existentiam negat, sive, ut pluribus suadere conatur laudatus Vir Cl., quatenus errorem continet *longe diversum ab errore primæ*; sed quatenus panis substantiam, que *accidentium* subiectum est, remanere connotat. Sequitur *tertio*, P. Ferrari non sibi constare, cum ait, *ex Venerabilium Conciliorum, Constantiensis, & Tridentini, suprema auctoritate, & definitionibus circa Sacrosanctum Eucharistia Sacramentum, adeo invicte colligi existentiam accidentium absolutorum in sensu Peripatetico, ut definitiones illæ cum Recentiorum placitis non satis apte cohereant* (a). Si namque Concilium Tridentinum *ex industria*, ut ille ait, *abstinuit a voce accidentis, ne Peripateticorum sententiam*, (de natura qualitatuum sensibilium) *tamquam dogma fidei definiret*, tam longe a vero est, ex illius definitionibus posse *invicte* colligi existentiam *accidentium absolutorum*, & Recentiorum placita cum illius Concilii definitionibus non satis apte coherere, ut hæc ne levissime quidem ex illis valeant suaderi. Non enim Tridentini Patres in iis definiendis, quæ circa venerabile Eucharistiæ sacramentum divina fide a nobis credenda sunt, *ex industria* abstinuissent sese ab *accidentis* vocabulo, si comperta res illis foret, quæ ad tantum Sacramentum pertinent, facta recta, rejectis *absolutis* Scholasticorum *accidentibus*, esse non posse. Demum si, ut ex doctissimo Muratorio alibi etiam diximus, *neque temeritas est, neque crimen perniciosum, id negare, quod a sacris Auctoribus affirmari, manifeste non constat* (b) temeritas sane non erit, neque perniciosum crimen, eam negare doctrinam, sententiamque respuere, quam Pastores Ecclesiæ, in generali Oecumenica Synodo congregati, affirmare ex industria noluerunt. Itaque, velit nolit, alterutrum fateri debet Cl. P. Ferrari, aut scilicet *neque falsam, neque temerariam, neque erroneam, neque hæreticam, neque sapientem hæresim* esse opinionem negantem *accidentia absoluta*; aut nimis incaute ab se fuisse scriptum, *Concilium Tridentinum abstinuisse ex industria a voce accidentis, ne philosophicam Peripateticorum sententiam expresse definiret*.

P p 2 Ter-

(a) Ibidem pag. 195.

(b) Lib. I. de moramine ingeniorum cap. 21.

Tertio: cum, ipsosmet etiam Scholasticos si audiamus, nequeant *accidentia absoluta* immediate a nobis percipi in corporibus, sed tantum mediate, scilicet, ut ipsi ajunt, per *species*, nimis profecto improprie, & valde obscure in re gravissima loquuti fuissent Patres Tridentini, si *absoluta accidentia* nomine *specierum* panis, & vini intellexissent; præsertim cum nullibi fideles monuerint de sensu, quo & sumta ab ipsis fuerit *specierum* vox, & vellent, ut illa ab omnibus in hac materia intelligeretur.

Dices, hujusce vocabuli obscuritatem ambiguitatemque non latuisse quidem Tridentini Concilii Patres; eos tamen maluisse, *specierum* potius, quam *accidentium* nomen adhibere, ut modo loquendi, quo S. S. Patres, agentes de hoc Sacramento, usi sunt, sese accommodarent.

Verum contra est. Nam non inficior, potuisse Tridentinos Patres, *specierum* potius, quam *accidentium* vocabulum in hoc Sacramento explicando adhibere, etiam si placet, ut modo loquendi a S. S. Patribus in hac materia usurpato sese accommodarent. Contendo solum, eos minime prætermittere debuisse, quominus monerent fideles de sensu, quo vellent, illud vocabulum ab omnibus sumi, si nempe sine piaculo nemini licere arbitrarentur, *Eucharisticas* panis, vini que *species* aliter, quam per *accidentia absoluta*, explicare. Quippe, ut etiam paulo antea diximus ex Decreto, *error, cui non resistitur, approbatur.*

Respondet P. Ferrari, *accidentia esse species substantiæ, & sensibilia dici, tum quia per sese percipi queunt; tum quia illorum substantia redditur sensibilis (a).*

Sed contra. Licet enim concedatur Cl. Adversario, *absoluta accidentia* posse *species* nuncupari; nostri tamen argumenti vis non idcirco infringitur. Quippe, cum *speciei* vocabulum tunc sit apprimè ambiguum, stat, quod contendimus, videlicet Tridentinos Patres vel palam facere, alicubi saltem, debuisse, *absoluta accidentia* ab se nomine *specierum* intelligi, & ab omnibus intelligi oportere, si persuasum illis fuisset, hunc intellectum ad fidem, & veritatem Eucharistiæ necessario pertinere; vel pro comperto eos habuisse, perinde omnino esse ad fidem de tanto Sacramento, quomodocunque illæ *species* a Theologis explicentur, dummodo tamen ratum omnibus fixumque sit, nihil prorsus substantiæ panis, & vini in Eucharistia remanere.

Opta-

(a) Tom. II. P. I. *Physicæ* Disp. IV. q. 1. in
solutione 8. *objectionis*, ad quartum, &
quintum pag. 217.

Optarem porro, nitide explicaret Vir Cl., quid intelligat, cum ait, *accidentia per sese percipi posse*. Vel enim *ly per sese* significat, illa posse a nobis percipi *immediate*, *seu independenter* ab iis *qualitatibus*, quas ipsi etiam Scholastici *species* appellant, vel *ly per sese* exprimit, *absoluta* dumtaxat *accidentia* *emittere* posse *species*, per quas deinde a nobis percipiantur. Si primum: non solum adversatur veritati, & communi etiam Scholasticorum doctrinæ, sed neque sibi tunc consentit. Res quippe sensibiles a nobis sentiri per *species*, quas illæ emittunt, communis Scholasticorum sententia est, & ex *Dioptrica*, & *Catoptrica*, loquendo de rebus, quæ visu percipiuntur, apertissime constat. Ipse quoque P. Ferrari pluribus in locis suæ Philosophiæ *species* hujusmodi non memorat tantum, sed etiam manifeste admittit. Sin alterum velit: negare non amplius potest Vir Cl., nomen *specierum* esse valde ambiguum, ac nonnisi improprie ad *absoluta accidentia* significanda assumi posse; neque a Patribus Tridentinis assumi potuisse, nisi de hac acceptione certos nos redderent, ne scilicet in errorem, vocabuli ambiguitate decepti, laberemur.

Postrema demum ratio, quæ me movet, ut putem, *speciei* nomen sumtum non fuisse a Patribus Tridentinis, quatenus *absolutum accidens* designat, ex eo desumitur, quod illi non *speciem*, sed *species* in Eucharistia remanere dixerint. Sequitur enim hinc, vel non adversari Tridentino Concilio, qui omnia *absoluta accidentia* rejiciunt; vel eos etiam illi refragari, qui solam *quantitatem* habent pro *accidente absoluto*, ex eaque una, mechanice modificata, *sensibiles* corporis *qualitates*, ut alibi innuimus (§. 53.), oriri putant. Cum enim, hac sententia admissa, non omnes panis, vinique *species*, sed una tantum, scilicet rerum illarum *quantitas*, sit *accidens absolutum*, quamvis Concilium Tridentinum non unam dumtaxat, sed plures manere dicat, videtur profecto, vel etiam hanc opinionem contrariam esse Concilio Tridentino, vel neque sententiam Recentiorum illi refragari. Nam qua ratione aliquæ *species*, quin Concilii auctoritati derogetur, non sunt *accidentia absoluta*; eadem prorsus ratione videtur, nullam penitus earundem *specierum*, salva quæ eidem Concilio debetur reverentia, pro *absoluto accidente* haberi posse.

Respondet P. Ferrari, *litem in voce constitui*, quod, inquit, *ridiculum est*. Sed & Concilium (pergit ille) ait, *manentibus speciebus panis, & vini*; unde si plurali utitur numero, plures appellat substantias prius existentes, quibus & plures numero *species* respondent. Ceterum, qui solam *quantitatem* ajunt permanere, hi distinctas numero *quantitates* ad-

mit-

mittunt; & cum fateantur, remanere species prius extantes, & doceant, accidentia esse sine subiecto, ideo sacrarum definitionum sententiam tenere videntur (a).

Sed contra arguitur; & primo mirandum est, ridiculum dici a Viro Cl., quod lis de nomine in hac controversia instituat. Ignorare quippe ille nequaquam debet, non aliam hic quaestionem haberi, nisi de voce, nempe de significatione vocabuli *specierum*, quo in hoc mysterio explicando usi sunt Patres Tridentini. Nescio itaque, an risu excipi debeant Recentiores, arbitantes, *specierum* vocabulum sumtum fuisse ab Tridentinis Patribus in vero proprioque sensu; num vero ii potius tanto honore digni sint, qui improprie illud sumtum volunt, putantque, ne tunc quidem licere, de voce litem institui, cum non de re, sed de sensu, quo vox aliqua intelligenda sit, & intellecta a Viris doctissimis fuerit, disceptatur.

Secundo: nulla prorsus ea ratio est, propter quam censet P. Ferrari, Tridentinos Patres, loquentes de *speciebus Eucharisticis*, pluralem numerum adhibuisse: videlicet hujus fuisse causam, quia plures extiterant substantiae, panis nimirum, & vini, quibus plures numero species respondent. Hac enim ratione admissa, causam reddat oportet Vir Cl., quamobrem iidem ipsi Patres dixerint aliquando (b), non sub speciebus panis, & vini, sed sub panis, & vini specie Christum Dominum in Eucharistia contineri. Fortene illorum sententia tunc fuit, unum dumtaxat numero accidens absolutum extitisse ante consecrationem in duplici subiecto, nimirum in pane, & vino, & post consecrationem sine subiecto remanere? Non ita certe de tantis Viris opinabitur, ut puto, P. Ferrari. Ergo non ideo Concilium Tridentinum, loquens de *speciebus Eucharisticis*, plurali numero utitur, quia plures fuerint substantiae, quibus plures numero species respondent.

Quod vero ad eos attinet, qui in Eucharistia solam quantitatem ajunt permanere, vellem ille ostenderet, quomodo sacrarum definitionum sententiam hi, ut ipse ait, tenere videantur. Nescio enim, quomodo haec opinio Concilio Constantiensi consona sit, si secunda Viclefi propositio: *accidentia panis, & vini non manent in Eucharistia sine subiecto*, proscripta in illo fuerit, non quia panis, vinique substantiam permanere connotat, ut arbitrantur Recentiores, & ipse negat; sed quia absolutorum accidentium existentiam inficiatur, adeo nimirum ut, quemadmodum ipse contendit, per damnationem illius secundae propositionis declaraverint Constantienses Patres, *accidentia realia*.

(a) Loco citato pag. 217. ad tertium.

(b) Sess. XIII. cap. 3. de Eucharistia.

lia manere in Sacramento altaris sine subiecto receptionis (a). Cum enim, qui solam quantitatem corporis habent pro accidente absoluto, dicant, omnes sensibiles ipsius corporis affectiones in illa vere & proprie recipi; dicant quoque iidem ipsi necesse est, qualitates corporum sensibiles, adeoque panis, vinique accidentia, sine subiecto in Eucharistia nequaquam existere. Respondebit Vir Cl., de substantiali tantum subiecto intelligendum esse Concilium, hoc est, proscriptam ab illo fuisse secundam Viclefi propositionem, quia affirmat, in Eucharistia manere subiectum non qualecunque, sed substantiale. Verum si in proscribenda secunda Viclefi propositione Concilii mens fuerit, non definitionem substantiæ panis, utpote in censura primæ propositionis jam definitam, sed remanentiam accidentium sine subiecto receptionis, ut ille contendit, determinare, me plane fugit, quomodo de solo subiecto substantiali intelligi illa definitio possit. Indefinite enim loquitur Concilium tam de accidentibus, quam de subiecto; utque docet Cl. P. Suarez, in locutionibus Conciliorum, quæ doctrinales sunt, indefinita æquivalet universali (b).

Si autem a me quærat Vir Cl., quidnam, reiectis absolutis accidentibus, intellexerint Patres Tridentini specierum nomine: dicam, non aliud, nisi externam panis sensibilitatem, sive apparentiam, quomodo-cunque demum illa explicetur. Id quippe definire noluerunt, tum quia persuasum ipsis erat, illud ad fidem non pertinere; tum ne cui Philosophorum sectæ (nec enim eos latebat, quantum in explicanda physica sensibilibus qualitatibus natura Philosophi discrepant) patrocinari viderentur. Hinc Cl. Auctor de re sacramentaria dico, inquit, hoc canone (nempe secundo Sess. XIII. Concilii Tridentini de Eucharistia) definiri I. totam panis, vinique substantiam converti in corpus, & sanguinem Christi. II. solas præcedentium elementorum species remanere. An vero absolutæ, & materiales sint entitates; an solæ apparentiæ panis, & vini, sensus nostros pari ac antehac modo afficientes, hoc, quoniam mere philosophicum, & ad dogma transubstantiationis minime pertinens, Tridentini Patres non attigerunt (c).

Hujus cautelæ in rebus fidei definiendis, cum aliquid in illis occurrat, de quo non convenit inter Philosophos, ex Ephesino Concilio præclarum exemplum habemus. Definitum in illo fuit contra Nestorium, unionem humanitatis cum Verbo factam fuisse in humana natura, non in illius persona; & ideo humanitatem sine propria

(a) Tom. II. P. I. Physicæ Disp. IV. q. 1.
pag. 198.

(c) Tom. I. lib. IV. q. 6. sect. I. cap. 4.
§. 2. in responsione ad instantiam 9.

(b) Disp. LVI. in 3. par. S. Thomæ sect. 1.

pria *personalitate* in Christo existere, hancque propterea *realiter* ab illa distingui. An vero *personalitas* creata *positivum* aliquid sit, ut plerique volunt, num vero *simplex negatio*, ut aliis placet, non determinaverunt Patres, quod compertum illis fuerit, controversiam hanc ad Philosophos pertinere, perindeque esse ad fidem de *dualitate naturæ*, & *unitate personæ* in Christo, quomocunque creata *personalitas* a Philosophis explicetur. Ita ergo factum puto etiam in Concilio Tridentino, cum de Eucharistia res fuit. Definierunt Tridentini Patres, quæ erant de necessitate fidei, nimirum I. corpus, & sanguinem Christi non ut in signo, & figura, sed vere, realiter, & substantialiter in Eucharistia contineri. II. veram & realem fieri conversionem totius substantiæ panis in corpus, & totius substantiæ vini in sanguinem, manentibus dumtaxat illarum rerum speciebus, sub quibus Christus in hoc sacramento existit. Quid vero physice sint illæ species, & quomodo maneant, non manente panis, vinique substantia, Scholasticorum disputationi reliquerunt, ratum fixumque habentes Viri illi doctissimi, divinam veritatem arbitrariis hominum opinionibus ad sui defensionem non indigere. Mihi proinde persuasum est, decipi eos omnes, qui putant, sententiam sive Peripateticorum, sive Recentiorum certo evidenterque posse ex Concilio Tridentino vel evinci, vel oppugnari.

Verum instat primo Cl. P. Ferrari. Vel enim, inquit, corpus Christi continetur sub speciebus, ut sensatis, vel sub speciebus, ut sensibilibus. Si primum dicant Recentiores: ergo corpus Christi sub titillationibus, motionibusque nostrorum sensuum continetur, atque sub ideis nostris: quod a fide prorsus alienum est, & veritatem nullatenus obtinet, dum Sacramentum in pixide clausum asservatur. Si secundum Recentiores affirmant: ergo corpus Christi dicitur contineri sub potentia causandi sensationes; quippe species, ut sensibiles, non aliud sunt, nisi id, quod potest movere sensus nostros, seu sensationes causare. Sed quaeso, quid est ista potentia, sub qua corpus Christi dicitur contineri, nisi vel intrinseca virtus Deitatis, vel potestas corporis Christi, aut vis movendi, vel motus ipse, aut decretum Dei? Igitur Christi corpus aut sub virtute continetur Deitatis, vel sub sibimet propria potestate, aut sub vi se movendi sibi propria, vel sub suo motu, vel denique sub decreto Dei. Porro nemo dicitur contineri sub seipso; Deitas autem & ipsa continetur sub speciebus, una cum Christi corpore. Non ergo sub Deitatis virtute, vel sub propria potestate, ac vi continetur tunc Christi corpus. At neque sub proprio motu, tum quod Christi corpus in Sacramento non operatur actiones loco motivas, ac naturales, tum quod

motus ille, qui proprius erat pani, nullatenus Christi corpori proprius est. Decretum vero Dei nequaquam sufficit, ut Concilii sententia subsistat, nec sub Dei decreto quidpiam vero, ac proprio sensu dicitur contineri (a).

Respondeo, & dico primo, Corpus Christi non contineri in Eucharistia sub speciebus, neque ut sensibilibus, neque ut sensatis, si contineri sub speciebus ita intelligatur, ut sit sensus, Corpus Christi esse in Eucharistia sub aliena entitate, ab eaque perinde comprehendendi, ac corpus humanum sub veste, qua tegitur & aqua in vase, quo undique continetur. Non alio siquidem sensu dicimus, Corpus Christi Domini contineri in Eucharistia sub speciebus panis, nisi quatenus Corpus illud sanctissimum ita in hoc Sacramento existit, ut a pane, qui ante consecrationem ibi habebatur, & post consecrationem non amplius ibi est, discerni sensuum ministerio, nullatenus a nobis possit. Non aliud certe significat, Christum apparuisse Magdalenæ sub specie hortulani, & discipulis euntibus in Emmaus sub specie peregrini; neque aliud Theologi intelligunt, cum, Christum quandoque visum fuisse, ajunt, in Eucharistia a quibusdam piis, sanctisque Viris sub speciebus pueri, vivæ carnis, aut sanguinis, nisi Christum ita sese illis tunc exhibuisse, perinde prorsus ac si ab hortulano, a peregrino, a puero, a viva carne, a sanguine reapse non distingueretur. Nullæ ergo sunt illæ loquutiones: sub titillationibus, sub motionibus sensuum, sub potentia causandi sensationes, sub virtute Deitatis, sub propria potestate, sub vi sese movendi, sub suo motu, & sub decreto Dei Corpus Domini, quatenus in Eucharistia existit, contineri, quæ prima facie absurdum præ se ferre, & molestiam incautis facile creare posse videntur. Nullæ, inquam, illæ sunt; quia loco particulæ sub, & verbi contineri, in quibus tota illarum vis consistit, adhiberi verissime potest verbum apparere. Unde miror, Cl. P. Ferrari, qui, ubi agebatur de sensu, quo sumtum fuerit a Concilio Tridentino vocabulum specierum, ridiculum censuit (b), litem in voce constituere, nunc in vocabulis sub, & contineri tantam vim spemque collocet, ut ex illis unis conetur ostendere, falsa omnino, commentitia, & absurda esse interpretamenta, quibus hætenus relata venerabilia Tridentini Concilii decreta a Recentioribus explicantur.

Dico secundo, divisionem specierum in sensibiles, & sensatas concedi non posse Viro Cl., nisi nitide exposuerit, quid nomine specierum sensibilibus, ut a sensatis distinguuntur, ipse intelligat. Si nam-

Q q

que

(a) Tom. II. P. I. Pssysce Disp. IV. q. 1.
pag. 206.

(b) Loco citato pag. 217. ad tertium.

que *sensibilium specierum* nomine significare velit *entitates* quasdam *absolutas*, quæ inhæreant substantiæ corporeæ, ipsamque reddant *formaliter* sensibilem, veniam dabit Cl. Auctor, si dixerim, tunc ab eo principium peti; neque moleste feret, si huiusmodi *species*, adeoque & quam assumit *specierum* divisionem, ipse negaverim. Velim quoque animadvertat, *species* panis, & vini, sub quibus Christus Dominus in Eucharistia contineri dicitur, non *species sensibiles*, sed *species rerum sensibilium* a Tridentino Concilio nuncupari.

Dico *tertio*, Corpus Christi Domini contineri sub titillationibus, motionibusque nostrorum sensuum idem non esse, ac illud contineri sub ideis nostris. Externorum quippe sensuum motiones non sunt ideæ, nisi lis fiat de nomine: quod, ipsomet teste P. Ferrari, est ridiculum. Dici etiam potest sine piaculo, Corpus Christi Domini sub titillationibus, motionibusque nostrorum sensuum in Eucharistia contineri. Ecclesia quippe nullibi contrarium definivit, & S. Thomas docuit, ut visum est (§. 114.), Christum apparuisse in hoc Sacramento sub *speciebus* carnis, sanguinis, & pueri, quatenus *in-ventium oculi* immutabantur *tali immutatione*, ac si *expresse viderent exterius carnem, vel sanguinem, vel puerum*: quod est, ut patet, sub titillationibus, motionibusque nostrorum sensuum contineri. Christum porro non existere sub titillationibus, & motionibus nostrorum sensuum, dum Sacramentum in pixide clausum asservatur, verissimum est, neque contrarium docent Recentiores. Sed quomodo etiam tunc Christus Dominus dici possit sub *speciebus* panis existere, siue sub illis, ut placet Cl. Adversario, contineri, suo loco explicavimus (§. 143.)

Instat secundo Vir Cl.: *species remanere, ut sensibiles, est remanere solummodo virtutem effectivam motionum*. Causa porro non est aliquid effectus, & effectum existere in sua causa, est effectum ipsum revera secundum se non existere. Ergo nihil omnino remanet, nisi corpus Christi cum sua virtute. Neque ex illius existentia possunt, absolute loquendo, existentes appellari *species*; alioquin absolute prolata hæc propositio: creatura fuit ab æterno, vera esset, quia ab æterno existebat Deus valens producere creaturam. Iam si res ita se habet, ite, o Recentiores, & hyemali tempore pulcherrima colligite poma, rosasque fragrantès! Remanent enim hæc omnia actualiter, & existunt; nam arbor actualiter manet, & rosetum, ac virtus effectrix (a)

R. neg. majorem. Non enim manere dicuntur a Recentioribus *species* panis in Eucharistia, quia solum manet, absolute loquendo,

(a) Loco citato pag. 206.

do, virtus effectiva motionum in sensoriis; sed quia habita ratione tum spatii, cui Corpus Christi realiter præsens in ea est, tum modi, quo in circumambientia externa corpora Christus ex illo loco reipsa operatur, corpus illud sanctissimum nullatenus a pane distinguitur (§. 129.). Quod si nulla tunc motio in sensoriis nostris fiat, ut contingit, dum Eucharistia in clausa pixide continetur, hoc non ideo est, quia nulla tunc in pixide sit actio propria panis, sed nuda tantum potentia operandi instar panis; verum quia pixidis latera impediunt, ne illa actio ad nos perveniat, quemadmodum, etiam positis *accidentibus absolutis*, ipsa eadem latera non sinunt, ut sensus nostri ab illis immutentur. Hinc nulla sunt, quæ, Recentiores deridendo, & forte non sine legentium stomacho, subiicit Vir Cl., de creatura possibili, de pomis, rosisque hyberno tempore, Recentiorum, quam hactenus exposuimus, admissa doctrina, ut ille ait, colligendis. Latissimum quippe discrimen est, tantum scilicet, ut mirandum videatur, Cl. Adversarium illud latuisse. Hyberno siquidem tempore nulla habetur actio rosarum, pomorumque productiva, sed mera tantum potentia; neque sufficit externorum impedimentorum remotio, ut illa corpora re habeantur, quemadmodum ex adverso sola sufficit clausæ pixidis referatio, ut Christus Dominus instar panis nobis in illa appareat.

Urget tertio, *neminem unquam Veterum docuisse, obiectum illud, circa quod res versatur, esse itidem illius subiectum, in quo sit. Alioquin enim rite dici posset, ideas nostras esse in Deo, & respicere Deum pro suo subiecto, in quo sint, quia nos ducunt in cognitionem Dei. Gratuita igitur omnino est, atque ad libitum prorsus effecta doctrina illa Recentiorum, qua dicunt, species ante consecrationem esse in pane, quia nos ducunt ad cognitionem panis; & e converso permanere species sine subiecto post consecrationem, quia non permanet panis, quem significant. A ratione igitur (concludit ille) aliena prorsus est illa indistincta acceptio obiecti circa quod, & subiecti in quo: quæ nec ab ullo unquam tradita fuit, nec aliis exemplis suaderi potest ac illustrari. Multo minus asseverare possunt Recentiores, hoc sensu loquutos fuisse Tridentinos Patres. Sed placet Recentioribus decreta fidei philosophicis metiri, & accommodare opinionibus suis; cum e contra ipsamet fidei decreta lex sint, & regula, per quam nostra assertiones dirigi debeant; cum verissimum sit celebre illud effatum: Applicandus est lapis amussi, non ad lapidem amussis (a).*

R., falsum esse, neminem Veterum docuisse, obiectum illud, cir-

Q q 2 ca

(a) Loco citato pag. 207. contra tertio.

ca quod res versatur, esse itidem illius subiectum, in quo sit. Id enim ii omnes docuerunt, docent & docere debent, quibus persuasum est, corpus organicum esse subiectum animæ, & ab anima cognosci posse. Si namque anima est in corpore, & circa illud potest ipsa cogitando versari, stat profecto, obiectum, circa quod res versatur, esse itidem subiectum, in quo ipsa recipitur. Neque hinc sequitur, ut ait P. Ferrari, tunc rite dici posse, ideas nostras esse in Deo, & respicere Deum pro suo subiecto, in quo sint, quia nos ducunt in cognitionem Dei. Neminem quippe fugit, posse aliquid esse subiectum, in quo res recipitur, & simul obiectum, circa quod illa versatur, quin sequatur propterea, nihil prorsus habere posse rationem obiecti circa quod, quin etiam subiecti in quo illud ipsum rationem habeat. Falsum est etiam, nihil eorum, quæ in alterius rei cognitionem nos ducunt, posse in ipsa re vere & proprie recipi. Constat enim, accidentia vere, & proprie in substantia existere, simulque esse medium, quo illa a nobis cognoscitur. Accidentia, inquit Aristoteles, magnam afferunt opem ad quid rei percipiendum. Nam cum per imaginationem de accidentibus aut omnibus, aut pluribus rationem reddere possumus, tum aliquid etiam de substantia dicere poterimus optime (a); cui consentiens Toletus ait: per accidentia, & effectus cognosci substantiam, fatentur omnes (b). Fallitur ergo P. Ferrari putans, a ratione alienam prorsus esse indistinctam acceptionem obiecti circa quod, & subiecti in quo; sicuti etiam, illam nec ab ullo unquam traditam fuisse, nec aliis exemplis suaderi posse, ac illustrari. Falsum quoque est, Recentiores docere, species ante consecrationem esse in pane, quia nos ducunt ad cognitionem panis. Docent quidem, panem dici posse subiectum specierum, sumto subiecto non pro eo, in quo forma recipitur, sed pro eo, quod species nobis repræsentant; sed nunquam dixere, species illas esse in pane, hoc est, in pane recipi. Ne cui porro imponat Vir Cl., dum ait, placere Recentioribus, decreta fidei philosophicis metiri, & accommodare opinionibus suis, moneo, dici quidem a Tridentinis Patribus, agentibus hac de re (c), species dumtaxat manere post consecrationem; sed nullibi ab illis tradi, manere species sine subiecto; unde necesse non est, ostendant Recentiores, subiectum sumtum fuisse a Patribus Tridentinis non pro eo, in quo forma recipitur, sed pro eo, quod per species nobis exhibetur, ut hinc scilicet cuique constet, humana ratione eos non metiri divinas res, neque opinionibus suis accommodare decreta fidei, quamvis persuadere sibi nequeant, veri-

tens

(a) Lib. I. de anima tex. II.

(b) Quæst. VI. in cap. I. lib. I. de anima

(c) Sess. XIII. can. 2. de Eucharistia

tem Eucharistia, nisi absoluta accidentia admittantur, defendi non posse (a)

Quæ demum opponit Vir Cl. desumpta tum ex ratione Sacramenti, quæ salva esse debet in Eucharistia, etiam dum clausa pixide continetur; tum ex notione conversionis; tum demum ex sacramentalium specierum fractione, earumque partibus, quæ a Patribus, & a Conciliis memorantur, suis respectivè locis soluta sunt, neque interest, cur ea repetamus.

Sunt postremo, qui putant, ab se evinci, Tridentinos Patres non meram apparentiam panis, sed absoluta Scholasticorum accidentia nomine specierum intellexisse, ex hoc quod dixerint, panis, vini-que species in Eucharistia non tantum manere, sed remanere. Hoc argumento usus est P. Picinardus. Remanere enim, inquit, non solum est aliquid adesse, sed aliquid, quod & antea erat, idem numero perdurare ac persistere. Sed apparitiones istæ accidentium, quæ ex parte obiecti in se vere & proprie accidentia non sint, licet de novo adessent in Eucharistia, non tamen essent aliquid, quod ante in pane fuisset, & idem numero in Eucharistia perduraret ac persisteret. Ergo de istis apparitionibus accidentium, quæ ex parte obiecti in se vere & proprie accidentia non essent, verificari nequeunt ea verba Concilii: REMANENTIBUS DUMTAXAT SPECIEBUS (b). Ita quoque P. Amort. Præmissa namque, ac veluti certo assumpto, Concilium Lateranense, & Tridentinum dixisse, remanere dumtaxat species panis, & vini, infert, species esse accidentia; cum sint id, quod remanet, & nihil dicatur remanere, quod prius non fuit (c). Ita demum etiam Cl. P. Ferrari. Postquam enim dixit, manere accidentia panis, ut subsistat conversionis notio, ex eo colligit, accidentia ista realia esse, ac prius fuisse in substantia panis, quia non dicitur manere, destructis aliis, nisi id, quod prius fuit (d).

Sed hoc argumentum ex Grammatica desumptum facile diluitur. In primis namque falsum est, Concilium Tridentinum dixisse species panis non manere in Eucharistia, sed remanere. Plures quippe, quotquot nempe habere potui, illius Concilii editiones consului. Sed in nulla legi, remanere species, sed tantum manere. Secundo, quia cum Concilium indefinite loquatur de speciebus, adeoque, ut Scholastici contendunt, de accidentibus, dicendum necessario est, etiam panis quantitatem, utpote quæ, perinde ac reliquæ sensibiles

cor-

(a) Auctor de re Sacramentaria Tom. I. lib. IV. q. 6. sect. 1. cap. 4. §. 2. in respon. 2. ad instantiam 6.

(b) De imputato Scholasticis studio effræni in Aristotelem cap. VII. § 2.

(c) Philos. Polling. P. IIJ. Physicæ Generalis. Sect. I. q. 1.

(d) Tom. II. P. I. Physicæ Disp. IV. q. I. pag. 202.

corporis *affectiones*, venit sub *specierum* nomine, in Eucharistia remanere; & ideo ipsam quoque, stando doctrinæ Concilii, esse *accidens absolutum*. Igitur vel nihil omnino hoc argumentum concludit, vel ii omnes adversantur Concilio Tridentino, qui realem distinctionem *quantitatis a substantia* cum Cl. Melchiore Cano, aliisque Viris doctissimis (§. 51.) aperte inficiantur. Postremo, quia non constat, Concilium Tridentinum, cum dixit, *manere dumtaxat species*, voluisse, non *apparenter* tantum, sed *vere & realiter* easdem numero *species*, quæ antea habebantur, etiam post consecrationem remanere. Nullus certe in toto illo Concilio locus est, ex quo id colligi possit. Et sane, cum ad dogma tam *præsentia realis*, quam *transubstantiationis* perinde sit omnino, sive *vere & realiter*, sive tantum *apparenter* eadem panis, vinique *species* in Eucharistia remaneant, non est profecto, cur illius Concilii Patres *realem* potius, quam *apparentem* earundem *specierum remanentiam* in eo dogmate definiendo non intellexerint tantum, verum etiam voluerint, ut ab omnibus intelligeretur.

III.

155. *Arguunt tertio* ex Concilio Colonienfi anno 1536., & Bituricensi anno 1584. celebrato. Hæc enim, ajunt, in Colonienfi habentur: *quid panis, vinique species aliud sunt post consecrationem, quam species sacramentales, & accidentia sine subjecto* (a)? In Bituricensi vero, inquirunt, feriri anathemate, & hæreticos censeri, qui negaverint, accidentia panis, & vini manere in Eucharistia sine subjecto. *Negantes* (illius sunt verba) *accidentia panis, & vini in sacramento Eucharistia sine substantia panis, & vini manere, anathemate feriantur, & hæretici censeantur* (b). Ergo absoluta Scholasticorum *accidentia* negari tuta fide non possunt.

R. neg. conseq. Ex neutro enim illorum Conciliorum id jure colligitur. Certe non ex primo. Nam illud Concilium non fuit œcumenicum, sed provinciale; neque illud ita confirmavit, approbavitque Summus Pontifex, ut definierit, quæcumque in eo vel determinata sunt, vel exposita, ad fidem pertinere. Præterea non definiendo, sed tantum explicando, & quidem non nisi obiter, ut patet, in eo dicitur, panis, vinique *species* esse *accidentia sine subjecto*. Certum est autem ex doctissimo Melchiore Cano, quæ in Conciliis, vel Pontificum decretis vel explicandi gratia inducuntur vel ut

objectio-

(a) P. VII. cap. 15.

(b) Tit. XXII. can. 3.

objectioni respondeatur, vel etiam obiter, & in transcurso præter institutum præcipuum, de quo erat potissimum controversia, ea non pertinere ad fidem, hoc est, non esse catholica fidei judicia (a). Notandum quoque, attentoque animo considerandum est, Colonienſis Concilii Patres non dixiſſe, *species panis, & vini eſſe accidentia absoluta*, neque ſine ſubiecto inhaſionis illas in hoc Sacramento exiſtere; ſed indefinite eas eſſe *accidentia ſine ſubiecto*. Hoc alterum autem non negant Recentiores, licet inſcientur primum. Fatentur enim, *species Eucharisticae eſſe accidens*, eaſque exiſtere in Euchariftia ſine ſubiecto, nempe ſine ſubſtantia panis, & vini, quam naturaliter repræſentant, & ſine qua viribus naturæ manere non poſſunt. Ergo &c.

Nihil quoque ſequitur ex Concilio Bituricenſi, quod Recentiorum opinioni officiatur. Illud quippe non damnatur, neque tamquam hæreticos ferit anathemate, qui *absoluta Scholæ accidentia* non admittunt; ſed qui panis, viniſque ſubſtantiam cum Lutheranis, ceteriſque ſectariis in hoc Sacramento manere arbitrantur. Perinde ſiquidem fuit, illius iudicio, negare in Euchariftia remanentiam *accidentium ſine ſubſtantia panis, & vini*, ac affirmare, ipſam panis, viniſque ſubſtantiam in ipſo Sacramento remanere.

Concedo propterea Cl. P. Ferrari, Concilium Bituricenſe *damnare* hoc canone *heresiſm Lutheranorum*; ſed nego, quod una ſimul inferat, nempe iſdem verbis *adſtrui ſententiam Peripateticam* (b) ſive exiſtentiam *accidentium abſolutorum*. Hæc enim ſi fuiſſet mens illius Concilii, non minus affirmantes manere in Euchariftia ſubſtantiam panis, quam negantes *accidentia absoluta*, percuffi eſſent *anathemate*, & tamquam *heretici* a nobis eſſent habendi: quod non dabit Cl. ille Auctor, tum ne eximiis iſis Theologis, qui, ut vidiſſimus, contrarium aſſerunt, tantam injuriam faciat; tum ne ſibi apertiffime contradicat; dixerat enim in ipſo quæſtionis limine, *Recentiorum opinionem ut hereticam damnari non poſſe* (c); ergo, eius iudicio, hæretici cenſendi non ſunt, neque anathemate a Bituricenſi Concilio percuffi fuere, imo nec percuti poſſunt, qui ſententiam Peripateticam non admittunt. Præterea cum dixerit idem Vir Cl. (d), *prudenter eſſe Peripatetici, optime animadvertere, Recentiorum opinionem ut hereticam damnari non poſſe*, dicat oportet, Bituricenſe Concilium vel non damnariſſe negantes *accidentia absoluta*; vel, eos proſcribendo, imprudenter egiffe. Itaque jurene, an injuria

(a) Lib. V. de locis Theol. cap. 5.

(b) Tom. II. P. I. Phyſicæ Diſp. IV. q. I.
pag. 208.

(c) Ibidem pag. 194.

(d) Ibidem.

iuria proruperit Vir Cl. in ea verba: *valeant species illæ intentionales, & nova Recentiorum commenta (a), aliorum esto iudicium.*

I V.

156. *Arguunt quarto ex Innocentio III.* Is enim quæsitus a Joanne Bellemenſi, primum Lugduni Archiepiſcopo, tum, infulis deſcriptis, Monaco Cisterciensi, utrum aqua, quæ calici miscetur, in Christi sanguinem una simul cum vino, vi consecrationis, convertatur, respondit, dici posse, *quod aqua non transit in sanguinem, sed remanet, prioris vini accidentibus circumfusa; idque, ait, ex eo convinci, quia si post calicis consecrationem aliud vinum mittatur in calicem, illud quidem non transit in sanguinem, nec sanguini commiscetur; sed accidentibus prioris vini commixtum, corpori, quod sub eis latet, undique circumfunditur, non madidans circumfufum; ipsa tamen accidentia vinum appositum videntur afficere; quia si aqua fuerit appoſita, vini saporem assumit. Unde concludit, tunc contingere, ut accidentia mutant subiectum, sicuti & subiectum contingit accidentia permutare (b).* Igitur Innocentius III. non solum pro comperta habuit existentiam accidentium absolutorum, sed illis præterea usus est ad plura explicanda, quæ ad Eucharistiam pertinent. Ergo absoluta Scholasticorum accidentia negari non possunt, quin Pontificiæ auctoritati refregemur.

R. concesso ante, & quod primo ex illo inferitur, scilicet Innocentium III. absoluta accidentia admisſiſſe, ita distinguo, quod secundo ex eodem principio colligitur: negari non possunt accidentia absoluta, quin refragemur Pontificiæ auctoritati in iis, in quibus Viro catholico illi refragari non licet, nego conſeq; quin refragemur Pontificiæ auctoritati in iis, in quibus licet sine piaculo ab illa recedere, concedo conſeq. Fateor itaque, Innocentium III. ſtetiſſe pro accidentibus absolutis, eorumque existentiam pro comperta habuiſſe. Simul tamen opinor, id non ſufficere, ne quis, tuta fide, & ſalva quæ Pontificiæ auctoritati jure debetur reverentia, ſentire contrarium poſſit. Ut enim ex Cl. Melchiore Cano paulo antea etiam diximus, *quæ in Conciliorum, vel Pontificum decretis vel explicandi gratia inducuntur, vel ut obiectiõni respondeatur, vel etiam obiter, & in tranſcurſu præter inſtitutum præcipuum, de quo erat potiſſimum con-*

tro-

(a) Loco citato pag. 208.

(b) Lib. III. *Decretalium* tit. XLI. de celeb. Miſſarum cap. cum Marthe.

troverfia, ea non pertinent ad fidem, hoc est, non sunt catholica fidei iudicia (a); sed tunc solum ea sunt huiusmodi, cum, ut ait Cl. Con-
tenfonus (b) sub interminatione anathematis, vel sub penis hæreticis in-
figendis credenda fidelibus proponuntur, addito etiam, oppositum Ec-
clesiæ regulis, Scripturæ, & sacre traditioni adversari. Hoc autem mo-
do non tradi ab Innocentio III. existentiam accidentium absolutorum;
sed de illis ipsum loqui, tantum explicandi gratia, obiter dumtaxat,
& in transcurso, præter institutum præcipuum, de quo erat potissimum con-
troverfia, non est, cur pluribus demonstrarem. Igitur nihil prorsus ex
laudatis Innocentii verbis inferri potest, propter quod, ob negata sci-
licet accidentia absoluta, iuste valeat Recentiorum fides in discrimen
a Scholasticis vocari.

Ad plenioram tamen huius argumenti solutionem non parum facit alia ejusdem Pontificis doctrina. Tradit ille, & quidem in eadem decretali, *aquam in vinum transire mixtam vino (c); elementum in*
elementa resolvere; ad compositionem humani corporis quatuor elementa concurrere, videlicet terram, aquam, aerem, & ignem; & ad vegetatio-
nem ejusdem corporis quatuor humores illis consimiles convenire, videli-
cet sanguinem, choleram, phlegma, & melancholiam (d). Jam vero ne
ipsi quidem Scholastici dicent, ut mihi persuadeo, dignum esse cen-
sura, qui negaverit, aquam vino mixtam in illud substantialiter
mutari; unum elementum in aliud posse converti; ad compositionem
humani corporis quatuor vulgo nota elementa pertinere, &
quatuor illis consimiles humores ad ejusdem vegetationem convenire.
Ergo etiam Recentiores possunt sine piaculo absoluta accidentia,
licet ab Innocentio III. admissa, inficiari.

Ceterum, quoniam ex Conciliorum, Summorumque Pontificum decretis potissimum argumentum desumunt Scholastici, quo sacram facere nituntur suam de *accidentibus absolutis* doctrinam, factu optimum censui, eas notas hic paucis subiicere, quibus ex laudato Cl. Melchiore Cano decreta ad fidem pertinentia ab iis, quæ ad illam nequaquam attinent, internoscuntur. Prima nota est: *si contrarium asserentes pro hæreticis judicentur.* Secunda: cum in hanc formam Synodus decreta præscribit: *si quis hoc, aut illud senserit, anathema sit.* Tertia: cum hac etiam utitur forma: *si quis contrarium docere, prædicare, vel pertinaciter asserere, seu etiam publice disputando defendere præsumpserit, eo ipso excommunicatus existat.* Postrema: *si quicquam*

R r

ex-

(a) Lib. V. de locis Theologicis cap. 5.

(c) Loco citato.

(b) Tom. I. Theol. mentis, & cordis lib.

(d) Ibidem cap. In quadam nostra.

II. Dissert. præamb. cap. 2. coroll. 1.

expresse & proprie a fidelibus firmiter credendum, aut tamquam dogma fidei catholica accipiendum dicatur, vel aliis similibus verbis aliquid esse Evangelio, doctrinae Apostolorum contrarium. Dicatur, inquit Vir doctissimus, non ex opinione, sed certo & firmo decreto (a). Nisi ergo demonstraverint Scholastici, uno, vel altero horum modorum tradi, nobisque ab Ecclesia proponi doctrinam de *accidentibus absolutis*, certissime sibi persuadeant, Recentiores perpetuo dicturos, eam esse non Ecclesiae, sed Scholae doctrinam.

V.

157. *Arguunt quinto ex Catechismo Romano.* Docet, inquiunt, Catechismus, *Eucharisticas species panis, & vini esse accidentia*, quæ supra omnem naturæ ordinem ipsa se nulla alia re nisi sustentant (b). Hujusmodi autem illæ esse nequeunt, nisi sint *accidentia absoluta*, ut est perspicuum. Ergo ex Catechismo *species Eucharisticae sunt accidentia absoluta*. Catechismi autem doctrina est doctrina Ecclesiae. Ergo *absoluta Scholasticorum accidentia* negari in Eucharistia non possunt, nisi una simul negetur Ecclesiae doctrina.

R. *neg. majorem.* Illud enim non docet Catechismus, sed tantum, posita opinione, tunc vulgo admissa, quod *sensibilitas panis in Eucharistia superstes ex remanentibus ejusdem panis accidentibus* proveniat, docet, quod, hac opinione posita, verissimum est, ipsa nimirum *accidentia sese, nulla alia re nisi, in hoc Sacramento sustentare*. Patet ex alia ejusdem Catechismi doctrina. Dixerat enim paulo antea, ex reali præsentia Christi Domini, & ex desitione substantiæ panis in hoc Sacramento tertium facile colligi, videlicet, *accidentia, quæ aut oculis cernuntur, aut aliis sensibus percipiuntur, sine ulla alia re subjecta esse, mira quadam atque inexplicabili ratione*. Ac panis quidem, & vini *accidentia omnia licet videre, quæ tamen nulli substantiæ inhaerent, sed per se ipsa constant; cum panis, & vini substantia in ipsum Domini corpus, & sanguinem ita mutetur, ut panis, & vini substantia omnino esse desinat* (c). Quis autem non videt, Catechismi Auctores ad *accidentium remanentiam in hoc Sacramento demonstrandam, frustra dixisse, ea oculis cerni, aut aliis sensibus percipi, nosque accidentia omnia panis, & vini videre, si non tantum realis Christi Domini præsentia, & desitio substantiæ panis, & vini,*
sed

(a) Lib. V. de locis Theol. cap. 5.

(b) P. II. de Sacrament. Eucharistiæ num. 45.

(c) Ibidem num. 26.

sed etiam *accidentium* remanentia ad fidem pertineret?

R. 2. concedendo argumentum principale, & *disting. min. subsumtam*: doctrina Catechismi est doctrina Ecclesiæ, adeo nimirum ut, nullo penitus discrimine posito, quidquid sive *directe*, sive *indirecte*, sive *absolute*, sive *incidenter* tradit Catechismus, sit Ecclesiæ doctrina, cui non liceat refragari, *neg. min.* Est doctrina Ecclesiæ, non tamen semper certa, sed quandoque tantum probabilis, & cui nobis licet non assentiri, *concedo min.*, & *nego consequ.* Observandum est igitur, non omnia, quæ in Catechismo traduntur, spectari debere tamquam doctrinam Ecclesiæ, adeo ut nemini licitum sit, contrarium sentire. I. etenim sunt sane plurimi, qui *physicam* Thomistarum *præmotionem* nedum non admittunt, sed negant apertissime, quamvis doceat Catechismus, *Deum universa, quæ moventur, aut aliquid agunt, intima virtute ad motum atque actionem ita impellere, ut quamvis causarum secundarum efficientiam non impediat, præveniat tamen* (a). II. Doctor Subtilis, ejusque Schola tenet, futuram fuisse Divini Verbi Incarnationem, etiam Adamo non peccante; & tamen, Catechismum si audiamus, *Deus ob eum finem hominem fieri voluit, ut nos homines filii Dei renasceremur* (b). III. Docet Catechismus, *formam consecrationis calicis* hisce verbis comprehendendi: *Hic est calix sanguinis mei, novi, & æterni testamenti, mysterium fidei, qui pro vobis, & pro multis effundetur in remissionem peccatorum* (c). Neque propterea id prohibet, quominus plerique tuta fide opinentur, priora tantum verba, scilicet: *Hic est calix sanguinis mei*, ad consecrationis *formam* necessario pertinere. IV. Loquens Catechismus de aqua, quæ vino miscenda in sacrificio est, docet, modicam infundi debere, idcirco quia, ut, quemadmodum nonnulli Ecclesiastici Scriptores, quibus ipse adhæret, olim opinabantur, *illa in vinum convertatur* (d). Sed nullam prorsus esse hanc rationem, licet a Catechismo adoptatam, omnibus ferme Theologis persuasum est (e). Hinc Cl. Tournely, *revera*, inquit, *juxta præscriptum Ecclesiæ ritum, paululum aquæ infundi debet, sed non propter rationem adductam, quæ sane nulla est, quidquid in contrarium affirmant tum Auctores Catechismi Romani, tum Editores Sacerdotalis Romani, tum S. Thomas, a quibus, salva quæ ipsis debetur reverentia, hic recedimus* (f). V. Docet Catechismus, *balsamum*

R r 2 ad

(a) P. I. de primo *Symboli* articulo n. 22.

(b) Ibidem de tertio articulo num. 6.

(c) P. II. de sacram. *Eucharistiæ* num. 21.

(d) Ibidem num. 17.

(e) Vide Iuenin *Comment. de Sacramentis*

Differt. IV. q. 2. artic. 4. §. 3., &c

Autorem operis *de re Sacramentaria*. Tom.

I. lib. IV. q. 2. cap. 3. §. 4. num. 3.

(f) Prælect. Theol. *de sacram. Eucharistiæ* q. IV. artic. 8.

ad materiam sacramenti Confirmationis pertinere. Quærenti siquidem, *quæ sit sacri hujus mysterii materia*, respondet, esse id, quod ex oleo, & balsamo, *solemni Episcopi consecratione, conficitur* (a). Neque videtur dubitandum, quominus de materia *essentia* Catechismus loquatur. Ait enim, *Ecclesiam, & Concilia id perpetuo docuisse; a S. Dionysio, & complurimis aliis gravissimis Patribus fuisse traditum, statutumque a Fabiano Pontefice, Apostolos chrismatis confectionem a Domino accepisse, nobisque reliquisse* (b). Sed quantum ab hac opinione de Confirmationis materia alieni sint Theologi plurimi, quantique faciant rationem, qua ad illam probandam utuntur Catechismi Auctores, ignorare nemo potest, qui Dogmaticam Theologiam vel a limine salutaverit. Unum memorasse sufficiat Theologum eximium, Auctorem scilicet sæpe laudatum *de re Sacramentaria*. Inquit ergo: *S. S. Patres Confirmationis materiam oleum simpliciter dicunt, nec balsamum meminerunt..... Insuper, si balsamum creditum a Majoribus fuerit de Sacramenti essentia esse, qui fieri potuit, ut priorum seculorum Patres olei quidem semper, nusquam vero balsami mentionem fecerint? De illo enim altum silent Justinus martyr, Tertullianus, Cyprianus, Basilus, Cyrillus Hierosolymitanus, Innocentius I., Augustinus, & alii* (c). Notum est etiam, maxime dubitari ab Eruditis, num vere S. Dionysii Areopagitæ sint opera, quæ sub illius nomine circumferuntur, quæque Catechismi Auctores veluti genuina habere videntur, & pro sua opinione in margine laudant. Demum, ut alia præteream, docet VI. Catechismus, *contritionem*, qua peccata deleantur, adeo *vehementem, acrem, & intensam esse oportere, ut doloris acerbitas cum scelerum magnitudine æquari conferrique possit* (d). At vero contrarium tenent quamplures Theologi, quos inter Cl. Tournely, a quo etiam dicitur, tantam non esse Romani Catechismi auctoritatem, *ut in rebus inter Theologos, salva fide, controversis necesse sit ad sententiam Auctorum illius accedere, propterea nimirum quia multa illi docent, quæ bene multis non probantur Theologis, v. g., aquam calicis Eucharistici prius converti in vinum, quam in sanguinem Christi; admixtionem balsami essentialem esse in sacramento Confirmationis, & alia hujusmodi non pauca, in quibus, salva quæ debetur Catechismo reverentia, ab Auctoribus illius recedunt Scholæ Magistri* (e). Quamvis ergo Scholasticis concedatur, *Eucharisticas species panis, & vini explicari a Catechismo per accidentia absoluta*, non propterea se-

qui-

(a) P. II. de sacra confirm. num. 7.

(b) Ibidem.

(c) Tom. I. lib. III. q. 3. cap. 3. §. 2. q. 3.

(d) P. II. de sacram. Penitentia n. 36.

(e) Prælect. Theol. de sacram. Penitentia q. IV. artic. 1. in solut. obiect. adversus secundam conclusionem.

quitur, horum *accidentium* existentiam pertinere ad fidem; sed tantum, quemadmodum ait P. Goudin de *physica præmotione* (a), ut *sanam doctrinam fidelibus ab Ecclesia in Catechismo proponi*: quod do libentissime. Absit enim, ut minus sanam ipse dicam doctrinam, cui aperte favit Ecclesia, quamque Viri plurimi pietate, & sapientia conspicui manifeste docuere.

Sed contra ita argumentatur P. Nicolaus Maria Gennaro: omnes Ecclesiæ, inquit, animarumque Rectores doctrinam de accidentibus, tamquam constantem, & perpetuam Ecclesiæ doctrinam, plebem docent; & Ecclesia nedum id dissimulando permittit, sed præcipiendo, ut patet ex Concilio Tridentino sess. XXIV. cap. 7. *hac doctrina, tamquam perpetua, & constanti ipsius Ecclesiæ, ut populi erudiantur, mandat*. Quod si hac non erit omnino indubitata, & certitudine fidei firma, erraret Ecclesia nedum dissimulando, sed etiam præcipiendo, ut eam tamquam constantem & perpetuam Ecclesiæ doctrinam (quod idem est, ac de fide credendum, ut apud omnes catholicos compertum est, & docet Canus lib. XII. cap. 5.) omnes Episcopi, & Parochi docere deberent, & Deus super hanc rem Eucharisticam, quæ plusquam Theologia speciem exhibet, errorem omnium Pastorum Ecclesiæ non aperiendo, populo Christiano in necessariis deesset. At, qui constanti & perpetuæ Ecclesiæ doctrinæ Pastoribus, ut idem concinant, & fideles instruant, demundata resistit, æque hæreticus erit, ac si sacris Literis, traditionibusque Apostolorum refragaretur, ut ex eodem Cano de locis lib. XII. citato. Ergo &c. (b).

R. & primo quidem dico, ea omnia esse verissima, firmissimoque assensu a nobis admittenda, quæ perpetuo constanterque Ecclesia docuit. Ut enim egregie, æque ac vere, habet S. Augustinus, quod universa tenet Ecclesia, nec Conciliis institutum, sed semper creditum est, nonnisi auctoritate Apostolica traditum rectissime creditur (c). Unde concedo Cl. P. Gennaro, qui constanti, & perpetuæ Ecclesiæ doctrinæ, Pastoribus, ut idem concinant, & fideles instruant, demandatæ resistit, æque hæreticum esse, ac si sacris Literis, traditionibusque Apostolorum refragaretur.

Dico secundo, perpetuam non fuisse, constantemque Ecclesiæ doctrinam, quod species Eucharisticæ panis, & vini sint accidentia absoluta. Horum quippe accidentium systema ignorarunt Patres, qui decem prioribus Ecclesiæ sæculis in Ecclesia florere, neque locum habuit in Scholis catholicis, nisi post sæculum Christi XI. (§. 146.).

Imo

(a) Disp. II. *Metaph.* q. 3. artic. 4. §. 2.

(b) Opuscul. dogm. *adversus atomos redivivas* cap. I. §. I.

(c) Lib. IV. de *Baptismo contra Donatistas* n. 31. alias c. 24.

Imo tantum abest, veteres Theologos explicasse *Eucharisticas species* per *accidentia absoluta*, ut, quemadmodum visum est suo loco (§. 118.), Abaelardum criminatus fuerit Walterius Abbas, tamquam violatæ fidei reum, ex eo quod diceret, Eucharistiam in illis *accidentibus* a nobis tractari, & frangi; & Abbaudus itidem Abbas dicere non sit veritus, *ineptum esse in Evangelio Christi de albedine, & rotunditate disputare*; seque *Dialecticis*, aut certe pueris talia permittere, quod facile quisque videat, *albedinem, seu rotunditatem ab ipso corpore, quod vel album, vel rotundum est, separari non posse*; neque opus esse *fideli in sua fide hac circuitione verborum*. Nunquam autem fore, ut ita scripsisset Abbaudus, si doctrina de *accidentibus absolutis* perpetua fuisset atque constans Ecclesiæ doctrina, adeo certum puto, ut nihil magis.

Dico tertio, falsum esse, omnes Ecclesiæ, animarumque Rectores doctrinam de accidentibus, tamquam constantem, & perpetuam Ecclesiæ doctrinam, plebem docere. Hanc certe doctrinam non tradidit fidelibus in eximia sua *Christianæ Doctrinæ* expositione, quam supra exhibuimus (§. 151.), doctissimus Præsul Jacobus Bossuet; neque puto, omnes Ecclesiæ, animarumque Rectores ignorare, doctrinam hanc nedum non approbari ab omnibus Theologis catholicis, sed a pluribus, ut visum est (§. 151.), etiam apertissime reiici.

Falsum est postremo, Tridentinum Concilium præcipere Sess. XXIV. cap. 7, ut hac doctrina, tamquam perpetua & constanti ipsius Ecclesiæ, populi erudiantur. Tam longe quippe a vero est, doctrinam hanc dici a Concilio Tridentino perpetuam, & constantem Ecclesiæ doctrinam, ut neque eo loci, nempe Sess. XXIV. cap. 7., nec alibi, quod invenire potuerim, illius vel levissimam, quemadmodum legenti patebit, mentionem faciat.

Urget tamen idem Vir Cl.: si non omnia, ergo aliqua, quæ ad plebis instructionem docet Catechismus, indubitata sunt, aut nulla. Hoc posterius hæreticum est. Si ergo aliqua; ergo ea, quæ ut constantem Ecclesiæ doctrinam proponit (a). Panis autem, vinique *accidentia ipsa se nulla alia re nisa in hoc Sacramento sustentare*, dicitur a Catechismo perpetua & constans catholica Ecclesiæ doctrina (b). Ergo absolutorum accidentium existentia nobis debet esse certissima.

R. plura, quæ docet Catechismus, esse verissima, atque ex his ea dubio procul, quæ perpetuo constanterque docuit Ecclesia, ut visum est paulo antea ex S. Augustino, & inter omnes Theologos ju-

re

(a) Loco citato.

(b) De sacramento *Eucharistiæ* num. 45.

re meritoque jam convenit. Verum an semper habendum certo sit pro doctrina Ecclesiæ, quod ut constantem Ecclesiæ doctrinam Catechismus proponit, mihi valde dubium est, ne plane falsum dicam. De materia namque sacramenti Confirmationis agens Catechismus, eam constare ait ex oleo, & balsamo, idque Ecclesiam, & Concilia perpetuo docuisse (a): quod tamen non esse verum, ex veterum Patrum silentio probat, ut supra diximus, Auctor de re sacramentaria. Si enim, inquit Vir Cl., balsamum creditum a Majoribus fuerit de Sacramenti essentia esse, qui fieri potuit, ut priorum seculorum Patres olei quidem semper, nusquam vero balsami mentionem fecerint? Itaque pro perpetua, & constanti doctrina Ecclesiæ non semper habendum est, quod perpetuam atque constantem Ecclesiæ doctrinam Catechismus appellat.

Sicuti porro certa omnino res est, Ecclesiam perpetuo & constanter docuisse, *Eucharisticas species* panis, & vini *sine aliqua re subiecta*, ut ait Catechismus, *in hoc Sacramento constare*, quod nempe semper constanterque creditum sit in Ecclesia, *Corpus Domini, & sanguinem vere in Sacramento esse*, ita ut amplius nulla subsit panis, & vini substantia; ita verum non esse puto, quod Catechismus veluti certum assumit, nempe *Eucharisticas* panis, vini *species esse accidentia absoluta* in sensu Scholastico. Hoc ergo, salva quæ Catechismo jure debetur reverentia, negamus; cum satis ostensum fuerit, opinionem hanc de physica illarum *specierum* natura latuisse veteres Patres, ac nonnisi post undecimum Christi sæculum in Scholis catholicis locum habuisse. Unde instantia Cl. P. Gennari nulla est, utpote falsis principiis tota innixa.

Liceat tamen contra hunc Virum Cl. ita argumentum conficere: vel negari possunt, tuta fide, *accidentia absoluta*, quamvis dicat Catechismus, Ecclesiam perpetuo constanterque illorum existentiam docuisse; vel sine piaculo ea negari non possunt. Si possunt: oleum certe atque operam perdit Vir Cl., dum illorum existentiam, Romani Catechismi auctoritate, suadere conatur. Si non possunt: ergo ii omnes Theologi digni sunt gravi censura, qui horum *accidentium* existentiam non admittunt; sicuti etiam qui negant, balsamum ad materiam sacramenti Confirmationis essentialiter pertinere, utpote doctrinam negantes, quam, perinde ac illam de *accidentibus*, vocat Catechismus perpetuam atque constantem catholicæ Ecclesiæ doctrinam.

Instant alii. Romanus Catechismus, utpote Tridentini Concilii jussu

(a) De sacramento Confirmationis num. 7.

jussu editus, tamquam illius interpres habendus est. *Eucharisticas* autem panis, & vini *species* explicat Catechismus per *accidentia absoluta*. Ergo videtur minime dubitandum, quominus eadem ipsa *accidentia* etiam Tridentini Patres *specierum* nomine intellexerint.

R. disting. majorem: Catechismus tamquam interpres Concilii Tridentini habendus est, adeo nempe, ut quæcunque ille tradit, haberi debeant veluti Tridentini Concilii doctrina, *nego majorem*; spectandus est Catechismus tamquam Tridentini Concilii interpres, quatenus plura ille diffuse explicat, quæ compendiose in Concilio traduntur, *concedo majorem*, & *permissa min.*, *nego conseq.* Cum enim plura, ut vidimus, doceat Catechismus, quæ non omnibus Theologis, salva fide, probantur, manifeste sequitur, non omnia, quæ Catechismus tradit, veluti Concilii doctrinam, nullo penitus facto discrimine, a nobis sumi atque spectari debere. Nonnulla profecto determinata habentur in Catechismo, a quibus tamen definiendis, certissime constat, Tridentinos Patres sese ex industria abstinuisse. Sic, ut unum memorem, docet Catechismus (a) Christum Dominum eam ipsam *formam* servasse in Eucharistiæ sacramento conficiendo, qua modo utitur Ecclesia, semperque usa est; cum tamen ex doctissimo Salmerono, qui Tridentino Concilio interfuit, habeamus, petiisse quidem nonnullos Theologos, *ut explicaretur forma, qua Christus confecit hoc sacramentum*; sed, *auditis hinc, & inde rationibus, nihil esse definiendum, prudenter Patres censuisse* (b).

V I.

158. *Arguunt sexto* ex Breviario Romano. Inquiunt enim: doctrina de *accidentibus absolutis* solemniter ab universa Ecclesia nedum admissa, sed approbata est. Hæc quippe in Officio Corporis Christi leguntur verba ex S. Thoma desumpta: *accidentia sine subjecto in eodem* (scilicet in Eucharistiæ Sacramento) *subsistunt, ut fides locum habeat*; utque recte habet P. Seraphinus Capponi a Poretta, *licet D. Thomas ad mandatum Papæ Urbani IV. totum illud Officium de Festo Corporis Christi composuerit, ut verissimum est; tamen quia idem Papa cum omnibus sequentibus, id acceptando, approbavit, ideo a tota Ecclesia esse dictum, verum reputatur illud quod ibi solemniter recitatur* (c). Ergo, sicuti hinc recte colligit P. Gennaro (d), sententia negans ac-

ci-

(a) De sacram. Eucharistiæ n. 19.

(b) Tom. IX. Tract. 13.

(c) In III. p. S. Thomæ q. 17. artic. 1.

in appendice.

(d) Opusc. Dogm. adversus atomos redivivas cap. I. §. 1.

eidentia absoluta communi Ecclesiæ sensui aperte contraria est, dignaque propterea, cui gravior nota inuratur.

R. concedendo, doctrinam de *accidentibus absolutis* expresse haberi in Breviario, eaque in festo Corporis Christi ab universa Ecclesia recitari. Verum nego, illam doctrinam ita propterea ab Ecclesia esse approbatam, ut a Viro catholico sine piaculo negari non possit. Arbitror enim cum doctissimo Melchiorre Cano, *sat non esse, ut Conciliorum, & Pontificum judicia firma esse credantur, in Divino Officio publice a tota etiam Ecclesia celebrari* (a). Sanctissimus quoque, æque ac Sapientissimus Pontifex Benedictus XIII. in ea, quam de reliquiis S. Bartholomæi Benevento vindicatis Dissertationem edidit, expresse docet, *Breviarium maxime quidem autoritatis esse in iis, quæ per se ad cultum Ecclesiasticum attinent; minoris tamen ponderis esse in privatis factis, aut gestis, quæ in vitis Sanctorum ex occasione referuntur, itaut efficax argumentum inde peti non possit, ubi præsertim antiquiora monumenta adversantur. Nec enim Ecclesia ipsa, quæ illis utitur, inconcussæ infallibilisque veritatis judicat, quacunque Breviariis sunt inserta; cum multoties pro variis temporibus, varia ex occasione, ea mutaverit, correxeritque. Testatur id Concilium Senonense de anno 1528, quod ut Breviaria, & Missalia emendarentur, decreto sanxit. Testatur Concilium Colonienſe de anno 1536, cui hoc idem decernere placuit; ac demum Concilium Rothomagenſe anni 1581. & Concilium Rhemenſe anni 1583 decernunt, ut quam diligentissime a falsis narrationibus Breviaria repurgentur. Quæ omnia argumenta sunt, non illico putanda esse ab omni aberratione historica libera Breviaria, sed magna plerumque spongia egere, licet in suum usum usurpet Ecclesia* (b). Sed neque Breviarium, quo ipsi in præſens utimur, nævis omnino caret, ut proinde necesse sit, in re, de qua agimus, plenam integramque fidem illi habeamus. In eo siquidem inter alia non omnibus probatur I. quod legitur in festo S. Damasi Papæ, ipsum scilicet jussisse primum, ut in fine cujusque psalmi diceretur *Gloria Patri, & Filio, & Spiritui Sancto*. Epistolam quippe S. Hieronymi ad Damasum (c), ex qua id sumtum est, *adulterinam, & plane commentitiam* vocat Eminentissimus Cardinalis Bona (d), *barbaram, imperitam, erroneam, in Apostolicam Sedem injuriosam, ideoque plane*

(a) Lib. V. de locis Theol. cap. 5.

(b) Artic. VII. Vide Launojum in Append. ad Dissertationem, & Disquisit. Guelfæiæ &c. de cura Ecclesiæ pro Sanctis, & Sanctorum reliquiis, ac sacris Officiis ab omni falsitate vindicandis. cap. 3.

(c) Tom. XI. Operum S. Hieronymi edit. Veron. pag. 278.

(d) De divina Psalmodia cap. XVI. §. 6.

plane fictam Vir doctissimus Christianus Lupus (a). Non probatur II., Cletum Pontificem ab Anacleto distingui. Non esse quippe a Cletto distinguendum Anacletum, sed duobus nominibus, ut ait Cl. Papebrochius, unum eundemque Pontificem designari, quem Irenaeus Anacletum, vetus Missale Gallicanum Ancletum, Eusebius, & Optatus Milevitanus Anacletum, Epiphanius, & Canon Missae Cletum nominant (b), tot tamque validis momentis evincit Cl. P. Natalis ab Alexandro (c), confirmatque Papebrochius laudatus (d), ut nullus plane dubitandi locus superesse videatur. Non probatur III., S. Dionysium Parisiensem eundem fieri cum Areopagita. Illos quippe fuisse diversos, invicte probat doctissimus Sirmondus (e), ostendens primo, Dionysium Parisiensem Dionysio Areopagita fuisse posteriorem. Secundo: illum in Galliam venisse, Decio Cesare. Tertio: veterem Ecclesiae Gallicanae traditionem duos Dionysios agnovisse. Quarto: transitum Dionysii Areopagita ab Episcopatu Atheniensi ad Parisiensem Gracis omnibus olim fuisse ignotum. Postremo: duos etiam Roma distinctos olim fuisse Dionysios, nec Areopagitam unquam illum, qui Parisiorum fuit Episcopus, appellatum. Launojus quoque pluribus demonstrat contra Germanum Milletum, legitima, & a capite derivata traditione constare, Dionysium Parisiensem ab Areopagita distingui (f), utriusque etiam Dionysii vita erudite ab illo conscripta (g). Petavius demum persuasum habet, imperante Decio, ejusque anno primo, vel secundo, Christi 250, hoc est, Decio, & Grato Coss., S. Saturninum Tolosa episcopatum iniisse, cum eoque missos esse Gratianum Turonorum, Dionysium Parisiensem episcopum; & hunc ibidem cum Rustico, & Eleutherio mortem pro Christo subisse (h). Quis autem non videt, Dionysium Parisiensem, si sub Decio martyrium subiit, esse non posse Areopagitam? Non probatur IV., S. S. Lazarum, Magdalenam, & Martham, una cum multis aliis Christianis, comprehensos a Judeis, in navim sine velo, ac remigio fuisse impositos, vastissimoque mari ad certum naufragium commisos; sed navim, Deo gubernante, salvis omnibus Massiliam, ut in Breviario legitur, appulisse. Hanc quippe historiam, ut plane commentitiam, reiciunt Launojus, Tillemontius, Morerius, alique non exterorum tantum, sed etiam Gallorum eruditissimi. Pecularem

(a) Tom. VI. Operum edit. Venetiis 1726. pag. 24. Vide Natalem ad Alexandro Tom. IV. Hist. Eccl. saeculi IV. c. 2.

(b) Propyl. ad acta S. S. mensis Maii in Anamefi de Cletto, & Anacleto.

(c) Tom. III. Hist. Eccl. Dissert. XIV. in Historiam saeculi I., & ibidem in Scholio.

(d) Loco citato.

(e) Dissert. in qua Dionysii Parisiensis, & Dionysii Areopagita discrimen ostenditur.

(f) Discuss. responsionis Germani Milleti ad Dissertationem de duobus Dionysis.

(g) Extat Tom. II. P. I. Operum edit. Coloniae Allobrogrum 1731.

(h) Ration. Temperum P. I. lib. V. c. 13.

culari quippe edita Differtatione, ostendit Launojus, a tempore Christi ad annum usque millesimum a Græcis universim, & Latinis traditum esse, Lazarum, Magdalenam, & Martham in Oriente obiisse: de Maximino Magdalena seu duce, seu comite, qui primus Aquensium Antistes fuerit, nulla usquam facta mentione (a): cujus profecto argumenti quantus in rebus ad historiam pertinentibus sit valor, Criticorum nemo ignorat, docente Baronio, contemnendum a nobis esse, quod a recentiore Auctore de rebus adeo antiquis sine alicujus vetustioris auctoritate profertur (b). Non probatur V., S. Marcellinum Papam in immani illa Diocletiani persecutione, nimio terrore perculsum, deorum simulacris thus adhibuisse; tum hujus peccati tantopere penituisse (sic legitur in Breviario) ut Sinuessam ad Concilium plurimorum Episcoporum venerit cilicio indutus, ubi lacrymis profusus scelus suum palam confessus est. Jam enim inter omnes modo convenit (c), commentitium esse hunc S. Marcellini lapsum; supposititium planeque fictitium Concilium Sinuessanum, in quo ille penituisse dicitur. Hoc certe tam grande facinus a Donatistis imputatum fuisse S. Marcellino, aperte testatur S. Augustinus. Hæc quippe habet S. Doctor contra Petilianum scribens: Marcellinus, & Presbyteri ejus Melchias, Marcellus, & Silvester traditionis codicum divinorum, & thurificationis crimine arguuntur; sed nunquid ideo etiam convincuntur, aut convicti aliqua documentorum firmitate monstrantur? Ipse sceleratos, & sacrilegos fuisse dicit. Ego innocentes fuisse respondeo. Quid laborem probare defensionem meam; cum ille nec tenuiter probare conatus sit accusationem suam? Si est ulla humanitas in rebus humanis, puto nos justius posse reprehendi, si ignotos homines, quos criminantur inimici, nec eorum crimen ulla testificatione demonstrant, nocentes potius, quam innocentes crediderimus (d). Hujusce quoque historiæ initia, & fundamenta contradictionibus tam manifestis implicata deprehenderunt Viri solertissimi Norisius, & Papebrochius, ut is dicere non dubitaverit, vehementer debere vacillare fidem ejus, qui illis nititur, opinionis, quantumvis antiquæ & inolite (e): ille vero scripserit, in hac historia tot

S f 2

men-

(a) Differt. de commentitio Lazari, & Maximini, Magdalene, & Marthæ in Provinciam appulsu. Vide ejusdem Disquisitionem disquisitionis adversus Guesnæum (extat Tom. II. P. I. Operum edit. laudatæ).

(b) Tom. I. Annalium.

(c) Videantur P. Natalis ab Alexandro Tom. III. Hist. Eccl. Differt. XX. in Hist. sæculi III., P. Antonius Pagius Tom. I. Critic. in annales Baronii ad annum 302.

n. 18., & seq., Acta Sanctorum ex Bollandino in Propyl. ad Acta Sanctorum mensis Maii Differt. XI. Card. Norisium P. I. Hist. Donatistarum cap. VII.

(d) Lib. de unico Baptismo contra Petilianum n. 27., alias cap. 16.

(e) Propyl. mensis Maii in vita S. Marcellini.

mendacia esse, quot verba (a). Audiendus non est autem P. Gennarus, dum nitens pro viribus argumentum, quod pro accidentibus absolutis ex Breviario ipse desumit, sustinere, ait, S. Marcellini lapsum ideo verum & moraliter omnino indubitatum esse, quia praviis jam tot (quas tamen ipse non recenset) exactissimis inquisitionibus, Marcellinum thus idolis cremasse, in Breviario indeletum perseverat (b). Ut enim observat P. Raynaudus, absolutorum accidentium acerrimus alioquin propugnator, perseverantia hujus de Marcellino narrationis in Breviario post Urbanum VIII., & alios quosdam anteriores Pontifices parum probat. Potuit enim expungi e Breviario ea narratio, sicut alia pleraque subinde sunt expuncta, & sicut e Martyrologio Romano, tempore Clementis VIII. correcto, erasa est ea narratio de Marcellino. Sed multa sinuntur & in tabulis, & in Breviario retineri, quæ Ecclesia non præstat esse indubitata, & posse diligentia posteriori corrigi, non diffitetur (c). Fallitur etiam idem Vir Cl., inquit (d), dubiam fuisse, S. Augustini tempore, historiam de lapsu S. Marcellini; tantumque Doctorem nonnisi per transfennam illi contradicere. Si ea namque historia tunc fuit dubia, undenam certa deinde facta est? Minus recte quoque dixisset S. Augustinus, incredibilem illam esse calumniam, & Petilianum nec tenuiter conatum fuisse probare accusationem suam. Demum, ut huic rei finem tandem imponam, non probatur VI. quod refert Breviarium in festo S. Silvestri de Constantini Imperatoris lepra atque baptismo. Constantinum quippe non Romæ, ut in illo legitur, sed Nicomediæ, & quidem nonnisi sub finem vitæ suæ, baptismum suscepisse, testantur, ne minima quidem curatæ lepræ facta mentione, Eusebius (e), Socrates (f), Sozomenus (g), Theodoretus Cyrensis Episcopus (h), S. Hieronymus (i), & S. Ambrosius (k), totque deinde, tamque validis momentis id confirmarunt P. Natalis ab Alexandro (l), & P. Daniel Papebrochius (m), ut Viri illi doctissimi Ord. S. Benedicti e Congregatione S. Mauri, qui Orationem S. Ambrosii de Theodosii obitu nuper notis illustrarunt, mirum sibi videri scripserint, adhuc extare, qui Constantinum a Silvestro baptizatum ex actis apocryphis obstinatius defendant; & eximius Card.

Bona

(a) P. I. *Historiæ Donatistarum* cap. 7.

(b) *Opusc. Dogm. adversus atomos redivivas* cap. I. §. I.

(c) *Syntag. de libris propr. memb.* 49.

(d) Loco citato.

(e) Lib. IV. *de Vita Constantini* cap. 61., & 62.

(f) Lib. I. cap. 39.

(g) Lib. II. cap. 34.

(h) Lib. I. *Hist. Eccl.* cap. 32.

(i) In *Chronico* ad annum ultimum Constantini.

(k) *Orat. habita in funere Theodosii.*

(l) Tom. IV. *Hist. Eccl.* Dissert. XXIII. in *Hist. sæculi IV.*

(m) *Propyl. ad acta Sanctorum mensis Maii* Dissert. XII.

Bona dixerit, lectiones Breviarii, quæ leguntur in festo S. Silvestri, sibi ob hanc causam esse *insupportabiles* (a). Hæc igitur cum ita sint, luculentissime ostensum manet, quod initio diximus ex Cl. Melchiorre Cano, *sat nempe non esse, ut Conciliorum, & Pontificum judicia firma esse credantur, in Divino Officio publice a tota etiam Ecclesia celebrari*; atque hinc nihil prorsus ex Breviario inferri posse, quod cogere jure valeat recentiores Philosophos, ut *absoluta Scholasticorum accidentia* admittant.

Dices, rem, de qua modo agimus, *juris esse, non facti*, hoc est, non ad historiam, sed ad doctrinam pertinere; & ideo contra illam non habere locum, quæ hætenus objecta sunt, historiarum monumenta.

Contra est tamen. Nam primo velim consideretur, quod legitur in Breviario de lapsu S. Marcellini, neminem scilicet eorum Episcoporum, qui Sinuessano Concilio intererant, ausum fuisse, Marcellinum condemnare, sed omnes ad illum conversos dixisse una voce: *Tuo te ore, non nostro judica; nam prima Sedes a nemine judicatur*. Id, inquam, velim animo attento consideretur. Licet enim, absolute loquendo, verissimum sit, Summum Pontificem nullius judicio subiaci; loquendo tamen de Pontifice in hæresim, adeoque & multo magis in idololatriam lapsus videtur a doctrina & praxi Ecclesiæ alienum, Pontificem deponi, & damnari non posse. Etenim, inquit doctissimus Bellarminus, *hereticum Papam posse judicari, expresse habetur can. Si Papa distin. 40, & apud Innocentium serm. 2. de consecrat. Pontific., & quod majus est, in VIII. Synodo act. 7. recitantur acta Concilii Romani sub Hadriano, & in iis continebatur, Honorium Papam jure videri anathematizatum, quia de hæresi fuerat convictus, ob quam solam causam licet minoribus judicare majores*. Ubi notandum est, quod etsi probabile sit, Honorium non fuisse hereticum, & Hadrianum II. Papam deceptum ex corruptis exemplaribus VI. Synodi, falso putasse, Honorium fuisse hereticum; tamen non possumus negare, quin Hadrianus cum Romano Concilio, imo & tota Synodus VIII. generalis senserit, in causa hæresis posse Romanum Pontificem judicari. Adde, quod esset miserrima conditio Ecclesiæ, si lupum manifeste grassantem pro pastore agnoscere cogeretur (b). Hinc Cl. Papebrochius, postquam dixit, se non posse animo comprehendere, qua ratione potuerint acta (Concilii Sinuessani)

(a) Ex epistola Claudii Castellani Can. Parisiensis anno 1684. ad Cl. Papebrochium data, quæ legitur in laudata ejusdem Papebrochii Dissertatione de Constantini lepra, & Baptismo n. 20.

(a) Lib. II. de Romano Pontifice cap. 30. Videatur Cl. Melchior Canus lib. VI. de locis Theol. cap. 8.

ni) in compilationibus Conciliorum absque debita censura tolerari (a), ego, inquit, Romana Ecclesia prerogativis additum potius aliquid, si possit, quam detractum velim, illa tamen, qua hic prætenditur: prima Sedes non judicari a quoquam, eo accepta sensu, quasi persona Pontificis, qua homo singularis est, nullius iudicio subjaceret, non modo falsa est, sed ab ipsamet Ecclesia positive rejecta in canone: Si Papa, distin. 40, sumto ex verbis S. Bonifacii Moguntini Archiepiscopi, & martyris, ubi statuitur, ut Papa judicetur a nemine, nisi fuerit a fide devius. Quis autem magis ab ea devius, quam idololatra (b)?

Secundo: sicuti in Officio Corporis Christi dicitur ex S. Thoma, accidentia panis, & vini sine subiecto in Eucharistia subsistere, ita in Officio, quod in Festo S. Thomæ Apostoli recitatur, dicitur ex S. Gregorio, fidem esse argumentum rerum earum, quæ apparere non possunt; idcirco quia, quæ apparent, fidem non habeant, sed agnitionem, ac proinde fidem simul cum scientia de eodem objecto haberi non posse. Id autem non prohibet, quominus Cl. P. Arriaga (c), alii-que Viri catholici, tuta fide, contrarium sentiant. Ergo etiam absoluta accidentia, tuta fide, negari possunt, tametsi illorum existentia in Officio Corporis Christi expresse memoretur.

Tertio: in Festo S. Hilarii legit Ecclesia ex eodem S. Doctore, nullum esse sal terre, & sal esse in se unum continens aqua, & ignis elementum. Primum autem aperte falsum est; cum plurimæ falis fodinæ, referente Varenio (d), in Polonia, in Transylvania, in Comitatu Tirolensi, in Hispania, in Asia minori, in Persiæ monte Kilissim, in locis prope mare Caspium, aliisque reperiantur. Alterum vero negant Philosophi plurimi, quin aliquis propterea eos dixerit, doctrinæ Ecclesiæ refragari. Ergo tamquam doctrinæ Ecclesiæ habenda non sunt, quæcunque in Breviario leguntur.

Quarto: ut egregie observat Cl. Didacus del Corro, non modo lectiones de Sanctis, sed etiam Patrum sermones, aut homilia, quæ quilibet diebus leguntur, eadem Romanorum Pontificum authoritate afficiuntur, quorum jussu in Breviariis sunt inserta, & decretis ab Ecclesia leguntur: quæ cum ita sint, querere licet, cum Patres in eodem Scripturæ exponendo textu contrariantur, diversisque eorum expositiones diebus leguntur, quamnam ex iis, iudicio Ecclesiæ, quoad veritatem probatam existimabimus? Dissentire inter se ambas expositiones supponimus. Probatam utramque ab Ecclesia asserimus. Ambas autem esse veras, affirmare

(a) In Propyl. ad acta SS. mensis Maii
Dissert. XI. num. 7.

(b) Ibidem num. 8.

(c) Disp. VI. de anima sect. 6.

(d) Lib. I. Geographiæ cap. 11.

firmare non possumus. Quod si aut utramque, aut nullam veram dicere ex probatione a Pontificibus conveniret, concludere necesse est, approbationes has hujus esse generis, quæ veritatem decernendam non respiciant (a).

Quinto: in Officio, quod in festo conceptionis B. V. Mariæ a toto Minorum Ordine solemniter recitatur, longe apertius conceptio ipsa vocatur immaculata, quam in Officio Corporis Christi accidentia dicantur sine subjecto in Eucharistia existere. Erroneam autem non dicet P. Gennaro sententiam negantem, B. V. Mariam sine originalis peccati labe fuisse conceptam. Ergo pari jure concedat ille ipse necesse est, neque opinioni neganti accidentia absoluta hanc, aliamve gravem notam juste deberi.

Dicit forte Vir Cl., causam esse discriminis, quia Officium immaculatae conceptionis Deiparæ Virginis ab uno tantum Minorum Ordine, non autem a tota Ecclesia, quemadmodum Officium Corporis Christi, recitatur.

Sed contra est. Nam primo Officium immaculatae conceptionis, quod ipsi in ejus festo recitamus, non minus a Summis Pontificibus approbatum est, ac sit ab illis approbatum Officium Corporis Christi. Secundo: quia licet Officium, in quo conceptio Virginis dicitur immaculata, non recitetur a tota Ecclesia; ab ea tamen tota festum conceptionis immaculatae solemniter celebratur. Postremo: quia non incidenter tantum, indirecte, ac veluti per accidens, ut de accidentibus absolutis in Officio Corporis Christi, sed directe, primario, & per se conceptio Virginis in Officio, quod ipsi recitamus, dicitur immaculata, eique plures favent Bullæ Summorum Pontificum; nulla vero, quod ego sciam, accidentibus absolutis. Igitur vel etiam sententia negans immaculatam conceptionem Virginis Deiparæ communi Ecclesiæ sensui contraria est; vel neque opinio negans accidentia absoluta communi sensui Ecclesiæ, ut contendit P. Gennaro, adversatur.

Accedit postremo auctoritas doctissimi Cardinalis Joannis a Turrecremata. Quærens enim Vir celeberrimus, an quæcunque opuscula SS. Patrum ab Ecclesia recepta, sint etiam ab Ecclesia approbata, negative respondet. Tripliciter enim, ait, potest aliquid dici receptum ab Ecclesia. Uno modo per approbationem, prohibendo, ne quis præsumat contrarium sentire. Hoc modo sunt ab Ecclesia recepta quatuor universalia Concilia..... Secundo modo etiam aliqua SS. Patrum opuscula recipit Ecclesia ad usum lectionis, sive ad expositionem Sacra Scriptura, sicut opus-

(a) Dissert. de argumento ex Breviario
cap. V, num. 41.

atque infusionis in corpus fuisse speciali Dei gratia, & privilegio, intuitu meritorum Jesu Christi ejus Filii, humani generis Redemptoris, a macula peccati originalis præservatam immunem (a), quamvis hanc piam sententiam recensere veritus ipse nequaquam sit (b) inter ea multa, quæ contra opiniones ab Eruditis receptas, ac moraliter certas in Historia Mystica Civitatis Dei a Ven. Maria de Agreda conscripta, ejus judicio, continentur (c). III. an erraverit, permittens, ut fideles possibilem credant, divina auxiliante gratia, amorem Dei purum, licet ipse amorem hunc possibilem esse neget, contendens, falsam esse vulgatam persuasionem existimantium, quod amor Dei perfectus excludat, aut omnino excludere possit desiderium propriæ beatitudinis (d). Scire itaque vellem a Cl. P. Amort, an Ecclesia, hæc permittens doceri & credi, erraverit. Si enim non erravit, ut eam non errasse certissimum est, eccur ait, fore, ut diu erraverit Ecclesia, & quidem in puncto satis notabili, si absoluta accidentia non darentur? Dabo etiam Cl. Auctori, Deum quotidie inspirare multa singulis fidelibus, & ideo iis etiam aliquando inspirare aliquid de articulis fidei, quos prævidet fore duces Ecclesiæ. Verum, quomodo id faveat accidentium absolutorum doctrinæ, hætenus non potui mente complecti. Si namque doctrina accidentium absolutorum ideo a Deo inspirata dicenda sit, adeoque vera, quia a Theologis tradita; videtur etiam opinio negans illa accidentia dici debere inspirata a Deo, proindeque vera, quia plures quoque Theologi eam modo expresse docent, aperteque propugnant. Dico tamen, quod etiam alibi ex Cl. Melchiorre Cano dictum fuit, idque velim, P. Amort alte sibi animo infigat, dumque calamus stringit, semper præ oculis habeat, Theologorum scilicet etiam multorum testimonium, si alii contra pugnant Viri docti, non plus valere ad faciendam fidem, quam vel ratio ipsorum, vel gravior etiam auctoritas comprobavit (e).

VII.

159. Arguunt postremo ex retractatione, quam anno 1676., mandante S. Romana Inquisitione, ut refert P. Syri (f), edere coactus fuit Andreas Pissini Lucensis. Hæc enim inter alia in ea leguntur: Io Andrea Pissini confesso &c. dico, che sebbene come Filosofo, seguitando

- (a) Bulla Alexandri VII. quæ incipit: Sollicitudo omnium Ecclesiar. &c. §. I.
 (b) P. II. de revelationibus &c. num. XIII. prop. 4.
 (c) Ibidem num. 4.

- (d) Idæa veri amoris prop. 2.
 (e) Lib. VIII. de locis Theol. cap. 4. concl. I.
 (f) In Logica de Predicamentis Syn- tagma IV. artic. 3.

do l'opinione degli Atomisti, parlando delli accidenti, o specie della SS. Eucaristia, ho dette alcune cose contrarie alle opinioni degli Aristotelici circa la natura degli accidenti, dicendo, che non sono entità distinte dalla sostanza, ma apparenze cagionate nei sensi del viso, e del tatto, ed il medesimo ho detto degli accidenti della SS. Eucaristia, e che sono come immagini de' sognanti, ed altre simili figure; però non ho inteso, ne intendo dire, che nella Eucaristia, oltre il Corpo, e Sangue di Cristo, non vi siano attualmente le specie, e li accidenti, sotto i quali, come insegnano i Sagri Concilj, si contengono i detti Corpo, e Sangue. Non ho inteso, ne intendo dire, che in essa Eucaristia non vi siano attualmente le due cose, come dice Innocenzo III. nel capo cum Marthæ, de celeb. Missarum, il Sacramento, cioè le specie sensibili, & res Sacramenti, che sono il Corpo, e Sangue di Cristo, perche tengo, e confesso, che vi siano attualmente. E sebbene in un mio esame ho detto, che quando non si vede, o non si tocca l'Eucaristia, allora vi è solamente il Corpo, e Sangue di Cristo, ma non vi è la cosa, che chiamasi Sacramento, perche allora non vi sono quelle apparenze, e commozioni nei sensi, che nascono, quando si vede, o si tocca, mi correggo, e ritratto, e confesso, che sempre nell'Eucaristia, o si veda, o non si veda, o si tocchi, o non si tocchi, come nella pisside, o altrove, sempre vi sono attualmente il Sacramento, ed il Corpo di Cristo. Jam vero si hoc, nemo non videt, absoluta Scholasticorum accidentia, tuta fide, negari non posse. Ergo &c.

R. primo, hoc argumentum nimis probare. Palinodiam enim cecinit Pissinus, non solum quia dixerat, che nella Eucaristia, oltre il Corpo, e Sangue di Cristo, non vi siano attualmente le specie, e li accidenti; verum etiam quia persuasum habebat, che in essa Eucaristia non vi siano attualmente le due cose, come dice Innocenzo III., il Sacramento, cioè le specie sensibili, & res Sacramenti, che sono il Corpo, e Sangue di Cristo. Ergo dicamus oportet, non eos tantum qui negant accidentia absoluta, verum etiam eos, qui rationem sacramenti, loquendo de Eucharistia, in panis, vinique speciebus positam esse inficiantur, suam debent opinionem revocare. Hoc autem non nisi temere dici potest; cum Theologi plurimi, iique gravissimi, negent, ipsas panis, & vini species esse id, quod in Eucharistia habet rationem sacramenti (§. 136.). Ergo neque Pissinus ideo palinodiam canere coactus fuit, quia absolutorum accidentium existentiam inficiaretur.

R. 2. Pissinum coactum fuisse sententiam suam de accidentium natura revocare, non quia Sacrum Inquisitionis Tribunal illam aperte

falsam, fideique dissonam judicaverit; sed quia, utpote novam, & omnium ferme Philosophorum, ac Theologorum opinioni tunc contrariam, illi vehementer suspecta videbatur. Et hinc est, eandem ipsam modo ab Ecclesia permitti, quod, accurato examine discussa, deprehensa fuerit posse cum fidei doctrina componi. Neque enim hic solus casus est, in quo doctrinam, antea suspectam, toleret Ecclesia, atque etiam aperte deinde permittat. *Ecclesia*, inquit doctissimus Muratorius, *enuntiationes easdem secundum varios sensus acceptas, nunc adprobavit, nunc improbat, & eadem omnino verba modo aversata est, modo amplexa, prout ipsi visa sunt sapere aut pravam, aut rectam doctrinam. Ita celebris illa thesis: Christus est unus e Trinitate, sive unus de Trinitate passus est, ab Hormisda Romano Pontifice, aliisque Catholicis rejecta primo fuit, quod ejus sensus ad Eutychianam heresim accedere crederetur, & ab ipsa significari, divinam naturam humanis doloribus, ac infirmitatibus fuisse obnoxiam. At subinde eandem thesim uti catholicam recepere Joannes II., & Vigilius Romani Pontifices, atque Oecumenica Synodus V., quum nempe in catholico sensu accepta fuit, & credita veram Ecclesie catholicæ sententiam sonare atque exprimere. In Synodo Antiochena vocem Homousion Episcopi complures proscripsere, in sensu Pauli Samosatani acceptam. Nicani vero Patres in sensu catholico consecrarunt. Ita & tempus fuit, quo varia circa Incarnationem sententiæ secundum varias illarum intelligentias male, aut bene sonabant. Quum Pelagii Literæ, ac Celestii Libellus de gratia Dei coram Zosimo, & Romana Synodo lectus fuisset, Libellus ille catholicus dictus est, uti scribit S. Augustinus lib. II. ad Bonifacium Papam cap. 7., ita ut Zosimus, pro fama utriusque heretici sollicitus, non sine aliqua indignatione ipsos purgavit apud Africanos Patres, inquit epist. 4. estne ullus locus, in quo Dei gratia, vel adjutorium prætermisum sit? Verum Pelagius nomine gratiæ non peculiare Dei donum anima infusum, sed legem, doctrinam, exempla Christi, aliaque externa adminicula intelligebat. De hoc sensu monitus Zosimus ab Africanis Patribus, approbator ante libros, eorumque Auctores anathemate feriit, ab Ecclesia ejecit (a). Omnium tamen maxime ad rem nostram facit, quod de Galilæano Mundi systemate observat Cl. P. Serry. Telluris motum circa Solem immobilem, ait ille, rationibus haud ita contemnendis ostendit, post Copernicanum, veteresque Pythagoricos, recentium Astronomorum bona pars, ac etiam fortasse melior. Non damnat modo, non proscribit Ecclesia: modo, inquam. Quamquam enim Galileus, hu-*

jusee

(a) Lib. I. de moderamine ingeniorum
cap. 20.

jusce systematis instaurator, illustrator, & vindex, haud ita propitium Romanum cælum initio statim invenerit; secutis tamen inde temporibus, atque hac ipsa ætate nostra Viri plerique pietate, ac religione præstantes; nonnulli etiam Purpura eminentes cum Galileo, cum Copernico sentire libere permittuntur; modo certum indubitatumque systema non dicant; sed commodam Astronomia usibus hypothesim faciant, ut ex decreto Sacrae Congregationis Sancti Officii anno millesimo sexcentesimo vigesimo perspectum est (a). Quod ergo respondet Cl. P. Serry pro Copernicano systemate de telluris motu, & Solis quiete, illud ipsum iis respondendum censeo, qui putant, aliisque persuadere nituntur, Recentiorum opinionem de physica sensibilibus qualitatibus natura ob palinodiam, quam canere Pissinus coactus est, neutiquam posse, salva religione admittri, neque tuta fide defendi. Ut enim Pissinus contendens, accidentia non esse entitates distincte dalla sostanza, ma apparenze cagionate ne i sensi del viso, e del tatto; ita Galilæus docens, Solem esse centrum Mundi, & immobilem, & terram non esse centrum, & moveri, retractare se debuit, quamque tuebatur opinionem, revocare. Et sicuti Galilæi retractatio non obstat, quominus, ut ait Cl. P. Serry; hac ipsa ætate nostra Viri plerique pietate, ac religione præstantes cum Galileo sentire libere permittantur, modo certum indubitatumque systema non dicant; ita retractatio Pissini impedimento esse nequit, quominus plures pii, doctique Viri persuasum habeant cum sæpius laudato Auctore præclari Operis de re Sacramentaria, meram esse Arabum Interpretum Aristotelis opinionem, nec fidei, nec rationis lumine roboratam, imo penitus, judicio multorum, contrariam, quod accidentia sint materiales entitates a subiecto realiter distinctæ; neque credant veritatem Eucharistiae, nisi absoluta accidentia admittantur, defendi non posse (b). Non est igitur, cur tanti fiat a Scholasticis Pissini retractatio, ut ex illa una compertum putent, non licere Viro catholico, cum de accidentibus agitur, Recentiorum hypothesim propugnare. Ceterum quam justè suspecta tunc fuerit Sacris fidei Inquisitoribus Pissini doctrina, luculenter evincunt non solum gravissima dictoria, quibus Scholasticam sententiam, ejusque fautores ille infectabatur; verum etiam falsa illa, erronea, & temeraria confectaria, quæ ex illa sua opinione ab eodem deducebantur. Conviciis enim prætermiſſis, quod ea recensere nec ferat caritas christiana, neque modestia sinat, inferebat ille ex rejectis absolutis accidentibus. I. che quando non si vede, o non si tocca l'Eucaristia, allora vi è solamente il corpo,

(a) Tom. I. Prælect. Theol. Disp. de
 Mundi opificio Prælect. I.

(b) Tom. I. lib. IV. q. 6. sect. 1. cap. 4. §. 2.
 in responsione ad instantiam 6.

e sangue di Cristo, ma non vi è la cosa, che chiamasi Sacramento; & ideo Eucharistiam in pixide clausa non esse sacramentum. II. che Dio nel farci comparire in quelle specie di pane, e di vino qualche cosa, che rappresenti il pane, e vino, c'inganna. III. che l'opinione, quale tiene, che le specie Eucharistiche sono accidenti, ed entità positive, sia empia; & si vellet, ab se probari posse dicebat, che è manifestamente eretica, ed espressamente dannata. Jam vero quid Conciliorum doctrinæ, ipsique proinde veritati magis contrarium, quam Eucharistiam non esse sacramentum, nisi cum tangitur reipsa, aut conspicitur? Quid magis temerarium, ne quid amplius dicam, quam doctrinam a præstantissimis Theologis traditam, & ab Ecclesia permissam, vocare impiam, manifeste hæreticam, & expresse damnatam? Quid demum magis impium, quam Deum veracissimum in sacramento veritatis aperte nos fallere? Merito ergo optimoque jure ad totam suam doctrinam retractandam coactus fuit Pissinus; iique itidem omnes justissime ab Ecclesia censorio stigmate configuntur, qui absoluta accidentia negare nesciunt, quin vel male explicent, quæ fidei sunt, vel sanam doctrinam risu excipiant, quique illi patrocinati sunt olim, & modo etiam patrocinantur, dictariis conviciisque dilacerent. Plane enim, ut nihil magis, a vero distat doctrina, quæ cum sancta Religione componi non potest; neque recedere nobis licet a sententiis summorum Theologorum, nisi manifesta nos ratio cogat urgeatque, nec nisi salva, quæ illis merito optimoque jure debetur, reverentia.

Contendit P. Ferrari, nisi Pissinus visus fuisset errare etiam in statuenda Atomistarum sententia, minime fore, ut Ecclesiastici Præsules eundem coegissent illam expresse retractare. Neque enim, inquit ille, Ecclesia jubet, prave sentientes omnia retractare, quæ dixerunt, quia veris quibusdam falsa admiscuerint, aut contrariam sententiam censura notaverint; sed censuram, & pravas opiniones tantummodo jubet revocandas (a).

Sed falso; ex hæcenus enim traditis liquido apparet, justum fuisse, ut ad revocandam Atomistarum sententiam compelleretur Pissinus, quamvis illa in se spectata nihil complecteretur, quod cum fidei dogmatibus conciliari nequiret. Satis enim fuit, ut illa opinio suspecta in Pissino sacris Judiciis videretur. Concedo, Ecclesiam non jubere, prave sentientes omnia retractare, quæ dixerunt, quia veris quibusdam falsa admiscuerint, aut contrariam sententiam censura notaverint. Plane tamen falsum puto, eam jubere, ut censura & pra-

va

(a) Loco citato in responsione ad objectionem octavam ad sextum pag. 217.

va opiniones tantummodo revocentur. Mea enim sententia est, constansque opinio, jubere Ecclesiam, & quidem rectissime, ut revocentur, non solum quæ aperte falsa sunt, hæretica, erronea, & temeraria; verum etiam quæ sunt vel *absolute*, vel *respectively* vehementer suspecta.

CONCLUSIO OPERIS.

160. Temere igitur non agunt recentiores Philosophi, dum negant, *sensibiles* corporum *qualitates* esse *accidentia absoluta*; neque iuste a Scholasticis reprehenduntur, atroque carbone notantur, quasi rei propterea sint dubiæ, aut etiam violatæ fidei. Temere illi non agunt; cum satis valida ipsis momenta non desint, quibus & Scholasticam oppugnent convellantque hypothesim, & Mechanicam, quam ipsi tradunt, veritati consonam esse, maxima sane probabilitate demonstrant. Injuste quoque in dubium vertitur illorum fides; cum eorum quoque opinione admissa, facta rectaque sint, quæcunque circa venerabile Eucharistiæ sacramentum sunt a nobis divina fide credenda; illi opinioni modo aperte favéant Theologi non pauci, iique doctissimi; neque constet, oppositum tenuisse veteres Ecclesiæ Patres, aut determinasse Concilia, vel nuper Ecclesiam decrevisse. Ceterum *quis hæc legit, ubi pariter certus est, pergat mecum; ubi pariter hæsitat, quærat mecum; ubi errorem suum cognoscit, redeat ad me; ubi meum, revocet me* (a). *Homines enim sumus; unde aliquid aliter sapere, quam res se habet, humana tentatio est. Nimis autem amando sententiam suam, vel invidendo melioribus diabolica præsumptio est. In nullo autem aliter sapere, quam res se habet, angelica perfectio* (b). Quæcunque porro dixi, Sanctæ Romanæ Ecclesiæ examini libentissime subiicio, paratus, si quid incaute mihi exciderit, quod minus catholicum sit, ejus judicio emendare. *Verbum illius summa mihi ratio est. Removeo argumenta, removeo disputationem. Sola mihi ad credulitatem sufficit persona dicentis. Non licet mihi de fide dicti ambigere; non licet deliberare* (c).

F I N I S.

(a) S. Augustinus lib. I. de Trinitate n. 5. (c) Cassianus lib. IV. de Incarnatione cap. 6. alias cap. 3.

(b) Idem Lib. II. de Baptismo contra Donatistas n. 6. alias cap. 5.

I N D E X

R E R U M E T V E R B O R U M .

A.

- A** Baelardus (Petrus) injuste a Walterio accusatus, quod non recte de Eucharistia sentiret. p. 210.
 Vindicatus a P. Natale ab Alexandro. *ibid.*
Accidens absolutum non est entitas extensa quoad se & impenetrabilis. p. 53.
 Non est natura sua *sensibile*. p. 59.
 Accidentia Eucharistica, si ponantur *absoluta*, quomodo sint *sensibilia*. *ibid.*
 Opinio de *accidentibus absolutis* ansam dare potest heterodoxis cavillandi dogma *transubstantiationis*. p. 187.
 Multum quoque minuit vim plurium argumentorum, quibus illud dogma probatur. p. 188. & seq.
Accidentium absolutorum existentia non est pervia sensibus in Eucharistia. p. 203.
 An sint admittenda in Eucharistia, ne miracula multiplicentur. p. 206.
 Non potest evinei illorum existentia testimonio veterum Patrum p. 240.
 Neque Theologorum. p. 265.
 Ab Arabibus Aristotelis Commentatoribus primum excogitata fuerunt. p. 244.
 Quo tempore in Scholis admitta. *ibid.*
Accidentia nequeunt dici *species* substantia. p. 250.
 Illa non intelligunt Patres, dum de *speciebus* loquuntur. *ibid.*
 Eadem distinguere a substantia, non est in Scriptura expressum, neque ab Ecclesia determinatum. p. 267.
 Horum distinctio a substantia est Arabum opinio, nec fidei, nec rationum lumine roborata. p. 272.
 Existentia *accidentium absolutorum* non est ab Ecclesia definita. p. 274.
 Falso nonnulli dixerunt, opinionem negantem *accidentia absoluta* esse hæreticam. p. 276.
 Hanc non proscripsit in Viclefo Concilium Constantiense. p. 277.
 Quo sensu Concilium Constantiense damnaverit secundam Viclefi propositionem. p. 278., & seq.
 Horum existentia non probatur ex Concilio Tridentino. p. 297., & seq.
 Neque ex Colonienfi. p. 310.
 Neque ex Bituricensi. p. 311.
 Neque ex Decretalibus. 312.
 Neque ex Cathéchismo. 314.
 Neque ex Breviario. 320.
 Neque ex retractatione Pissini. 330.
 Opinio negans *accidentia absoluta* olim Ecclesiae suspecta. 332.
 Qui admonent amice, docendi sunt; qui inimice insectantur, repellendi. 225.
 Alliacus (Petrus Cardinalis) totum ipse direxit negotium damnationis Viclefi, quæ in Concilio Constantiensi facta est. 282.
 Quo tempore scripserit super sententias Magistrum. *ibid.*
 Non revocavit, quæ ante Concilium Constantiense scripserat de *accidentibus*. 281.
 Album corpus reflectit totam, aut ferme totam lucem, quam excipit. 116.
Alba difficile, facile *nigra* incallescunt, & flammam concipiunt. *ibid.*
 Per quid *formaliter* corpus sit *album*. 124.
 Amort (P. Eusebius) impugnatur. p. 45.
 62. 309. 310. 328. 329. 330.
 Anacletus Papa non est diversus a Cleto. 322.
 Analogia inter Eucharistiam, & Incarnationem quo sensu vera. 264.
 Angelica perfectio est, in nullo aliter sapere, quam res se habet. 335.
 Annihilatio non est destructio totius compositi etiam quoad accidentia. 185.
 Apparitiones ex illusione sensuum quomodo fiant. 40.
 Apparitiones Christi sub speciebus hortulani, peregrini &c. quomodo factæ. 193.
 Negare hasce apparitiones fieri posse sine *accidentibus absolutis*, erroneum est. 194.
 Possunt durare longo tempore, licet factæ independenter ab *accidentibus absolutis*. 196.
 Non est de fide, aquam vino mixtam in illud converti. 313.
 Non est certum, Aristotelem admisisse *accidentia absoluta*. 243.
 Nimis obscure scripsit. 244.
 Ejus opera aliquando proscripta. *ibid.*
 Cor-

Corpora non fiunt *arida* per *accidens* *absolutum*. 88.
 Atomus quo sensu *infertilis*, & *figurata*. 146.
 Auctor cujusdam Dissertationis de *accidentibus* impugnatur. 196. 197.
Auditus organum in quo consistat. 9.
 Contemnendum est, quoad ab Auctore recentiore de rebus antiquis profertur sine alicujus vetustioris auctoritate. 303.

B.

Balsamum necessario non pertinet ad materiam Confirmationis. 316.
 Berengariana professio fidei. 209.
 Boucat (Antonius) impugnatur. p. 184. 185. 186. 213.
 Ex Breviario Romano nihil colligi potest, quod Recentioribus officiat. 320.
 Multa in illo sunt, quæ non omnibus Eruditis probantur. 321.
 Sæt non est, Conciliorum, & Pontificum judicia firma credantur, ea in Breviario recitari. *ibid.*
 Plura Concilia curarunt, ut Breviaria corrigerentur. *ibid.*

C.

Calor non est *accidens absolutum*. 78.
 Male definitur a Scholasticis. *ibid.*
Caloris effectus. 79.
 An proprium sit *caloris* disgregare heterogenea, & congregare homogenea, & quomodo id ille efficiat. 82. 83.
Calor consistit in effluvio. 135.
 Non est necesse, etiam *lumen* in effluvio positum sit, si *calor* in effluvio consistat. 138.
 Incertum est, an *calor* separari queat a *lumine*. *ibid.*
 Potest *calor* ex iisdem corpusculis oriri, ex quibus provenit *calor*, quin ubicunque percipitur *lumen*, etiam *calor* sentiatur. 139.
 Nihil prohibet, quominus ex aliis corpusculis *calor*, ex aliis *lumen* proveniat. 140.
 Quo sensu motus, in quo consistit *calor*, sit sensibilis. 142.
 Nihil potest esse turpius Physico, quam sine causa fieri aliquid dicere. 93.
 Catechismus Romanus multa continet,

quæ non omnibus probantur. 315.
 Non semper est doctrina Ecclesiæ, quam ut Ecclesiæ doctrinam Catechismus proponit. 319.
 Quo sensu sit interpres Concilii Tridentini. 320.
 Cerebrum obtusissimum, quo sensu sit verum. 13.
 In ferendis censuris maxima præcautio, ne opus est. 270.
 Chrysostomus (S. Joannes) laudatus. 262.
 Illius epistola ad Cæsarium Monachum apprimè dubia. *ibid.*
 Ex ea non evincitur existentia *accidentium absolutorum* in Eucharistia. 263.
Circumscriptive esse in loco quid sit. 226.
 Clæus Pontifex diversus non est ab Anacleto. 322.
 Colores non sunt *accidentia absoluta*. 70.
 Non immutant visum per *species* Scholasticas. 71.
 Per quid *formaliter* corpus appareat coloratum. 112.
 Colores *objectivi* a quonam Corporum temperamento dependeant. 114 115.
 Colores non mutantur, mutato *luminis* gradu. 118.
 Perinde ad eos est, quomodocunque lumen in corpus incidat. 119.
 Colores non ex omni refractione *luminis* proveniunt. 123.
 Colorum *mediorum* origo incerta est. 124.
 Color, prout in objecto, non dependet a *lumine*. 125.
 Quo sensu verum sit, corpora in tenebris posita *colore* destitui. 126.
 Conciliorum decreta quando ad fidem pertineant. 182.
 Concilii dissimulare non licet, quæ spectant ad fidem. 298.
 In locutionibus doctrinalibus Conciliorum *indefinita* æquivaler universali. 303.
 Summa cautela utuntur Concilia in definiendis rebus fidei. *ibid.*
 Exemplum hujus ex Ephesino contra Nestorium. *ibid.*
 In definitionibus Conciliorum distinguendæ sunt propositiones *principales* ab *incidentibus*. 280.
 Concilium Constantiense non damnavit in Viclefo negantes *accidentia absoluta*. 277.
 Quo sensu procriperit secundam propositionem Viclefi. 278., & seq.
 V
 Con-

Constantienſes Theologi arbitrati non ſunt,
errorem ſecundæ prop. Vicleſi diverſum
eſſe ab errore primæ. 292.

Concilium Tridentinum nomine *ſpecierum*
non intellexit *accidentia abſoluta*. 297.

Neque Lateranenſe IV. ibid.

Vox *accidentis* ne ſemel adhibuerunt Pa-
tres Tridentini. 298.

Quæ definiant can. 2. Seſſ. XIII. 303.

Quæ ſint definita circa Euchariftiam a
Concilio Tridentino. 304.

Concilium Sinueſſanum fictitium eſt. 323.

Conſiſtentia corporum in quo conſiſtat. 156.

Conſtantinus non Romæ, ſed Nicodemæ
baptiſmum ſuſcepit. 324.

Hujus hiſtoria, quæ legitur in Breviario
valde dubia. ibid.

Conſubſtantiatores hæretici. 286.

Corpora arida per quid humectentur. 152.

Corpus Chriſti quanto ſpatio fit præſens
in Euchariftia. 216.

Quid ſentiendum hac ſuper re a Viro ca-
tholico. 217.

Eſt in Euchariftia cum ſua quantitate. 220.

Non eſt in illa *circumſcriptive*. 226.

Neque *definitive*. ibid.

Sed *ſacramentaliter*. ibid.

Non eſt totum in ſingulis hoſtiæ parti-
bus ante diviſionem. 227.

Eſt in Euchariftia inſtar panis: licet or-
gana noſtrorum ſenſuum ab illo non
immutentur. 228.

In illa hoc modo eſt independenter ab
accidentibus abſolutis. 229.

Etiā in pixide clauſa exiſtit ſub ſenſi-
bilitate panis. ibid.

Nulla converſio naturalis dependet ab
accidentibus abſolutis. 178.

Non exigit, ut aliquid remaneat com-
mune utrique termino. ibid.

In Euchariftia fit converſio totius ſub-
ſtantię panis, & vini in corpus, & ſan-
guinem Chriſti. 176.

Corpus Chriſti quo ſenſu in Euchariftia
dicatur contineri ſub *ſpeciebus*. 305.

Non eſt ſub motionibus ſenſuum, pro-
prie loquendo. ibid.

Eſſe tamen ſub illis dici poteſt ſine pia-
culo. 306.

D.

Damaſus Papa non ſtatuit, ut in fine
cujusque pſalmi diceretur: *Gloria*
Patri &c. 321.

Epistoſta S. Hieronymi, in qua hæc in-
ſtitutio Damaſo tribuitur, falſa eſt. ibid.

Deceptio ſenſuum nulla in Euchariftia. 199.

Definitive eſſe in loco quid ſit. 226.

Densum quod nam dicatur. 92.

Densitas corporum non eſt *accidens abſo-
lutum*. ibidem.

Undenam phyſice proveniat. 164.

Frigore, & compreſſione corpus fit den-
ſum. ibid.

Ad Deum non eſt recurrendum, ut effe-
ctus naturales explicentur. 103.

Ad fidem non pertinent, quæ in Pontifi-
cum, & Conciliorum decretis indu-
cuntur explicandi gratia &c. 310.

Decretorum ad fidem pertinentium no-
tæ. 313.

Diabolica præſumptio eſt, nimis amare ſen-
tentiam luam. 335.

Diaphanum quodnam dicatur. 69.

Diaphaneitas non eſt *accidens abſolu-
tum*. ibid.

In quonam phyſice conſiſtat. 109.

Diaphanum corpus ex opacis corpusculis
conſtat. 110.

S. Dionyſius Pariſienſis eſt alius ab Areo-
pagita. 322.

Dionyſii Areopagitæ opera dubia. 316.

Dogma fidei non eſt, quidquid Juris Ca-
nonici volumine continetur. 235.

Quæ Eccleſia tradit, quandonam haben-
da ſint tamquam dogmata fidei. ibid.,
& pag. 313.

Durities corporum unde proveniat. 15.

E.

Ecclēſia multa tolerat; ſed quæ ſunt
contra fidem, vel bonam vitam, non
approbat, non tacet, nec facit. 298.

Firmiſſimo aſſenſu admittenda ſunt, quæ
perpetuo conſtanterque docuit Eccle-
ſia. 317.

Non ſemper docuit dari *accidentia*. 319.

Triplaciter poteſt aliqui dici receptam ab
Eccleſia. 327.

Plura recipit Eccleſia, quæ tamen tuta
fide

- fide negari possunt. 327.
 Sensus totius Ecclesiæ non est dari *accidentia absoluta*. 328.
 Ecclesia easdem enuntiationes modo reprobabat, modo approbat secundum diversos sensus. 332.
 Revocare jubet, non solum, quæ aperte falsa sunt, sed etiam quæ vehementer sunt sibi suspecta. 335.
 In effervescentia corporum cur augeatur calor, imminuto motu sensibili. 143.
 Error non est, quidquid Thomisticis, aut Scoticis pronunciatis adversatur. 174.
 In Eucharistia existit vere, realiter & substantialiter tum corpus, tum sanguis Christi. 175.
 Quo sensu verum sit, nos in Eucharistia videre eandem panis *albedinem* &c. 198.
 Nulla in ea sit sensuum deceptio. 199.
 Eucharistia est *sacramentum*, non solum cum sumitur a fidelibus, verum etiam cum clausa pixide continetur. 230.
 Quidnam sit, quod in illa habet rationem *sacramenti*. ibid.
 Non requirantur *accidentia absoluta*, ut Eucharistia sit *sacramentum*. ibid.
 Quomodo sit signum sensibile gratiæ. 232.
 Discrimen Eucharistiæ a reliquis *sacramentis*. ibid.
 Est vere sacramentum, etiam admissa hypothese Recentiorum. 238.
 Analogia inter Eucharistiam, & Incarnationem. 263.
 Incertum est, quibus verbis Christus Dominus Eucharistiam confecerit. 320.
 Id determinare noluerunt Patres Tridentini. ibid.
 Eusebii epistola ad Damasum Portuensem de morte S. Hieronymi commentitia est. 258.
 Hæc, sicuti & duæ de *magnificentis*, & *miraculis* S. Hieronymi sunt absurdissimæ, & falsissimæ. 260.
 Idem fuit harum omnium auctor. ibid.
 Non fuit Damasus Portuensis, qui illam ad Damasum scripserit. ibid.
 Ovidini conjecturæ, quibus id ille nititur suadere, nullæ sunt. ibid.
 Auctor illius epistolæ est posterior sæculo Christi XI. 261.
 Eutychiana hæresis quo tempore orta. 261.
 Exsiccatio corporum non fit per *accidens absolutum*. 88.
 Quomodo fiat ex Aristotele. 89.
 Extensum *quoad se*. 4.
 Quid requiratur, ut consurgat totum *extensum* quoad se. ibid.
 Extensum *quoad locum*. ibid.
Extensio est ratio, cur duo sint *impenetrabilia*. 49.
 An corpus privari possit *extensione locali*, retenta *entitativa*. 219.
 Hac de re dubitarunt Gassendus, & Maignan. 221.
 Sed non idcirco negandum videtur. 220.
 221.
- F.
- Q**uid faciendum, ne rei falsæ, vel non satis cognitæ assentiamur. 175.
 Ferrari (P. Joseph Antonius) impugnatur. 13. 15. 19. 21. 22. 24. 25. 26. 28. 29. 33. 36. 48. 49. 51. 54. 55. 56. 57. 58. 65. 67. 68. 72. 73. 75. 76. 77. 78. 80. 81. 83. 84. 85. 86. 87. 88. 89. 90. 91. 98. 99. 100. 101. 102. 103. 104. 105. 106. 107. 108. 111. 112. 113. 116. 117. 118. 119. 120. 121. 122. 123. 126. 128. 129. 130. 131. 132. 133. 138. 139. 140. 142. 144. 145. 146. 147. 149. 150. 151. 152. 158. 159. 160. 161. 162. 163. 167. 168. 169. 170. 171. 172. 173. 178. 179. 181. 183. 184. 225. 229. 238. 247. 249. 250. 257. 283. 284. 285. 286. 287. 288. 290. 292. 293. 294. 295. 296. 298. 299. 300. 301. 302. 303. 305. 306. 307. 308. 309. 310. 311. 334.
 Fides non est rerum earum, quæ sensibus apparent. 326.
 Non stat cum scientia. ibid.
Fluidum quodnam sit. 91.
Fluiditas non est *accidens absolutum*. ibid.
Fluidum per quid siccum. 153.
Fluiditas in quo consistat. 155.
 In omnibus *fluidis* an partes sibi mutuo adhæreant. 158.
Fluidissimum corpus quodnam sit. ibid.
Fractio realis in Eucharistia non est de fide. 206.
 Dari potest *fractio realis* in Eucharistia, licet nullum in ea sit *accidens absolutum*. 209.

Fractio apparens non officit dogmati præsentie realis. 208.
Frigas non est *accidens absolutum*. 85.
 Illius effectus. 87.
 Cur manus, dum per aquam frigidam circumfertur, sustinere *frigus* vix possit. 143.
Frigus in quonam physice consistat. 147.
Frigoris corpuscula per quid *formaliter* frigoris sensum inducant. 150.
 Id non efficiunt per *accidens absolutum*. 151.

G.

G Alilæanum Mundi systema modo ab Ecclesia toleratur. 332.
 Gentaro (P. Nicolaus Maria) impugnat. 317. 318. 324.

H.

AD recte de *hæresi* judicandum quid requiratur. 174.
 Hac in re merito ridentur nonnulli Scholastici. ibid.
 Negantes *accidentia absoluta* non sunt hæretici. 267.
 S. Hieronymo falso imputatur epistola ad Damasum, in qua ab hoc præceptum dicitur, ut psalmi doxologia terminarentur. 321.
 Humana tentatio est, aliter sapere, quam res se habet. 333.
 Humectatio corporum non fit per *accidens absolutum*. 88.
 Humectandi vis in liquoribus a quo proveniat. 152.
 Humecta corpora quomodo exsiccantur. 153.
 Humidum male cum *fluido* confunditur. 89.

I.

Ignis, & calor non differunt nisi secundum magis, & minus, Veterum iudicio. 136.
Impanatores hæretici qui sint. 286.
Impenetrabile quid sit. 4.
 Non debet confundi cum *duro*. ibid.
 Incarnatio Verbi futura, etiam non peccante Adamo. 315.
 Innocentius Papa III. admisit quidem *acci-*

dentia absoluta, sed non determinavit, ea ad fidem pertinere. 312.
 S. Irenæus quidnam intelligat nomine *rei cælestis*; & *terrenæ*, quibus ait constare Eucharistiam. 251.

L.

LAnfrancus Archiep. Cantuar. laudatus. 246.
 Non utitur doctrina *accidentium absolutorum*, dum Berengarium confutat. ibid. 297.
 SS. Lazari, Marthæ &c. appulsus in Provinciam apprimè dubius. 322.
Lumen five *lux secundaria* non est *accidens absolutum*. 65.
 Non radicitur in subiecto. ibid.
 In quonam physice consistat. 97.
 Est corpus. ibid.
 Quomodo penetrat corpora diaphana. 104.
 Quo sensu totum vitrum sit lucidum. 107.
 Cur papyri poros non pervadat. ibid.
 Incertum est, an possit esse sine omni calore. 138.
Lumen, & *calor* possunt esse ab iisdem corpusculis, quin ubicunque sentitur *calor*, etiam *lumen* appareat. 139.
 Nihil prohibet, quominus ex aliis corpusculis *calor*, ex aliis *lumen* proveniat. 140.
Lumen quomodo *calorem* excitet. 141.
Lumen Lunæ ineptum est ad comburenda corpora. 102.
Lux primaria non est *accidens absolutum*. 63.
 Quomodo excitetur in corporibus. ibid.
 Non dependet a motu partium tantum ut a conditione. 64.
 In quonam physice consistat. 95.
Lux est substantia ex Theodoro. 256.
 Etiam ex S. Augustino. ibid.
 S. Basilius non docuit, *lucem* esse *accidens physicum*. 253.
 Neque id docuit Nazianzenus. 256.
Lux pro formali non est *qualitas* ex Damasceno. 258.
 Ejus iudicio, non distinguitur ab igne. ibid.
Lux non est corpus, quatenus in corpore recipitur. 257.
 Lutherani dicere nequeunt, primam Viceles propositionem coincidere cum tertia. 289.

M.

- D**E magnis Viris caute judicandum. 3.
Magnitudo corporis quid sit. 9.
 Non est *accidens absolutum*. 41.
 Quomodo distinguatur a substantia. 42.
 Quo modo constituat prædicamentum diversum a prædicamento *substantiæ*. 44.
 S. Marcellini lapsus in idololatriam commentitius est. 323.
 Fuit illi imputatus a Donatistis. *ibid.*
 Hujus historia contradictionibus plena. *ibid.*
 Miracula non multiplicantur in Eucharistia sine necessitate. 205.
 Ad illa non est confugiendum, ut prima rerum creatio explicetur. 254.
Mollities corporum unde proveniat. 157.
 Motus rectus quomodo esse possit cum perturbato. 141.
Multitudo non est *accidens absolutum*. 41.

N.

- N**ervi quid sint. 6.
 Horum substantia. *ibid.*
 Horum fibræ primitivæ sunt ejusdem rationis. 19.
Nigrum corpus totam, aut ferme totam lucem absorbet. 116.
Nigra facile incalescunt, & flammam concipiunt. *ibid.*
Nigredo non est *color positivus*. 120.
 Maxime differt ab *albedine*. 121.
 Per quid corpus sit *nigrum*. 124.
Nigrum apparere potest corpus ob multiplicem causam. 121.
 Cur, aucto *lumine*, res magis nigra appareat. 122.

O.

- O**bjectum *circa quod* potest esse etiam subjectum *in quo*. 308.
Odores non spargit corpus, vitro hermetice clauso contentum. 74.
 Odor non est *accidens absolutum*. *ibid.*
Odores consistunt in effluvio. 132.
 Hoc effluviū est *sulphureo-mercuriale*. 133.
 Per quid excitet odoris sensum. 134.
Olfactus organum in quo consistat. 10.

- Opacum* quid sit. 69.
Opacitas non est *accidens absolutum*. *ibid.*
 In quo consistat. 109, 111.
 Organum sensus externi. 7.
 Ejus structura. 9.
 Ovdinus (Casimirus) impugnatur. 260.
 261.
 P.

- P**anis quo sensu sit *subjectum specierum*. 308.
 Papa hæreticus judicari potest ab Ecclesia. 325.
 Patrum communis sensus facit certam fidem dogmarum catholicorum. 240.
 Horum plurium auctoritas nequit esse firmum argumentum. *ibid.*
 Patres veteres fuere Platonici. 241.
 Quomodo loquantur de *sensibilitate* panis, quæ in Eucharistia superest. 245.
 Picinardus (P. Seraphinus) impugnatur. 207, 208, 235, 309.
 Fallo pro sua opinione laudat Card. Belarminum. 276.
 Pissini (Andreas) palinodia non officit Recentioribus. 331.
 Cur coactus fuerit revocare, quæ de *accidentibus* scripserat. *ibid.*
 Et quam iuste. 333.
 Plato non admisit *accidentia absoluta*. 241.
 Neque propterea ipsum criminatio sunt Patres veteres. 242.
 Summorum Pontificum decreta quando ad fidem spectent. 182.
 Omne corpus suos habet *poros*. 164.
 Præmotio physica non est de fide. 317.
 Præsentia realis Christi Domini in Eucharistia non dependet ab *accidentibus absolutis*. 176.
 Purchotius fallo accusatus a P. Ferrari. 283.

Q.

- Q**ualitatis *sensibilis* nomine quid intelligatur. 5.
 In quonam physice consistat. *ibid.* & 31.
Qualitatum sensibilium exiſtentia certissima est. 6.
 Non negatur a Recentioribus. *ibid.*
 Non proveniunt ex affectionibus mechanicis quantitatis. 50.
 Nulla *qualitas sensibilis* est entitas extensa, & impenetrabilis. *ibid.*

Nu.

Nulla est *accidens absolutum*. 63.
Qualitates spirituales an sint accidentia ab-
soluta. 94.
Qualitatum sensibilibum origo physica. ibid.
 Quid senserit S. Basilii de illarum distinctione a substantia. 255.
Quantitas. Vide magnitudinem.
 Quo sensu manere dicatur in Eucharistia. 47.
 Identitas *quantitatis cum substantia* vel non nocet Recenioribus, vel etiam Scholasticis officit. 48.
 Quæstio de voce non est ridicula, quando agitur de significatione vocabuli. 302.

R.

Rarum quodnam sit. 92.
 Raritas corporum non est *accidens absolutum*. ibid.
 Undenam physice proveniat. 164.
 Corpora calore rarefciunt. ibid.

S.

Sacramentum quid sit. 132.
 Non est de intrinseca illius ratione, ut vere in ipso sit, quod apparet. 232.
 Quomodo in Eucharistia aliud videatur, aliud intelligatur. 233.
 Quo sensu in Eucharistia locum habeant, quæ Innocentius III. in Sacramento distinguit. 234.
 An Christus Dominus etiam extra Eucharistiam sacramentaliter tradi possit. 237.
 Sacramentarii hæretici qui dicantur. 286.
 Sal terræ falso negatum a S. Hilario. 326.
 Sapor non est *accidens absolutum*. 71.
 Oritur a particulis salinis. 127.
 Hæ non excitant sensum saporis per *accidens absolutum*. 72.
 Sed per suam magnitudinem & figuram. 127.
 Corpus lapideum debet dentibus conteri, & saliva dilui, ut illius *sapor* sentiantur. ibid.
 Lingua nimis arida, vel nimio humore turgida *saporem* non percipit. ibid.
 Corpora calore fiunt lapidiora, frigore insipida. 128.
 Cur dissimilia corpora eundem *saporem* referant. 131.

An id sit universaliter verum. ibid.
 Saporum discrimen unde mechanice proveniat. 132.
 Scholasticorum ætas prima. 240, 245.
 Scholasticorum omnium communis sententia in re gravi nonnisi temere negari potest. 265.
 Scholasticorum non omnium, sed multorum auctoritas quanti facienda. ibid.
 Scholastici plures negant, *accidentia absoluta* pertinere ad fidem. 266., & seq.
 Scholastici nonnulli merito ridentur. 177.
 Sensatio nulla fit sine motu. 29.
 Debet passio externi sensorii ad cerebrum deferri, ut fiat sensatio. 29.
 Hæc communicatio non fit momento temporis. 25.
 Fit ope *spirituum*. 26.
 Quid menti sentienti in sensatione occurrat. 32.
 Res non sentitur per speciem. 35.
 In re non est, quod sentitur. 39.
 Quomodo judicandum ex sensibus. ibid.
 Quomodo per sensus videri possit nobis præsens, quod reapse præsens non est. 40.
 Sensibile quid sit. 4.
 Corpus per quid sensibile. 5.
 Sensibile est *tactile*, quo sensu verum. 15.
 Sensibile formaliter. 31.
 Per quid. ibid.
 Sensibilis qualitas in quo consistat. ibid.
 Sensibilitas panis in Eucharistia superflua non est mere extrinseca. 228.
 Sed aliquo modo intrinseca, & obiectiva. ibid.
 Nihil natura sua sensibile est *accidens absolutum*. 59.
 Sensorii passio in quo consistat. 10.
 Sensoriorum diversitas non est frustranea, licet omnis sensus tactu fiat. 18.
 Sensus externi organum. 7.
 Ejus compositio. 9.
 Sensuum quinarius numerus non corrumpitur, licet eorum omnium passio in motu consistat. 22.
 Sensuum testimonio utimur, etiam cum de substantia judicandum est. 203.
 Siccitas in quo consistat. 153.
 Cur in exsiccatione decreascit magnitudo & pondus corporis. 154.
 Cur exsiccatio calore perficiatur. ibid.
 Siccum perperam confunditur cum *solido*. 89.

Signum quid dicatur. 232.
Sinufiastæ hæretici. 264.
Solidum quid sit. 91.
Soliditas non est *accidens absolutum*. ibid.
Solidum cur ficcum. 153.
 Sub *propria specie* apparere quid sit. 7.
 Sub *aliena*. 8. & 40.
Species sensibiles non bene explicantur a Scholasticis. 12.
 Vel nullæ sunt, vel non differunt a motione sensorii. 31.
 Apparitiones Christi sub speciebus hortulani &c. factæ sunt per solam sensoriorum immutationem. 193.
 Negare, eas posse fieri independentem ab *accidentibus absolutis*, erroneum est. ibid.
 Possunt fieri pluribus simul, & diu durare independentem ab *accidentibus absolutis*. 196.
 Potest Christus Dominus esse in Eucharistia sub speciebus panis independentem ab *accidentibus absolutis*. 192.
Species Eucharistica quomodo corrumpantur. 213.
 Id nonnisi apparenter fieri, nonnulli docuerunt, sed non recte. 214.
 Quomodo ex illis vermes generentur. 215.
 Quomodo ex illis fiat nutritio. ibid.
Specierum nomine quid intellexerint Patres. 247.
Species necessario exigunt objectum, a quo producantur, ut *accidentia* subiectum, cui inhæreant. 249.
Species Eucharistica non *sensibiles*, sed *rerum sensibilibus* a Tridentino dicuntur. 306.
 Non manent, quia sola maneat virtus eas producendi. 304.
Species manere in Eucharistia *sine subiecto*, nullibi dixerunt Patres Tridentini. 308.
 Eas non *remanere*, sed tantum *manere*, iidem dixerunt. 300.
Spiritus animales quid sint. 6.
 Illorum existentia ferme ab omnibus admittitur. 7.
Substantiæ corporeæ ratio. 8.
 Habet partes ex se. ibid.
 Hæ possunt ex se constituere totum extensum. 41.
Substantia non habet *speciem* sui, proprie loquendo. 250.
 Cognoscitur per *accidentia*. 308.

T.

Tactus organum. 10.
Tactus duplici modo sumi potest. 14.
Temperamentum in corporibus duplex. 113.
 Theologi plures non faciunt argumentum certum. 265.
 Omnium consensus certum facit. ibid.
 Plures negant, doctrinam de *accidentibus absolutis* ad fidem pertinere. 266.
Transsubstantiatio quid sit. 176.
 Quot conditiones ad illam requirantur. 177.
 Ipsam dari, dogma est fidei. 176.
 Non dependet ab *accidentibus absolutis*. ibid.
 Quo sensu sit conversio mirabilis, & singularis. 183.
 Per quid differat a *creatione* &c. 184.
 Non recte definitur desitio substantiæ, manentibus *accidentibus*. 186.
 Probatur ex præsentia reali. 223.
 Neque id sectarii negare potuerunt. ibid.
 An evidenter colligatur ex S. Scriptura. 224.
 Quid de hoc argumento Scotus. 225.

V.

Veis (P. Uldaricus) impugnatur. 217. & seq.
 Veritas semper conjuncta est cum sacris Literis &c. 174.
 Non semper cum Philosophia. ibid.
 Non alia Theologorum, alia Philosophorum. ibid.
 Quo sensu sit verum, quod sensibus constanter apparet. 205.
 Viclefi doctrina etiam ante Concilium Concilium Constantiense damnata. 282.
 Illius ptopositio secunda cur dicta fuerit *sapiens hæresim*, prima vero absolute *hæretica*. 293.
Visus organum. 9.
 Vitrum cur dum in pulverem facessit, *diaphaneitatem* amittat. 159.

FINIS.

The first of these is the fact that the American Medical Association has been successful in securing the passage of the Federal Food and Drug Act, which gives the Federal Government the power to regulate the manufacture and sale of food and drugs. This is a very important step in the history of the American Medical Association, and it is one which has been long and hard fought for.

The second of these is the fact that the American Medical Association has been successful in securing the passage of the Federal Food and Drug Act, which gives the Federal Government the power to regulate the manufacture and sale of food and drugs. This is a very important step in the history of the American Medical Association, and it is one which has been long and hard fought for.

The third of these is the fact that the American Medical Association has been successful in securing the passage of the Federal Food and Drug Act, which gives the Federal Government the power to regulate the manufacture and sale of food and drugs. This is a very important step in the history of the American Medical Association, and it is one which has been long and hard fought for.

The fourth of these is the fact that the American Medical Association has been successful in securing the passage of the Federal Food and Drug Act, which gives the Federal Government the power to regulate the manufacture and sale of food and drugs. This is a very important step in the history of the American Medical Association, and it is one which has been long and hard fought for.

The fifth of these is the fact that the American Medical Association has been successful in securing the passage of the Federal Food and Drug Act, which gives the Federal Government the power to regulate the manufacture and sale of food and drugs. This is a very important step in the history of the American Medical Association, and it is one which has been long and hard fought for.

86(c)/260



UNIVERSIDAD DE SEVILLA



600707511













127337339

86

DISSERT
DE
QUALITAT
CORPOR

260

+ colorchecker classic



+ calibrite

mm